

L.O. 4. 31-

102



CORONA VITÆ

CONTINENS MEDITATIONES
DE VITA,
AC

Præcipuis perfectionibus
CHRISTI DOMINI,
ATQUE
DIVINÆ PARENTIS
IN SINGULOS DIES
Hebdomadæ, Mensis, Annique
totius digestas.

AUTHOR B
PETRO CONTESSINO
SOCIETATIS JESU.



BONONIÆ, M.DCCII.

Typis Constantini Pisarii ad S. Michaelē prope
Archigymnasium. Superiorum permissu.



EMINENTISSIMO,
ET REVERENDISS. DOM.

D. JACOBO


Tit. S. Mariæ in Via S.R.E.

PRESB. CARD.

BONCOMPAGNO

BONONIÆ ARCHIEP.

ET S.R.I. PRINCIPI.



Uoniam magnitudo animi, qua præstas,
EMINENTISSIME PRINCEPS,
major est omnibus Dignita-



2

ti-

ribus, & Coronis, quas tantum despicias, quantum alij quærunt: exhibere Tibi coronam in mentem venit, quam five Pietas, five Magnitudo tua despiciere nequit: immò quam Tibi unicè cordi esse, certissimè novi. Corona Vitæ est, præcipua Filii Dei, Divinæque Parentis decora complectens, ac gesta, in singulos Anni dies distributa, & partim quidem, & potissimùm in se; partim verò etiam considerata in virtutibus, rebusq; gestis Beatorum Civium, veluti repercussa luce referentium Luminare majus, & Luminare minus.

Regnum Decoris, & Diade-

dema speciei de manu solùm
illius accipitur, cujus in Capi-
te vidit Joannes Diademata
multa Apocal. 19. 12.; & ille
solum accipit, qui legitimè
certat : & nunquam desinit
audire dicentem : Tene quod
habes, ut nemo accipiat Co-
ronam tuam.

Non accipitur nunc ; sed
nunc incipitur : & ope Sapien-
tiæ elaboratur, nostrisq; Ca-
pitibus, velut adhuc informis
aptatur, cōtemplantibus no-
bis non quæ videntur, sed quæ
non videntur : donec illa ea-
dem, aliquandò tandem re-
motis enigmatum umbris, in
Civitate Domini Virtutum,
sicut audivimus, videamus.

Qua Te familiaritate, Præ-
sul Amplissime, studium O-
rationis Deo conjungat, te-
stantur illa, quæ facis. Quis
enim Pastorum tanta cum
solicitudine, vigilantia, to-
lerantia laborum, constantia
in duris, patientia in adversis,
mansuetudine in omnes, &
Charitate, quemadmodum
Tu, Gregi suo præsto esse po-
test, nisi Deus fuerit cum eo,
& in eo: & ille vicissim ex
Consortio Domini lucens, &
ardens, non didicerit perpe-
tuò esse cum Deo, & in Deo?
Hoc unum præ cæteris,
quibus emines, ornamentis
impulit, ut meum hoc, qua-
lecumq; illud sit, opusculum
nun-

nuncuparem Principi genus
suum in omnibus redolenti,
& majorum suorum, ab ipso
Patre Sanctissimo Gregorio
XIII. erga Societatem uni-
versam merita renovanti, &
renovaturo.

Noli tenuem hanc grati
animi tuorum Beneficiorum
memoris testificationem cō-
temnere. Quod in exiguo
munusculo meum est, nihil
est, nihiliq; planè ducendum.
Quod aliundè accedit, & me-
um non est, muneris vilita-
tem abundè compésat. Quod
enim aliundè est, via est, qua
itur ad Regnum. Ipsius Re-
gni, & Vitæ Corona est. De-
niq; Ipsa Vita est. Majus, &



melius offerre non possum.
Igitur diutissimè vive , & Ec-
clesiæ universæ, donec innu-
meris, de morte ad vitam la-
bore tuo, cura, Divinæ Glo-
riæ zelo translatis, accipias
Coronam Vitæ de manu il-
lius, qui solus Tua, & om-
nium Via, & Veritas, & Vita
est.

Humillimus, & addictissimus
EMINEN. TUE Servus
Petrus Contessinus.

AD LECTOREM BENEVOLUM.

PRÆFATIO.

De Titulo , Fine , & Ufu
præsentis Opusculi.

Quoniam Capitis orna-
mentum Corona est ,
placuit collectionem è
selectis considerationi-
bus de Christo Domi-
no , illiusq; Matre Sanctissima Coronam
dicere , quia nihil magis illuminat , &
exornat Intellectus, si ve Capita Animo-
rum nostrorum , quam Veritates , quæ
vel tamquam Flores Immortalitatis in
Coronam immarcescibilem colligan-
tur; vel tamquam Lapidès pretiosi Au-
ro Sapientiæ in orbem ducto inseruntur;
vel tamquam sidera Coronæ cuspidibus
insidentia funguntur munere oculorum,
non solum decus redimitis frontibus af-
ferentium , sed tutamen . Excubant
enim adversus omnia machinamenta
hostium , securosque nos præstant à ti-
moribus nocturnis , à sagitta volante in

die, à negotio perambulante in tenebris;
ab incurſu, & dēmonio meridiano.
Pſalm. 90. 6.

Non ſolum igitur complexio ejuſmo-
di Veritatum Corona, ſed Vitæ Corona
eſt. Illius enim beneficio & vivimus,
& vivemus. Vivimus nunc, quia ſi
omnis Contemplator vitam quandam à
propoſita ſibi Veritate ſortitur: quantò
veriorẽ vitam ille ſortietur à Verita-
te, quæ in omnibus Veritatibus Contem-
platori ſuo ſe prodit, quæ omnis Veritas
eſt, & quæ Veritas, & Vita eſt? Vive-
mus verò multò iucundius, atq; ſecu-
rius, quandò amotis ænigmaturn in vo-
lucris, eamdem Veritatem, & Vitam
clariffimè intuebimur, & ſimiles ei eri-
mus, quia videbimus eam ſicuti eſt.
Quæramus igitur illius Faciem ſemper,
& ad mortem uſque fideliter inquirā-
mus, memores illius, quod Angelo Sar-
dis dictum eſt Apocal. 2. 10. Eſto fidelis
uſq; ad mortem, & dabo tibi Coronam
Vitæ.

2 Quod attinet ad finem Operis, finis
fuit eorum pietati morem gerere, qui
quotidiè aliquid temporis impendunt
privatæ recitationi Roſarii Mariani; ſi-
mulque gaudent huic utiliffimo generi
Orationis vocalis, præ diverſitate die-
rum.

rum, & argumentorum congruentes
considerationes interfecere, & sic ma-
jori cum fructu, sensuq; devotionis sin-
gulas, decurrere decades, illasq; brevi
colloquio concludere, vel gratias agen-
do, vel emendationem Vitæ, & acqui-
sitionem Virtutum deposcendo, vel in
alios actus; prout mens, & affectus sug-
gerit, procedendo.

Ad levandum tædium variata sunt
argumenta considerationum pro quali-
bet die sex mensium; immò totius An-
ni, si quæ mense antecedenti versata
sunt animo, eadem recolantur mense
consequenti. Neq; hoc meditati mo-
lestum, sed potius pergratum esse con-
suevit: tum quia sæpenumero citius
prætervolat tempus Orationi præfi-
xum, quam singula materiæ ab initio
proposita capita percurrantur, penitus-
que dispiciantur; tum quia licet omnino
discussa fuerint, quod raro contingit, ob
inhexaustam rerum divinarum abis-
sum, nihilominus, quæ semel placue-
runt, & fructum attulerunt, repetita
delectabilius placent, & fructum affe-
runt uberiores.

3 Denique quod attinet ad usum ha-
rum considerationum, advertendum
primò est Vitam Christe Domini, Matris-

que Sanctissimæ cum præcipuis utriusque præcellentijs triginta quinque Meditationibus esse comprehensas pro numero quinque; Hebdomadarum cujusque mensis, licet una semper sit manca, & imperfecta.

Advertendum secundò ad vitandam confusionem dierum unius mensis, cum diebus alterius, semper inchoandas Meditationes Mensis Novembris, ex. gr. à feria 2. Hebdomadæ integræ Mensis Novembris, licet jam exacti essent duo, vel tres dies illius. Undè fit, ut si prima dies Novembris incidat in diem Veneris e. g., non intermittendæ sint Meditationes Octobris, sed illis insistendum, usque ad diem Dominicam inclusive, juxta designationem Octobri convenientem.

Advertendum tertio, Meditationum distributionem in singulos menses commodissimam fore, si puncta singularum Meditationum, assignentur

Prima	Novembri, atque Decembri
Secunda	Januario, ac Februario
Tertia	Martio, & Aprili
Quarta	Majo, & Junio
Quinta	Julio, & Augusto
Sexta	Septembri, & Octobri.

Hic

*His positis triplex potest esse usus
ejusmodi Considerationum .*

*Primus est , si quotidiane recitationi
Rosarii præmittatur attenta, & ab om-
ni curarum tumultu semota lectio unius
tantum puncti ex præfatis Meditationi-
bus, pro tali Mense, Hebdomada, ac die
designati .*

*Secundus est si non solum præmitta-
tur Lectio , sed brevis per unum qua-
drantem Meditatio, ita ut partim Medi-
tatio , partim recitatio cum suis ad sin-
gulas decades colloquijs unam expleat
semihoram .*

*Tertius est, si pro quotidiana Medita-
tione, non aliud argumentum in prom-
ptu sit, spatium integræ Horæ memora-
ti puncti pōderationi adscribatur . Nul-
lum enim ex punctis proponendis erit
ita jejunum , ut non amplam meditan-
di materiem suppeditare possit , præci-
pue exercitatis in studio Orationis . Di-
vina enim ita plena sunt lucis, & ignis,
ut spectatoribus oculis nova semper, &
nova, admiratione digna sufficiant , &
ardentibus animis novarum semper
suggerant nutrimenta flammarum .
Quoniam verò ut innuit Propheta
Psalm. 72. 10. reliquæ cogitationis
diem Festum Domino agere consueve-
runt,*

erunt, non erit difficile, reliquias cogitationum, & sanctorum desideriorum ex Oratione matutina transferre in obsequium certis Salutationibus Angelicis constans, Virgini persolvendum intra eandem diem, ubi tempus opportunum occurrerit.

Atque hæc de Titulo, Fine, & Usu Considerationum, quarum series hic eadem Benigno Lectori subjicitur.



INDEX MEDITATIONUM.

HEBDOMADÆ PRIMÆ.

Meditatio I.

*De Initio, Progressu, & Consummatione
Angelicæ Sanctitatis. fer. 2. pag. 1.*

Meditatio II.

*De superbia, & inobedientia malorum,
& de Humilitate, & obedientia Spi-
rituum electorum. fer. 3. pag. 12.*

Meditatio III.

*De Charitate Domini Humanam assu-
mentis Naturam relucente in Chari-
tate Beatorum Spirituum. fer. 4. p. 22.*

Meditatio IV.

*De Christo Domino in Cæna ultima ad
suos Discipulos dicente: Desiderio de-
sideravi hoc Pascha manducare vo-
biscum. fer. 5. pag. 33.*

Meditatio V.

*De Christo Domino in Horto Gethsema-
ni orante. fer. 6. pag. 45.*

Meditatio VI.

*De Capite Domini in Sepulchro jacen-
tis. die Sabb. pag. 57.*

Meditatio VII.

*De Resurrectione Domini. Die Domini-
ca. pag. 67.*

HEB-

HEBDOMADÆ II.

Meditatio I.

De ratione, qua Sancti omnes paruerunt DEO dicenti: Sancti estote, quoniam Ego Sanctus sum. fer.2. p.78.

Meditatio II.

De Humilitate, & Obedientia Sanctorum. fer.3. pag.89.

Meditatio III.

De Charitate Domini, Domum Zachariæ inuisentis, & Præcursorem suum sanctificantis relucente in Charitate Sanctorum. fer.4. pag.99.

Meditatio IV.

De Lotione pedum Eucharisticæ Institutioni præmissa. fer.5. pag.110.

Meditatio V.

De Cæso Flagellis Domino. fer.6. p.120.

Meditatio VI.

De Facie Domini in Sepulchro jacentis. Sabb. pag.130.

Meditatio VII.

De Christo Domino in Cælum ascendente. Dom. pag.140.

HEBDOMADÆ III.

Meditatio I.

De Sanctitate Divinæ Parentis. fer.2. pag.150. Me-

Meditatio II.

*De Humilitate, & Obedientia Divinae
Parentis. fer.3. pag.161.*

Meditatio III.

*De Charitate Domini in hunc Mundum
venientis relucente in Charitate Ma-
tris ipsum Parentis. fer.4. pag.172.*

Meditatio IV.

*De Christo Domino Eucharistiam Insti-
tuente sub specie Panis. fer.5. p.182.*

Meditatio V.

*De Christo Domino spinis redimito. fe-
ria 6. pag.195.*

Meditatio VI.

*De Pedibus Domini vulneratis in Se-
pulchro jacentis. die Sabb. pag.207.*

Meditatio VII.

*De Spiritus Sancti Adventu. die Do-
minica. pag.218.*

HEBDOMADÆ IV.

Meditatio I.

*De Sanctitate Domini in forma Homi-
nis. fer.2. pag.229.*

Meditatio II.

*De Humilitate, & Obedientia Domi-
ni. fer.3. pag.240.*

Meditatio III.

*De Charitate Domini in Templo Præ-
sen-*

sentati . fer. 4. pag. 251.

Meditatio IV.

De Sacramento Eucharistiæ sub specie Vini Dominum continente. feria 5. pag. 263.

Meditatio V.

De Christo Domino Crucem bajulante. fer. 6. pag. 275.

Meditatio VI.

De Manibus Domini vulneratis in Sepulchro jacentis. die Sabb. pag. 287.

Meditatio VII.

De Beata Virgine in Cælum Assumpta; Die Dominica. pag. 297.

HEBDOMADÆ V.

Meditatio I.

De Sanctitate Domini in forma Dei : feria 2. pag. 308.

Meditatio II.

Quo semper honore Filius Dei sit prosequutus Humilitatem, & Obedientiam. fer. 3. pag. 318.

Meditatio III.

De Charitate Domini Doctores in Templo docentis. fer. 4. pag. 328.

Meditatio IV.

De Christo Domino dicente : Qui manducat meam Carnem, & bibit me-

um

*um Sanguinem, in me manet, &
ego in eo. fer. 5. pag. 138.*

Meditatio V.

*De Christo Domino exaltato à Terra;
& omnia trahente ad seipsum.
feria 6. pag. 349.*

Meditatio VI.

*De aperto Latere Domini in Sepulchro
Jacentis. die Sabb. pag. 360.*

Meditatio VII.

*De Coronatione Divinæ Parentis. Die
Dominica. pag. 369.*



INDEX

I N D E X

Rerum præcipuarum hujus Opusculi.

A

A Ngeli brevitatem viæ suæ, qua excellentia compensaverint. Hebdom. 1.

Med. 1. punct. 4. & 5. pag. 6. 7. 8.

Angelorum, qui in veritate non steterunt
luctuosa mutatio. Hebdom. 1. Med. 1.
punc. 1. pag. 1. 2.

Angelorum Charitas erga Verbum Incarnatum, & erga homines propter Verbū.

Heb. 1. Med. 3. punct. 4. & 5. p. 28. 29.

Ascendentis Domini Corpus tollitur ab oculis, sed non separatur Deus à cordibus nostris. Ex D. Augustino. Heb. 2.
Med. 7. punct. 2. pag. 142.

Ascensionis Dominicæ tot gradus, quot descensionis, Quomodo cum Christo descendendum, ut cum ipso ascendamus. Heb. 2. Med. 7. punct. 4. p. 144.

B

Benignitas Domini caput inclinantis è Cruce, reclinantis in tumulo. Heb.

1. Med. 6. punct. 1.

pag. 57.

Cha-

C

Charitas Filii Dei relucens in Charitate Archangeli Virginem salutantis.

Heb. 1. Med. 3. punc. 1. 2. 3. pag. 23. 24. 25. 26.

Charitas eadem relucens in aliis Angelis invisibiliter Virginem salutantibus. Ibidem punc. 4. 5. 6. pag. 28. 29. & 30.

Charitas immensa Pueri JESU Patri suo se offerentis in Templo, tamquam Agnū simul, & Primogenitum. Heb. 4. Med. 3 punc. 2. 3. & 4. pag. 251. 252. & seq.

Christi jacentis in tumulo, & Iacob suppositis lapidibus quiescentis comparatio. Heb. 1. Med. 6. punc. 2. 3. 4. pag. 59. & seqq.

Christi ē Cruce pendentis, & omnia trahentis ad seipsum spectatores, diversi. Heb. 5. Med. 5. punc. 1. pag. 349.

Ad Christum trahentem omnia ad seipsum, qui non trahitur, quid perpendere debeat, ut trahatur. Ibidem punc. 2. & sequentibus. pag. 351. & seqq.

Christo, cur latus apertum, non crura confRACTA. Heb. 5. Med. 6. punc. 1. p. 360.

Christo nobis aperiente sinum, & cor suū, ut ingrediamur ad ipsum, & ipse ingrediat ad nos, quid nobis agendum. Ibidem punc. 4. & 5. pag. 364. & seqq.

Ibidem. Quinam claudi ad latus Domini, tamquam ad portam speciosam templi ponantur, ut stipem ab introeuntibus

petant, & prò auro, & arg
tem recipiant, punc. 6.

**Consuetudo laudabilis, nullis
bus intermittenda. Heb
punc. I.**

Coronam spinicam, quanti
mus exemplo Domini. He
punc. 6.

Crucis jucunditas ex D. Ber
4. Med. 5. punc. 1.

Crux Navis . Mare seculum
tus . Ex D. Aug. Heb. 4.
2. 3. 4. pa.

Crux, quotidie tollenda. **M**
ratem operis lenientia, e
Ibidem. punc. 5.

D

DEO soli innitendum.
7. punc. 5.

Deum laudare, quomodo
dies, noctesque ex Bellarn
Hebd. 1. Med. 1. punc. 4.

Deformitas speciosi forma p
num in morte, & sepulch
mosa. Heb. 2. Med. 6. p

Desiderium desiderantis P
care nobiscum, quale,
fuerit. Heb. i. Med. 4.
quentibus.

Dolor meus in conspectu meo
37.18. Quis hic dolor,

punc. 4.
Dolent homines flagella sua. ^{pag. 121.} ^{quare digne}
Iamur non dolent. Consideratio ex D.
Aug. utilissima. Ibidem punc. 5. p. 126.

E

Eucharistici Panis proprietates. Heb.
3. Med. 4. punc. 1. ^{pag. 182.}
Eiusdem troscus, ibidem, punc. 6. p. 193.
Eiusdem suavis. Ibidem punc. 7. p. 194.
Eucharistici panis suavitatem nauseantiam
infelicitas. Ibidem punc. 2. ^{pag. 184.}
Eucharisticum vinum cum lacte bibere
quod sit. Heb. 4. Med. 4. punc. 1. p. 264.
Eucharistici poculi calefacientis, letifi-
cans, inebriantis effectus. Ibidem
punc. 1. 3. 4. ^{pag. 265. & seqq.}
Eucharisticum vinum cur dicatur germi-
nans Virgines. Ibidem punc. 5. & 6.
^{pag. 271. & seqq.}
Eucharistiam sumens, quomodo maneat
in Christo. Hebom. 5. Med. 4. punc. 1.
^{pag. 339.}
Quomodo ibidem Christus maneat in mar-
ducante. Ibidem punc. 2. & sequenti-
bus. ^{pag. 341. & seqq.}

F

Facies Domini, cum sodario regimur.
Heb. 2. Med. 6. punc. 1. ^{pag. 341.}

per illud: Omnia
re, & Mare non
anc. 3. ^{pag. 165.}
consideratio mira-
Heb. 4. Med. 2.
^{pag. 242.}
m in hac Vita ex
5. Heb. 2. punc. 13.

ica, quam iucun-
ndus. Heb. 2. Med.
^{pag. 103.}
Domino, nemo di-
pedes in æternum.
6. ^{pag. 119.}

quanto cum labore;
fecerant, refec-
punc. 4. ^{pag. 291.}
psi. Ibidem punc.
^{pag. 287.}
ii, Gehennæ, sz-
b. 2. Med. 1. punc.
^{pag. 80. & seqq.}
imum usus, qualis
Angelorum Sancto-
r. punc. 6. ^{pag. 10.}
Mor.

que Sanctissimæ cum præcipuis utriusque præcellentijs triginta quinque Meditationibus esse comprehensas pro numero quinque Hebdomadarum cujusque mensis, licet una semper sit manca, & imperfecta.

Advertendum secundò ad vitandam confusionem dierum unius mensis, cum diebus alterius, semper inchoandas Meditationes Mensis Novembris, ex. gr. à feria 2. Hebdomadæ integræ Mensis Novembris, licet jam exacti essent duo, vel tres dies illius. Undè fit, ut si prima dies Novembris incidat in diem Veneris e. g., non intermittendæ sint Meditationes Octobris, sed illis insistendum, usque ad diem Dominicam inclusive, juxta designationem Octobri convenientem.

Advertendum tertio, Meditationum distributionem in singulos menses commodissimam fore, si puncta singularum Meditationum, assignentur

Prima	Novembri, atque Decembri
Secunda	Januario, ac Februario
Tertia	Martio, & Aprili
Quarta	Majo, & Junio
Quinta	Julio, & Augusto
Sexta	Septembri, & Octobri.

Hic

His positis triplex potest esse usus ejusmodi Considerationum .

Primus est, si quotidianę recitationi Rosarii præmittatur attenta, & ab omni curarum tumultu semota lectio unius tantum puncti ex præfatis Meditationibus, pro tali Mense, Hebdomada, ac die designati .

Secundus est si non solum præmittatur Lectio, sed brevis per unum quadrantem Meditatio, ita ut partim Meditatio, partim recitatio cum suis ad singulas decades colloquijs unam expleat semihoram .

Tertius est, si pro quotidiana Meditatione, non aliud argumentum in promptu sit, spatium integrę Horę memorati puncti pöderationi adscribatur . Nul- lum enim ex punctis proponendis erit ita jejunum, ut non amplam meditan- di materiem suppeditare possit, præci- pue exercitatis in studio Orationis . Di- vina enim ita plena sunt lucis, & ignis, ut spectatoribus oculis nova semper, & nova, admiratione digna sufficiant, & ardentibus animis novarum semper suggerant nutrimenta flammarum . .
Quoniam verò ut innuit Propheta
Psal. 72. 10. reliquię cogitationis
diem Festum Domino agere consueve-
runt,

¶ Sint, non erit difficile, reliquias cogitationum, & sanctorum desideriorum ex Oratione matutina transferre in obsequium certis Salutationibus Angelicis constans, Virgini persolvendum intra eandem diem, ubi tempus opportunum occurrerit.

Atque hæc de Titulo, Fine, & Usu Considerationum, quarum series hic eisdem Benigno Lectori subjicitur.



INDEX MEDITATIONUM.

HEBDOMADÆ PRIMÆ.

Meditatio I.

*De Initio, Progressu, & Consummatione
Angelicæ Sanctitatis. fer. 2. pag. 1.*

Meditatio II.

*De superbia, & inobedientia malorum,
& de Humilitate, & obedientia Spi-
rituum electorum. fer. 3. pag. 12.*

Meditatio III.

*De Charitate Domini Humanam assu-
mentis Naturam relucens in Chari-
tate Beatorum Spirituum. fer. 4. p. 22.*

Meditatio IV.

*De Christo Domino in Cæna ultima ad
suos Discipulos dicente: Desiderio de-
sideravi hoc Pascha manducare vo-
biscum. fer. 5. pag. 33.*

Meditatio V.

*De Christo Domino in Horto Gethsema-
ni orante. fer. 6. pag. 45.*

Meditatio VI.

*De Capite Domini in Sepulchro jacen-
tis. die Sabb. pag. 57.*

Meditatio VII.

*De Resurrectione Domini. Die Domini-
ca. pag. 67.*

HEB-

HEBDOMADÆ II.

Meditatio I.

De ratione, qua Sancti omnes paruerunt DEO dicenti: Sancti estote, quoniam Ego Sanctus sum. fer. 2. p. 78.

Meditatio II.

De Humilitate, & Obedientia Sanctorum. fer. 3. pag. 89.

Meditatio III.

De Charitate Domini, Domum Zachariæ inuisentis, & Præcursoresuum sanctificantis relucens in Charitate Sanctorum. fer. 4. pag. 99.

Meditatio IV.

De Lotione pedum Eucharisticæ Institutioni præmissa. fer. 5. pag. 110.

Meditatio V.

De Cæso Flagellis Domino. fer. 6. p. 120.

Meditatio VI.

De Facie Domini in Sepulchro jacentis. Sabb. pag. 130.

Meditatio VII.

De Christo Domino in Cælum ascendente. Dom. pag. 140.

HEBDOMADÆ III.

Meditatio I.

De Sanctitate Divinæ Parentis. fer. 2. pag. 150. Me-

Meditatio II.

*De Humilitate, & Obedientia Divinae
Parentis. fer.3. pag.161.*

Meditatio III.

*De Charitate Domini in hunc Mundum
venientis relucente in Charitate Ma-
tris ipsum Parentis. fer.4. pag.172.*

Meditatio IV.

*De Christo Domino Eucharistiam Insti-
tuente sub specie Panis. fer.5. p.182.*

Meditatio V.

*De Christo Domino spinis redimito. fe-
ria 6. pag.195.*

Meditatio VI.

*De Pedibus Domini vulneratis in Se-
pulchro jacentis. die Sabb. pag.207.*

Meditatio VII.

*De Spiritus Sancti Adventu. die Do-
minica. pag.218.*

HEBDOMADÆ IV.

Meditatio I.

*De Sanctitate Domini in forma Homi-
nis. fer.2. pag.229.*

Meditatio II.

*De Humilitate, & Obedientia Domi-
ni. fer.3. pag.240.*

Meditatio III.

*De Charitate Domini in Templo Præ-
sen.*

sentati. *fer. 4. pag. 251.*

Meditatio IV.

De Sacramento Eucharistiæ sub specie Vini Dominum continente. feria 5. pag. 263.

Meditatio V.

De Christo Domino Crucem bajulante. fer. 6. pag. 275.

Meditatio VI.

De Manibus Domini vulneratis in Sepulchro jacentis. die Sabb. pag. 287.

Meditatio VII.

De Beata Virgine in Cælum Assumpta; Die Dominica. pag. 297.

HEBDOMADÆ V.

Meditatio I.

De Sanctitate Domini in forma Dei: feria 2. pag. 308.

Meditatio II.

Quo scmp̄ honore Filius Dei sit prosequutus Humilitatem, & Obedientiam. fer. 3. pag. 318.

Meditatio III.

De Charitate Domini Doctores in Templo docentes. fer. 4. pag. 328.

Meditatio IV.

De Christo Domino dicente: Qui manducat meam Carnem, & bibit me-

*um Sanguinem, in me manet, &
ego in eo.* fer. 5. pag. 138.

Meditatio V.

*De Christo Domino exaltato à Terra;
& omnia trahente ad seipsum.*
fcia 6. pag. 349.

Meditatio VI.

*De aperto Latere Domini in Sepulchro
Jacentis.* die Sabb. pag. 360.

Meditatio VII.

*De Coronatione Divinæ Parentis. Die
Dominica.* pag. 369.



INDEX

I N D E X

Rerum præcipuarum hujus Opusculi.

A

Angeli brevitatem viæ suæ, qua excellentia compensaverint. Hebdom. 1.

Med. 1. punct. 4. & 5. pag. 6. 7. 8.

Angelorum, qui in veritate non steterunt
luctuosa mutatio. Hebdom. 1. Med. 1.

punc. 1. pag. 1. 2.

Angelorum Charitas erga Verbum Incarnatum, & erga homines propter Verbū.

Heb. 1. Med. 3. punc. 4. & 5. p. 28. 29.

Ascendentis Domini Corpus tollitur ab oculis, sed non separatur Deus à cordibus nostris. Ex D. Augustino. Heb. 2.

Med. 7. punc. 2. pag. 142.

Ascensionis Dominicæ tot gradus, quot descensionis. Quomodò cum Christo descendendum, ut cum ipso ascendamus. Heb. 2. Med. 7. punc. 4. p. 144.

B

Benignitas Domini caput inclinantis è Cruce, reclinantis in tumulo. Heb.

1. Med. 6. punc. 1. pag. 57.

Cha.

C

Charitas Filii Dei relucens in Charitate Archangeli Virginem salutantis .
 Heb. 1. Med. 3. punc. 1. 2. 3. pag. 23.
 24. 25. 26.

Charitas eadem relucens in aliis Angelis invisibiliter Virginem salutantibus. Ibidem punc. 4. 5. 6. pag. 28. 29. & 30.

Charitas immensa Pueri JESU Patri suo se offerentis in Templo, tamquam Agnū simul, & Primogenitum. Heb. 4. Med. 3. punc. 2. 3. & 4. pag. 251. 252. & seq.

Christi jacentis in tumulo, & Iacob suppositis lapidibus quiescentis comparatio . Heb. 1. Med. 6. punc. 2. 3. 4. pag. 59. & seqq.

Christi ē Cruce pendentis, & omnia trahentis ad seipsum spectatores diversi. Heb. 5. Med. 5. punc. 1. pag. 349.

Ad Christum trahentem omnia ad seipsum, qui non trahitur, quid perpendere debeat, ut trahatur . Ibidem punc. 2. & sequentibus. pag. 351. & seqq.

Christo, cur latus apertum, non crura contracta. Heb. 5. Med. 6. punc. 1. p. 360.

Christo nobis aperiente sinum, & cor suū, ut ingrediamur ad ipsum, & ipse ingreditur ad nos, quid nobis agendum . Ibidem punc. 4. & 5. pag. 364. & seqq.

Ibidem . Quinam claudi ad latus Domini, tamquam ad portam speciosam templi ponantur, ut stipem ab introeuntibus

pe-

- petant , & prò auro , & argento sanitatem recipiant , punc. 6. pag. 366.
- Consuetudo laudabilis , nullis difficultatibus intermittenda . Heb. 1. Med. 5. punc. 1. pag. 45.
- Coronam spineam , quanti facere debeamus exemplo Domini . Heb. 1. Med. 6. punc. 6. pag. 64.
- Crucis jucunditas ex D. Bernardo . Heb. 4. Med. 5. punc. 1. pag. 275.
- Crux Navis . Mare seculum . Deus Portus . Ex D. Aug. Heb. 4. Med. 5. punc. 2. 3. 4. pag. 278. & seqq.
- Crux, quotidie tollenda . Motiva difficultatem operis lenientia , ex eodem Aug. Ibidem . punc. 5. pag. 282.

D

- D**E O soli innitendum . Heb. 4. Med. 7. punc. 5. pag. 304.
- Deum laudare , quomodo nos doceant dies, noctesque ex Bellarm. in Psal. 32. 2. Heb. 1. Med. 1. punc. 4. pag. 6.
- Deformitas speciosi forma præ Filiis hominum in morte , & sepulchro , quam formosa . Heb. 2. Med. 6. punc. 3. p. 133.
- Desiderium desiderantis Pascha manducare nobiscum , quale , quantumque fuerit , Heb. 1. Med. 4. punc. 1. & sequentibus . pag. 110.
- Dolor meus in conspectu meo semper. Psal. 37. 18. Quis hic dolor , Heb. 2. Med. 5. punc.


punc. 4. pag. 125.
Dolent homines flagella sua, quare flagel-
lantur non dolent. Consideratio ex D.
Aug. utilissima. Ibidem punc. 5. p. 126.

E

Eucharistici Panis proprietates. Heb.
3. Med. 4. punc. 1. pag. 182.
Eiusdem fructus, ibidem, punc. 6. p. 193.
Eiusdem suavitas. Ibidem punc. 5. p. 191.
Eucharistici panis suavitatem nauseantium
infelicitas. Ibidem punc. 2. pag. 184.
Eucharisticum vinum cum lacte bibere
quid sit. Heb. 4. Med. 4. punc. 1. p. 264.
Eucharistici poculi calefacientis, letifi-
cantis, inebriantis effectus. Ibidem
punc. 2. 3. 4. pag. 265. & seqq.
Eucharisticum vinum cur dicatur germi-
nans Virgines. Ibidem punc. 5. & 6.
pag. 271. & seqq.
Eucharistiam sumens, quomodo maneat
in Christo. Hebom. 5. Med. 4. punc. 1.
pag. 339.
Quomodo idem Christus maneat in man-
ducante. Ibidem punc. 2. & sequenti-
bus. pag. 341. & seqq.

F

Facies Domini, cur Sudario tegitur.
Heb. 2. Med. 6. punc. 1. pag. 130.
Fa-

Faciem Domini, quis deformavit, & cur
deformata sit. Ibidem punc. 2. pag. 132.
Facies Domini, cur obscurata, & abscon-
dita. Ibidem punc. 5. pag. 136.
Faciem suam, unusquisque omnibus ad-
versantibus in via Domini, tamquam
petram durissimam debet opponere. 
Heb. 2. Med. 6. punc. 4. pag. 135.
Flagella non respuat, qui hereditatem desi-
derat, ex Aug. Heb. 2. Med. 5. punc. 3.
pag. 124.

G

Gaudium Domini de Passione, & mor-
te sua. Heb. 2. Med. 3. punc. 4. p. 105.

H

Humilitatis perfectissimæ actus exer-
cici ab Angelis, ubi cognitione Domi-
nicæ Incarnationis illustrati sunt. Heb.
1. Med. 2. punc. 4. 5. 6 pag. 17. & seqq.
Humilitas, & Charitas Domini in formam
servi exinniti. Heb. 1. Med. 3. punc. 1.
pag. 22.
Humilitas alia, quam parit Veritas, alia,
quam format Charitas, ex D. Bernardo.
Heb. 2. Med. 2. punc. 2. pag. 90.
Humilitatis, & Virginitatis pulchra per-
mixtio, ex D. Bernardo. Heb. 3. Med. 2.
punc. 1. pag. 162.
Hu-

Humilitas B. V. expressa per illud : Omnia
flumina intrant in Mare, & Mare non
redundat. Ibidem punc. 3. pag. 165.

Humilitatis Dominicæ consideratio mira-
bilis ex D. Bernardo . Heb. 4. Med. 2.
punc. 2. pag. 242.

Humilitas exaltata etiam in hac Vita ex
D. Augustino . Heb. 5. Med. 2. punc. 3.
pag. 322.

L

Labor Vitæ apostolicæ , quàm jucun-
dus, & undè jucundus . Heb. 2. Med.
3. punc. 3. pag. 103.

Lavare pedes volenti Domino, nemo di-
cat; non lavabis mihi pedes in æternum.
Heb. 2. Med. 4. punc. 6. pag. 119.

M

Manus Domini , quanto cum labore ;
quod sine labore fecerant , refece-
runt . Heb. 4. Med. 6. punc. 4. pag. 291.

In manibus meis descripsi . Ibidem punc.
1. & 2. pag. 287.

Memoria Mortis , Iudicii , Gehennæ , sæ-
pius retractanda . Heb. 2. Med. 1. punc.
2. , & 3. pag. 80. & seqq.

Mediorum ad Finem ultimum usus , qualis
esse debeat exemplo Angelorum Sancto-
rum . Heb. 1. Med. 1. punc. 6. pag. 10.

†

Mor.

Mortificatio corporis , Sanctis omnibus
communis . Heb.2. Med. 3. pun. 1. p.99.
Mortificationis corporalis necessitas . Heb.
2. Med. 1. punc. 4. pag. 84.
Mors Divinæ Parentis , sicut in conspectu
Domini pretiosissima , ita Resurrectio
gloriosissima . Heb. 4. Med. 7. punc. 1.
& 2. pag. 297.

O

Obedientiæ Sanctorum dotes . Heb.2.
Med 2. punc. 4.5.6. pag.94. & seq.
Obedientia B. Virginis , quam excellens .
Heb. 3. Med.2. punc. 5. & 6. pag.168.
Obedientiæ Dominicæ dotes . Hebd. 4.
Med. 2 punc. 4. 5. 6. pag. 246. & seqq.
Obedientiæ merces . Hebdom. 5. Med.2.
punc. 2. pag. 319.
Obedientia Parens Sapientiæ ex D. Aug.
Heb. 5. Med 2. punc. 4. pag. 323.
Obedientia virtutes ceteras menti inserit,
infertasque custodit, ex D. Greg. expli-
catur . Hebdom. 5. Med.2. punc. 5. & 6.
Orationi constanter insistendum . Heb.1.
Med. 5. punc.4. & 5. pag. 51.

P

Peccatoris peccantis impudentia . Heb.
2. Med. 5. punc. 1. pag. 121.
Pedes Domini jacentis in tumulto, quomo-
dò adorandi , Heb. 3. Med. 6. punc. 1.
pag. 207.

Pec-

Peccatores ad istos pedes procumbere, nè
formident. Ibidem, punc. 2. 3. 4. pag.
209. & seqq.

Pedibus Domini, quæ obsequia exhiben-
da, ex D. Bernardo. Ibidem, punc. 5.
pag. 214.

Pedes Domini aurei ex Cantic. 5. Cur. Ibi-
dem, punc. 6. pag. 216.

R

Resurgentis Christi Regnum. Heb. 1.
Med. 7. punc. 1. pag. 67.

Eiusdem Resurgentis Victoria. Ibidem,
punc. 2. pag. 69.

Resurgendum cum Christo tertia die, non
quarta, ex D. Bernardo rem utilissime
expendente. Ibidem, punc. 5. pag. 72.

Resurrectio Christi comparati Agno, Leo-
ni, & Libro aperienti se ipsum, & se-
ptem signacula resignanti ex eodem D.
Bern. Ibidem, punc. 6. pag. 75.

S

Sacramenta novæ Legis, quanti sint
pretii. Heb. 2. Med. 4. punc. 4. p. 115.

Sanctitas Divinæ Parentis, expressa per
Civitatem, habentem fundamenta in
Montibus Sanctis. Heb. 3. Med. 1. punc.
1. & sequentibus. pag. 152. & seqq.

Sanctitas Domini in forma Servi, profi-
cientis sapientia, & ætate, nostram de-
fidiam coarguens. Heb. 4. Med. 1. pun.

1. & sequentibus . pag. 229. & seqq.
 Sapientiam Verbi ubique diffusam per mo-
 dum lucis incōtaminatæ. qualiter imita-
 ri deceret . Heb. 5. Med. 1. punc. 4 p. 313.
 Silentium, quam utile sit sapienter locutu-
 ro , Deoque in salutem Animarum coo-
 peraturo . Heb. 2. Med. 3. punc. 2 p. 101.
 Spiritus Divini Adventus quas dispositio-
 nes requirat in nobis . Heb. 3. Med. 7.
 punc. 1. pag. 218.
 Spiritus Domini advenientis, totamque
 domum replentis effectus . Ibidem ,
 punc. 3. 4. 5. 6. pag. 221. & seqq.
 Spinas Domino quales, & quæ terra protu-
 lerit . Heb. 3. Med. 5. punc. 1. pag. 196.
 Sponsus liliū, sed non inter spinas, ex D.
 Bernardo . Ibidem punc. 2. pag. 197.
 Superbiæ mala . Heb. 1. Med. 2. punc. 2.
 & 3. pag. 13. & seqq.
 Superbia nostra humilitati Domini com-
 posita . Heb. 4. Med. 2. punc. 1. p. 240.
 Surgenti à Mensa Christo, & pedes Disci-
 pulorum abluenti, quid obsequii debea-
 mus . Heb. 2. Med. 4. punc. 1. pag. 110.

V

Verbum Incarnatum lac factum , ut
 lacte nutriti crescamus, & apti cibo
 solido efficiamur . Ex D. Aug. Heb. 3.
 Med. 4. punc. 4. pag. 188.
 Verbum Incarnatum idem Isaac, cui par-
 citur, idem aries hærens inter vepres,
 qui immolatur . Heb. 3. Med. 5. punc.
 4. & 5. p. 201. Ver:

Verbum, quod cecidit inter spinas minimè
 suffocatum Ibidem. punc. 3. pag. 199.
Idem cur se nominet Sanctum simul, & Ve-
 rum. Apocalyps. 3. Hebdom. 5. Med. 1.
 punc. 1. pag. 308.
Idem in forma Dei, cur dicatur Candor
 Lucis, cur speculum sine macula. Cur
 Imago &c. Ibidem, punc. 4. 5. 6. pag.
 313. & seqq.
Veritatis primæ contemplatio, quam effi-
 cax ad constantiam in benè cæptis. Heb.
 1. Med. 1. punc. 2. pag. 3.
Eiusdem consideratio, quam utilis ad vitæ
 candorem. Ibidem, punc. 3. pag. 4.
Viæ justorum, & impiorum, quam dissi-
 miles. Heb. 2. Med. 1. punc. 1. pag. 78.
Vita brevissima, & excellentissima Ange-
 lorum, quam dissimilis nostræ, quantò
 longiori, tantò imperfectiori. Heb. 1.
 Med. 1. punc. 4. pag. 6.
Virginis de deserto ascendentis deliciæ.
 Heb. 4. Med. 7. punc. 3. & 4. pag. 301.
 & sequentibus.
Virginis in Cælum ascendentis amictus;
 candidissimus simul, & calidissimus ex
 D. Bern. Heb. 5. Med. 7. pun 1. p. 369.
Virgineum Caput duodecim sydera coro-
nantia, quattuor ternaria Privilegio-
 rum. Ibidem punc. 2. pag. 371.
Punctis sequentibus ad singula ternaria
 descenditur, & quid fructus inde colli-
 gi possit innuitur. pag. 372. & seqq.

F I N I S.

Placet ultimò ad mentem in præin-
dicatis Meditationibus exercen-
dam subnectere septuplex VIR-
GINIS Patrocinium in unam-
quamque diem Hebdomadæ.

Præsidebit igitur Diei Lunæ.

Beata Virgo sine Labe Concepta.

*Et à nobis tamquam Sanctitatis omnis, at-
que munditiæ Impetratrix implorabitur
hac, vel simili Oratione.*

Virtutum omnium, maximèque illiba-
ti Candoris Candidissima Parens,
quæ sine macula hæreditariæ culpæ con-
cepta gratiam in oculis Domini inveni-
sti, antequam nascereris, per Immacu-
latam Conceptionem tuam impetra-
mihi, ut cor mundum creet in me, spi-
ritumque rectum innovet in visceribus
meis Author omnis Innocentiæ, & San-
ctitatis Dominus noster IESUS CHRI-
STUS, Qui cum Patre, & Spiritu San-
cto vivit, & regnat in sæcula sæculorum,
Amen.

Præsidebit Diei Martis.

Beata Virgo ab Angelo salutata.

*Summa precatationis ad Virtutem Humilita-
tis, & Obedientiæ deposcendam poterit esse
hujusmodi.*

Do-

Donorum omnium genere cūmulatissima Parens, quæ Virginitate mirabiliter placuisti, Humilitate, & Obedientia mirabilius concepisti, impetra mihi spiritum veræ Humilitatis, & Obedientiæ, ut obsequium servitutis meæ gratum esse possit illi, qui cum in forma Dei esset in formam servi se ipsum exinanivit, factusque Hostia peccati pro peccatoribus Crucis ignominiam confusione contempta sustinuit, ut sicut acceperat mandatum a Patre sic faceret. Qui cum Patre, & Spiritu Sancto vivit, & regnat Deus &c.

Præsidebit Diei Mercurii.

Beata Virgo Elisabetham invisens.

Participatio Charitatis Apostolica postulabitur in hunc ferè modum prò arbitrio postulantis.

Pulchræ dilectionis Amantissima Parens, quæ Concepto Verbo in Montana cum festinatione abiisti, ut plena Deo aliis Divinæ Largitatis dona divideres, per ineffabilem illam Charitatem, qua cum adhuc inimici essemus dilexit nos Dominus, impetra mihi spiritum Charitatis Apostolicæ, nè in admirabile Lumen suum me frustra vocaverit illuminans omnem hominem venientem in hunc mundum, propter salutem hu-
ma-

mani Generis Incarnatus, omnibusque omnia factus, ut omnes ad Patris agnitionem, cultumque perduceret, durissimaque servitute liberatos in Filios Dei transcriberet, habiturus tot Regni co-hæredes, quot servos in libertatem Filiorum Dei vocatos, qui cum Patre &c.

Præsidebit Diei Iovis.

Beata Virgo Mater Domini in Cibum nobis, & Potum exhibiti.

Ad studium, singularemque sensum Pietatis impetrandum erga DIVINISSIMUM SACRAMENTUM dirigetur.

Oratio.

EX omnibus Virgo electa Virginibus, quæ tamquam Tellus intacta, nec aliundè, quam cælesti rore fecunda, nobis Frumentum pareres Electorum, Vinumque germinans Virgines omnibus abundè sufficeret; impetra mihi ab illo Spiritu, qui ventrè tuum fecit aceruum tritici undè aleremur, & viscera tuæ Fontem Vini Electi, undè inebriaremur, ut nihil magis esuriam, ac sitiam, quam Corpus, & Sanguinem DOMINI NOSTRI IESU CHRISTI. Qui cum Patre &c.



Præ-

Præsidebit Diei Veneris :

Beata Virgo Doloris Gladio trajecta .

*Postulabitur desiderium ardens , & efficax ;
durissima quaque patiendi , semperque
adharendi Lateri Amoris Crucifixi .*

Oratio .

Regis Dolorum Afflictissima Parens ;
cujus Animam in obitu Filii Gladius
pertransiit , sed non separavit à Filio ,
per fortissimum , immobilemque Amo-
rem tuum ergà Filium de Cruce penden-
tem , impetra mihi Amorem nullâ vi se-
parabilem ab Amoris Latere de Cruce
pendentis Domini nostri IESU CHR-
ISTI : ut ego quoque de Crucis inimi-
co , Amator Crucis effectus , dicere
possim : Quis me separabit à Charitate
Dei , quæ est in CHRISTO IESU DO-
MINO NOSTRO . Qui cum Patre &c.

Præsidebit Sabbato .

Beata Virgo , à Funere Filii solitudinî ,
& Lacrymis indulgens .

*Pœnitentia salutaris petitionem hodiernam
continebit ,*

Oratio .

Non innocentium solum , sed etiam
pœnitentium Benignissima Parens ,
per amarissimas lacrymas , quæ tibi post
obi-

obitum Filii fuerunt panes die, ac nocte,
da obsecro capiti meo aquam, & oculis
meis fontem lacrymarum, ut Cēlo te-
cum, terrâque lugente, ego quoque tan-
ti causa meroris, & luctus lugere possim
Dominum meum, Peccatorum mani-
bus, quorum ego primus sum, Crucifi-
xum, & mortuum. Qui cum Patre &c.

Præfidebit Diei Dominica.

Beata Virgo in Cēlum Assumpta.

*Divina Gloria propagatio, illi usque propa-
ganda studium postulabitur in hac verba.*

Potentissima Cēli, terrarumque Regi-
na, quæ super omnes Angelorum Cho-
ro exaltata, Sōlio Divinitatis adstas in
vestitu deaurato, circumdata varietate;
ne recuses è tam sublimi fastigio in
hanc lacrymarum vallem ora converte-
re, discussaque caligine Principis tene-
brarum, universum Orbem, Cēlesti lu-
ce perfundere, ut Cēlesti Spiritu omnes
agente, ubique Divina Majestas adore-
tur in spiritu, & veritate, nomenque
SANCTISSIMÆ, & INDIVIDUÆ
TRINITATIS, sicut in Cēlo, ita san-
ctificetur in Terris, quas Pretioso San-
guine sanctificavit DOMINUS NO-
STER IESUS CRISTVS. Qui cum Pa-
tre, &c.

FA-

*Facultas R. P. Joannis Petrobelli
Soc. JESU in Provincia Veneta
Præpositi Provincialis.*

CUM Librum, cui titulus; *Coro-
na Vitæ, complectens Meditatio-
nes &c.* à P. Petro Contessino no-
stræ Societatis Sacerdote conscrip-
tum, aliquot ejusdem Societatis
Theologi recognoverint, & in
lucem edi posse probaverint, po-
testate nobis à R. P. nostro Thy-
so Gonzalez Præposito Generali
ad id tradita, facultatem conce-
dimus, ut typis mandetur, si ita
iis, ad quos pertinet videbitur.
Cujus rei gratia has litteras ma-
nu nostra subscriptas, & sigillo
nostro munitas dedimus.

Bononiæ die 26. Augusti 1702.

Locus ✠ Sigilli.

Joannes Petrobellus.

Vidit

*Vidit D. Sebastianus Giribaldus Cler. Regul.
Sancti Pauli in Ecclesia Metropolitana
Bononia Pœnitentiarius pro Eminentissi-
mo, & Reverendissimo Domino D. Iacobo
S. R. E. Cardinali Boncompagno Archie-
piscopo, & Principe.*

*De Mandato Reverendissimi Patris Inquisi-
toris Generalis Bononia, attente perlegi
Libellum cui Titulus Corona Vitæ Au-
ctore P. Contessino Soc. Iesu, nihilque in
eo tortuosum à Chastolica Fide, aut bo-
nis moribus obnoxium reperi, adeoque
Prælo dignissimum censeo.*

*Fr. Hyacinthus Pius Tabalius Ordinis
Præd. Mag. ac Sac. Pagina Interpres.*

Stante supradicta censura.

Imprimatur.

*Fr. Pius Felix Cappasanta Inquisitor Be-
nonia.*

HEBDOMADÆ^I

PRIMÆ,

Meditatio Prima.

De Initio, progressu, & Consummatione Sanctitatis Angelica.

MUndum visibilem prius condidit Deus tamquam rudem adhuc molem, & incompositam; postea verò composuit, exornavit, perfecit. At Coelum Empyreum videtur à prima rerum origine omnium perfectione sibi debita edidisse, ut Spiritibus Immortalibus ab initio perfectissimis, & unà cum Cœlo conditis, Locus tamquam suis Habitatoribus esset consentaneus.

Innumeræ igitur Intelligentiæ tamquam Stellæ Matutinæ in suos ordines, stationesque dispositæ per immensa Cœli spatia lumen dederunt in Custodijs suis, & lætatae sunt; vocatae sunt, & dixerunt, adsumus. Baruc. 3. 34.

Vocatae nimirum sunt, non solum ad esse creatum, sed Divinum: Vocatae sunt ad perficiendam in se ipsis Imaginem Augustissimæ Trinitatis, laudando, colendo,

A

omni-

omnique genere servitutis prosequendo Principium, Finemque ultimum suum; & dixerunt: Adsumus. Ideò omnes, & singulæ dederunt lumen Sapientiæ in custodiis suis. Singulæ citrà vllam discordiæ perturbationem suos ordines servaverunt: Singulæ omnia, quæ infrà sunt, & quod illud est non sunt, & se ipsas inter omnia contemnentes, luxerunt ei cum iucunditate, qui fecit illas.

Verùm quæ repentina caligo; atque calamitas serenissimam diem infecit? Ecce qui serviunt ei non sunt stabiles, & in Angelis suis reperit pravitatem. Non illos à lapsu continuit, Loci Sanctitas, non sociorum in benè cæptis constantia, non affluentia scientiæ, non vox omnipotens mentis auribus acutissimè insonans, & seditiosas cogitationes disiciens, & perire volentes ad vitam vocans.

Quis igitur Hominum sibi audeat polliceri stabilem innocentiam, firmamque cum fine ultimo conjunctionem, vel quia Hierosolymis vivit ad Sepulchrum Domini, vel quia inter Sanctos, & quotidiana Sanctorum exempla versatur, vel quia sublimi dono Contemplationis eminet, vel quia laudabilem vitæ cursum instituit, aut etiam magna ex parte perfecit? Potentissimi Spiritus instabiles facti sunt, mutatique de optimis in deterrimos, quia Bono incommutabili sicut adhæserant, non adhæserunt. Victi sunt, quia se ipsos vincere neglexerunt. Quis enim præ cæteris

Meditatio I.

3

ris Luciferum seduxit, quis viciat? Nullum habuit Authorem, nullum sceleris Hortatorem. Se ipsum, ipse seduxit, & vicit, & ab ultimo se sine separatione lucuosissima separavit.

2 Sed à lugubri, ad gratius spectaculum oculos convertamus, discamusque à melioribus Divinæ Sapientiæ Auditoribus luculentiora Sanctitatis exempla. Melior, & major nobilium multitudo spirituum in veritate stetit, quia nunquam oculos à veritate detorsit. In tanto Reipublicæ motu, in tanto rerum discrimine, tantoque certamine cum seditiosissimis Perduellibus, cæteros omnes ad defectionem sollicitantibus, qua hortando, qua increpando, qua deridendo, nullus è numero innumerabili mentis aciem deflexit à Deo. Indè tota, indè firmitas tanta.

O' Veritas! ò Summa Veritas, quæ tantoperè Beatis mentibus placuisti! Tu Luce tua Ignem excitasti semper arsurum, Nullæ aquæ, nulla è toto Aquilone flumina exundantia Ignem hunc obruere potuerunt. Felicissimi Cælitum Chori, semper ardete, sicut arstis. De Luce semper ardete, de qua magis ardere voluistis, quam lucere. O' si nobis quoque ita lucere, ita liceret ardere! Sed numquid animus abiiciendus omnino est? Absit, quod ope nostra non possumus, Divinis Viribus assequemur.

Assequemur autem primò: Si ad Vires

A 2

Di-

Divinas obtinendas propitios habebimus Spiritus illos , qui primi omnium claritatem Lucis acceptæ servaverunt intactam , & Conditori suo non luxerunt , nisi ut arderent ; & non cognoverunt in se , vel aliis Authorem omnium , nisi ut amarent ipsum propter ipsum , & omnia propter ipsum.

Assequemur secundò : Si quod benè placuit , constanter placeat ; potissimum autem placeat in Veritatis contemplatione constantia .

Assequamur tertio : Si constantiam ejusmodi non labefactabunt , aut bella hostium invisibilium , aut pravorum hominum dicta , facta , cogitata : aut opulentia divitiarum , aut aliæ cupiditates animum ad modum procellosi Maris , huc illuc agentes . Si veritates revelatæ per Fidem , & attente consideratæ , adinstar Clypei nos tegunt , juxta illud ex Psalm. 90. 5. Scuto circumdabit te veritas ejus . Quantò magis circumdabit Veritas ipsa Infinita , die , ac nocte antè oculos posita ? Quid nostram voluntatem separabit à fine , qui terminus est Amoris ; si nihil separabit Intellectum à Veritate , quæ Principium est Amoris , non solum finiti , sed etiam Infiniti ? O Veritas tanti Principium Amoris ! Illucesce menti meæ , ut nihil amem suprà Te . Nihil præter Te . Et omnia in Te , & propter Te .

3 Sicuti Veritas indeficiens tantam Admiratoribus suis tribuit firmitatem ,
quid

Meditatio 1.

5.

quâ indeficiens, & immutabilis est, itâ singularem vitæ candorem largita est, quâ Speculum sine macula est, & Candor Lucis æternæ. Quis mente assequi possit quam innocentem vitam traduxerint Beati Spiritus, dum adhuc Viatores Viam Mandatorum Domini cucurrerunt? Non declinaverunt ad dexteram, vel sinistram. Omnis illorum cogitatio fuit apud Altissimum. Sap. 1. 16. Omnis affectio rectissima, & ordinatissima inhæsit Altissimo. Nullus error intellectum decepit. Nulla culpa, licet levissima voluntatem infecit. Ubi erat impetus Spiritus, illuc gradiebantur, nec revertebantur, cum ambularent, quâ nulla inconstantia nota, aut alio vocavit, aut ab opere inito retardavit.

Vitam vestram Candidissimi Spiritus nostræ componite. Bone Deus! Qualis, & quanta inter utramque distantia? Videte vestri cogitationes intellectus, & nostri. Cogitationes vestræ Sole nitidiores Coelesti semper Sapientia refulserunt. Nostræ tenebræ fuerunt, & sunt. Cogitationes in malum intentæ omni tempore. Genes. 6.6. Cogitationes sine intellectu. Cogitationes Prudentiæ carnis, quæ mors est.

Videte vota vestræ voluntatis, & nostræ. Quid vos voluistis? Quid nos volumus? Operit confusio facies nostras, & quò se vertat miseria nostra non invenit. Quantum placetis, tantum displicet nobis nostra deformitas,

Atque utinam quantum fas est displiceret. Illam Benignissimi Protectores Vitæ præteritæ detestationem impetrate, quæ ad aliū vitæ cursum instituendam est necessaria. Memores Beneficiorum ab initio conditionis vestræ acceptorum, memores Sapientiæ, memores Innocentiæ, & Charitatis, omniumque Operum, quibus Deo dicenti: Sancti estote, quoniam ego Sanctus sum; perfectissimè parvistis: impetrate, ut easdem voces audiamus, iisdem vocibus pareamus, & cor mundum creet in nobis Deus, & Spiritum rectum innovet in visceribus nostris. Mentes nostras in illum convertite, in quem semper prospicere desiderastis, ut eundem, & nos semper aspicientes, semper diligamus, & quem indè tenorem constantiæ, vitæque candorem hausistis, hauriamus.

4 Fuit vita vestra brevissima, sed brevitate excellentia compensavit. Paucis momentis explevistis tempora multa, & cursu vix inito, longissimum iter emensi, bravium comprehendistis.

Nos verò tandiū viximus, & adhuc vivere non didicimus. Dies diebus succedunt, & noctes noctibus; ut diebus, & noctibus Laudes Dei concinentibus, nostras Laudes addamus; & nostri immemores muneris, mutique ad celebrandum Nomen illius, qui laudem perficit ex ore infantium, atque lactentium, omnibus diebus vitæ nostræ somno torpemus, & otio. Dies diei eructat Verbum. Ps. 18. 2,

Hoc

Meditatio I.

7

Hoc est unus dies peracto cursu, & prædicatione sua tradit sequenti diei Verbum prædicationis: & nox nocti indicat scientiam, hoc est, nox similiter suo cursu perfecto, ac veluti Hymno cantato, tradit nocti sequenti scientiam laudandi Deum, ut sine ulla intermissione, diebus, & noctibus Choreas ducentibus laudetur Deus. Si hæc ita se habent, qui fieri potest, ut vita nostra, quæ his diebus, quæ noctibus hisce componitur, quid sit laudare Deum in Cythara, & Psalterio decem Chordarum, adhuc ignoret?

Conditi sumus ad laudandum Deum, ex cognitione Creaturarum, quæ teste D. Basilio, & Augustino per cytharam ex inferiori parte resonantem significatur. Bellarm. in Psal. 32. 2.

Conditi sumus ad Deum voce, operibusq; laudandum ex cognitione Scripturarum, quæ per Psalterium resonans ex parte superiori, adumbrantur. At quid hæcenus egimus? aut agimus? Numquid per ea, quæ facta sunt, invisibilia Dei conspiciere nitimur? Numquid scrutamur Scripturas, & jugi Divinorum Eloquiorum consideratione, illum nosse contendimus, à quo, per quem, & propter quem conditi sumus?

Quid prodest diù vivere, & ita vivere? Momentum quodlibet iemen est Æternitatis, & quidem, si volumus Æternitatis beatæ. Nam quæ seminaverimus, hæc, & metemus; quoniam qui seminat in car-

ne sua, de carne & metet corruptionem :
qui autem seminat in Spiritu de Spiritu
metet Vitam æternam.

Animum intendamus in eos, qui consummato brevi temporis cursu, pluraque tempora expleverunt, paucisque præliis innumeros Hostes fuderunt, innumeras retulere victorias, ut horum, & præcipue Angelorum exemplis excitati, quæ amissimus, reparemus; quæ inutiliter sparsimus, colligamus, & omni torpore seposito cursum acceleremus, donec comprehendamus: totaque contentione pugnemus, donec certantes legitimè coronemur.

5 Verùm qua rerum gestarum gloria excellere potuit Angelica Vita, ita exiguis finibus circumscripta? Vix enim aggressa certamen, coronata est. Dictu sanè mirabile est, sed extrà omnem dubitationem est Spiritus universos condignis operibus immensum gloriæ pondus assequutos fuisse, & ex iis quam plurimos, tot sibi merita comparasse, quot per multos annos innumeri Anachoretæ inter quercus, & fagos: in speluncis, & Cavernis Terræ: quot innocentes innumeri, quantò innocentiores, tantò austeriores, & Poenitentia amantiores: quot innumeri Martyres compararunt, angustiiati, afflicti, circumcunctes in melorii, in pellibus caprinis; in Carceres coniecti; Feris obiecti: è saxis præcipitati; securi percussi. Qua ratione gloriosi Triumphatores tot rerum gestarum

rum gloriam paucis momentis, & æquastis, & superastis?

Benedicant omnia opera Domini Domino, quia ita feliciter in hunc Mundum venistis, vidistis, vicistis, & ita gloriose vicistis. Vestra vobis decora gratulamur. & ex toto corde gaudemus.

Quoniam verò de illo, in quo sunt omnes Thesauri Sapientiæ, & Scientiæ Dei, ita divites fuistis, & estis; ad Pauperes, & Egenos benigna ora convertite, & egestati nostræ consulite. Ut autem libentius consulatis:

Erimus primò accuratiores temporis Æstimatores, atq; Custodes. Nulla desideribus, & nihil agentibus diei particula, quantumvis minima præteribit.

Erimus secundò, Non solum Captatores, sed Indagatores cuiuslibet opportunitatis, boniq; operis ad Majorem Dei Gloriam procurandam in nobis, & aliis.

Erimus tertio, Ardentiores in agendo, quod agimus. Toto conatu, totis viribus insudabimus vitiis exterminandis, virtutibus acquirendis, & præcipuè studio rectæ intentionis, divinæq; Charitatis augendæ, sine qua nihil sumus juxta Doctrinam Apostoli 1. ad Chorint. 13. 1. dicenti: Si linguis hominum loquar, & Angelorum, charitatem autem non habeam, factus sum velut æs sonans, aut cymbalum tinniens. Et si habuero Prophetiam, & noverim Mysteria omnia, & omnem scientiam; & si habuero omnem

Fidem, ità ut montes transferam, Charitatem autem non habuero: Nihil sum.

6 Libet ultimò considerare Præstantissimi Spiritus, quo potissimum medio præter ea, quæ diximus, usi fueritis ad consummationem vestræ Perfectionis, & sanctitatis.

Singulare præ cæteris medium fuit, prudentissimus usus omnium mediorum, quibus ad hoc instructi fuistis, ut Sancti essetis. Media fuerunt nobilitas Naturæ vestræ, ab omni materia secretæ, Indolis Celsitudo, Perspicacia Intellectus, Robur Voluntatis. Media fuerunt tot vestigia Divinarum Perfectionum, in rebus conditis elucentium. Revelatio arcanorum mira luce mentes vestras perfundentium. Voces arcanae Divini Spiritus vocantis, moventis, inflammantis, ad æternum Templum suæ Divinitati excitandum in vobis. His omnibus, aliisque nobis incognitis mediis sagacissimè usi consumastis ædificium, quod intra vos extruendum acceperatis. Nulli studio defuistis. Nulli oculos lumini clausistis. Nulli pepercistis labori.

Nos verò, quibus, ut infirmioribus, Divina Clementia multò plura media suppeditavit ad salutem, ad sanctitatem: ipsa beneficia convertimus in exitium Animarum nostrarum; & in dedecus, & injurias Donatoris. Acceperamus Corpus, vires, valetudinem, exteriores sensus, & interiores, yim intelligendi, li-

ber,

bertatem, divitias, delicias, & quicquid habemus, & sumus ad Laudem, & servitutem Authori nostro exhibendam. Hæc omnia fecimus instrumenta peccandi. Bonum summum, & bona caduca novimus, & Bonum summum, & indeficiens Bonis vilitissimis, & fugacissimis posthabuimus. Si non aspeximus, certè credidimus, Filium Dei in Terris visum esse, & cum Homini- bus conversatum, & Crucifixum, & mortuum esse prò toto Mundo, & nobis: & antequam moreretur, lavisse pedes Discipulorum, & illis post Lotionem pedum se præbuisse manducandum, & bibendum, & nos ab eadem Mensam sæpissimè sedimus, & sedemus: & adhuc vitiis omnibus obnoxii, adhuc superbi, iracundi, nostra quærentes, Cælo, terræq; dedecori sumus.

Proh dolor! Quando evigilabimus? Quando Amor Æterni Boni, omnis alterius Boni Amorem extinguet, efficietque, ut nobis mori discamus à vobis, qui mortalitatis omnis expertes, ità Bonis omnibus, vobisque mortui fuistis, ut viventem de vobis Holtiam, Sanctam, placentem, & in odorem suavitatis ardentem obtuleritis.

OC OOC [M] [M] [M] JO

MEDITATIO II.

De Superbia Malorum, ac de Humilitate Spirituum Electorum.

Filius Dei humanam assumpturus naturam dum se per Fidem proponit Angelis paulò antè conditis, in speciem servi, quod erat multò post nobis clarè dicturus, illis dixit obscurius : Discite a me, quia mitis sum, & Humilis corde.

Non placuerunt Verba Sapientiæ Lucifero tanta Sapientia prædito. Cur autem non placuerunt? quia nimium sibi plecuit. Eleuatum est Cor tuum in decore tuo. Perdidisti Sapientiam tuam in decore tuo dicit Dominus, Ezechial. 28. 17.

Quid portentosius, quam pluris facere Sapientiam suam, quam Sapientiam Patris, & eleuari coram Altissimo in terram vsq; dejecto? Nulla sanè huic audaciæ conferri potest audaciā; quantumuis Lucifer plenus esset decore, & omnis lapis pretiosus esset operimentum ejus, ut habetur Ezech. 28. 13.

Tu verò N. Peccator vilissime, Tu pulvis, & cinis. Tu putredo, & vermis, quid habes undè superbias? si esses plenus Sapientia, si perfectus decore, si gemmarum omnium splendore præfulgens, ut Lucifer; ad-
huc

huc deberes ad centrum usque terræ infrā pedes omnium Peccatorum caput demittere, tuamque indignitatem, & nihilum profiteri. Quid enim haberes, quod non accepisses? Jam verò quis ferat elationem tuam? Quis ferat extollētiam oculorum tuorum, à qua tantoperè desiderabat Sapiens liberari, Ecclesiastici. 23. 4. dicens: Domine Pater. & Deus vitæ meæ, ne derelinquas me in cogitatu illorum, nempè inimicorum. Extollentiam oculorum meorum ne dederis mihi, & omne desiderium averte à me.

Cum sis ità Pauper, & ità superbus, memor esto, quid dicat Spiritus Sapientiae Ecclesiastici 25. 3. Tres species odit Anima mea, & aggravor valdè Animæ illorum. Pauperem superbum, Divitem mendacem, Senem fatuum, & insecutum.

Si quærat aliquis, quam ex classibus enumeratis magis oderit Deus, animadvertat primo loco recenseri classem Pauperum superborum.

2. Ad Superbiam totis viribus fugiendam, videamus, quot malorum origo fuerit superbia Regi super omnes filios superbiæ.

Malum primum ijs verbis exprimitur Ezech. 28. 16. In multitudine negotiationis tuæ repleta sunt interiora tua iniquitate. Negotiatio Luciferi, qua dedit operam, ut omnes socios in suam sententiam adduceret, & qua secum perdidit tertiam partem stellarum, replevit illius interiora iniqui-

qui.

quitate, non unius tantum sceleris, sed plurimum, & ferè innumerabilium. Tot enim patravit scelera, quot perdere voluit.

Timeant superbi. Elatus enim superbia præceps agitur in alia peccata plurima, quæ sæpè occultissima sunt, & ideo superbia dicitur implere iniquitate interiora peccantis.

Malum secundum; Ejeci te de Monte Dei, & perdidisti te de medio lapidum Ignitorum.

De Cælo superbus ejicitur, quia Deus superbis resistit, & Luciferi exemplo volentes in Cælum conscendere, & super astra Dei exaltare solium suum, de sede sua deponit. Et perditur de medio Lapidum Ignitorum, hoc est spirituum charitate flagrantium: quia superbus non collocat sedem suam ad meridiem, sed in lateribus Aquilonis. Cupiens autem lucere magis, quam ardere, omnis caloris fit expers, geritque cor in visceribus suis rigidissimo gelu concretum. Si cor durum male habebit in novissimo. Ecclesiastici 3. 27. quid erit dicendum de corde, quod totius Aquilonis duritia obfirmavit in malo?

Malum tertium. In terram projeci te, ante faciem Regum dedi te, ut cerne-
rent te.

Quoniam superbus terrenis solum, & fluxis honoribus inhians, Terram Cælo præponit, in terram projicitur cum ipsa terra calcandus, & conterendus. Rursum, quia magis optat videri, quam esse, & inani plau-

su, levibusque acclamationibus pascitur; omni vero honore spoliatur, & ante faciem Regum statuitur, hoc est omnium Iustorum, qui verissimè Reges sunt, & Filij excelsi omnes: ut cernatur humiliatus, abiectus, omniq; dignus opprobrio, ac derisione. Neq; Rîsus rideri, neq; poterit contemptus iste contemni. Qualis erit confusio tua superbe Peccator in die novissima, in totius Orbis Theatro, coram Sapientissimis Regibus nullo errore deceptis, nulla perturbatione commotis, contemni eo contemptus genere, qui nulla poterit ratione contemni?

3. Malum quartum. In multitudine iniquitatum tuarum, & iniquitate negotiationis tuæ polluisti sanctificationem tuam.

Sanctificatio Luciferi fuerat eximia participatio illius sanctitatis, quæ Filius Dei est speculum sine macula Dei majestatis, & Candor Lucis æternæ. Turpîtudo, & Immunditia superbiæ tantum Candorem Lucifero communicatum infecit spiritumque purissimum fecit immundissimum. Noluît Lucifer obsequium exhibere Sancto, Innocenti, Impolluto, segregato à Peccatoribus: Idèò omni contaminatione pollutus, erit semper Peccator, & segregatus ab illo, qui peccatum non fecit, fecitque ut peccatum finem acciperet. Daniel. 9. 24. Quicumque de acceptis donis instantur, totis artibus contremiscant; & quo sanctiores fuerunt, magis metuant. De mundis enim fient immundi, fient immundissimi. Cur enim illos, de quibus agit Apostolus, ad Rom.

Rom. 1. 26. tradidit Deus in passionēs ignominia? Cur tradidit in desideria cordis eorum, in immunditiam, ut contumelijs afficiant corpora sua in semetipsis? nisi quia cum cognovissent Deum, non sicut Deum glorificaverunt, aut gratias egerunt, sed evanuerunt in cogitationibus suis?

Malum quintum. Producam ergo ignem de medio tui, qui comendat te, & dabo te in cinerem super terram in conspectu omnium videntium te.

Ignis, qui de medio Luciferi, omnisque Superbi producit, est dolor, desperatio, horribilisq; tristitia, quæ in morem ignis incendit, & comedit, & in cineres seræ nimis Penitentia? resolvit Superbum, in conspectu omnium videntium confusionem intolerabilem, & inutilem Penitentiam. Superbi dum tempus habetis operamini bonum, & salutarem agite Poenitentiam.

Malum sextum. Omnes, qui viderint te in Gentibus obstupescant super Te. Nihilifactus es, & non eis in perpetuum.

Omnes obstupescant, quod superbus ad Imaginem Dei conditus, & olim per Gratiā sanctificatē signaculū similitudinis, plenus sapientia, & perfectus decore, in tantam vilitatem, e tanta dignitate corruerit, dicaturque de illo: Nihilifactus es, & non eris in perpetuum.

Nihili fit, imò fit nihil superbus, quia si omnia, quæ sunt, se habent tamquam non sint, corā eo, qui solus est, qui est; quid erit

coram Deo Peccator, & maximè superbus, cui melius, erat, si natus non fuisset? Nihil est, & nihil erit, & ideo illi dicitur. Non eris in perpetuum; quid enim esse potest, qui sine Deo est?

4 Vidimus Angelos de Coeli Aquilis versos in dracones deserti: Videamus Angelos de syderibus versos in rotas Diuini currus, de quibus dicitur Ezech. 1. 18. quod erant plene oculis in circuitu, & quocumq; ibat Spiritus, illuc eunte spiritu, & rotæ pariter eleuabantur, sequentes eum. Spiritus enim vitæ erat in rotis.

Ideo ad prima Verba Domini dicentis: Discite à me, quia mitis sū, & humilis corde, quid fecerunt, qui pleni erant oculis ad intuitum, & in modum rotarum maximè mobiles, ad motum Spiritus viuientis, & agentis, qui erat in ipsis? Numquid perturbati? Numquid indignatione commoti; quia Filius Dei non Angelos apprehendit, sed semen Abrahamæ apprehendit? Numquid in ancipiti positi, quid sibi deliberandum esset dubitauerunt? Immò Divina Consilia reveriti, sub Potenti manu Dei sua Capita humiliaverunt, & cum fuissent à primordio suæ conditionis humillimi, facti sunt humiliores.

Quo enim studio humilitatis arserunt, considerantes per lumen Fidei, & Sapientiae infusæ Filium Dei in formam servi exinanitum? Quod si ad formam servi mentibus suis obiectam, tanta admiratione defixi sunt: quid illos fecisse credamus, ad
spe-

speciem peccatoris? Quid ad speciem peccatoris è Cruce pendentis, & morientis in Cruce, & in Sepulchro jacentis?

Miremur, & nos, quod Angeli mirati sunt, & conemur discere, quod illi didicerunt. Pluribus enim, & gravioribus rationum momentis nos ad id urgemur, quam illi. Nostram enim ille substantiam assumpsit, non illorum. Deinde loquens de nobis dixit. Deliciæ meæ esse cum filiis hominum. Nusquam simile de Angelis affirmavit: denique, ut alia omittamus, pro Peccatoribus Hominibus mortuus est, non Angelis: & quidem pro illis ipsissimis mortuus est, à quibus occisus est: ut omnes ad ipsius normam parvuli efficeremur, & sic ipso Viæ Duce, ipso Auspice Regnum eius intraremus.

5. Sed ut redeamus ad Angélos Verbum Carnem factum considerantes, & illius verba ad humilitatem discendam exhortatoria excipientes, illud prætereà attendamus, quod nō inania solum, & inefficacia Humilitatis desideria conceperunt, sed Amore Domini mortalitatem nostram assumpturi, & opprobrijs saturandi, & mortem acerbissimam appetituri, ad infima quæque ministeria se obtulerunt, & propter ipsū, & propter eos, qui hæreditatem capiunt salutis.

Non solum igitur Humanitati assumptæ cultum omnem exhibuerunt: Non solum Diuinam Parentem in Reginam, ac Dominam salutarunt. Non solum Apostolos Martyres, Sanctosq; omnes, tamquā socios,
& Re-

& Regni consortes totis viribus complexi sunt: sed Peccatoribus omnibus custodiendis, erudiendis, & ad omnem virtutem informandis, sedulam se navaturos operam sponponderunt.

Discamus primò à BB. Spiritibus singulare studium Pietatis ergà Dominum, Incarnatum, nobiscum agitâtes, quo ingrati animi vicio hæctenus laboraverimus erga tot Beneficiorum Authorem, nostræque Naturæ in se ipso Exaltatorem: quia parvuli humilitate non fuimus, & illius parvitatem, ingratiſsimè simul, & superbissimè parvipendimus.

Discamus secūdo Omne genus obsequii, & Subiectionis erga Virginem Matrem, cælique Curiam vniuersam, Beati Spiritus Matrem Domini vix cognitam, & solum in Spiritu, & fortasse valde obscure cognitam, ità enixè coluerunt; nos verò totam illius vitam apprimè tenemus, & ità frigidi sumus in colendo, & illi seruiendo, quam ità sæpè contemplati sumus, aut Filium parientem, aut in Templo Patri offerentem, aut Hierosolymis amissum quærentem, aut Crucifixum, extinctumque lugètem. Quod de Regina Sanctorum diximus, de Sanctis omnibus proportionè servata dicendum.

Discamus tertio Implere desiderio, quod opere exercere non possumus. Nondum erant Peccatores, nondum terrarum orbem repleverant ærumnis, lacrymis, & peccatis suis; & nihilominus Benignissimi nostræ Mortalitatis Amatores, omnium Inco-

lu.

luminati consulere desiderarunt, omnium Ignorantiam depellere, omnium lateri adhærere, omnium Infirmitatem portare, omnes à vitijs ad Virtutem, à Morte ad Vitam, à Carcere ad Regni solium traducere.

Et nos igitur studio Humilitatis simul, & Charitatis, quibus Peccatoribus opem re ipsa ferre non possumus, feramus precibus, gemitibus, sanctisque desiderijs. Et quidem feramus opem omnibus vbique terrarum degentibus, omnibus licet vilissimis, flagitiosissimis; perditissimis: omnibus, quantum vis rebellibus Lumini, rebellibus Deo, Inimicis omnis Iustitiæ, Inimicis Ecclesiæ, & præ omnibus Inimicis nostris. Sic Humilitatis, & charitatis Angelicæ Imitatores, non exigua nobis præ nostra tenuitate, merita comparabimus.

6. Unum adhuc in Sanctis Angelis ad illorum Humilitatem, & Sanctitatem perspiciendam attendamus. Non erant dolorum Corporeorum capaces, & mortis: sed quia tristari poterant, & haberi contemptui & foecitate carere: & ex alia parte cogitantes Dominum, qui voluit præ Peccatoribus pavere, tædio, & mœrore confici, & opprobrijs saturari: ardentissimè desiderarunt illius exemplo tristitiam experiri: desiderarunt haberi contemptui, & ipsa Beatitudine, si licuisset, carere, ut omni gloria spoliati Divinæ Gloriæ cooperarentur, & omni confusione repleti, æterna confusione peccatores eriperent. Si enim Aposto-

lus

lus cupiebat Anathema esse prò Fratribus suis: & si Moyſes. Exod. 32.31. dicebat ad Dominum: Obſecro, peccavit Populus iſte peccatum maximum; teceruntque ſibi Deos aureos; aut dimitte eis hanc noxam: aut ſi nō facis, dele me de Libro quem ſcripſiſti. Si dicebat inquam hoc Moyſes, quid non dixiſſe cenſebimus Sacraſiſimos Spiritus demirantes Filium Dei è Coelo demiſſum in terras, ut Coelo Terras inferret; factumque Hominem Pauperem, contemptum, opprobrium hominum, & abiectionem plebis, ut Hominem exaltaret?

Singula perpendamus, & è ſingulis fructum aliquem decerpere enitamur, illud præcipuè præoculis habentes, quod ſi digni omni Gloria, omni veneratione, omni felicitàte non recuſarunt, immò, quantum in ipſis erat enixè optaverunt neſciri, prò nihilo reputari, & haberi contemptui, omni confuſione repleti, Amore Immortalis, Mortalitem Induti; amore Summi Divitis, ad ſummam egeſtatem redacti; Amore Sapientis, in quo ſunt omnes Theſauri ſapientiæ, & ſcientiæ Dei, prò ſtulto habiti: Cur nos omnis ludibrii impatientes ſumus qui digni ſumus omni ludibrio? Cur ſapientes haberi volumus, qui ſumus inſipientiſſimi? Cur nos inanis Gloriæ ità cupidi ſumus, quos manet, niſi contracta debita oblitterentur, æterna confuſio?

Et quidem ità leves, ità ſuperbi ſumus; poſtquam Ille, qui ſummus eſt, factus eſt omnium Inſimus; & poſtquam ad Altissi-
mi

mi pedes ità demissi, vidimus Gloriosissimos Coeli Principes, una cum Principe suo Michaelē demissos, humiliatos, & abiectis coronis abiectos.

MEDITATIO III.

De Charitate Domini.

*Humanam assumentis Naturam
Relucente in Charitate Beatorum Spirituum.*

Archangelus Gabriel à Deo mittitur in Civitatem Galileę cui nomen Nazareth. Lucæ 1. 26.

Non egrè fert Princeps clarissimus in terras è Cœlo delabi, desertaq; Civitate auro, gemmisq; fulgente intrare Nazareth, intrare domum luteam, angustisque exceptus parietibus Legatione sua defungi, ut imperata faciat, & Mundo jacenti succurrat. Ità sui Principis est amans Orator, & propter Principem Amator est Mundi.

Verum quid isti Charitati communis, cum Charitate Verbi carnem induentis? Ille de Cœlo venit in terras, de Beata Hierosolyma in Oppidum Nazarenum, de Palatio Regis æterni in pauperulæ Domum: At Verbum de sinu Patris, venit in sinum

Vir-

Virginis, & magni consilii Angelus angustissimi sinus receptus Hospitio, ostendere incipit suæ Latitudinem Charitatis, & Patris sui apud nos Legatum agere.

Magna sanè distantia inter Coelum, terrasque, inter Omnipotentis Regiam, & exiguam, pauperemque domum, quam Coelestis Nuncius, qui Fortitudo Dei nominatur, ingreditur. Sed quantò major distantia inter sinum Patris in quo, & ex quo nascitur Deus de Deo, Deus verus de Deo vero: & sinum Virginis, ubi concipitur Filius Hominis Mortalis, de mortali, Infirmus de infirmo? O' altissimam Charitatè è summa Celsitudine sedemittentis in profundissimam nostræ mortalitatis profunditatem! O' Charitatem Immensam de Immenso in formam pulveris exinaniti!

Quid agimus pulvis, & cinis antè Dominum ità nostri pulveris Amatorem, ut non solum pulvis fieri voluerit; non solum pulvere nostro in morem Penitentis caput aspergere, totoque vitæ tempore propter peccata, quæ non fecerat in pulvere jace-re; sed præterea in pulverem redigi, & posse dicere ad Patrem suum: In pulverem mortis deduxisti me: Psalm. 21. 16. ut nos de pulvere suscitaret, & qui pulvis sumus, esse pulverem doceret?

Cur ergo pulvis, & umbra, non amamus Lucem Sapientiæ, cur non amamus divitias Bonitatis illius, qui nostras tenebras, pulveremque ità dilexit? Cur non ama-

amamus Naturæ sublimitatem ; Cur Immensitatem Amoris non diligimus, quo ille nostram vilitatem, nostrasque ita dilexit angustias ? Ille descendit ad nos, ut ascendamus ad ipsum . Exinanitus est in nobis, ut in ipso magni efficiamur . A' nobis igitur ascendamus ad ipsum . Et contemplando, & amando, & ipsi in salutem Animarum cooperando magni efficiamur per ipsum, & in ipso .

2 Lucæ 1.28. Ingressus Angelus ad eam dixit : Ave gratia plena &c. Ne timeas Maria &c.

Facundus Orator humani Generis causam strenuè peracturus, ex mente Regis, à quo mittebatur, timentem bono animo esse jubet, præsentia simul, & futura bona recensens, quibus dubitantis animus poterat confirmari. Præsentia sunt ; Invenisti gratiam apud Deum ; præter illa, quæ jam commemoraverat dicens : Ave Gratia plena, Dominus tecum, Benedicta tu in mulieribus . Futura sunt : Ecce concipies in utero, & paries Filium, & vocabis Nomen ejus JESUM ; Hic erit Magnus, & Filius Altissimi vocabitur . Utroque argumento nititur confirmare dubiam, & inducere ad dicendum : Ecce Ancilla Domini .

Quot, & quanta debemus amabili planè, amantique Legato, qui tanta dexteritate nostrum agit negotium ? Sed quantò plura debemus Verbo ? Angelus exterius, Verbum loquebatur interiùs . Dicebat Angelus :

gelus: Ne timeas Maria; invenisti enim gratiam apud Deum. Dicebat Verbum: Ego sum. Noli timere. Invenisti gratiam apud Patrem meum. Invenisti gratiam apud me. Noli timere. Angelus loquendo, suadebat. Verbum loquendo faciebat, quod loquebatur; donec ad illa verba jam corde concepta, & jam jam de ore Virginis erumpentia; Ecce Ancilla Domini, fiat mihi secundum verbum tuum; Verbum caro fieret, & per quod facta sunt omnia, omnia reficerentur, & cum aliis ego reficerer, cunctisque in melius restauratis dici posset: Vidit Deus cuncta, quæ fecerat, & mirabilius refecerat, & erant valde bona.

Per ineffabilem istam, cui nihil addi potest, Charitatem, refice Domine in me opus, quod ego perdidi. Destruere quod ego feci. Renova, quod ipse fecisti. Cor mundum crea in me, ut possim diligere Te, cuncta restaurantem exinanitione tua, Spiritum rectum innova in visceribus meis, ut rectus Rectitudini tuæ cohærens loqui non desinam ad Te, qui cuncta loquendo fecisti, & perdita reficiens, meliora fecisti.

Ut Cor mundum crees in me, projiciam à me omnes iniquitates meas, recogitabo tibi omnes annos meos, in amaritudine animæ meæ, & erunt mihi lacrymæ meæ panes die, ac nocte. Psal. 41. 8.

Ut spiritum rectum innoves in visceribus meis, cupiditates omnes distortas

B

exuam,

exuam ; ambulabo coram Te simplici corde, per vias rectas, per semitam mandatorum tuorum, Unum cogitans, Unum quærens, ad Unum, in quo sunt omnia, suspirans, & aspirans.

Ut annumeres me operibus locutione tua factis, & reſectis, aperiā aures loquenti, ut seridè intelligam, quid seruo ſoquatur Dominus meus.

3 Dixit MARIA ad Angelum: Ecce Ancilla Domini fiat mihi ſecundum Verbum tuum. Et diſceſſit ab ea Angelus. Lucæ 1. 38.

Magna ſanè Charitas Angeli, qui à cæptis non deſtitit, niſi poſtquam conſenſum, quem intendebat, expreſſit. Quid dixerit, & quid egerit, notum eſt. Quomodò verò, & quo affectu cauſam demandatam egerit, quo ſtudio deſideraverit omnibus, & ſingulis, & maximis peccatoribus opitulari, & omne genus Juſtitie, virtutiſque in Orbem ſcleribus cooperatum introducere, ignotum eſt. Menſuram ardentis animi unusquiſque deſumat à Charitate, qua Sacraſſimus Spiritus Verbum complectebatur, totumque Mundum Peccatorem propter Verbum.

Sed quid ſunt hæc omnia, ſi cum illa Charitate componantur, de qua dixit Dominus. In Charitate perpetua dilexi te Jeremiæ 31. 3. Illud potiffimum attendatur, quod Angelus ſua legatione functus diſceſſit. Non ſic Magni Conſilii Angelus miſſus à Patre. Non ſolum ſtat ad oſtium,
& pul-

& pulsat . Non solum petit ut sibi aperia-
tur . Non solum patienter expectat ad ja-
nuam . Sed reſerata janua ingreditur ,
ingreſſusque non diſcedit , poſtquam con-
ſenſum , quem deſiderabat , obtinuit . Ga-
brielem Archangelum ad multas horas lo-
cutum eſſe cum Virgine aliqui arbitran-
tur . Angelorum Dominus novem Menſi-
bus in Utero Virginis manet . Et Uteri
Virginalis non horret anguſtias , non te-
nebras , non incommoda : & nobiſcum ,
futurus uſque ad conſummationem ſæculi
ſub ſpecie panis , & vini , incipit habita-
re nobiſcum , in veriſſima forma Infantis ,
quamvis Infantiam neſcientis . Erat enim
Verbum Infans vir perfectus ratione Sa-
pientiæ etiam humanæ , & Sanctitatis . Et
hoc ipſam magnitudinem Charitatis oſtē-
debat . Nam ſub Infantis exuviis vir per-
fectus in Matris alvo moleſtias experieba-
tur , quas ceteri ignorant Infantes . Non
diſcedit tamen , ſed manet .

Veni Domine ad me , & ne diſcedas à
me . Magna poſtulo , ſed à magno ; & ma-
gnitudinem omnium iniquitatum mea-
rum , & magnitudinem indignitatis aufer-
re potente . Magna poſtulo , ſed ab illo ,
cuius magnitudinis non eſt finis , & cuius
Charitatis latitudo , tanta eſt , quanta eſt
altitudo , & longitudo , & profundum .

Ut non diſcedas à nobis , non diſcede-
mus à Te , ſed manebimus in te ſemper co-
gitando de Te , & amando latitudinem ,
& longitudinem Amoris tui , altitudinem ,
& profundum .

4 Divus Augustinus lib. 22. de Civitate Dei cap. 29. Sic sunt, inquit, Angeli nostri, qui sunt Angeli Dei, quemadmodum Christus Dei, Christus est noster. Dei sunt, quia Deum non reliquerunt. Nostri sunt, quia suos Cives nos habere ceperunt.

Si Angeli Dei sunt, & nostri sunt; non solus Archangelus Gabriel Virginem salutavit antequam Verbum Caro fieret. Ceteri etiam Angeli salutarunt. Ille quidem sub specie visibili. Hi verò invisibiliter. Igitur Magni Oratoris comites, allocutione sub sensum non cadente Virginem allocuti sunt, Invisibiliter ab ea consensum expetiverunt, Invisibiliter quicquid ille cogitavit, dixit, perfecit, approbarunt amore Verbi, & amore Mundi propter Verbum dilecti.

Gratias adiutoribus nostris agamus, & miremur in singulorum cordibus illum ignem ardere, quem communis Dominus mittere venit in terras, & vult ubique vehementer accendi. Ipsi antè Homines incendium amabile experti sunt; & quia ipsi esca sunt Amoris sui, ideò nunquam alimentum concepto semel non suffecit incendio. Ideò tam ardentè optarunt Adventum ejus in Mundum, qui de Cœlo missurus erat ignem, quo Cælum ardet.

Si tales flammæ è spiritibus singulis, tamquam ruptis montium fornacibus exundabant, quali, quantoque Amore flagravit Ille, ad cujus flammās nullis finibus circumscriptas omne evanescit incendium,

dium, in morem scintillæ tenuis, & in ipso morientis exortu?

O' Amor Coeli, Terræque! O' Amor Angelorum, & Hominum! O' Amor Patris tui! Sicuti Coelum, ita igne Amoris tui Terras incende. Discant Terræ, discant rupes, & saxa, discant Maria durissima glacie rigentia, Te diligente, diligere diligentem. Feræ sumus Peccatores omnes, feræ indomitæ, & ad omnem indociles disciplinam. Rupes inhospitæ sumus, & saxa, nulli operi, nulli malleatoris ferro, nulli idonea tunsioni. Denique quid remotius ab amando, quam Cor Impii, sive dicatur Mare ferveas cupiditatibus suis: sive dicatur Mare Glaciatum obæcatione intellectus, & obfirmatione voluntatis in pacto cum Morte inito?

Hæc omnia sumus, Fili Dei summa dilectione digne. Hæc omnia sumus. Sed si vis desinemus esse quod sumus, & amabimus Te, qui fecisti ut essemus, primò quidem venientes in hunc Mundum: postea verò longè perfectiori modo, Te in hunc Mundum veniente. Venientes enim in hunc Mundum illuminasti. Veniens in hunc Mundum inflammasti; iis exceptis, qui acceperunt in vano animam suam. Fecisti ut essemus ad intelligendum, & diligendum. Ne proicias nos à facie tua inter eos, qui oculos declinaverunt in terram, ne Te intelligerent, neque diligerent.

5 Ex Angelis, qui obsequium invisibi-

le exhibuerunt Reginæ, Regique Mundi, principem, locum obtinet Princeps Cælestis Militiæ. Qui enim à die conditionis suæ pro Gloria Verbi in hunc Mundum, sub humana specie venturi pugnâvit adversus Draconem: quid egisse arbitrari-
mur quo tempore de ineffabilis executione consilii agebatur cum Virgine caput contritura Serpentis? Qui primus obstitit nefario Desertori, qui primus in officio continuit majorem, & meliorem partem Exercitus Dei Exercituum: Qui primus dixit: quis ut Deus, undè & nomen sortitus est, prædicans, & amans, & ad amandum inflammans Magnitudinem, Majestatem, Potentiam, Sapientiam, Sanctitatem Dei in se ipso; & eadem contentione vocis, atque facundiæ, prædicans exinanitionem, Parvitatem, Paupertatem, Infirmitatem Dei extrâ se ipsum, in assumpta videlicet Natura: quo ardore præ omnibus aliis Angelis audire optavit à Vergine: Ecce Ancilla Domini, fiat mihi secundum Verbum tuum? Ad hæc enim verba ille concipiendus erat, per quem ipse in veritate stetit: per quem socios suos secum in veritate stetisse gavi-
sus est: per quem Homines Angelorum, Concives, & Regni Cohæredes, immò ipsius Christi Cohæredes, erant efficiendi?

Si omnia Luciferi decora, immò longè plura, & perfectiora Michaeli collata sunt: si omnis lapis pretiosus operimentum ejus; si præ omnibus fuit, & est si-
gna;

gnaculum similitudinis, plenus Sapia, & perfectus decore, quoniam ex omnibus Filio Dei similior Michael? Et quidem, similior magnitudine, similior parvitate, similior Charitate?

Ita planè est. Meminerimus tamen similitudinem istam, infinita distantia distare à Magnitudine, à Parvitate, à Charitate Verbi Omnipotentis exinaniti in formam Servi, & in utraque Natura ineffabiliter amantis Opera manuum suarum.

Ego Domine Deus meus contendo cognoscere Te in operibus manuum tuarum, & præstantissima eligo ad Te cognoscendum in ipsis, & ex ipsis: & licet multum caliginis offundant menti meæ peccata mea, cognosco tamen Te, juvante Te, quantum patitur tenuitas mea, & longè magis, quam merear, cognosco Te, sed non amo Te, ita vehementer amantem Mundum Peccatorem, & me. De Luce, qua illuminas me gratias ago. De ardore, qui culpa mea non sequitur ad Lucem, hanc, multum doleo. Quid agam, ut amem?

Desinam primò amare me, quia ego sum ille peccator, amore cujus perditissimo, non amavi Te.

Deindè ut desinam amare me, considerabo me. Considerabo vilitatem, paupertatem, deformitatem Animæ meæ, licet ita fuerit pretiosa in conspectu tuo. Utinam juxta Doctrinam tuam, oderim Animam meam in hoc Mundo, ut eam

in vitam æternam custodiam.

Denique, ut incipiam diligere Te, persequar quantum potero vestigia pulchritudinis tuæ in Operibus tuis; & præcipuè, post Matrem tuam, omnia inferiora mirabiliter complectentem, in Archangelo Michael, quem ita similem Tibi fecisti. O si ad cognitionem tui in Operibus tuis cum Beatissimo Archangelo exclamarem: Quis ut Deus? Quis ut Deus?

6 Unum adhuc discrimen, inter Charitatem Angelicam, & Filii Dei, libet advertere. BB. Spiritus Michael, Gabriel, & ceterique dilexerunt Peccatores adhuc incognitos, vel certè obscurissimè cognitos: At Filius Dei secundum utramque Naturam Divinam, & Humanam, exactissimè perspectos habuit, & nihilominus perfectissimè dilexit. Vidit singulos; vidit singulorum dicta, facta, cogitata, vidit sibi adversantes, sibi manus violentas afferrentes, omne genus injuriæ irrogantes: non idcirco tamen decretauit naturam nostram induere, & in Utero Virginis exinaniri, & nesciri, & haberi contemptui, ut prodesset inimicis suis, proditoribus, & interfectoribus suis.

Vidisti ergo Domine JESU Mundum, & ita dilexisti Mundum cum Patre tuo, ut sicut ille dedit Unigenitum suum, ita Unigenitus ejus dederis te ipsum, pro Mundi Vita. Et quod magis in admirationem me rapit: vidisti me, qui Mundi pars sum minima quidem, sed pessima, & ama;

& amasti me . Vidisti omnes dies Vitæ meæ: Tibi numerati fuerunt omnes capilli Capitis mei: Nulla te latuerunt opera manuum mearum: omnes recessus cordis mei, tibi nudi fuerunt, ac aperti; & amasti me: & sicuti prò toto Mundo, ita voluisti exinaniri prò me; ut ab inanitate mea ad plenitudinem tuam me traduces.

Utinam de plenitudine ista possim accipere, ut plenus Studio Humilitatis, Studio Sapientiæ, Studio Charitatis, despiciam me, noverim Te, diligam Te, & neque me, neque aliud quodlibet, nisi propter Te.

MEDITATIO IV.

De Christo Domino

In Ultima Cœna dicente Discipulis suis: Desiderio desideravi hoc Pascha manducare vobiscum, antequam patiar.

Q Vis est, qui dicit: Desiderio desideravi, hoc Pascha manducare vobiscum antequam patiar? Lucæ 22. 12.

Ille nimirum est, qui Aggei 12. 8. dicitur, desideratus cunctis gentibus.

tibus. Et Genes. 49. 26. Desiderium Collum æternorum. Et Cantic. 5. 16. Totus desiderabilis. Et prima Petri 1. 12. In quem desiderant Angeli prospicere.

Dicitur desideratus cunctis Gentibus, quia Gens omnis, quantumvis Barbara, & exlex semper desideravit Regem, in quo omnes dotes Regiæ emerent. In solo autem Christo eminere potuerunt, & possunt.

Dicitur Desiderium Collum Æternorum hoc est Angelorum, atq; Sanctorum, qui ex omnibus Inferioribus tamquam vallibus in ima depressis assurgunt eminentia Sapientiæ, & Sanctitatis, & semper assurgent: ideo dicuntur Colles Æterni.

Dicitur totus Desiderabilis, quia siue consideretur Divinitas cum omnibus Attributis suis: siue Humanitas cum omnibus proprietatibus, & effectibus suis; nihil est in ipso non summè amabile.

Dicitur ultimò. In quem desiderant Angeli prospicere, quia quantò magis Incarnati Verbi Pulchritudinem Angeli admirantur, tantò magis contemplari cupiunt. Sicut enim alloquium, & convictus Sapientiæ non habet amaritudinem, ita non habet fastidium, & satietatem.

Quid ergò Boni desiderat, qui habet omnia Bona in se ipso, & à se ipso? Desiderat Pascha manducare cum Discipulis suis. Nullo indigens Bono, hoc Bonum desiderat, non sibi, sed suis. Imò & sibi, & suis. Bonum enim suorum, suum arbitrat.

eur. Et quoniam Illius sunt quotquot per Discipulos ejus crediderunt, & credunt in ipsum, ideò quod Pascha desiderat manducare cum Discipulis suis desiderat etiam manducare nobiscum.

Si hoc ità se habet, cur ità frigidè cupimus esse, loqui, ad mensam cum illo sedere qui tam ardentè optat esse, loqui, & nobiscum ad mensam discumbere?

Si deposita veteri, novam rationem vitæ instituere volumus, & in primis quidem si volumus esse cum illo, qui de hoc Mundo non est, desinamus esse de hoc Mundo, licet aduc in Mundo esse necesse sit.

Si loqui cupimus cum dicente: ducam illam in solitudinem, & loquar ad cor ejus. Osee 2. 14. non ità solitudinis inimici simus, ut soli cum solo in solitudine Cordis loquamur. Sic nunquam erimus minus soli, quam cum ità soli erimus.

Si denique flagramus desiderio Mensæ Dominicæ, cogitemus sæpè, & intelligamus quam diversis Dapibus instruaturs Mensa Domini, & Mensa dæmoniorum.

2 Quid autem est Pascha, quod manducare desideravit cum discipulis suis?

Pascha, ut plurimum significat Sacrificium Paschale, sive Agnum Paschalem, qui quotannis immolabatur in memoriam Angelipercutientis Ægyptios, parcentis autem Primogenitis Israelitarum, quid cæsi Agni sanguis postibus, & supliminaribus Domorum Hæbrearum erat aspersus.

Et quoniam Agnus iste figura erat veri

Agni pro nobis immolandi, & in Altari Crucis assandi, & nobis sub speciebus Eucharisticis apponendi, ideò, non tam desideravit comedere cum discipulis suis Agnum figuratiuum, quam figuratum.

Desideravit ergo sedere nobiscum ad illam mensam, in qua non legalium Hostiarum carnes manducantur, sed in qua Agnus ille Immaculatus comeditur, quem postquam omnis credentium populus manducavit, ipsissimus, qui sacrificatus est Agnus, & comedentibus distributus, integer perseverat, & viuus. Quid mirabilius nobis optari potest, & quid majus? Quid enim mirabilius victima, quæ quotidie sacrificatur, & nullum vitæ patitur detrimentum: & cum vna sit, tot Mensas instruit carnibus suis, quot sunt Fidelium Ecclesiæ toto Orbe diffusæ? Porro, quid majus illa, quæ continet id, quo majus excogitari non potest. Cur igitur non desideramus, quod summè desiderabile est, & quod nobis desiderat, qui totus desiderabilis est, & qui nihil magis desiderat, quam desiderari?

Ad hoc desiderium excitandum in nobis utamur primò lactucis agrestibus, sinè quibus Paschalis Agnus non comedebatur. Amara Lactucæ Pœnitentiæ ad Palati nauseam depellendam utiles erunt.

Utamur secundo Baculo paschalem victimam comedentium. Accedamus ad Mensam Domini cum Baculo Crucis, illum tenentes manibus, & illi subnixi. Geramus Domini Crucem, non in ore solum, & cor,
de,

de, sed in manibus, agendo, & patiando, & Christi Passionibus communicando.

Vtatur tertio. Zona ad renes succincta, pedumque calceamentis, tamquam iter acturi ab exilio ad Patriam, à terra captivitatis, ad terram melle, & lacte manantem. Si hæc erunt desideria cordis nostri, sicuti desiderabimus Patriam manentem, ita desiderabimus Cibus, qui non perit, sed manet, & sine quo nihil manet.

3 Ubi dicit Dominus: desiderio desideravi hoc Pascha manducare vobiscum?

Dicit in Cœnaculo grandi, strato representante primò quidem Ecclesiam Militantem longè, latèque diffundendam; Deinde Triumphantem longè majoribus spatijs dilatandam, majorique gloria cumulandam. Ad Cœnam igitur ultimam nobis instruendam utitur Cœnaculo grandi, strato, ut locus ipse & latitudinem, & exquisitam rationem sui Amoris ostendat; Amoris videlicet ad omnes Fideles Viatores simul, & Comprehensores extensi: atque adeò non solum usque ad consumationem sæculi, sed in perpetuas æternitates duraturi. Sedent enim, & sessuri sunt ad Mensam eandem Viatores, & Comprehensores. Diverso quidem modo illis, & istis cibus apponitur. Cibus tamen idem est, quo utrique convivæ recreantur. Cibus idem est, per quem Ille manet in nobis, & nos manemus in ipso. Et si Beatis Comprehensores annumerabimur, semper, feliciterque manebimus.

Vide Anima mea, quibus desiderijs possit, ac debeat ineffabili desiderio responderi. Efficace de corde tuo Cœnaculum non angustum, sed grande, illum exceptura, qui stat ad ostium, & pulsat, & intrare desiderat cœnaturus tecum. Noli illiberaliter agere cum Hospite latissimi cordis. Noli dicere. Hoc quidem faciam, sed illud non possum. Si, & illud petat à te, quod non posse tibi videris: dilata cor tuum, & poteris, illo juvante, quod non potes, & poteris, illo volente, velle quod non vis.

Adiunge latitudini cordis ornatum. Sit cœnaculum non solum grande, sed stratum. Mensas tegant munda mantilia, omniumque Virtutum supellex sit mundissima. Relinque suam munditiem Scribis, & Phariseis, qui mundabant, ut innuitur Matthæi 23. 25. quod de foris est Calicis, & Parophsidis: intus autem pleni erant rapina, & immunditia. Absit à cœnaculo tuo ista mundities immundissima.

Decentia denique istius ornatus, accedant prout tua tenuitate delicia. Sternatur floribus pavementum, totaque domus vernis odoribus fragret. Fragrabit autem, si tu Anima mea secundum Apostoli documentum, eris bonus odor Christi.

4 Cur antequam patiatur desiderat Dominus Pascha manducare cum Discipulis suis?

Desiderat primò, ut intelligamus, quam libenti animo patiatur. Ad ostendendam enim dici celebritatem, & pompam, solent

instui Convivia magis splendida, atque solemnia. Quam igitur suæ Passionis dies Domino debet esse lætus, atque Solemnis, ad quem celebrandum ita celebre Convivium instituit? Potestne Convivium excogitari dapibus magis peregrinis, & exquisitis instructum? Si ergo lætitia, quæ dies aliquis celebratur, tanta est quanta est magnificentia Convivij, quod ad celebrandum diem apparatus, quibus finibus contineri potest illa lætitia, si Cœna, quæ præmittitur ad significandam læticiam, infinita est, immensa est, ipse Christus est, quantus est?

Si grati esse volumus Authori Convivij, quanta pati, & quam libenter mori consentaneum esset, prò illo, qui ad gaudium, quo patiebatur, & moriebatur prò nobis declarandum, in unius tantum cœnæ apparatu, omnes thesauros Sapientiæ, & Scientiæ suæ, omnes divitias suæ Bonitatis expendit, ita ut nihil superfuerit profundendum? Quid enim illi poterat superesse, qui non solum quicquid habebat, sed quicquid erat effudit? Ut participes esse possimus gaudij in durissimis quibusque tolerandis, frequenter ad illam mensam accedamus, in qua manducatur, & bibitur Gaudium universæ terræ. Si dat se ipsum, dabit, & gaudium, quo pati, & mori quotidie in nobis ipsis possimus prò ipso.

Desiderat secundo manducare Pascha, cum Discipulis suis, antequam patiatur, ut Fideles doceat quanti momenti sit, habere

re in conspectu Mensam, imò discumbere
ad mensam, quam ille paravit in conspectu
nostro, adversus eos, qui tribulant nos. Si-
cut enim ille proposito sibi gaudio Cru-
cem sustinuit, confusione contempta : ad
Heb. 12.2. ità nos proposito gaudio mensæ
Dominicæ, ad mortē, & omne genus adver-
sitatis perferendum armamur cōfusione, &
omni tribulatione cōtempta. Quod gaudiū
sibi proposuerit ad Crucem sustinēdam cō-
fusione contēpta novit Apostolus, qui scri-
psit. At præter gaudium paternę voluntatis
implendæ, & præter aliud quodlibet nobis
inexploratum, non omittendum sanè illud,
quo de tuo Convivio gavisus est innume-
ritque undique evocandis, & Convivio
adhibendis, & in Authorem Convivij mu-
tatione mirabili transformandis iuxta il-
lud. Cresce, manducabis me, nec tu me
mutabis in te, sed tu mutaberis in me.

Desiderat tertio Palcha manducare
cum Discipulis suis, antequam patiatur, ut
ostendat, nullam malorum impendentium
atrocitatem sibi impedimento esse, quin
accuratissimè cogitet, non solum de salute,
sed de summa fælicitate suis communican-
da, vel inter ipsa pericula, gravissimasque
nostræ mortalitatis ærumnas.

Utinam incensi tanti Amoris exemplo,
nullis malis, sive corporis, sive animi ità
perturbemur, ut quid nobis agendum sit
obliviscamur. Nulla Spes commodi, nulla
instantis mali formido ità nos occupet, ut
non tota contēptione Animi cogitemus de
quo,

quolibet Divinæ Gloriæ incremento, & de obsequio quolibet Amantissimo Reparatori impendendo.

5 Quomodo antequam patiat^{ur} desiderat Dominus Pascha manducare cum Discipulis suis ?

Modus hujus desiderij est sine modo, ut clarum est multipliciter ex premissis . Verum adhuc unum addamus . Dicebat D. Aug. tom. 9. in Epist. B. Ioannis tract. 4. Tota Vita Christiani Boni Sanctum desiderium est . Si rectè Augustinus hoc dixit quid erit dicendum de Vita Christi , undè quilibet Christianus bonus, & undè omne desiderium sanctum est ?

Si quæris ergo, quomodo , seu quo desiderio Christus Dominus desideravit Pascha manducare cum Discipulis suis , desiderio perpetuo desiderasse comperies . Tota enim Vita Christi, qui solus bonus est, sanctum desiderium fuit . Ne autem perpetuitatem hujus desiderij metiamur à Vita humana Christi. Metiamur à diebus Æternitatis , metiamur à Nativitate Verbi in Forma DEI, dicentis . In Charitate perpetua dilexi Te . Gratijs de more persolutis :

Confundamur primò quia si desiderium Christi desiderantis manducare Pascha cum Discipulis suis perpetuum fuit, & est; cur ità rarò mensam istam desideramus, qui Discipuli Domini cupimus appellari ?

Confundamur secundo, quia licet frequentius ad mensam Dominicam accedamus , parum abest quin dicamus : nauscat ani-

anima nostra super cibo isto levissimo?

Confundamur tertio, quia si desiderando, capaces efficimur illius quod desideramus, quando nam efficiemur capaces Boni, quod quia non videmus, non desideramus. Ad hoc penitius, & utilius percipiendū cōsideremus attentē verba Augustini extract. 4. citato, ubi postquam dixisset, totam Vitam Christiani Sanctum desiderium esse subjungit.

Quod autem desideras non dum vides, sed desiderando capax efficeris, ut cum venerit, quod videas, implearis. Sicut enim si velles implere aliquem sinum, & nosti quam magnum est, quod dabitur, extendis sinum vel sacci, vel utris, vel alicujus rei, & extendendo facis capaciorē: Sic DEUS differendo extendit desiderium, desiderando extendit animum, extendendo facit capaciorē. Desideremus ergo Fratres, quia implendi sumus. Hæc est Vita nostra, ut desiderando exerceamur. Tantum autem nos excercet sanctum desiderium, quantum desideria nostra amputaverimus ab Amore sæculi. Bono implendus es. Ex inani quod implendum est, funde malum: puta, quia melle te vult implere DEUS; si aceto plenus es, ubi mel pones? Fundendum est, quod portat vas. Mundandum est ipsum vas. Mundandum est etiam cum labore, cum tritura, ut fiat aptum cuidam rei. Mel dicamus, aurum dicamus, vinum dicamus: quicquid dicamus, quod dici non potest, quicquid volumus dicere Deus

vocatur. Et quid diximus DEUS, quid diximus? duæ istæ syllabæ sunt totum quod expectamus. Quicquid ergo dicere valuimus infrà est. Extendamus nos in eum, ut cum venerit, impleat. Hæc August, de Deo clarè videndo.

Sed facilè transferi possunt ad Deum, quem sub Eucharisticis Speciebus latentem accipimus.

6 Consideretur ultimo, quo tempore desideraverit Dominus Pascha manducare cum discipulis suis.

Dominus IESUS, inquit Apostolus primò ad Chor. 11. 23. in qua nocte tradebatur, accepit Panem, & gratias agens fregit, ac dixit: Accipite, & Manducate, Hoc est Corpus Meum, Similiter & Calicem postquam coenavit dicens: Hic Calix novum Testamentum est in meo Sanguine.

Eadem igitur nocte parantur insidiæ, & paratur mensa. Parantur insidiæ adversus Regem. Paratur mensa prò subditis adversus Regem tumultuantibus: quo tempore Dominus accipiens panem, & frangens distribuit dicens: Hoc est Corpus meum: Homines dicunt: Mittamus Lignum in panem eius (hoc est mittamus Lignum Crucis in Corpus ejus) & eradamus eum de terra viventium, & Nomen ejus non memoretur amplius. Ille dicit: Calix hic novum Testamentum est in sanguine meo. Illi dicunt, Morte turpissima condemnemus eum. Contumelia, & tormento interrogemus eum, ut sciamus reverentiam ejus, & probe:

bemus patientiam illius. Ille propinat nobis sanguinem, quo Testamentum pro nobis conditum confirmavit: Illi Hæreditatis testamento neglecto, fœdus percutiunt cum Inferno, & Morte; quæruntque illum Sanguinem fundere, quo peccata omnia expiantur, quo tellus irrigata omnem exuit sterilitatem; quo Decretum antiqui Chirographi, quod erat adversus nos deletur; quo in Libro Vitæ omnium Electorum Nomina describuntur; quo denique magnæ Cænæ implentur pocula ad Convivas omnes felici ebrietate à se ipsis alienandos.

Hic est Amor Filij Dei erga nos. Hæc est Humana perversitas adversus Filium Dei. Desiderat manducare Pascha usque ad consumationem Sæculi duraturum, cum Discipulis suis, in qua nocte tradebatur.

Quid retribuemus Domino pro omnibus quæ retribuit nobis? Diligamus Fratres nostros, etiam Inimicos; etiam quando nos occultis consilijs, obrektionibus, machinationibus oppugnant: etiam quæcunque apertas injurias irrogant verbis, & factis.

Si tales essemus, quam dignè, quam frequenter, quam ardentè illum desideraremus, qui accipiens Panem fregit, & dixit, & Apostolis, & omnibus, qui erant per Apostolos credituri: Accipite, hoc est Corpus meum: Et hoc dixit, & fecit in qua nocte tradebatur.

Ergo diligamus Homines etiam nos odio habentes propter illum, qui, cum adhuc

huc inimici effecimus, dilexit nos. Diligamus Homines propter illum, qui propter Homines factus est Homo; ut ei similes secundum viscera Charitatis erga Homines, simus etiam similes secundum desideria erga illud Pascha, quod tantopere desideravit manducare nobiscum.

MEDITATIO V.

*De Christo Domino in Horto
Getsemani Orante.*

ET egressus ibat secundum consuetudinem in Montem olivarum. Lucæ 23. 39.

Habens Dominus consuetudinem orandi in Monte olivarum, à consuetudine laudabili non avocatur, aut illa tristitiâ de qua dixit: Tristis est Anima mea usque ad mortem, aut metu periculi, quod imminebat à dolo, & vi inimicorum suorum. Nam ubi oraturus erat, amicitia simulatione prodendus erat, & armatorum furore in vincula coniiciendus.

Disce, quid agendum tibi sit, qui consideras euntem secundum consuetudinem in Montem olivarum. Nullum tædium, nulla tristitia, nullum periculum ab oratione te avocet. Si cogitationes tuæ turbant te, si in ore conficeris, levamen-
cum

tum tristitiæ non ab Hominibus quære; sed à Patre Misericordiarum, & DEO totius consolationis. Si consistant adversum te castra Hostium invisibilium, si exurgat adversum te prælium, ad illum te recipere, qui est Protector vitæ tuæ, Illuminatio tua, & salus tua, & non timebit cor tuum. Una spes tua ille sit, qui non solum in die malorum proteget te, neque solum abscondet in tabernaculo suo, de quo Psal. 26. 9. Sed abscondet te in abscondito tabernaculi sui, hoc est in intima, abditissima, & à malis omnibus securissima parte Protectionis suæ.

Illud ulterius attende, quod habens consuetudinem orandi in Monte olivarum, ibidem orat etiam moriturus. Ne in Morte quidem bona consuetudo intermittitur. Ergò si Præceptoris optimi vestigia premes, si assueveris semper orare, & in illo præcipuè Monte, undè fluit oleum Misericordiæ Divinæ, & ubi abundat oleum Devotionis, orabis etiam moriturus. Non mortis pavor, non dolores corporis, non fatiscientis animi tædium, atque tristitia orationem tuam impediunt. Psalles spiritu, psalles, & mente, & juxta exhortationem Vatis Regii. Psalm. 32. 2. Confiteberis Domino in cythara, in psalterio decem chordarum psalles illi: orans videlicet voce, & opere: orans voce, & manu pulsante Cytharam, atque Psalterium, quibus divinorum mandatorum impletio significatur. Quam gratum eris

Sa-

Sacrificium labiorum tuorum, cui Sacrificium iustitiæ, perfectumque, & corporis, & animi holocaustum in odorem suavitatis accedet.

Altè igitur illa Verba cordi tuo insi-
deant, & jucundè retracta. Et egressus
ibat secundum consuetudinem in Montem
olivarum.

2. Antequam Hortum ingrederetur, cœ-
pit pavere, & tædere. Matth. 14. 33.

Sed numquid fuit illud tædii, & pavo-
ris initium? Fuit sanè secundum externam
speciem. Ceterum secundum internam
animi commotionem, tædium, pavor, &
omnis doloris acerbitas sumpserunt ini-
tium ab Utero Matris tuæ, Bone JESU,
ex quo dixisti: In capite Libri scriptum
est de me, ut facerem voluntatem tuam,
Deus meus volui, & Legem tuam in me-
dio cordis mei. Et quoniam summè dili-
gebas Patrem, & propter Patrem arden-
tissimè diligebas Mundum peccatorem,
ideò Paternæ Voluntatis Amator, deside-
rantis omnes homines salvos fieri, & Pa-
ternæ Legis in medio cordis sui descriptor
ab ipso Conceptionis exordio dolore acer-
bissimo torquebaris, ob innumerabiles in-
jurias, quas Homines irrogabant Patri. &
innumerabiles clades, quas peccata infer-
rebant hominibus. Si tantum quis dolet,
quantum amat, quis fuit modus doloris
tui? Quantum dilexeris Patrem, tu solus
nostis. Quantum dilexeris Homines, fa-
cta loquuntur. Ille propter scelus Populi
sui

fui percussit Te . Tu eadem amoris Vehementia percuti voluisti .

Ideò . Psalm. 87. 16. per os Prophetæ dicebas : Pauper sum ego , & in laboribus à juventute mea . Ne putarent homines , inquit Bellarmius in Psalm. cit. Christi Passionem trium horarum aut unius tantum diei fuisse , revelat hic nobis Spiritus Sanctus Christum in diebus Carnis suæ , nunquam sine Passione fuisse . Sicut igitur fuit in laboribus à Juventute sua , imò ab Infantia , imò ab Utero Matris , ita fuit in cædio , atque mærore de peccatis , hominumque excidio perire volentium .

Ergo Peccator ingratus , Vide primò quantæ causa doloris fueris Domino omnia , & singula tua peccata clarissimè intuiti , & ad omnia , & singula contabescenti omnibus diebus Vitæ suæ . Quid si peccata tua fuerint ex illis , quæ Joannes Apostolus epist. 1. cap. 5. 15. vocat peccata ad mortem : peccata videlicet nulla penitentia expianda , suamque secum involutura perniciem ? Sic enim duplici de causa dolorem illis auxisses . Auxisses , quia graviora essent . Auxisses quia post Passionem , & Mortem Peccatorum omnium expiatrix , & Mundi totius Reparatrix , expiationis , & Reparationis esse particeps noluisse . Avertat omne peccatum divina Clementia : at præcipuè peccatum ad mortem avertat .

Vide secundò quò dolore ipse confici debeas de peccatis tuis , quæ tanto dolore

Fon.

Fontem omnis Gaudii confecerunt, ac dicere compulerunt; Tristis est Anima mea usque ad Mortem.

Vide tertio quam iniquū sit magno toties in merore te fuisse pro Te, dolentem, videlicet de malis, quæ mala non sunt, sed malorum, quæ verè mala sunt, pænæ: nunquam verò pro illo, & propter illum doluisse, qui pro te tantum doluit de veris malis tuis, tanquam tristitiæ succubuit.

3 Argumentum Orationis in Horto Gethsemani iis verbis comprehenditur: Pater mi si possibile est, transeat à me Calix iste. Verumtamen non sicut ego volo, sed sicut Tu Matt. 26. 39.

Petiturus liberationem à morte, Liberatorem suum nominat Patrem, non ut nominis Paterni usurpatione paternum pectus emolliat, & ad commiserationem inflectat; Sed ut ostendat reverentiam Filii, erga Patris Imperium, quantumvis inusitatum, ac durum. Et quia sciebat se non exaudiendum à Patre, nihilominus Patrem vocat, & Patrem suum, non adscititium, sed verum, sed coeternum, & consubstantialem, ut sui doloris augeat acerbicatem. Quid enim acerbius, quam in mortis articulo non audiri Filium à Patre, & illo Patre, qui dicitur Pater Misericordiarum, & totius Consolationis? Ità pati gaudebat, quando liberari postulabat à Morte, ut omnem rationem quæreretur, undè animi sui cruciatus esset atrocior.

Quid ad hæc dicis Anima mea, itè Ini-

C

mica

nica omnis incommodi, & meroris? No-
verat Dominus immutabile Consilium.
Patris, Cur ergò dicit, si possibile est.
transeat à me Calix iste? Hoc dicit repræ-
sentans affectum appetitus sensitivi mor-
tem ex Natura sua fugientis. Idem etiam
dicit repræsentans motum voluntatis infe-
rioris, non re, sed virtute solùm, a supe-
riori distinctæ. Voluntas inferior regitur
ratione proponente motiva Naturæ sim-
plici consentanea. Superior verò Volun-
tas regitur ratione proponente motiva Na-
turam omnem creatam excedentia. Se-
cundum voluntatem superiorem difficilli-
ma quæque, & mortem ipsam vehemen-
ter optabat, juxta illud: Baptismo habeo
baptizari, & quomodo coarctor usque
dum perficiatur. Secundum voluntatem
inferiorem malum omne horrebat. Sicut
autem secundum appetitum sensitivum,
itâ secundum voluntatem inferiorem hor-
rebat horrore, non coacto, sed volunta-
rio, seu voluntariè assumpto. Sicut enim
oblatus est, quia voluit, itâ ærumnas om-
nes, & corporis, & animi expertus est,
quia voluit experiri, ad nostram, totiusq;
Ecclesiæ eruditionem.

Disce Anima Imitatrix Christi. Sub te
sit appetitus tuus. Et voluntas superior
omne dominium exerceat in inferiorem.
Exercebit autem si tu spectaveris, non
quæ proponit humana ratio, sed Divina.

Orationem semper concludit: Verum-
tamen non quod ego volo, sed quod Tu.

Et

Et hoc dicit, non ore tenus, sed ex toto corde; Non lingua inania verba sonante, sed opere, & veritate. Ego verò Domine Deus meus quoties dico: Pater Sancte non mea, sed tua Voluntas fiat, dum desidero, non Tuam, sed meam fieri voluntatem? Da mihi Spiritum veritatis, qui à Te procedit, ut me doceat omnem veritatem, & sermo meus mendax non sit coram eo, cujus sermo veritas est. Io: 17. 17.

4 Et factus in Agonia prolixius orabat; Et factus est sudor ejus, sicut guttæ sanguinis decurrentis in terram. Lucæ 22. 44.

Deliquium patitur, sed ab Oratione non cessat. In sudorem sanguineum resolvitur, indigetque Angelo confortante; sed quod dixit ratum habet, & quod promisit vult constanter impleri.

Tu verò delicate Miles quid agis? Non dum ad sanguinem restitisti: & officio tuo egregiè te functum arbitraris. Ad prima pericula de fuga cogitas. Ad primum pugnæ sonitum terga vertis. Vide quid agat Imperator tuus. Cum omnibus Principatibus, & Potestatibus tenebrarum præliatus, cum Orbe toto, omnibusque peccatis congressurus, & pro peccatoribus omnibus mortem acerbissimam appetiturus, non detrectat certamen, non mutat consilium, Sed propinquante periculo, magis accenditur, & antequam cruorem fundat in Atrio Præsidis, vel Ara Crucis, fundere incipit in Horto Gethsemani, ulnæ inferente, non crudelitate

Tortorum, sed magnitudine Amoris sui.

Ergo si tu quoque orans ad illa Te offers, ad quæ vocat Deus, constantiæ memineris. Si morbi, si calumniæ, si tristis facies cujuslibet calamitatis nondum oculos feriat, multi multa promittunt. Specie verò mali propius ingruente deficiunt, & quæ promiserant oblivioni tradunt. Noli tantæ mobilitatis nota inuri. Si difficultatibus uno agmine incurrentibus, & animum vehementer quatientibus trepidaveris, oculos in Ducem tuum converte. Unus intuitus Virorum omnium fortissimi te præstabit invictum.

Si ab Orationis Studio non recedes exemplo Domini, si à Patre Amantissimo auxilium unicè præstolaberis, si una Domini Sanguinis gutta decurrentis interram, in Animam tuam deflexerit, Victor eris omnium difficultatum, & quantò gravius certamen instabit, tantò alacriori fortitudine pugnabis, & vinces.

5 Apparuit illi Angelus de Cælo confortans eum. Lucæ 22. 43.

Quod obsequium Angeli multis Martyribus persolverunt, solatium doloris, & laboris in duro discrimine positis adhibentes, præsentia sua, alloquio, officiis, absterfione Frontium sudore manantium, persolunt etiam Regi Martyrum, Regique suo. Adest unus è Principibus primis deliquium patienti, totoq; e corpore sudorem sanguineum emittenti. Qua specie spectandum se præbuerit, qua reverentia, qui-

quibus verbis usus fuerit, quid egerit, nos latet. Legationis tamen causa non latet. Summa enim tristitia, volentis confici dolore sine ullo temperamento solaminis, compulit Cœlestes Spiritus ad aliquid levamenti afferendum Domino suo: immò compulit Patrem ad mittendum Nunciū: qui Consolatoris munere fungeretur, erga miserorum omnium Consolatorem omnis consolationis expertem, ut summa desolatio Capitis nostri, summa tristitia, in illud Gaudium verteretur, quod à nobis, tamquam membris Corporis sui non posset auferri.

Quoties ergo desolationibus exercebimur, non deficiamus, sed ut monet Apostolus ad hœb. 12. 1. Per patientiam curramus, ad propositum nobis certamen, aspicientes in Authorem Fidei, & Consummatorem JESUM. Ideò enim Author Fidei, omnisq; per Fidem Consummator virtutis voluit affici desolatione, cui nihil inesset consolationis, ut nos ad similem tolerantiam erudiret.

Ad ejusmodi tolerantiam in praxim redigendam clamemus ad Dominū de profundo malorum nostrorum, & quāto magis adversa nos obsident, dicamus cum Thoma à Kempis lib. 3. cap. 50. 5. Gratiarum tibi ago, quia non pepercisti malis meis, sed attrivisti me verberibus amaris, infligens dolores, & immittens angustias foris, & intus. Non est, qui me consoletur, ex omnibus, quæ sub Cœlo sunt,

nisi Tu Domine DEUS meus, Cœlestis Medicus Animarum, qui percutis, & sanas, deducis ad Inferos, & reducis. Disciplina tua super me, & virga tua ipsa me docebit.

Ad hæc meminerimus id, quod scribit Apostolus 1. ad Corinth. 10. 13. dicens; Fidelis DEUS est, qui non patietur vos tentari suprâ id, quod potestis, sed faciet etiam cum tentatione proventum, ut possitis sustinere.

Quid igitur spê abiiciamus? quando venerimus in altitudinem Maris, & videbitur jam jam nos demersura tempestas, mittet invisibiliter Angelum suum, qui fluctuantibus dexteram porriget, & nos appellet ad littus, & suo complexu, & verbis, & omni fovebit officio. Modicæ Fidei, dicet nobis Dominus per Angelum suum, quare dubitasti?

Qui denique cursu vitæ finito, absterget omnem lacrymam ab oculis nostris, manibus suis, ut habetur Apoc. 21. 4. quoties per manus illorum Spirituum, qui faciunt voluntatem ejus ad audiendam vocem sermonum ejus, abstergit fletum quem ab oculis, & sudorem, quem à frontibus expressit sæpenumero desolationum acerbitas?

6 Clausulam huic Meditationi imponamus, quærendo undenam potissimum oriatur sudor ille sanguineus, quo tota Facies, & singula Domini Membra perfunduntur, & qui ad terram usque irriganda

dam decurrit. Oritur nimirum ab illo onere, de quo quæritur Psalm. 37. 4. Iniquitates meæ supergressæ sunt caput meum, & sicut onus grave gravatæ sunt super me. Oritur à Labore, de quo Isaia 43. 24. Servire me fecisti in peccatis tuis, præbuiisti mihi laborem in iniquitatibus tuis.

Quantum est N. Peccator pessime illud onus, sub quo curvatur, qui portat Orbem? Non de suis iniquitatibus loquitur, sed de tuis, quas expiandas suscepit, & quæ velut aquæ inundantes præ multitudine supergressæ sunt caput ejus; & præ gravitate, veluti plumbum subsidentibus humeris incubuerunt.

Quantus est Labor ille, quo lassatur Gygas Omnipotens, cogiturque sanguineo sudore diffluere? Tu verò ingratiſſime, Hominum siccis oculis intueris toto corpore tua peccata lugentem. Fieri nè potest, ut non possis paucas rependere lacrymas illi, qui pro te Corpus totum dissolvit in fletum?

Quod si adhuc cor tuum, si oculi tui ad lacrymas omnes arescunt, vide quid gemens, & sudore manans citatis verbis subiiciat. Postquam enim dixit: Servire me fecisti in peccatis tuis; præbuiſti mihi Laborem in iniquitatibus tuis, illicò subiungit: Ego sum, ego sum ipse, qui deleo iniquitates tuas propter me, & peccatorum tuorum non recordabor. Reduc me in memoriam, & judicemur simul.

Narra si quid habes, ut justificeris. Isaia
43. 25.

Qui ad ista non gemit inhumanior est
Feris, durior scilicibus. Delet peccata sub
quorum onere gemit, & sudat: & illo su-
dore delet, quem tu peccando venis om-
nibus extrahis, & adhuc peccare non ces-
sas. Ille, ut Liberatorem tuum in memo-
riam reducas, peccatorum tuorum non
recordabitur: Tu verò oblitus Domini
Dei tui, omnibus diebus Vitæ tuæ, ad-
huc oblivisceris.

Si tam ingrati animi vitium delere de-
sideras desine primò peccando servus esse
peccati, ne Dominum Coeli, ac terræ ser-
vire facias in peccatis tuis.

Nullū secundò laborem fugias pro illo
suscipiendum, cui tantum hætenus labo-
rem præbuiſti in iniquitatibus tuis.

Recordare tertio recordatione perpe-
tua Beneficiorum illius, qui tot, ac tanta
egit, ac pertulit, ut peccatorum tuorum
non recordaretur.



MEDITATIO VI.

*De Capite Domini in Sepulchro
jacentis .*

I **C**Apit Augustum, quod gemen-
tes vidimus inclinatum è Cru-
ce, nunc reclinatum in tumulo
intuemur. Quid ista inclina-
tio, Bone I E S V, quid sibi vult ista reclina-
tio?

Numquid Caput expiraturus inclinas, ut
Peccatores, vel dubitantes, vel non valen-
tes assurgere ad osculum Pacis admittas?
An expiraturus inclinas, ut non solum Ada-
mo, sed omnibus ejus filijs de limo terræ
formatis inspirares in faciem eorum Spira-
culum vitæ; & fieret omnis Homo in Ani-
mam viventem; neque solum corpora, sed
Animæ ipsæ vita carentes, vitam beatissi-
mam sortirentur, de spiraculo vitæ morien-
tis?

Iam yero, cur idem Caput vita, spiri-
tuque cassum reclinas in tumulo? An ut
Peccatores præter omnem spem, & super
omne votum ad osculum Pacis admissi,
possint per otium, quod sibi inclinatum, re-
clinatumque est, attentè intueri, & mani-
bus contrectare, & sanctissimæ Penitentis
Magdalenæ Unguento perfundere? Ne pe-
dum quidem unctio peccatores decet. As

fi boni Penitentes sumus, etiam, quis credat? ad unctiōnem Capitis evocamur: ut nobis gratias agentibus, & Benignitatem ineffabilem prædicantibus, ex odore unguenti domus impleatur, totusque Christianus Conuentus lætificetur, ut ait Rupertus in Matth. 26.

Quis dignas rependat gratias inclinanti caput, & reclinanti? Quis dignè perpendat Beneficij magnitudinem? Quis intelligat, quid sit mori, immò quid sit vivere in osculo Domini? Quis perspiciat, quid sit non solum Corpora, sed Animas mortuas vivificari Spiritu expirantis? Quid sit post inclinationem Capitis ad osculandum, reclinatio Capitis, ad illud nostris obsequijs exhibendum, ad contemplandum, ad lacrymis perfundendum, ad balsamo Devotionis illinendum?

O' Beneficium! O' Charitatem! Ecce Caput exanime, frigidumque, quod ut nos vivificaret, vitam amisit: ut erigeret, sed demisit; ut nobis placidissimam quietem pareret, præbuit oculos durissimo somno claudendos.

Moriamur ergo nobis, & omnibus, ut uni soli vivamus, de illo Vitæ spiraculo, quod expirans in facies nostras inspiravit. Deposito fastu superbię capita demittamus, ut erigamus ad illum, qui caput suum, ut nos erigeret, ita profunda inclinatione demisit.

2 Genes. 28. 10. Egressus Iacob de Bersabee pergebat Haran, cumque venisset ad quem-

quemdam locum, & vellet in eo requiescere post Solis occubitum, tulit de lapidibus, qui jacebant, & supponens capiti suo dormiuit in eodem loco.

Verus Iacob egressus non de finibus Bersabee, sed moenibus Hierosolymæ, pergebat Haran, hoc est, si nominis interpretationem attendas, destructum. Et sanè quid magis destructum, quam Genus humanum, ad quod pergebat Dominus, ut destructum repararet, & in pristinum revocaret?

Cum autem venisset ad quemdā locum, hoc est in Montem Oliveti, & vellet in eo requiescere, post Solis occubitum, qui ab hora sexta, vsque ad horam nonam factis tenebris super universam terram, occidebat; tulit de lapidibus, qui hinc inde jacebant; de lapidibus videlicet, quos erat in Filios Abrahæ suscitaturus, & supponens capiti suo dormiuit in eodem loco.

Supposuit quidem Capiti suo lapidem illius sepulchri, in quo nondum quisquam fuerat positus. Sed quantò libentius, supposuit Capiti suo, Lapides durissimos peccatorum, de quibus Filios Abrahæ suscitare decreverat?

Hi Lapides fuerunt Sepulchri lapidibus longè duriores, & idè molliores, Amori Amoris Crucifixi, mortui, & sepulti. Idè his incumbens lapidibus, si Amoris magnitudinem spectes, tam dulci somno quieuit; licet ità duro, ferreoque, si mortis immanitatem consideres.

Quis dignè amet hunc Amorem? Si

quantò major est duritia lapidum, tantò major est Amor utentis lapidibus, prò cervicali: qualis quantusque fuit Amor dormientis erga me, qui lapidum omnium duritiam excedo?

Utinam ex omnibus lapidibus Capiti Divino suppositis ad quiescendum, ut in Filios Abrahæ suscitarentur, ego quoque durissimus omnium, in Filium Abrahæ susciter, mutatusque in virum alterum, in pace in idipsum dormiam, & requiescam.

3 Si mors amarissima, visa est Domino præ Amoris magnitudine suavissima, & quies super durissimis Lapidibus placidissima: Cur & nobis mortuo commortuis, & sepulto consepultis placidissimè quiescere non contingat, reclinatis capitibus, non super duris Peccatorum lapidibus, sed super angulari Lapide Christo, ab Homnibus quidem reprobato, sed à Deo ad foelicitatem Electorum electo? Si nostri lapides ità molle pulvinar Domini Capiti præbuerunt: cur nobis durus videatur Lapidum omnium, & pretiosissimus, & molliissimus?

Caput Animæ tuæ, quicumque ad hunc tumulum gemis, Intellectus est. Iacta super Dominum cogitatum tuum, Iacta curam tuam, ut inquit Prophæta psalm. 54. 21. & imple te non solum enutriet, sed nutritum Doctrina Veritatis, placidissimè dormire faciet. Omnem sollicitudinem tuam, ut hortatur Petrus Apostolus ep. prima. cap. 5. 6. projice in eum, quoniam ipsi cura est de te, Somnum securus cape, quia

nobis dormientibus, & ipsi indormienti-
bus, ipse vigilat.

Neque terreat duritia Lapidis. Petra
Christus est, & Lapis angularis. Superadde
Lapidi Crucem, Spinas, Clavos, Lanceam,
Flagella: quid tum? Si amaveris, unus
IESVS, & quidem Crucifixus, mortuus, &
sepultus, faciet omnia mollissima, & jucu-
dissima. Suppone Capiti pulvinar amabile;
& suavissimè dormies.

4 Sicut Jacob vidit scalam in somnis
stantem super terram, & Angelos ascen-
dentes, ac descendentes, ita vidit Domi-
nus, dum quiesceret in sepulchro, fructum
somnia sui, seu mortis suæ. Vidit nimirum
virtute mortis suæ, jam præstitum, quod
ante præviderat exiturum. Vidit inquam
Homines in Angelos commutatos, ascen-
dentes per Scalæ gradus, per diversas vide-
licet perfectiones gradusque virtutum, Hu-
manitatis assumptæ, secundum quam Via
nostra est. Est enim Via, per quam itur ad
Veritatem, & Vitam, quæ Divinitas est. Et
ideò dicitur cacumen illius tangens Cæ-
lum, quia nostra Mortalitas eò evecta est,
ut non solum Coelum, sed Verbum ipsum
quodamodò admirabili nexu contingat.
Diciturque Dominus innixus scalæ: An-
potius dicenda est Scala innixa Domino,
ad se omnes per scalæ gradus, invitanti, ex-
hortanti, volentes ducenti, Trahenti no-
lentes,

Exultemus Domino ferali quidem som-
no quiescenti, sed lætissima intuenti. Lau-
de.

deus cum Sanctis omnibus sapientiam
 attingentem à fine vique ad finem fortiter,
 & suaviter omnia disponentem ; & cum fir-
 ma, potentem omnia ; permanentem in se,
 & omnia inovantem, ut habetur Sap. 7.27.
 & per nationes in Animas sanctas se trans-
 ferentem, & Amicos Dei, & Prophetas
 constituentem, & Homines in Angelos
 transformantem.

Ut verò ex his Angelis ascendentibus,
 & descendentibus (si tanta mutatio potest
 etiam cadere in Peccatores non absimiles
 nobis) esse possimus :

Petamus primò illam integritatem mo-
 rum, illam vitæ Innocentiam, ut de nobis,
 tamquam vitæ suæ Consortibus Angeli
 non erubescant. Rem difficilem postula-
 mus. Sed longè majora potest Sapientia,
 quæ non solum Sole speciosior est, & super
 omnem dispositionē Stellarum, & luci com-
 parata invenitur prior, & cujus Spiritus di-
 citur incoquinatus, mundus, & attingens
 ubique propter munditiam suam. sed præ-
 terea Omnipotens est, & infinitè amans
 est.

Petamus secundò ut de virtute in virtu-
 tem semper proficientes ascendamus ad il-
 lum, cui Scalæ itantis super tetram cacu-
 men inimitur. In hac lacrymarum Valle
 cum Regio Vate ascensiones in corde no-
 stro disponamus. Psal. 84. 6.

Petamus tertio, cum Angelis descen-
 dentibus descensum, non à perfectione ad
 imperfectionem, sed à contemplatione Dei
 ad

ad actionem Proximorum salutis perspicientem. Sic ascensus ad Deum, & descensus à Deo erit Deo gratissimus: & sic ascensus ad Deum efficiet, ut majori cum fructu descendamus ad Proximum: & descensus ad Proximum præstabit, ut facilius, celerius, & sublimius ascendamus ad Deum.

5 Præter illa, quæ diximus, quæramus ulterius, quid à nobis exigit Caput Domini reclinatum in tumulo,

Exigit primò, ut cum Ieremia cap. 9. 1. Vnusquisque dicat: Quis dabit capiti meo aquam, & oculis meis fontem lacrymarum, & plorabo die ac nocte, non interfectos Filia Populi mei, ut dicebat Propneta: sed interfectum à Filia Populi crudelis. Quem autem interfectum? Illum nimirum, qui non recusavit interfici, ut interfecti Filia miserabilis revocarentur ad vitam. Quanta diversitas inter interfectos, & interfectum suos interfectores vivificantem!

Exigit secundò, Ut meminerimus nostra quoque capita ad summam Gloriæ celsitudinem exaltanda, si confortia fuerint Dominicæ dejectionis. Sicut enim quia Dominus de humanis calamitatibus torrentis in morem, magno cum strepitu defluentibus, secumque omnia rapientibus, in via hujus mortalitatis bibit, & usque ad satietatem bibit, erat caput exaltaturus, juxta illud: de torrente in via bibet, propterea exaltabit caput: Psalm. 109. 8. Ità nostra capita ad summam Gloriam eveherentur, si prius depressa fuerint in profundum: & si

nos quoque ærumnis ingruentibus involuti biberimus de torrente, qui nos, & nostra involuerit, secumque devoluerit, atque demerferit.

Exigit tertio, Ne summa Paupertas dicentis: *Matth. 8. 20.* Vulpes foveas habent, & volucres Cœli nidos: Filius autem Hominis non habet, ubi caput reclinet: nos à benè captis dettereat. Licet enim secuti, & sequi velimus ita Pauperem, ut ne in morte quidem habuerit, nisi alienum sepulchrum, ubi caput reclinaret: non ideo tamen animum despondere debemus. Caput enim ita Pauperis, aureum est: immò Aurum optimum est. Deus est. Caput enim Christi Deus. Si omnis copia, quæ Deus non est, egestas est, Augustino teste: quid egestatis subtili Capite metuere possumus? Metuant egestatem, quorum Thesaurus Ille non est, de quo dicitur. Caput ejus Aurum Optimum: *Cantic. 5. 11.*

6 Iob e solio Regni sui dejectus, & jaccens in sterquilinio, loquensq; de Deo ad Amicos suos dixit *cap. 19. 9.* Spoliavit me gloria mea, & abstulit Coronam de capite meo. Ità Dominus è Cruce, tamquam è Solio Regni sui depositus, & ornamentis Regis dolorum spoliatus, de Patre suo quodamodò queritur: Spoliavit me gloria mea, & abstulit Coronam de Capite meo.

Quandò è Cruce pendens: dicebat Deus Deus meus, ut quid dereliquisti me: non tam querebatur de cruciatibus, quibus afficiebatur, quam de cruciatibus, qui sibi de-

denegabantur, & quibus non amplius futurus erat obnoxius. Ideò Diuus Bernardus aiebat: Non queritur propter tormenta quæ patitur, sed queritur propter tormenta quæ non patitur. Iam iam enim morituro eripiebatur omnis patiendi facultas.

Ità ne Domine IESU, antequam morereris, pati cupiebas, & cruciatibus, & opprobrijs saturari, ut doleres doloribus, & malis tuis modum imponi? Nunc verò in Sepulchro jacens, privatusque corona, quæ tantoperè gloriabaris, tacita quadam querimonia, quantumvis loquendi usum, mors neget, de Patre loquens dicis. Spoliavit mea gloria mea, & abstulit Coronam de Capite meo?

Vide N. Peccator, quanti faciat Rex dolorum Gloriam Regni sui. Gerit Caput Spinarum vulneribus vbique patens, & cruentum: sed egrè patitur abesse Spinas, quæ vulnera inflixerunt. O' si posses tandem aliquandò fieri de Inimico Amator Spinarum, quas Amor Crucifixus ità dilexit! Dicant alij: coronemus nos rosis antequam marcescant. Tu si sapias, præ omnibus rosis dilige spinas, quæ suas cuspides reliquerunt in Capite Domini. Ferire non possunt, postquam omnes aculeos in tali Capite amiserunt, tamque Pretioso Sanguine rubuerunt, & adhuc amissa cuspidē purpurascent.

Vide secundò, quod si Amor, & secundum Corpus, & secundum Spiritum perfectè

Et Crucifixus, & Mortuus, spinas suas de-
siderare non desinit: quāto magis ille spi-
nas debet optare, qui nondum est perfectè
Christo commortuus, & consepultus? Vi-
vit adhuc in te multum de Amore mundi,
de amore tui. Quid ergò spinas fugis, quæ
maximè necessariæ sunt ad occidendum in
te, quicquid vivit de te, impeditque ne uni-
cè vivas de illo, extra quem, & sine quo vi-
vens, mortuus es.

Vide tertio quinam sit, cui tam cordi
sunt Regni sui insignia, spinæque de Capite
suo eductæ. Ille nimirum est, de quo dici-
tur Apoc. 19. 12. Oculi ejus, sicut flam-
ma Ignis, & in Capite ejus diademata mul-
ta. Si Nazarenì Capitis spinas amaveris,
imponetur capiti tuo, non unum diadema,
sed multa. Quia enim post laborum tole-
rantiam, post Crucem, & Spinas, possidebis
non unum Regnum, sed multa, immò om-
nia uno Regno, contenta: ita gestabis in
capite non unum diadema, sed multa uno
diademate comprehensa. Præmium intue-
re, & noli spinas metuere. Immò non Præ-
mium, sed Præmii Donatorè suspice. Quod
si ad frontem Spineo serpto cigendam duce-
ris amore mercedis, nullam quære merce-
dem præter illum, qui Abraham, omniq; Ju-
sto dixit. Genes. 15. 1. Noli timere: Ego
Protector tuus sum, & Merces tua magna
nimis,

MEDITATIO VII.

De Resurrectione Domini .

P Salm. 92. 1. Dominus regnavit, decorem indutus est, indutus est Dominus fortitudinem, & præcinxit se.

Dominus ab initio Mundi regnavit, hoc est Regnum quodammodo acquisivit, quia subditos habere coepit. Decorem indutus est, gloriam videlicet, & Majestatem Regiam: Indutus est Dominus fortitudinem, hoc est Potentiam ostendit, Gloriæ, & Majestati adiunctam, & præcinxit se, hoc est accinxit se ad regnandum, & subditos in officio continendos.

Longè verò gloriosius Regnavit, siue Regnum accepit ab initio Mundi restaurati, die videlicet Resurrectionis, quo indutus est decorem gloriosi Corporis, & per decorem Corporis, decorem Animæ, & per decorem utriusque decorem Divinitatis manifestavit.

Tantò verò clarius Filius Dei suam Pulchritudinem manifestavit in Homine redivivo, quam in Orbe condito, quanto conjunctior est Humanitati assumptæ, quam universitati rerum; & quanto unus Homo ad ineffabilem dignitatem erectus, melior, & major est Mundo.

For-

Fortitudinem quoque indutus est, quia data est illi omnis potestas in Coelo, & in terra, & præcinxit se ad propagandum Regnum suum per Apostolorum prædicationem; usque ad fines terræ, illudque gubernandum Sapientia sua, attingente à fine ad finem, & fortiter, & suaviter omnia disponente.

Domino gratulemur, & nobis. Domino, quia Regnum accepit. Nobis, quia Regnum ipsius sumus. Domino, quia decorem indutus est, ad nostros animos sibi divinciendos. Nobis, quia ad tanti decoris contemplationem accersimur. Domino, quia indutus est fortitudinem, ut ipsum timeamus. Nobis, quia timere volumus, quem diligimus, adeoque Filiorum more, non timere more fervorum.

Illud præcipuè meminerimus, quod scribit Apostolus 2. ad Thimot. cap. 2. 17. Si commortui sumus, & convivemus, si sustinebimus, & conregnabimus.

Respice Anima mea Illustres Animas, quæ Dominum rediituum circumstant. Respice, & numera, si potes, quæ post has sequutæ sunt, & sequentur, & quidem tecum, si vis, & in occasu Mundi suis restitutæ corporibus, æternum vivent, æternumque cum Christo regnabunt.

2 Ad Rom. 6. 9. Christus resurgens ex mortuis jam non moritur, mors illi ultra non dominabitur.

Quia Dominus moriendo perfectè mortem

tem occidit, ideò jam non moritur. Et quoniam duplex mors est, alia visibilis per quam corpus separatur ab Anima: alia invisibilis, per quam Anima separatur à Deo separatione durissima; ideò mortem visibilem perfectè vicit, quia de invisibili, cui non ipse, verum solus Peccator erat obnoxius, perfectissimè triumphavit. Moriens enim fecit, ut Peccatum finem acciperet, terræque iniquitas deleteretur. Quoniam ergò peccati mortem perfectè sustulit, ad quam tollendam Crucifixus, & mortuus est: ideo resurgens ex mortuis jam non moritur, mors illi ultrà non dominabitur.

Glorioso Triumphatori gratulemur, quod Mortem visibilem vicerit. Multò magis gratulemur, quod vicerit invisibilem. Quid enim habet commune mors invisibilis, cum visibili? Maximè verò gratulemur, quod vicerit in perpetuum.

Utrique Morti Immortalis Vita successit, cujus, & nos participes erimus, si per Dominicæ Mortis merita, nobis perfectè moriendo, mortem peccati perfectè vicerimus. Sic enim cum ipso resurgentes ex mortuis, jam non moriemur, mors nobis ultrà non dominabitur.

3 Ad Philipp. 3. 21. Reformabit Corpus humilitatis nostræ, configuratum Corpori claritatis suæ.

Christus Dominus resurgens ex mortuis, non solum reformavit Corpus suum, sed nostrum etiam configuratum Corpori
cla-

claritatis suæ reformabit . Reformavit suum, quia venas florenti sanguine implevit, illo nimirum sanguine, quo rubuit Hortus Gethsemani, quo flagella Carnificum rubuerunt, quo defluente è vulneribus Capitis, Manuum, Pedum, Lateris terra irrigata est . Reformavit Corpus suum, quia sanavit saucium, vivificavit extinctum, obscuratum illuminavit, deformatum decore induit, ceterisq; instruit dotibus corporis gloriosi .

Victori Mortis Laudis Canticum persolvamus, nostriq; Cantici argumentum sit Reformati Corporis Pulchritudo, Subtilitas, Agilitas, Impassibilitas .

Sed quoniam non sibi soli, sed nobis etiam, & quidem amantissimè resurrexit, suum nobis corpus ostendit Sole formosius, ut sciremus, qualia futura sint corpora Humilitatis nostræ, quando claritatis suæ Corpori configurabuntur . Ut autem configurentur meminerimus Reformationi Corporis, necessariò præmittendam esse Animæ reformationem . Nos igitur, & nostra omnia Sapientiæ, atque Potentiæ Renovatoris omnium permittamus, ut Anima nostra ad Imaginem, & similitudinem Divini vultus reformata, reformetur similiter Corpus ad Imaginem, & similitudinem Corporis pro nobis deformati, & innumeris modis attriti .

Novas Liberatori nostro gratias agamus, & post oblationem Animarum, offeramus illi nostra corpora ad omnium

laborum tolerantiam, ad omne genus mortificationis, ad omnium, quæ illi placuerint, experimentum parata, ut sicuti socia fuerint passionum, ita sint consortia gaudiorum.

4 Psalm. 138. 17. Exurrexi, & adhuc sum tecum.

Exurrexit Dominus, & quia secundum Humanitatem, non tam ratione unionis hypostaticæ, quam ratione Charitatis, fuit semper Divinitati Verbi conjunctus in omnibus pressuris, doloribus, cruciatibus internis, & externis, atque adeo in ipsa Morte: ideo rectè dicit: Exurrexi, & adhuc sum tecum.

Gratulemur Beatissimæ Humanitati, quod semper fuerit cum Deo, & quod resurgens ex mortuis, à morte quidem visibili resurrexerit, à pœnis peccati resurrexerit; ab ipsa verò morte peccati exurgere non potuerit.

Nos à Morte peccati resurgere possumus, & sæpè resurgimus, quia peccatores sumus. Idcirco non possumus dicere: Exurreximus, & adhuc tecum sumus: Sed solum dicere licet; Exurreximus, & esse tecum incepimus. At saltem postquam, semel surreximus, postquam ope Gratiæ sanctificantis inhæsimus Tibi, ita firmiter inhæreamus, ut separari nulla ratione possimus.

Tu Domine JESU, qui nunquam sine Deo fuisti, & esse non potuisti, vide fecitatem tuam, vide miseriam nostram.

Per

Per nexum illum indissolubilem, quo tua Humanitas Divinitati cohæret, ita nos tibi conjunge, ut unumquisque nostrum cum Apostolo affirmare possit: Certus sum, qui à neque Mors, neque Vita, neque Angeli, neque Principatus, neque Virtutes, neque instantia, neque futura, neque Fortitudo, neque Altitudo, neque Profundum poterit nos separare à Charitate Dei, quæ est in CHRISTO JESU Domino nostro. Ad Rom. 8. 38.

Si hoc dederis, & Auspice Te, inhæserimus tibi, inter omnia pericula, & vitæ hujus angustias; Nos quoque exurgemus: Et sicuti inter omnia mala tecum fuerimus, ita inter omnia bona tecum erimus: quamdiù tecum erit Æternitas.

5. Apocalypf. 5. 5. Ecce vicit Leo de Tribu Juda. Vicit planè malitiam Sapientia, inquit D. Bernard. Serm. 1. de Die sancto Paschæ, attingens à fine usque ad finem fortiter, & suaviter universa disponens: Sed prò me fortiter, suaviter mihi. Vicit Judcorum blasphemias in patibulo, fortem armatum alligavit in atrio, & de ipso mortis imperio triumphavit. Quid sibi volunt verba Doctoris melliflui: Fortiter prò me, suaviter mihi? Numquid alludit ad Fortitudinem, qua pugnavit adversus Hostes, ut nobis benè esset? An alludit etiam ad robur, quo pugnavit adversus se ipsum Crucem prò nobis ascendens, & non audiens dicentes: Descendat, si Rex Israel est, & credimus ei. Ita planè

planè est . Fortiter prò nobis vicit , suaviter vicit nobis . Opus demandatum sibi à Patre fatiter prò nobis : nobis suaviter consummavit . Quod si adhuc generatio prava , & adultera signum quærit : non ei dabitur , nisi signum Jonæ Prophætæ . Non signum descensionis , sed resurrectionis . Signum Resurrectionis non quærit Judæus . Quærimus nos , & amplectimur , & gaudemus . Vicit enim Leo de Tribu Juda . Suscitatus est paterna voce , Leonis Catulus ; clauso prodiit tumulo , qui de patibulo non descendit .

Si de patibulo non descendemus , fortiter prò nobis pugnabimus , & Hostiam in odorem suavitatis Deo de nobis offeremus , & cum prodeunte de Tumulo prodibimus .

Vicit Leo de Tribu Juda , nec resurrectionem distulit ultra tertium diem , ut Prophæta fidelis inveniatur qui dixit . Vivificabit nos post tres dies , in die tertia suscitabit nos , & vivemus in conspectu ejus . Oseæ 6. 3. decet nimirum , ut quemadmodum Caput præcessit , sequantur membra . In patibulo sexta feria redemit Hominem , ipsa die , qua fecerat Hominem in initio : Secunda die Sabbatizavit in monumento , consummato opere , quod susceperat . Tertia verò , quæ prima dierum est primitiæ dormientium apparuit Mortis Victor , novus Homo . Ità & nos quicumq; sequimur caput nostrum , tota die hac , qua plasmati , & redempti sumus ,

D

non

non cessemus tollere Crucem nostram, perseverantes in ea, sicut ipse perseveravit, donec dicat Spiritus, ut requiescamus à laboribus nostris. Neminem audiamus, non carnem, & sanguinem, non Spiritum quemlibet, descensum è Cruce suadentem. Persistamus in Cruce, Moriamur in Cruce: deponamur aliorum manibus, non nostra levitate. Caput nostrum deposuerunt Viri Justī: Nos verò indignatione sua Angeli Sancti deponant, ut consummata viriliter die Crucis, secunda quæ post Mortem est, quiescamus suaviter, dormiamus feliciter in sepulchris expectantes beatam spem, & adventum Gloriæ magni Dei, qui resuscitabit tertia die corpora nostra configurata Corpori claritatis suæ. Ita ad verbum Sermonē citato Divus Bernardus.

Concludamus hoc punctum sententijs gravissimis, & utilissimis Abbatis Sancti. Foetent quadriduani, sicut de Lazaro scribitur: Jam fœtet Domine; quadriduanus est enim. Adinventio Filiorum Adam, quartam formavit diem, quam à Domino non accepit. Propterea corrupti sunt, & abominabiles facti sunt, tamquam jumenta, quæ in stercore suo putruerunt. Divinæ siquidem ordinationis est Triduum, quod prædiximus: In Labore, in Requite, in Resurrectione. Non placent hæc Filiis Hominum, sed suam volunt proferre diem differentes poenitentiam, ut indulgeant voluptati. Non est hæc dies, quam fecit Do-

Dominus : quatruiduani facti sunt , & jam
fētent . Non novit hanc quod de MARIA
natum est Sanctum . Tertia resurrexit die,
ne videret corruptionem . Vicit itaque
Leo de Tribu Juda . Occisus est Agnus ,
sed Leo vicit . Leo rugiet , quis non pave-
bit . Sed prò suis Leo rugiet , non in suos .
Paveant alieni ; Tribus Juda magis exul-
tet . Gaudeant , qui induti sunt Confessio-
ne quorum omnia ossa dicunt : Domine
quis similis Tibi ?

6 Considerationem ultimam conficia-
mus , partim sententiis , partim verbis ,
ejusdem sapientissimi Patris . Vidi , in-
quit Joannes , in dextera sedentis super
Thronum Librum signatum sigillis septē ,
& non erat qui legeret , vel aperiret . Ego ,
ait , flebam multum , quod nemo aperire
librum dignus inveniretur . Et unus de
senioribus dixit mihi : Ne fleveris : Ecce
vicit Leo de Tribu Juda , radix David .
Et vidi , & ecce in medio Throni Agnum
stantem , tamquam occisum . Et veniens
accepit Librum de dextera sedentis in
Throno , & aperuit Librum , factaque est
lētitia magna , & gratiarum actio . Leo-
nem Joannes audierat . & Agnum vidit .
Agnus occisus est ; Agnus accepit Librum ,
Agnus aperuit , & apparuit Leo . Deni-
que dignus est , ajunt seniores , Agnus , qui
occisus est , accipere fortitudinem . Non
mansuetudinem amittere , sed accipere
fortitudinem , ut & Agnus maneat , &
Leo sit . Plus dico , ut mihi videtur . Idem

etiam Liber est, qui non poterat aperiri. Quis enim dignus inveniretur aperire hunc Librum? Indignum se profitetur, & ipse Baptista Ioannes, quo inter natos mulierum, maior, nemo surrexit. Non sum inquit dignus solvere corrigiam calceamenti eius. Venerat enim ad nos calceata Majestas, Divinitas Incarnata; Venerat Dei Sapiencia, sed in Libro clauso utique, & signato.

Sapientiam Libri, fortitudinem Leonis, mansuetudinem, & innocentiam Agni, tota cum cœlesti Curia summis laudibus efferamus. Sed quænam sunt Libri Signacula, quæ resignanda mansuetudini Agni, Leonisque fortitudini referantur?

Signaculum primum juxta Divum Bernardum: Matris desponsatio est, qua Partus Virginis, & conceptionis puritas velabatur; ita ut Hominis Fabri Filius Fabricator Hominis putaretur.

Signaculum secundum Infirmitas corporis, in qua latebat virtus Divinitatis.

Signaculum tertium Circumcisio. Qui enim ad peccatum omne tollendum venerat, Circumcilius Peccatoris speciem præferebat.

Signaculum quartum. Fuga in Ægyptum: Fugiens enim à facie Herodis Reguli, nec Dei Filius agnosci poterat, nec Rex Cæli.

Signaculum quintum trina tentatio in deserto. Prima fuit: Si Filius Dei es, dic, ut lapides isti panes fiant. Secunda in-

pinnaculo Templi: Mitte te deorsum. Neutrum fecit Christus, ut signaretur Liber, ut falleretur astutus. Denique eo usque seductus est, ut haberet prò constanti, Hominem esse purum, & in tantam vesaniam superbia cæca proruperat, ut non diceret ultrà, si Filius Dei es: Sed hæc omnia tibi dabo, si procidens adoraveris me.

Signaculum sextum. Signum Crucis, ubi pependit inter Latrones, & cum iniquis deputatus est Dominus Majestatis.

Signaculum septimum sepultura. Clausit enim sepultura Librum hunc; nec ullum signaculum omninò sic obstruxit, sic occultavit magnum Pietatis Sacramentum.

Sepulto nimirum Domino, sola restare desperatio videbatur; adeò ut Discipuli dicerent: quia nos sperabamus. Quis non illo flieret in tempore clausum arctius Librum, & non esse qui aperiret? Sed nè fleviſſet ultrà Joannes Sancte: etiam tu noli flere Maria. Procul sit luctus. Tristitiæ nebula dissipetur. Lætamini in Domino, & exultate Justi, & gloriamini omnes recti corde. Dignus est Agnus, qui occisus est. Dignus est Leo, qui resurrexit. Postremò Liber ipse dignus est aperire se ipsum.

Utinam Librum ità feliciter demptis signaculis reſeratum, semper legamus, & intelligamus, & Sacramenta, quæ latebant recolamus, & ope Agni Innocentiam, & Leonis fortitudinem impertiētis, Libri Sapientia impleamur.

⁷⁸
HEBDOMADÆ
S E C U N D Æ,

Meditatio Prima.

*De Ratione, qua Sancti omnes, Deo
dicenti: Santi estote, quoniam
ego Sanctus sum;
paruerunt.*

Beati immaculati in via, qui
ambulant in Lege Domi-
ni. Psalm. 118. 1. Si Beati
sunt, qui habent quicquid
volunt, & nihil mali vo-
lunt, omnes Iusti beati sunt, quia nihil ma-
li volunt, & habent quicquid volunt, quia
solum Deum volunt & ejus voluntatem
implere cupiunt, ut inquit Bellarminus tex-
tum explicans. Ideò dicuntur Immaculati
in via, hoc est carentes omni peccato lethali
in hac vita mortali, quæ appositè dicitur
via, cum semper mutetur, & nunquam in
eodem statu permaneat. Iusti verò per hanc
viam gradientes, & simul in lege Domini
ambulantes, dicuntur immaculati; quia
Lex Domini immaculata conuertens ani-
mas. Psalm. 118. 8. Vitam Iustorum imma-
culatam facit. Ideò via Iustorum, non est
aut

aut lutoſa, aut pulverulenta, aut alio modo ſordida, ſicuti via impiorum, quæ plena eſt pulvere ſuperbiæ, coeno luxuriæ, & aqua ſordida avaritiæ, vt Bellarminus aduertit.

Cum igitur Iniqui multa mala velint, & multa non habeant eorum, quæ vellent; Iuſti verò cum aliud nihil velint, quam Deum tamquam ultimum finem, adcòque nihil mali velint: idcirco illi miſeri ſunt, futuri poſt vitam præſentem miſeriores: hi verò affatim beati ſunt, futuri poſtmodum longè beatioreſ, ubi plenam felicitatem attingerint. Nè igitur decident à Bono præſenti, quo fruuntur, & à futuro, quod expectant, averſantur omnia, quæ finis ultimi conſecutioni obſtare poſſunt.

Et quoniam Impedimentum unicum eſt via Impiorum, idcò ab hac longiſſimè abſunt, verſanteſ præ cæteris animo verba Sapientiæ. Prouerb. 4. 14. dicentis: Ne delecteris in ſemitis impiorum; nec tibi placeat malorum via. Fuge ab ea, nec tranſeas per illam: declina, & deſere eam. Non enim dormiunt, niſi malè fecerint, & rapitur ſomnus ab eis, niſi ſupplantaverint. Comedunt panem impietatis, & vinum iniquitatis bibunt.

Qui ergo vult eſſe Beatus, & Immaculatus, fugiat à ſemitis Immundorum, & per viam Immaculatum incedat. Ut autem incedat ſæpenumerò ſecum reſcolat, quale ſit, quantumque diſcrimen inter Iuſtorum ſemitam, & viam Impiorum. Iuſtorum.

femita, inquit Sapientia . Prouerb. 4. 18. quasi lux splendens, procedit, & crescit vsque ad perfectam diem . Via Impiorum tenebrosa. Nesciunt ubi corruant.

Audiat unusquisq; verba gravissima, atque perpendat, & si hactenus magis dilexit tenebras, quam Lucem, pergat, si potest, ire quâ cœpit . Salutis monita non despiciat ; non despiciat se ipsum . In primis nihil mali velit, & solum Deum velit . Finis enim ultimus unicè volitus, est rei totius Firma-
mentum, & cardo .

2 Iusti omnes, icet ad summam perfectionem euecti nunquam destiterunt , se more Incipientium in primis vitæ spiritualis rudimentis naviter exercere . Ideò ad peccati malitiam inspiciendam , & odio habendam sæpius, de peccati pœnis, de morte videlicet, de Iudicio extremo, de Reprobatorum cruciatibus cogitabant , iuxta divini Spiritus documentum Ecclesiastici 7. 40. In omnibus operibus tuis memorare novissima tua , & in æternum non peccabis .

Diuus Laurentius Iustinianus moriturus: Christus, inquit, prò nobis mortuus est primitiæ dormientium: pudeat nos mortem timere , cum Dominus noster propter nos mori voluerit . Hunc diem semper antè oculos habui.

Diuus Hieronymus in Regul. Monach. cap. 30. Sive comedam, ait, sive bibam , sive aliquid aliud agam, semper insonat in auribus meis vox illa horrida: Surgite
Mor-

Mortui, & venite ad Iudicium.

Magnus Arsenius de amplissimo Senatore Monachus, interrogatus cur non permetteret, ut aqua operi manuum destinata mutaretur, respondit: Propter thymiamata, quibus in sæculari conversatione fruebar, oportet me nunc, dum in hoc corpore sum, sentire istiusmodi fætorem, ut in die Iudicii, de illo gehennæ intolerabili fætore liberet me Dominus.

Quid ergo nobis agendum, qui tanto à Viris sanctissimis intervallo distamus? Non pudeat primò nostri nos pulveris meminisse, & illa recolere, quæ insipientes Sap. 5, 9. Morte magistra discunt, & dicunt: quid nobis profuit superbia, aut divitiarum jactantia, quid contulit nobis? Transierunt omnia illa, tamquam umbra, & tamquam Nuncius præcurrens, & tamquam Navis, quæ pertransit fluctuantem aquam, cujus cum præterierit, non est vestigium invenire, neque semitam carinæ illius in fluctibus, aut tamquam avis, quæ transvolat in aere, cujus nullum invenitur argumentum itineris, sed tantum sonitus alarum verberans levem ventum, aut tamquam sagitta emissæ in locum destinatum; divisus aer continuò in se reclusus est, ut ignoretur transitus illius. Sic, & nos nati continuò desivimus esse, & virtutis quidem nullum signū valuimus ostendere, in malignitate autem nostra consumpti sumus.

Non pigeat secundo Iudicii; Non pigeat tertio meminisse gehennæ, ut saltem pena-

rum timor à peccando coerceat, si fortè
nos amoris cepisset obliuio. Sed vtramque
considerationem ad uberiores indè fru-
ctum percipiendum in punctum proximè
sequens reijciamus.

3 Prò temporis igitur opportunitate
unusquisque consideret, quid sibi velint
Apostoli Verba: omnes quidem resurge-
mus, sed non omnes immutabimur 1. Cori.
15. § 1. quid sit: Non resurgent impij in
Iudicio, neque Peccatores in Concilio Ju-
storum. Psalm 1. 6. quam metuenda sint
illa, ad Hæb. 10. 6. Voluntariè peccantibus
nobis post acceptam notitiam veritatis,
jam non relinquitur prò peccatis hostia,
terribilis autem quædam expectatio Iudi-
cii, & 1. Petri 4. 17. Tempus est; ut inci-
piat iudicium à Domo Dei, & Sophoniæ 1.
12.; & erit in tempore illo; scrutabor Ieru-
salem in lucernis, & visitabo Viros defixos
in fecibus suis, qui dicunt in cordibus suis:
Non, faciet benè Dominus, & non faciet
male. Alia ex vtroq; testamento similia si-
bi quisq; seligat, si præmissa non sufficiunt,
quamvis satiùs multùm, quam multa per-
pendere.

Non recedat secundò à nobis reprobationis
Timor, Ignisq; perpetuas poenas ab
Hominibus expecturi. Non sit timor, qua-
lem habent, qui spem non habent. De vtro-
que timore differens D. Bernardus serm.
§ 1. in Cantic. hæc habet, quia per dexte-
ram, & sinistram, aduersa solent, & prospe-
ra designari, videtur mihi hoc loco intelli-

gi posse læuam quidem Verbi; comminationem supplicij: Dexteram verò Regni promissionem. Est autem cum mens nostra formidine pænæ serviliter premitur; & tunc nequaquam sub capite, sed super caput dicenda est, nec potest sic affecta Anima omnino dicere, quia Læua eius sub capite meo. At verò si proficiens ex hoc spiritu servitutis transierit in quemdam spontanei obsequii digniorem affectum, quatenus videlicet præmijs potius provocetur, quam arctetur, supplicijs; magis autem si amore boni ipsius agatur: tunc indubitanter dicere poterit, quia læua eius sub capite meo: quippe qui illum servilem metum, qui in sinistra est, meliori, atq; excellentiori habitudine superarit animi, & dignis desiderijs etiam ipsi appropriaverit dexteræ in qua sunt omnes promissiones dicente Propheta ad Dominum: Delectationes in dextera tua usque in finem. Undè & certa spe concepta cum fiducia loquitur: Et dextera eius amplexabitur me.

Igitur more Sanctorum æterna supplicia, & cogitemus, & metuamus, sed Verbi Læua sub capite sit, non supra caput. Timeamus sperantes, immò, & amantes. Sic enim continget nobis, quod sanctissimo Viro Francisco Borgiæ, qui contemplator ignis æterni valdè frequens, inter illa miserrorum incendia diuini Amoris incendio cremabatur. Utinam Ignis divinæ Iustitiæ, victimas inexpiabiles semper incendens, nunquam absumens, alimenta minui-

stret Igni, de quo dicitur Exod. 6. 12. per ænigma: Ignis in Altari semper ardebit, quem nutriet Sacerdos subijciens ligna, manè per singulos dies.

4 Prima ad Corinth. 9. 24. Sic currite, ut comprehendatis. Omnis enim, qui in agone contendit, ab omniaibus se abstinere; & illi quidem, ut corruptibilem coronam accipiant, nos autem incorruptam. Ego igitur sic curro, non quasi in incertum: sic pugno, non quasi aerem verberans, sed castigo Corpus meum, & in servitutem redigo, nè cum alijs prædicauero, ipse reprobus efficiar.

Ab omnibus abstinebat Apostolus, sicut is qui in agone contendit: ita parciore cibo, potuque contentus currebat, & pugnabat, ut pugnans adversus carnem suam, non curreret in incertum, aut aerem verberaret, sed verbera nefarijs spiritibus infligeret, illosque in fugam ageret: castigabat corpus suum, & in servitutem redigebat, nè cum alijs prædicaret ipse reprobus efficeretur. Cæteri Sancti ab Instituto Apostoli, non abhorrebant, nobis videlicet prælucentes exemplo, viamque monstrantes, qua itur ad summum. Summa sanè perfectio non est castigatio corporis. Sed summum, non stat sine infimo.

Videamus igitur primò, ne amor immodicus corporis suis nos fallacijs in errorem inducat. Prudentia, qua nobis parcimus, non sit prudentia carnis, sed spiritus. Nam prudentia carnis mors est. Prudentia.

dentia autem spiritus vita, & pax, quoniam sapientia carnis, inimica est Deo. Legi enim Dei non est subiecta. Nec enim potest. Qui autem in carne sunt, Deo placere non possunt. Ad Rom. 8. 6.

Videamus secundo utrum simus ex ijs, qui omnem duriusculam corporis tractationem averfantur, dicentes summam Virtutis sitam esse in vera spiritus mortificatione; & utriusque mortificationis expertes, neque corpora offerunt, neque Animas in Hostiam viventem, Sanctam, Deo placentem. Quid summis laudibus summa laudantur, & ad summum per gradus inferiores via non munitur? Audiant hi quid Sanctus Hieronymus dicat adversus Iovinianum de delicijs corporis refrænandis. Vexillum Crucis, inquit, & prædicationis austeritas Idolorum templa destruxerat. E' regione luxuria ventris, & gutturis subvertere nititur Fortitudinem Crucis. Semper Pseudoprophetæ dulcia pollicentur, & modicum placent. Amara est Veritas, & qui eam prædicant replentur amaritudine.

Videamus tertio, quomodo Sanctorum vitæ nostra consentiat, & quid hætenus egerimus, & quid in posterum agere velimus, ut corpus perfecte spiritui subijciamus; memores interim D. Chrysostomi advertentis: Apostolum dixisse: Castigo, & in servitutem redigo, non verò dixisse: Perdo, & punio. Non enim inimica caro est. Sed Castigo, & in servitutem redigo,

go, quod Domini est, non Hostis; Magistri, non Inimici; Exercitatoris, non Adversarii.

§ Genes. 17. 'primo apparuit Dominus Abrahamo, dixitq; Ambula coram me, & esto perfectus.

Sicut Abrahamus, ita Iusti omnes Divinis consilijs parentes coram Deo ambulaverunt, & luce Solis innocidui illuminati, per innumeros viarum errores, & cœca præcipitia; pede inoffenso ad maiorem semper perfectionem contenderunt. Nunquam intermissa Dei præsentia, magnum viæ compendium est ad Sanctitatem. Ideo Severinus Boetius agebat, magnam nobis injectam esse necessitatem bene agendi, quod omnia agimus in conspectu Iudicis cuncta cernentis: Et hac de causa tot, tantarumque rerum gestarum gloria excelluerunt Sancti, quia nunquam à Deo cuncta cernente mentis aciem ad inania declinaverunt. Si Filij Sanctorum, & Imitatores esse in votis habemus, coram Domino ambulemus.

Ambulabimus autem primò, si in omnibus operibus suis Conditorum agnoscere, & contemplari studebimus. Memor fui operum Domini, agebat Regius Vates psal. 76. 12. Et meditabor in omnibus operibus tuis, & in adiuventionibus tuis exercebor.

Ambulabimus secundò, si considerantes, ut habetur Ecclesiaste 1. 8. Quod non saturatur oculus visu, nec auris auditu imple-

pletur, & cuncta, quæ sunt sub Sole, sunt vanitas, & afflictio spiritus, ad saniora consilia nos convertemus, & de illo solo cogitare deliberabimus, qui solus visum, auditum, omnemque appetitum explere potest.

Ambulabimus tertio. Si præter summam voluptatem, summam etiam utilitatem, & honestatem Divinæ Præsentiae attenderimus. Quid enim utilius nobis, quid honestius, quam Legis totius impletio? Hanc autem Divinæ Præsentiae adscribit Prophetæ psalm. 118. u. 168. dicens: Servavi mandata tua, & testimonia tua, quia omnes viæ meæ conspectu tuo.

6. Non solum Sancti magna gesserunt; sed magna etiam pro Domino pertulerunt. Et postquam innumera pertulissent, nunquam dicebant: sufficit. Sed longè plura, & acerbiora pati desiderabant, & petebant: neque ore tenus, sed sicut ex toto corde innumera, & durissima toleraverant, ita se pluribus, & intolerabilioribus tolerandis ex toto animo offerebant, memores ubique, & omni tempore Divini Magistri dicentis Lucæ 17. 10. Cum feceritis omnia, quæ præcepta sunt vobis, dicite: Servi inutiles sumus, quod debuimus facere, fecimus. O magnitudinem Animi, o dilectionem numeris omnibus absolutam! O voluntatem non solum uniformem, sed Deiformem!

Nos verò dicere quidem possumus: Servi inutiles sumus. Sed numquid adiungere
pos-

possumus: Quod debuimus facere, fecimus? Quid enim hactenus fecimus? Quid passi pro Nominis divini gloria sumus? Quid agere, & pati desideravimus? Et si quid agere, aut pati contigit; quomodo, & qua de causa opus executioni mandavimus? aut laborem sustinuimus? Quantum pudoris illa tria offendent: quid, quomodo, cur? Si consideraverimus quid nos, & quid Sancti: quomodo nos, & quomodo Sancti: Cur nos, seu qua rectitudine voluntatis, & Cur Sancti Viri, & qua perfectione egerint: sustinuerint, concupierint, quicquid egerunt, sustinuerunt, in votis habuerunt?

Ergo vitæ præteritæ, præsentisque pertransi, spectantesque, quanta inter nostram vitamque Sanctorum dissimilitudo intercedat, desidiam nostram calcaria subijciamus: nosque pudeat, post exiguos, brevesque labores, sollicitos magis esse de meta, quam stadio, magis de corona, quam cursu. Si comprehendere volumus, ita curramus, ut non cogitemus quantum stadij decurrendi supersit, sed quam bene curramus.



MEDITATIO II.

*De Humilitate, & Obedientia
Sanctorum.*

Non omnes Sancti fuerunt, si-
ve Apostoli, siue Martyres,
siue Doctores, aut Virgines,
sed omnes fuerunt Humiles.
Janua Regni Cœlestis angustâ est, humilis
est. Nisi quis aut sit, aut efficiatur Paruu-
lus, non intrabit. Neque parvitas quæ-
cumque sufficit ingressuro. Alia enim est
Humilitas Intellectus, qua quis suam vi-
litem agnoscit. Alia est Humilitas Affe-
ctus, qua quis cognitam sibi vilitatem ab
aliis cupit agnoscere, amans nesciri, & pro
nihil reputari.

Ergo qua fronte superbe Peccator suspi-
cis Cœlum? Non illuc patet ingressus ere-
cta cervice gradientibus. Quid facilius,
quam ad Lumen Veritatis, vilitatem suam
agnoscere? Tu tamen ita miser, & cœcus
es, ut nondum nosse te ipsum didiceris,
& nondum intelligas, quantum distes
non solum à Justis, inter quos versaris, &
quibus te præponis: sed à Peccatoribus,
& magnis Peccatoribus, quorum peccata
vincis, & nescis.

Si de primo gradu Humilitatis, qui fa-
cillimus est, nihil habes: quid habebis de
se-

secundo, qui non sine magna sui victoria exercetur? Operiat ergo confusio faciem tuam, daducant oculi tui rivos lacrymarum, divinam opem implora, & esse enitere, quod non fuisti.

2 Ut autem N. Peccator voti particeps fias, & quod leviter indicatum est, clarius assequaris, perpende verba Divi Bernardi Serm. 40. in Cantica, ita loquentis. Est Humilitas, quam nobis Veritas parit, & non habet calorem. Et est Humilitas, quam Charitas format, & inflamat. Atque hæc quidem in affectu, illa in cognitione consistit. Etenim Tu si temetipsum intus ad lumen Veritatis sine dissimulatione inspicias, & sine palpatione diiudices, non dubito quin humilieris & tu in oculis tuis, factus vilior tibi ex hac vera cognitione tui, quamvis nec dum id esse patiaris in oculis aliorum. Eris igitur humilis. sed de opere interim veritatis, & minimè adhuc de Amoris infusione. Nam si veritatis ipsius, quæ se tibi veraciter, atque salubriter demonstravit, sicut splendore illuminatus, ita affectus amore fuisses * voluisses proculdubio quod in te est, eandem de te omnes tenere sententiam, quam ipsa apud te Veritatem habere cognoscis.

Audiivi Doctor sanctissime documenta oris tui lacte, & melle manantis. Utinam intelligerem quæ dixisti, & executioni mandarem. Quoniam verò mandare non possum, nisi luce Veritatis illuminet, & nisi

nisi Charitatis Igne succendar, & nisi vilis factus in oculis meis, vilis etiam apparere cupiam in oculis alienis; impetra mihi primò, ut qui positus est à Patre suo in Lucem Gentium, disiciat tenebras Intellectus mei, ut noverim me. Impetra secundò ut qui venit Ignem in terras mittere, frigidissimi cordis gelu dissolvat, ut amem illum, qui fecit, ut oderim me, alta sapientem, inania cogitantem, & superbia mea ad iram provocantem Altissimum. Impetra tertio. Ut nihil magis desiderem, quam contemni, omniumque pedibus teri sicut lutum platearum, amore illius, qui cum in forma Dei esset factus est Homo; & de Homine factus est vermis, & opprobrium hominum, & abiectio plebis.

Si talis esse didicero, non verebor dicere: Amem nesciri. Multi enim amant nesciri affectu Humilitatis propria bona occultantis, & magis obscuritate nominis, quam claritate gaudentis. Multi vero amant nesciri affectu superbiæ suæ mala, suæ dedecora regentis. Vè superbis, væ mihi, si faciem Animarum nostrarum clarè spectandam Veritas exhiberet? Quæ si pudore suffunderemur, si quæ soli patient Deo, essent omnibus explorata? Ideò qui nondum humilis est, non facilè dicat: Amem nesciri. Illi enim melius est, attenda indole superbiæ nesciri, quam sciri. At si jam serio diligere ceperit exinanitum in formam Servi, & opprobriis sag-

ru.

turatum, dicat fidenter. Amem nesciri. Sicut enim bona sua latere, ita mala sua omnibus manifesta esse desiderat. Et idcirco sicuti sensit Bernardus: Si quis amore afficiatur, sicuti splendore illuminatur, nult eandem de se omnes tenere sententiam, quam apud se veritatem habere cognoscit.

3 Excelluerunt etiam beatissimi Cives, dum adhuc in hoc exilio versarentur, tribus illis gradibus Humilitatis, quos in ordinem digessit, & in Meditationibus Exercitiorum Spiritualium omnibus Amatoribus Sanctitatis proposuit Sanctus Patriarcha Ignatius.

Fuerunt enim primò divinæ Legi ita subjecti, ut nullius boni spes, nullius mali quantumvis æterni formido, illos inducere potuisset, ad præceptum aliquod graviter obhgans violandum. Ideò tot Anachoretæ, tot Penitentes, tam durè secum egerunt; tot Martyres cæsi sunt, Feris obiecti sunt, erupibus præcipitati, Equis indomitis per saxa, dumosque raptati, flammis absumpti, ne debitam Legislatori subiectionem, & obedientiam denegarent.

Verùm ejusmodi humilitatis gradu nequaquam contenti, ad ulteriorem processerunt, & eodem Animi robore eadem pertulerunt, aut si oblata fuisset occasio, perferre voluissent, ne se ulla in re quantumvis levissima, divinæ Voluntati subdicerent.

Sed

Sed neque hic substiterunt. Ad ultimum enim, atque celsissimum Humilitatis gradum se se agentes, licet nullum siue grave, siue leve Legis implendæ præceptum urgeret; imò licet per gloria Dei fuisset honorari, siue contemni; opibus augeri, siue spoliari; in summa felicitate versari, vel summo luctu, summaque miseria: ad maiorem tamen imitationem Christi, elegerint potius cum eo Paupere, spreto, & illuso, pauperiem, contemptum, & insipientiæ titulum complecti, quam opes, honores, & sapientiæ æstimationem.

Consideret unusquisque ad quem Humilitatis gradum pervenerit. Primus est omnibus ad salutem necessarius. Secundus ad Innocentiam vitæ. Tertius ad summum apicem perfectionis.

Neminem terreat Verticis celsitudo. Habet enim gradus hic eminentissimus gradus suos. Qui ad summum eniti non potest, ad infimum summi nitatur. De Christo paupere, spreto, illuso vindicet sibi quicquid, & quantum virium infirmitas patitur.

4 Psalm. 17. 48. Populus, quem non cognovi servivit mihi, in auditu auris obedivit mihi. Filii alieni mentiti sunt mihi, Filii alieni inveterati sunt, & claudicaverunt à semitis suis.

Sunt verba Davidis manifestè Christum Dominum referentis, ut Bellarminus advertit. Sicut enim Davidi à suis deserto adhæserunt Gabaonitæ, & Getei, qui
Gen.

Gentiles erant ; ita Messia, à quo Synagoga defecit, adhæsit Gentium multitudo. Et ideo dicit, Populus quem non cognovi servivit mihi. Præcipue autem commendat promptam novorum Fidelium Obedientiam, dicens: In auditu auris, hoc est ad primum sonum, ad primum vocis auditum, obedivit mihi Populus, quem non cognovi. Filii autem alieni, Filii degeneres à Patribus suis, Abrahamo videlicet, qui iussus immolare Filium, nulla interposita mora, se dedit itineri ad imperata facienda ; & Isaaco, qui sine ulla repugnantia, velato vultu, manibusque vinctis se aræ permisit imponi : & Jacobo, qui jussu Patris, paterna Domo relicta in Mesopotamiam abiit ; Filii inquam adulterini, & cæterorum Patriarcharum immemores, mentiti sunt Deo, & ab illo tamquam folia arentia defluerunt, ut vox Hebrea significat, ubi latina versio habet: inveterati sunt: & claudicaverunt à semitibus suis ; hoc est non recte, & fideliter cum Deo inceserunt.

Quam aptè prima verba conveniant veteris, & ferventibus Ecclesiæ novæ Fidelibus ; postrema verò tepidis, & à primæva Fidei virtute abhorrentibus, satis superque exploratum est.

Veri Fideles ab initio nascentis Ecclesiæ, ubi primum Filium Dei cognoverunt, illicò illius amore flagrarunt, seque, & sua omnia obliti, nihil aliud in votis habuerunt, quam vocibus parere.

vocantis, sicuti Petrus, & Andreas, qui Divinum Magistrum audientes dicentem: Venite post me, faciam vos fieri Piscatores Hominum: continuò relictis retibus secuti sunt eum: & sicuti Iacobus, & Ioannes, qui similiter vocati: statim relictis retibus, & Patre secuti sunt vocantem.

Ego verò quam impigrè Sanctorum, pressi, & premo vestigia? Et cognovi Dominum, & audiui, & sæpius vocantem, audiui, & adhuc Algeo, & adhuc hæreo desidia torpens, & illud usurpans, modò, & modò. Et nullum habet modum hoc insulsi ssum modò, & modò.

Quis vincula mea dirumpet? Quis me liberabit, à mortis huiusce torpore? Numquid Domine IESU numerabor inter Filios alienos, qui tibi mentiuntur, & ab Arbore vitæ tamquam folia arentia defluunt, & claudicant à semitis tuis? Adiuvā Domine infirmitatem meam. Fac me velle, quod nolo. Et itā desidi in pariendo, parendi celeritatem impertire.

5 Celeritati Obedientiæ addiderunt Sancti omnes fortitudinem. Non enim, solum promptissimè paruerunt in rebus modicum difficultatis habentibus, sed in asperrimis quibusque, & maximè arduis. Quid enim difficilius, quam abdicatione voluntaria carere bonis omnibus animi, corporis, & fortunæ? Suamque felicitatem ponere in summa paupertate, in summis cruciatibus corporis, in fame, & siti, in frigore, & nuditate, in summa igno-

mi:

minia, ludibriis, oblocutionibus calumniantium, & scelera, & flagitia omnis generis obiiicientium, & fidem calumniis apud Homines invenientium?

Nihil horum obedientiæ studio timuerunt Sancti, nihil non vicerunt. Unusquisque percurrat illorum acta, & præcipue suorum Patronorum, quos peculiari colit obsequio: & cogitanti occurrent innumera, undè in admirationem rapiatur, & undè magno pudore suffundatur.

Erit autem utilis ista confusio, primò ad placandam Iustitiam divinam tot inobedientiis nostris infensam.

Erit utilis secundò ad nostræ soporem, socordiae excutiendum, & excitandum animum ad currendum, exemplo currentium ad bravium æternæ vocationis, nè alii nostram Coronam accipiant.

Erit utilis tertio ad enixius orandum, & obsecrandum donec impetremus illam celeritatem, illam indifferentiam, illam fortitudinem Obedientiæ, qua tantopere indigemus. Quod si non solum conformitatem voluntatis cum voluntate, sed etiam iudicii cum iudicio Præcipientis impetraverimus, ita ut idem velimus, quod vult Præcipiens, & idem sint sentire nostrum, & sentire mandantis, tunc omni Bono, omni quæ nos cumulat gaudio sentiemus.

6 Ultima dos Obedientiæ perseverantia est. Ijs omissis, qui gloriosâ studio obedientiæ mortem appetiverunt, nobis aliquos pro-

ponamus, qui vel in morte, vel etiam post mortem imperata fecerunt.

Dositheus jam extremi vim morbi non sustinens, optansque dissolui, & esse cum Christo, Sancto seni Barsanuphio ad se invisendum ingresso dixit: Dimitte me, quoniam jam ulterius nequeo. Respondit Senex: Sustine, & expecta paululum Fili. Rursum post aliquot dies ad se ingressus, Pater, inquit, jam amplius nequeo penitus. Tum Senex: Vade in pace Fili, & te Sanctæ Trinitati præsentia, atque precare pro nobis. Quibus dictis, evolavit Vir obediens in Coelum. Apud Jo: Seuceanum. pag. 169.

Friardus reclusus imminente morte accersivit Felicem Episcopum Nanetensem, qui occasione quadam detentus, mandatum remisit dicens: Rogo te, si fieri potest, ut me modicum expectes. His auditis Friardus, surgamus, inquit, & sustineamus Fratrem nostrum. Et sic surrexit incolumis. Post multum temporis febris correptus advenientem Episcopum salutavit dicens: Grandes mihi moras de itinere debito facis, ô Sancte Sacerdos. Cum igitur tota nocte simul vigilassent, & collocuti essent, mane factò Vir Sanctus reddidit Spiritum. Apud Surium Tom. 4.

Audiens Beatum Nilum Juniores se vocantem nomine suo Stephanus, licet Animam ageret, statim resedit: manibusque levatis mentem adhibebat ad ea, quæ sibi dicerentur. Cum autem dictum esset: Be-

E

nedic

nedic Fratribus tuis, cum jam deficias :
 Extensis manibus Aeger, & oratione facta illis benedixit. Nunc requiesce, inquit Beatus Nilus, quia non potes amplius. Parvit illicò Moribundus, & peracta obedientia caput reclinans placidè requievit.

Quid plura ? Ne post mortem quidem Sancti Virtutem Obedientiæ dederunt. Cum Athanasiam pretiosam morte defunctam vellent pretiosis induere vestibus Moniales, renuit Cadaver manus adhærentes pectori tenens. Rogata, ut quam obedientiam viva servaverat, fervaret etiam extincta, manus illicò relaxavit, & vestimenta parantium admisit obsequium.

Ità Sanctissimis Viris, & Feminis Obedientia cordi fuit. Ità cordi nobis erit, si quorum facta miramur, sequi prò viribus contendemus. Sequemur autem, si quotidie iussa facere assueverimus in parvis æquè ac magnis : in facilibus, & arduis : tam in consonis propensione propriæ voluntatis, quàm repugnantibus. Præmium laboris, piæque consuetudinis erit in ipso mortis articulo, & si fas est dicere, etiam post mortem præcipientibus obtemperare, celeriter exequendo quod præcipitur, vehementer amando quod executioni mandatur, & idem quod Præcipiens judicat, judicando.

Audiat Dominus preces nostras, ut ipsum audiamus semper, & Prælatos nostros ipsius personam sustinentes, audiamusq;
 dum

dum vivitū; ut vel morientes audire
possimus.

MEDITATIO III.

*De Charitate Domini Præcursores
Sanctificantis relucente in Cha-
ritate Sanctorum.*

Sanctus Patriarcha Ioseph, ut
operam suam impenderet Do-
mino volenti Domum Zachariæ
invisere, & Ioannem sanctifica-
re, & Elisabetham Spiritu Sancto replere
sternit jumentum ad iter faciendum.

Iumentum, quo sancti omnes cum Di-
vo Ioseph utuntur ad iter agendum, Do-
minumque cum Matre sua introducendum
in Animas nostras, est corpus. Hoc an-
tè omnia comparatur ad iter. Sternitur
ad comodè equitandum. Frænum illi ini-
citur, ad regendum. Si vox non sufficit
ad socordiam excutiendam, virgæ, ver-
beribusque non parcitur.

Quam rigide Sancti omnes corporum
suorum jumenta tractaverint, quam parcè
paverint, nè recalcitrarent, quæ fræna illis
injecerint, quibus verberibus exercue-
rint, ut Spiritui parerent, manifestum
est singulorum gesta percurrentibus. Ali-
ter utilia esse non possent ista jumenta ad
procurandam salutem aut nostram, aut

alienam. Ideò Sancti omnes ità solliciti fuerunt circa regimen, & mortificationem suorum corporum, ut sibi prodesse possent, & aliis, & ut iisdem corporibus iterentur ad portandum Dominum illis quodamodò insidentem, eundemque in aliorum Animas introducendum.

Si hoc Patriarcha Sanctissimus, si hoc Sancti omnes egerunt, quid Sanctum Sanctorum egisse consuebinis? Psalm. 39. 9. dicitur: Sacrificium, & holocaustum noluisti, aures autem perfecisti mihi. Græca versio habet: Corpus autem perfecisti mihi; hoc est corpus aptissimum ad sentiendum, atquè adeò ad patiendum. Nec ista Lectio repugnat latinæ editioni. Nam latinus interpres posuit partem pro toto, nempe aurem pro toto corpore. Et aptè quidem, ut Bellarminus advertit. Nam auris est Instrumentum Obedientiæ. Cum autem Corpus Christi esset non solum aptissimum ad patiendum, sed obedientissimum ad penas omnes perferendas, adeoque totum esset Auris, idcirco in latina versione, non alia pars corporis ponitur pro toto corpore, quam Auris.

Utinam Domine JESU discam à Sanctis, discam à Te non subesse corpori meo, sed præesse. Utinam discam illud regere, & obediens ad omnia imperata facere, & utile ad cooperandum Gloriæ tuæ in meipso, & in aliis. Dicebat Apostolus prima ad Cor. 6. 10. Glorificate, & portate Deum in corpore vestro. Da ut ego, da

ut

ut omnes Glorificemus te, & portemus te, in corpore nostro, & notitiam, & amorem Tui diffundamus à nobis in alios, teq; una cum Matre tua in aliorum Animas introducamus ad illas illuminandas, sanctificandas, & Spiritu Sancto replendas.

1 Sequamur Sanctum Patriarcham iter facientem, & consideremus, quam altum silentium teneat, silensque solo cum DEO loquatur. Silet, ut loquatur cum audiente, & in silentio loquente. Loquitur cum Deo, à quo solum discere potest Sapientiam Sanctorum, & vires obtinere ad hanc Sapientiam aliis communicandam, aperiendumque aditum DEO unà cum Sapientia venienti in Animas Audientium.

Quantò perfectiùs hac arte usus est, qui è Coelo venit in terras, ut nos visiteret oriens ex alto? Cum medium silentium tenerent omnia, & nox in suo cursu medium iter haberet, Omnipotens Sermo tuus Domine de Coelo à regalibus sedibus venit, & siliens venit, & silvit in Utero Matris mensibus novem, toramque Infantiam traduxit elinguis, more aliorum Puerorum; & cum ab incunabulis omnes Sapientes docere posset, usque ad annum trigessimum publico abstinuit, silens, & orans continuò Patrem, solitusque in Mōeibus pernoctare in Oratione Dei.

Tanti nimirum faciebat salutem hominum. Adeò diligebat Peccatores, ut noluerit demandatam sibi provinciam aggredi, nisi longa veluti consultatione præmis-

sa, qua nullatenus indigebat; aditumque tentare in corda hominum, nisi post omnia media diligenti discussione quodammodo explorata.

Tantæ Charitati gratias agentes discamus, quid in procuranda Proximorum salute agere debeamus. Cooperari Deo in salutem Animarum, si Arcopagitæ credimus, Divinissimum opus est. Non est opus Prudentiæ nostræ, non industriæ, non laboris. Humana arbitria regere, & volentia ducere, nolentia trahere, Divini Spiritus est, non humani. Vel ipsa Prophætæ verba exterius quidem sonant, sed cor non accendunt, Mysteria proferunt. Sed tu Domine Deus referas intellectum, signatorum. Mandata edicunt, sed tu juvas ad perficiendum. Viam ostendunt, sed tu confortas ad ambulandum. Ergo quid nostræ Providentiæ, quid miseri Peccatores nostris conatibus innitamur, si vel Sanctissimi Viri loquentes foris tantum agunt, Tu verò corda instruis, & illuminas: Illi exterius rigant, sed Tu fecunditatem donas. Illi clamant verbis, sed Tu auditui intelligentiam tribuis. Thom. à Kemp. lib. 3. cap. 2.

Quoniam ergo Te silente, proficua nobis, & aliis loqui non possumus: neque nisi tacentes audire possumus loquentem verba Vitæ æternæ, præsta ut multum sileamus antequam loquamur: & multum oremus, antequam manum operi, quod omnium operum Divinissimum est, admoveamus.

3 Labor itineris gravis non est Sancto Patriarchæ, sed jucundus. Cooperari siquidem Filio Dei, ad invisendam Zachariæ Domum, Joannemque sanctificandum erat illi jucundissimum. Ista voluptas nullum tædio aut laboris, aut itineris, relinquebat locum.

Quid igitur erit de illo dicendum, qui exultavit ut Gigas ad currendam viam ita longam, implexam, & asperam, ut licet summo polleret robore, fatigatus tamen ex itinere sedere coactus fuerit ad Fontem Sichar, Samaritanæ gratia lucrificandæ, quæ naturæ humanæ typum gerebat: & in Horto Gethsemani sanguineo sudore manare; ac tandem alto sopore correptus in sepulchro quiescere? Via non poterat esse longior, asperior, laboriosior. Sed amor humani generis, sed ardens desiderium una cum Patre, Spirituque suo ad nos veniendi; & apud nos mansionem faciendi, omnem longitudinem, asperitatem, difficultatem ademit viæ longissimæ, asperissimæ, laboriosissimæ.

Quis dignas tanto Amori grates rependat? quid non tentandum, quid operis quantumvis ardui aggredi non decet ad majorem Dei Gloriam, Proximorumque utilitatem, ut grati simus?

Ut autem desides animos excitemus, ad veros Imitatores JESU æmulandos, illorum dicta, & facta identidem recolamus. Videamus, & attentè consideremus quid scribat Apostolus 2. ad Corinth. 11. 22.

seipsum cum æmulis suis, & pseudo Apostoli componens. Hæbrei sunt, & ego. Israelitæ sunt, & ego. Semen Abraham sunt, & ego. Ministri Christi sunt (ut minus Sapiens dico) plus ego: in laboribus plurimis, in carceribus abundantius, in plagis supra modum, in mortibus frequenter. A' Judeis quinquies, quadragenas una minus accepi. Ter virgis cæsus sum. Semel lapidatus sum, ter naufragium feci, nocte, & die in profundo maris fui, in itineribus sæpè, periculis fluminum, periculis latronum, periculis ex genere, periculis ex Gentibus, periculis in Civitate, periculis in solitudine, periculis in mari, periculis in falsis Fratribus; in labore, & ærumna, in vigiliis multis, in fame, & siti, in injuriis multis, in frigore, & nuditate. Quis infirmatur, & ego non infirmor? quis scandalizatur, & ego non uror?

Et cap. 12. ejusdem Epistolæ 14. Ecce tertio paratus sum venire ad vos, & non ero gravis vobis. Non enim quæro quæ vestra sunt, sed vos. Nec enim debent Filii thesaurizare Parentibus, sed Parentes Filiis. Ego autem libentissimè impendam, & superimpendar ipse pro Animabus vestris, licet plus vos diligens minus diligar.

4 Quantò magis Sanctus Ioseph Zachariæ sedibus propinquabat, tanto majori gaudio perfundebatur. Qui enim multum amat, multumque desiderat benefi-

cia

cia conferre, eò abundantius gaudet, quò propinquior est beneficii collatio.

Quid ergo mirum, si dicebat Dominus: Baptismo habeo baptizari, & quomodo coarctor usque dum perficiatur? Hoc enim dicebat morte appetente, qua mortem nostram erat occisurus, & qua deleturus erat peccatum impediens suæ Divinitatis adventum in Animas nostras: & quò propius mors accedebat, eò plenioris lætitiæ signa prodebat. Ideò invitatus à suis Jo: 7. 10. ad Festum Scenopegiae dixit: Vos ascendite ad diem Festum hunc: Ego autem non ascendo ad diem Festum istum, quia meum tempus nondum impletum est. Quid est hoc tempus implendum? Illud nimirum, quod unice spectabat, & expectabat. Tempus videlicet passionis, & mortis: Tempus hoc vocat tempus suum, tamquam sibi maximè Festum, atque solemne, & cum tabernaculorum Festo minimè conferendum.

Sed cur postea ascendit, quasi in occulto? quia si manifestè ascendisset, interfectus ab inimicis odio flagrantibus fuisset, antè præfinitum tempus à Patre; nisi divinitus mortem evasisset. Tempus hoc summopere expecebat: Sed adhuc voluntas Patris obstabat. Igitur inter duo extrema sibi opposita eximie coarctabatur. Volebat Baptismo sui sanguinis baptizari; sed pari voluntatis ardore volebat Voluntatem Patris impleri. Ideò dixit: Vos ascendite ad diem Festum hunc; ego autem

non ascendo ad diem Festum istum, quia tempus meum nondum impletum est: neque cum isto Festo Scenopægiæ jungendus est dies Festus mihi omnium celeberrimus.

Ita ne Domine JESU diligis nos, ut solum diem illum tibi celeberrimum, ac jucundissimum putes, quo pro Peccatoribus moreris? dicisque nondum advenisse tempus tuum, quia nondum Crucem ascendis? Ità planè est: Per mortem enim discedens à nobis, tibi aditum aperis, quo venis ad nos, & manes in nobis.

Tempus meum nondum advenit, tempus autem vestrum semper est paratum. Quid est hoc? inquit Divus Augustinus in Io: tract. 28. Nondum venerat tempus Christi? Quare ergo Christus venerat, si tempus ejus nondum venerat? Non nè audimus Apostolum dicentem: Cum autem venit plenitudo temporis, misit Deus Filium suum? Si ergo in plenitudine temporis missus est, quando debuit missus est; quando oportuit, venit. Quid ergo est: Tempus meum nondum venit.

Respondet sibi Augustinus dicens: Tempus Gloriæ meæ nondum venit. Sed quænam est gloria, de qua loquitur Augustinus? Numquid opprobriis saturari, cum sceleratis reputari, & pro mortem inferrentibus mori? Si hæc summa Christi voluptas, & gloria est, Absit à nobis delectari, absit gloriari, nisi in illa Cruce, in qua Dominus summum gaudium, summam gloriam collocavit.

§ Si-

§ Sicut ab incepto itinere Sanctus Patriarcha non destitit, nisi postquam in Zachariæ Domum Matrem, Filiumque Dei introduxit; ita Christus Dominus opus inceptum non intermisit, nisi postquam Domum Zachariæ donis cœlestibus cumulavit, & Ioannem in Matris utero exultantem sanctificavit, & Elisabetham, Spiritu Sancto replevit. Et quoniam domus Prophætę, Mundi totius referebat Imaginem, & unius domus Visitatio, totius Mundi Visitationi præluxit, propterea sicuti Dominus Charitate summa susceptum laborem perduxit ad exitum felicissimum; ita Charitate longè ampliora inchoatam visitationem Mundi, ab eo tempore, quo in propria venit, & sui eum non receperunt, in singulos dies promovit, donec illam exacte perficeret. Perfecit autem totum Orbem terrarum per se ipsum, deindè per Apostolos illuminando, juxta illud: In omnem terram exivit sonus eorum: & in fines Orbis terrę verba eorum. Psalm. 18. 5. Perfecit non unum Ioannem in utero Matris, sed innumeros Peccatores in sepulchro viciorum suorum jacentes sanctificando, juxta illud Ezechiel. 37. 4. Ossa arida audite verbum Domini. Hęc dicit Dominus Deus ossibus his: Ecce ego intromittam in vos Spiritum, & vivetis. Et dabo super vos nervos, & succrescere faciam super vos carnes, & superextendam in vobis cutem, & dabo vobis Spiritum, & vivetis, & scietis.

sis, quia Ego Dominus. Perfecit denique Ecclesiam universam Spiritu Sancto replendo: juxta promissionem, quæ habetur Lucæ 24. 49. Et ego mitto promissum Patris mei in vos. Vos autem sedete in Civitate, quoadusque induamini virtute ex alto.

Perfice Domine opera tua in nobis, qui perficis omnia. Perfice Virtutes omnes. Perfice constantiam in promovendo, & ad exitum perducendo, si quæ laudabiliter inchoavimus, ad rudes erudiendos, ad jacentes erigendos, ad errantes reducendos, ad sollicitandos inertes, & tepidos inflammandos.

6 Sanctus Ioseph unâ cum Matre, Filioque Dei ingressus domum Zachariæ, mansit ibi summam voluptatem percipiens ex affluentia Bouorum, quibus abundare cernebat Familiam cœlesti luce perfusam, Præcursorem justificatum, & Elisabethâ, non suo, sed Spiritus infusi ore prophetantem.

Quonam igitur gaudio exultavit, qui Patre suo putatio, & Matre Virgine precunte, eadem sedes ingressus, fecit de tenebris lucem splendescere, & Ioannem in Matris utero exilire, & Elisabeth suo spiritu plenam futura prædicere?

Sed hæc fuere initia gaudiorum. Enim verò, quo gaudio pertusus est, quando Mundum ingressus concinentibus Angelis pacem hominibus bonæ voluntatis nuntiavit? Quando Veritas de terra orta est,

& lu.

& Iustitia. de Coelo prospexit? hoc est, quando ipse, qui Veritas est de Matre Virgine ortus est: & quando ipso in lucem edito cepit vera Iustitia de Coelo descendere, & Homines per Fidem Christi iustificare, ut inquit Beilarminus in Psalm. 84. 11. Quando Misericordia, & Veritas objaverunt sibi, & Iustitia, & Pax osculatae sunt? quando Reges Orientis ad Præsepe nova Stella deduxit? Sed necesse non est ire per singula. Non pigeat tamen, omittis aliis, illius temporis meminisse, quando gloriosissimæ Vitæ curriculum e mensus traxit omnia ad se ipsum. Ad hoc enim venerat. Ad hoc discessit à nobis, ut apud nos maneret, & maneret usque ad consummationem sæculi, docens, regens, visitans, & de nobis, & in nobis exultans.

O nostrarum Visitator. Annuarum! O Amor Collium Æternorum! quo Amore ardes erga tam frigidos in amando? Delitiæ tuæ esse cum Filiis Hominum. Cur delitiæ nostræ non sunt esse cum Filio Dei? Disrupisti jam Coelos, & descendisti, uti desiderabat Isaias 64. 1. A facie tua Montes superbi defluerunt: sicut exultio ignis contabuerunt, & in Penitentiæ cineres resoluti sunt. Aquæ frigidissimæ cordium humanorum arserunt illo Igne, quem in terras mittere venisti, & voluisti vehementer accendi: nostra verò corda sicut hætenus riguerunt; ita durissimo adhuc gelu rigescunt. Sed non rigebunt in posterum, si Tu nolueris, Non rigebunt, si

egenos, & vacuos de Tua Plenitudine
dabis accipere.

MEDITATIO IV.

*De Lotione pedum Eucharistiæ
Institutioni præmissa.*

ANte diem festum Paschæ
sciens IESUS, quia venie
hora ejus, ut transeat ex
hoc Mundo ad Patrem,
cum dilexisset suos, qui erant in Mundo,
in finem dilexit eos. Et Coena facta, illa
nimirum, quæ sequebatur ad esum Agni
Paschalis, abluturus pedes Discipulorum
suorum surgit à cœna, ut habetur Ioan.
13. 4.

Singulari exemplo Christi se ad lavan-
dos Discipulorum pedes comparantis,
Evangelista præmittit singularis verba di-
lectionis, ut intelligeremus, qua dilectione
se servorum suorum servum fecerit, &
ad illorum se pedes abiecerit, antequam
ex hoc Mundo transiret ad Patrem. Quis
major est, qui recumbit, an qui ministrat?
Nonne qui recumbit? Ego autem in me-
dio vestrisum, sicut qui ministrat. Lucæ
22. 27. Verum quoniam illotis pedibus,
ad mensam Regis Invitatus sedere non de-
cet, idcirco non solum mensæ, sed ne ab-
luendorum quidem pedum refugit mini-
ste-

sterium. Et quidem non perfunctoriè, ac negligenter, ut Maldonatus advertit, sed tanto studio, tanta sedulitate, ut nihil unquam aliud per totam vitam egisse videretur. Ideò surgit à mensa. Ideò vestimenta deponit. Ideò linteo se præcingit. Ideò suis manibus mittit aquam in peluim.

Ergo Domine IESU ut nobis ministres surgis à cœna? Neque solum surgis à mensa Paschali, sed à cœna Beatitudinis? Propterea enim de Comprehenso Viatorem pariter te fecisti, ut posses obnoxius esse labori, & incomodis ministerii. Tu surgis à Cœna Felicitatis Æternæ, ut Convivis ministres, & illorum abluas pedes antequam recumbant: Nobis verò natis ad laborem, molestum erit surgere à mensa felicitatis terrenæ, quæ miserabilis miseria est, non felicitas? Absit, ut nobis hoc molestum sit: Surgemus, ut ministremus Tibi, & initium ministerii nostri erit ad pedes tuos procidere, & illos profusissimis abluere lacrymis, lumentibus oculis miseriam nostram, & animis implorantibus misericordiam tuam.

Atque utinam surgere à mensa possemus, non solum ut pedes tuos lacrymis veræ Penitentiæ rigaremus, sed etiam, ut Tibi de nobis cœnam instrueremus, tantoque Convivæ exhiberemus panem illū, de quo Martyr Sanctissimus dicebat: Frumentum Christi sum, dentibus bestiarum molar, ut panis mundus inveniar; & similiter exhiberemus aquam timoris, in-

vinum amoris jussu tuo mirabiliter commutata. Ut enim docet Serius tuus Bernardus Serm. 13. inter parvos: Cum Hydrix plenæ factæ sunt usque ad summum, tunc aqua vertitur in vinum bonum, quia nimirum ordo rationis est, ubi timor est initium Charitatis perfectum. sequatur etiam plenitudo dilectionis.

2. Ponit vestimenta sua. Vide Animam accuratam ministrandi rationem. Ut in omne opus ministerii sit expeditior, abiicit impedimenta vestium. Tu verò quid agis Anima desidiola? Adhuc otiosa, adhuc delicata sedes ad mensam amoris proprii, & circumdata tot habitibus vitiosis, nè unum quidem habitum hæcenus exuisti, ut præsto esses Regi Regum obsequio promptiori. Pudeat te tui, & ad illam depositionem vestium, discere deponere vitia tua, discere te ipsam exuere, ut induas Dominum nostrum IESUM Christum. Nulli impedimento eris ista Vestis ad illi ministrandum.

Si adhuc in ancipiti hæres, vide quæ alia vestimenta longè diversa deponat, ut tibi famuletur. Ab initio vitæ, ut superius indicatum est, statum Comprehensoris, Viatorisque conjungens, è Beatitudinis suæ cæna surrexit, & ut familiarius tecum ageret, & lavaret, & recumbenti ad mensam ministraret, suæ Potentiæ, Majestatis, & Magnificentie signa, veluti ornamenta exteriora depoluit, Divinitatem suam occultavit, ac tamquam Deus

absconditus in terris visus est, & cum hominibus conversatus. Si enim circumdatus prodigiis Omnipotentiae suae, si Luce, quam inhabitat, coronatus apparuisset, quis magnitudinem ferre potuisset? Ut ergo ad illius praesentiam non trepidares, ut illius obsequia sine metu, sine alienatione mentis admitteres, exuit quodammodo se ipsum, & induit naturam tuam.

Si haec ita se habent, cur tu similiter non exuis te ipsam, ut illum induas? Si hoc egeris, ille tibi veste deposita ministrabit, & illi tu servies abiectis omnibus impedimentis. Nulli deeris obsequio, poterisque in singula momenta dicere: Paratum cor meum Deus, paratum cor meum. Cantabo, & psalmum dicam: hoc est serviam Tibi voce, serviam operibus. Paratum cor meum erit ad opera Penitentiae, per lotionem pedum adumbratae: & paratum cor meum erit ad mensae delicias, quoties ad illas vocabor.

3 Cum accepisset linteum praecinxit se. Io: 13. 4. Si consideretur Dominus in forma Hominis linteo se praecinxit Sanctitatis, & innocentiae incontaminatae, qua uteretur ad Animas nostras lotas in sanguine suo, celesti consolatione afficiendas. Si vero consideretur in forma Dei praecinxit se. Humanitate innocentissima, tamquam Lino mundissimo, ad easdem Animas abitergendas, mundandas, grataeque suis oculis exhibendas.

Sed quomodo inquires, utroque genere lin-

lindei Animæ nostræ terguntur? Lavantur primò in sanguine Agni, quod fieri non potest sine detestatione, & dolore Peccatorum. Non enim divini Sanguinis efficacia applicatur Animæ expiandæ, nisi divinæ lotioni, Penitentiae lacrymæ præmittantur. Iam verò Animæ pretioso è balneo emergenti applicat Dominus in forma Hominis, & per cognitionem, & amorem, veluti admoveat linteum Sanctitatis, qua præfulget; sive in forma Dei admoveat linteum Humanitatis, quam assumpsit, & sic mœrorem omnem, læsq;que Iustitiæ metum abstergit. Dum enim Anima Penitens gratia sanctificante donata, considerat excellentiam Dominicæ Sanctitatis, cordisque latitudinem, qua Christus Dominus, & in forma Dei, & in forma servi, nos dilexit, posuitque Animam dilectam pro nobis, summa voluptate perfunditur, omnique mœrore detergo gaudet se ad vitam de morte translata, proficiensque de virtute in virtutem, quæ priùs timore, ac dolore, nunc lætitiis, cœlestique consolatione utitur ad currendam viam mandatorum Domini.

Ad hoc facilius percipiendum consideretur, quod sicuti corpus aqua perfusum, & omni inquinamento expiatum, mundo lino abstergitur, & abstersum, quemdam nitorem acquirit, & quamdam hilaritatem: Sic Anima Penitens in Agni sanguine à noxis, sive gravibus, sive levibus expiata, sed adhuc rorans lacrymis Penitentiae,

tiæ, si Linum mundissimum humanitatis assumptæ per intellectum, & affectum, illi admoveatur, excluso metu luctuque oblivioni tradito, luce quadam hilaritatis perfunditur, sentitque tristitiam omnem in gaudium esse convertam.

Gaudet enim primò de illius innocentia, qui peccatum non fecit.

Gaudet secundò quod tanta Sanctitate præditus ita dilexerit Peccatores.

Gaudet tertio quod omnes omnino possint de plenitudine tantæ Sanctitatis accipere.

Gaudet quartò quod ejusmodi Gaudium non sit inane, & infecundum, sed ferax origo virtutum, omnisque perfectionis.

4 Mittit aquam in peluim. Aqua Discipulorum pedibus abluendis adhibita, significabat lacrymas, quas pro nobis effudit ubertim Dominus à Nativitatis exordio usque ad finem vitæ, quando cum clamore valido, & lacrymis axauditus est pro sua reverentia; significabat sudorem, quo sepius maduit per invia, & avia perditam ovem quærens; significabat Baptismum sanguinis, quo baptizari adeò vehementer optabat; significabat denique merita infiniti valoris, quibus pro nobis satisfecit, & omnium peccata delevit.

Hæc omnia, in balneum salutare convertit, quod nobis reliquit, Sacramentorum veluti vasis quibusdam contentum. Sacramenta enim moraliter continent pre-
sacramentum

eium sanguinis, & meritorum ejus; imò Sacramentum Eucharisticum reipsa continet ipsum Gratiæ fontem, & sanguinem illum pretiosissimum, quo abluimur, licet ipsissimi simus, qui manus nostras Peccatorum omnium manibus adiunximus ad illum effundendum.

Dum ergo mittentem aquam in peluim aspiciamus; eundem nobis ob oculos proponamus sanguinem suum, unâ cum valore meritorum omnium in Sacramentorum vasa mittentem; ut in promptu habeat, undè nos facilius, modoque sensibili nobis accomodato, quotidie possit abluere, mentisq; suæ dignos efficere.

Quis ad Amoris tanti prodigia non alienetur à sensibus, & extrâ se positus, quo se vertat, ignoret? Eundem sanguinem quo nos inebriat, tribuit in la vacrum: nec alio Fonte nos lavat, nisi quo sitim levat?

Ergò quanti facere Sacramenta necesse est, Sanguinem Domini unâ cum sudore, lacrymis, doloribus, & operibus omnibus continentia? Et præcipuè quas gratias persolvere debemus prò Sacramento Baptismi, & Pœnitentiæ? Enim verò utroque mundamur, dignique illa mensa efficitur, ad quam sedet Dominus cum Discipulis suis, & in qua Dominus manducatur, & bibitur. Magnum beneficium est lavari in Sanguine Agni Sacramento Pœnitentiæ contento: Longè majus eodem Sanguine sedentes ad mensam relictâ, & inebriari, quo loti sunt. 5 In-

Incipit lavare pedes Discipulorum,
& extergere linteo, quo erat præcinctus.

Dum pedes corporeos Discipulorum
ablueret simul incorporeos abluebat, mun-
dans affectus, & corda purificans. Con-
sideretur attentè Humilitas Domini, &
Charitas, & infinita Dignatio. Quod
enim attinet ad mysticam Lotionem,
quod olim fecit in Cénaculo, nunc etiam
facit in tota Ecclesia, quæ Cénaculum est
grande, stratum, ubi quotidie Augustissi-
mæ cœnæ Convivæ innumeri adhiben-
tur.

Nunc autem facit, quod olim fecit,
quâ omnes Iusti prius Lavacro Regene-
rationis abluti, deindè si primam Inno-
centiam amiserunt, Sacramento Pœnitent-
iæ expiati, à gravioribus inquinamentis,
idem Sacramentum repetunt, ut à noxis
etiam levissimis expurgentur. Sed quæ-
nam est illa manus, quæ peccata dimittit?
Numquid Sacerdotis dicentis: Ego te ab-
solvo? Se habet quidem hæc per modum
Instrumenti. Verum causa efficitrix po-
tissima, & principalis manus est Principis
Pastorum secundum ordinem Melchise-
dech.

Ergo ut à noxis quantumvis levibus
nostri mudentur affectus, debet Sacerdos
Altissimus ad nostros quodamodò pedes
procumbere, & illos manibus omnipo-
tentibus, & infinitè beneficis abluere; ne-
que hoc munus alteri demandare potest,
quâ ad remittenda peccata etiam levissi-

ma

ma vis requiritur, & Authoritas infinita. Docuit hoc D. Augustinus in Evang. lo: tract. 56. ubi ait. Affectus humani, sine quibus, in hac mortalitate non vivitur, quasi pedes sunt, ubi ex humanis rebus afficimur, & sic afficimur, ut si dixerimus, quia peccatum non habemus, nos ipsos seducimus, & veritas in nobis non est. Quotidiè igitur pedes lavat nobis, qui interpellat pro nobis, & quotidiè nos opus habere, ut pedes lavemus, in ipsa Oratione Dominica confitemur, cum dicimus: Dimitte nobis debita nostra.

Quantum igitur Sacerdotis æterni Dignationem admirari, tantum detestari, ac lugere nos decet pulverem pedum, nostrorumque etiam minimas labes affectuū, quibus abluendis, nullæ aquæ sufficiunt, præter illas, de quibus dixit Dominus: Effundam super vos aquam mundam, & mundabimini ab omnibus inquinamentis vestris: imò quibus tollendis, nullæ manus sufficiunt, præter illas, quæ Mundum condiderunt.

6 Venit ergo ad Simonem Petrum, & dixit ei Petrus: Domine tu mihi lavas pedes? Non lavabis mihi pedes in æternum. Io: 13. 6.

Dixit hoc Petrus nesciens quid diceret. Quis enim mundare nos potest, nisi qui solus cor mundum creat in nobis? & in cuius conspectu Cæli mundi non sunt? Videntes igitur Dominum ad nos eluendos accinctum, superemus magnitudinem pu-
do-

doris; quo suffundimur, cum Apostolo Petro, necessitatis magnitudine, quæ compellimur ad quærendam munditiæ plenitudine omnis Innocentiæ.

Respondit ei IESUS. Si non laverò te, non habebis partem mecum.

Pars non habentium partem cum Christo, quænam est? Post divitias, delicias, & cætera bona caduca, ignis, & sulphur, & spiritus procellarum pars calicis eorum. Psalm. 10. 7. Et Apocalypsi. 21. 8. Pars illorum erit in stagno ardenti, igne, & sulphure, quod est mors secunda.

Pars verò, de qua loquitur Dominus dicens: Non habebis partem mecum, ipse Dominius est; juxta illud: Pars mea Deus in æternum. Psalm. 72. 26. Et illud: Dominus pars hæreditatis meæ, & calicis mei. Psalm. 15. 5. Et illud: In terra eorum nihil possidebitis, nec habebitis partem inter eos. Ego pars, & hæreditas tua in medio Filiorum Israel. Sic enim Principi Levitici Ordinis dicitur: Numer. 18. 2.

O Partem omni toto majorem! Quid prodest totus Mundus, quid prodest omne totum ab ista parte distinctum, sine qua quicquid est, nihil est? Igitur cum Beato Apostolo exclamemus: Domine, non tantum pedes, sed & manus, & caput. Quod si respondeat: qui lotus est non indiget nisi ut lavet pedes: de singulari beneficio gratias unusquisque persolvat; & simul orare non desinat. Amplius lava
me

me ab iniquitate mea, & à peccato meo munda me. Quoniam enim in divinæ mensæ Conviva, non Angelica solum, sed Divina quædam munditia requiritur; & qui lotis etiam pedibus, ita secundum se totum mundus est, ut nova semper munditia donari possit: clamare non cesset: Amplius lava me: & victo pudore, Dominum Majestatis roget, ut sibi lavet pedes.

MEDITATIO V.

De Cæso Flagellis Domino.

PRÆSES Romanus ad Judeorum populum tumultuantem dixit. Io: 18. 39. Est consuetudo vobis, ut unum dimittam vobis in Pascha. Vultis ergo dimittam vobis Regem Judeorum? Clamaverunt ergo rursus omnes dicentes: Non hunc, sed Barabbam. Erat autem Barabbas Latro. Tunc ergo apprehendit Pilatus IESUM, & flagellavit.

Si dicitur Pilatus IESUM apprehendisse, & flagellasse, quia iussit; quanto verius illi dicendi sunt apprehendisse, & flagellasse, qui compulerunt Pilatum; ut juberet? Compulerunt autem quando in seditionem proni dixerunt: Non hunc, sed Barabbam.

Huc animum advertite Peccatores, & vide:

videte quid feceritis . Non soli Iudæi , sed vos cum illis IESUM Barabbæ posthabuistis . Vos Pilatum ad iniquam sententiam ferendam adigistis . Sed quid ista comemoro ? Vos Patrem illum , qui ut nobis parceret , Filio non pepercit , vos ad percutiendum ita severè Filium compulistis , juxtà illud : Propter scelus Populi mei percussieum . Isaïæ 53. 8.

Et quoniam ego Peccatorum omnium primus sum ; Ego , Ego præ ceteris Pilatum in immane facinus præcipitem egi : Ego tortorum dexteris flagellis armavi : Ego Patrem misericordiarum ad iracundiam provocavi , & quæ mihi verbera debebantur , ad infligenda Filio innocentissimo concitavi .

Neque hoc semel , atque iterum . Sed centies , & millies . Quoties enim peccavi , toties Dominum Gloriæ Barabbæ posthabui : Hoc est mihi longè Barabbæ deteriori . O Scelus ! O Furor ! Si Hominem propter seditionem conjectum in carcerem pluris fecissem , quam IESUM , quid fecissem ? Iam verò quid feci Bone IESU , pluris illum Hominem faciendo , quem Tu Hominem fecisti , ego autem Peccatorem feci ? Et quem , quantumque Peccatorem ? Nec ego novi , nec alius quilibet . Tu solus nosti . Hæc feci , & tacuisti . Utinam Te tacente non taceat pupilla oculi mei , donec t. loquente fiat sicut mare contritio mea , & proiciantur in profundum maris omnia peccata mea , &

discam tandem aliquando IESUM præferre non Barabbæ, sed illi Homini, quem licet viliores Barabba, & nullius planè pretii esse cognoverim, & cognoscam, prætuli, & adhuc timeo, ne præferam Pretio totius Mundi.

2 Si verbera designatum, juxta Leges, numerum excedebant, qui cædebat per perpetua notabatur infamia. Cur ergo virgarum ictus, quibus cæditur Dominus, non solum trigessimum nonum excedunt numerum, sed quinquagesimum, sed centesimum, sed miliesimum, & iterum, iterumque millesimum? Numquid Rex Gloriæ dicetur infamis? Quid hoc rei est Bone IESU. Tu Cæli Amor, & Honor. Tu Mundi Lux, & Gloria: Tu numeraberis inter infames? Si Amori tuo non sufficiunt uulnera, nisi uulneribus addatur etiam infamia, qua laborare non renuis apud Amatores Mundi pro toto Mundo, & pro me: quid probrorum, quid contumeliarum, Mundum, & me deceret pati pro Te? Quod si toti Mundo magis placeat gloria sua, quam ignominia tua: numquid mihi quoque probabitur Mundi stultitia suam gloriam tuæ ignominie anteferentis? & non meminero, quod quemadmodum, quod infirmum est Dei fortius est Homini-bus, ita quod stultum est Dei, Sapientius est Homini-bus? Absit à me illa prudentia, quam reprobasti, & illa sapientia, quam stulta non fecisti. Prima ad Corinth. p. 21. Si Tu ille es, de quo dictum est: Saturabitur

cur opprobriis, cur non ego unicè memoret
Tui, & oblitus mei, gaudebo Tecum vilipendi, & opprobriis saturari?

Dicebat David Psalm. 16. 17. Satiabor cum apparverit Gloria tua. Da mihi Domine tantum robur virtutis, da tantum amoris incendium, ut prius desiderem, tuis opprobriis, quam Gloria satiari. Cum apparverit Gloria tua, sensus omnes replebit jucunda satietas. Ergo cum appareat nunc ignominia tua, quanta deberem voluptate perfundi, si fierem particeps confusionis tuæ? Non carerem utique hac voluptate, si amarem. Sed quia non amo, totis viribus fugio, quod Amatores tui totis viribus quærunt, & quo habito Beatissimi nominantur, & sunt. Doce me Domine cum his, stultum fieri, ut sim sapiens. prima ad Corinth. 3. 18.

3 Permisit Pilatus, vel fortè etiam in mandatis dedit, ut Innocentissimus Agnus ità barbarè cæderetur, eo consilio, ut Adversariorum immanitas flecteretur, sine-rectque IESUM prò Barabba dimitti. Non flectitur tamen inhumana crudelitas. Fessis tortoribus recentes substituuntur, fiunt latera, inter sanguinis pretiosi rivus albescunt ossa, carnibus spoliata; devastata funditus Vineæ, nova grandine verberatur. Non deservescit tamen rabies spectatorum, sed vehementius accenditur.

Sed quid alienam inhumanitatem detestor, meam non video? Quid enim? An

non, & ego siccis oculis intueor proprio natantem in sanguine, & adiiciens peccata peccatis, non ne uulnera uulneribus adiacere pergo? O duritiem animi adamantibus duriores! Et Ego ille sum, cui sempiterna Gehenæ flagella debentur. Et qui ad columnam cæditur, ille est. qui uulneratur propter iniquitates meas, & atteritur propter scelera mea, & sine fine tunditur, ut ego liberer tunsionibus nulum finem habiturus.

Da capiti meo aquam Domine IESU, & oculis fontem lacrymarum, ut lugeam, quia non lugeo. Da cor paratum ad flagella omnia excipienda pro Te, & propter Te, qui ut mihi parcas, Tibi non parcis. Da ut cum Prophæta Psalm. 37. 18. dicere possim ex toto corde: Ego in flagella paratus sum, & dolor meus in conspectu meo semper. Atque ut hoc dicam, non verbo, & lingua, sed opere, & veritate, da ut attentè perpendam, & percipiam, quæ servus tuus Augustinus nos docuit, ubi ait. Aliquando Peccatores in hac vita, aut non, aut minus flagellantur, quia jam desperata est intentio illorum. At vero illi quibus paratur vita sempiterna, necesse est ut hic flagellentur, quia vera est illa sententia; Fili ne deficias in disciplina Domini, neque fatigeris, cum ab illo increparis. Quem enim diligit Dominus corripit: flagellat autem omnem filium quem recipit. Ideò ergo non insultent inimici mei, non magna loquantur, etsi flagellat me Pater meus.

meus. In flagella paratus sum, quia mihi Hæreditas præparatur. Non vis flagellum? non tibi datur Hæreditas. Omnis enim Filius necesse est, ut flagelletur. Usque adeò omnis flagellatur, ut nec illi pepercerit, qui peccatum non habuit. August. in Psalm. citat. 37. y. 18.

4 Igitur non solum in flagella verborum, sed etiam in flagella verberum, & plagarum paratus ero, & quia mihi præparatur Hæreditas; & quia Pater cælestis omnem Filium, quem recipit, flagellat, & quia nè illi quidem Filio pepercit, qui argui de peccato non potuit. Atque ut magis paratus sim, erit dolor meus in conspectu meo semper. Quinam autem erit hic dolor? Dolor meus ego ipse sum. Dolor meus super omnia Dominus meus est. Ego quidem sum dolor meus ob innumera peccata, quæ feci. Tu verò Domine IESU es dolor meus ob innumera uulnera, quæ in corpore tuo delicta mea fecerunt.

Ego dolor meus, quia omnibus diebus vitæ meæ concepi dolorem, & peperì iniquitatem adversum me, & adversum Te. Tu dolor meus, quia pro dolore, quem ego concepi, concepit te Mater tua in doloribus, de quibus dixisti: Circumdederunt me dolores Mortis: dolores Inferni circumdederunt me. Psalm. 17. 5. 6. Et pro iniquitate, quam peperì, peperit te Mater tua Virum dolorum, & scientem infirmitatem, ut positis supra dorsum tuum omnibus iniquitatibus meis, languores meos

ipse ferres, & dolores meos ipse portares?

Ego dolor meus, quia reliqui Fontem aquæ vivæ, & fodi mihi cisternas dissipatas, quæ continere non valent aquas. Tu dolor meus, quia Tibi quotidie, & omnibus offerenti aquas tuas ad bibendum, ut fiant in nobis Fons aquæ salientis in vitam æternam, & simul querenti bibere de aquis oculorum nostrorum, ne unam quidem lacrymam fundimus.

Ego dolor meus, quia doleo flagella mea, sed quare flageller non dolco. Tu dolor meus, quia flagella tua non sentis, sed unice doles de peccatis meis.

Utinam uterque dolor, sit in conspectu meo semper, ut semper, & amarè lugeam, quæ commisi adversum Te, & quæ Tu per tulisti propter me: & ut forti animo perfe ram omnia flagella sive interna, sive externa, quæ Domino meo videbuntur pro me flagellis cesso.

§ Non pigeat hoc loco audire Dium Augustinum illa verba explicantem: & dolor meus antè me est semper, & non exiguum indè fructum decerpere. Hæc igitur habet. Quis dolor? Fortè de flagello? & verè Fratres mei, verè dicam vobis: Flagella sua dolent Homines; quare flagellantur non dolent. Non erat iste sic: nempe David, de quo Sanctus Doctor loquebatur. Audite Fratres mei. Nescio qui, si damnum patitur proclivior est, ut dicat: indignè passus sum, quam ut consideret, quare passus sit, dolens damnum pecuniæ,
non

non dolens Justitiæ. Si peccasti, thesaurum tuum interiorem dolo. Nihil habes in domo; sed fortè inanior es corde. Si autem plenum est cor bono suo, Deo tuo, quare non dicis, Dominus dedit, Dominus abstulit, sicut Domino placuit, ita factum est, sit nomen Domini benedictum?

Undè ergo iste dolebat? De flagello, quo flagellabatur! Absit. Et dolor meus, inquit, ante me est semper. Et quasi diceremus: quis dolor? Undè dolor? quoniam iniquitatem ego pronuntiabo, & curam geram prò peccato meo. Ecce undè dolor. Non de flagello dolor; de vulnere, non de medicina. Nam flagellum medicamentum est contra peccata.

Advertendum est, quod ubi vulgata versio habet: Et cogitabo prò peccato meo, significantius ex Hæbreo Sanctus Hieronymus legit: & sollicitus ero prò peccato meo. D. Augustinus verò: Et curam gero pro peccato meo, undè subjungit.

Quid est curam gerere pro peccato tuo? Curam gerere pro vulnere tuo. Si diceres: Curam geram pro vulnere meo, quid intelligeretur, nisi dabo operam, ut sanetur? Et paulo post. Ecce de die in diem plangis peccatum tuum, sed fortè lacrymæ currunt, & manus cessant. Fiant elemosinæ, redimantur peccata, gaudeat indigens de dato tuo, ut & tu gaudeas de dato Dei. liget ille. Eges & Tu. Eget ille ad Te. Eges, & Tu ad Deum. Tu contemnis egentem

tui. Deus non contemnet egentem sui. Hoc est, curam geram pro peccato meo, faciam omnia quæcumquæ facienda sunt, ad abluendum, & sanandum peccatum meum.

Vides Anima mea undè, & quare dolendum sit ex doctrina sanctissimi Doctōris.

Dolendum primò est, non de flagello, sed de causa flagelli.

Dolendum secundò: Si quis doleat de jactura bonorum pereuntium, non verò de jactura Boni incommutabilis, Thesaurique bona omnia continentis, & corda nostra unicè potentis implere.

Dolendum tertio: Si lacrymæ currant, & manus cessent. Si cogitamus, si curam gerimus, & solliciti sumus de peccatis commissis, redimantur peccata nostra eleemosynis sive corporalibus, sive spiritualibus. Egent multi ad nos. Nos egemus ad Deum. Alienæ consulamus inopiæ, ut Dives in omnes, qui invocant illum, effundat in nos divitias misericordiæ suæ. Sic dolor noster convertetur in gaudium, & inopia nostra in illam Copiam, sine qua omnis copia egestas est,

6 Atrocissima verberatione finita, Domine JESU à columna solueris, humique præ virium imbecillitate, dolorisque magnitudinis procumbis, manibus, pedibusque reptans, proprioque lapsans in sanguine vestimenta requiris, ut contegas nuditatem tuam, decenterque ad Tribunal Iudicis iterum adducaris. Om.

Omnes aspiciunt , omnes despiciunt ;
nullaque commiseratione tanguntur . Ne-
mo porrigit manum , nemo præsto est ve-
stes resumentis , & induenti : Torcular ni-
mirum calcasti solus , & de Gentibus non
est Vir tecum . Considerabas ad dexteram ,
& videbas , & non erat qui cognosceret
Te . Psalm. 141. 5 Numquid in tot angu-
stiis Animæ tuæ me quoque considerasti ,
& vidisti me non cognoscentem Te ? Uti-
que non cognovi , neque adhuc satis co-
gnosco , ut impendam me Tibi , non qui-
dem indigenti , sed nihilominus requiren-
ti obsequium servitutis meæ . Aperi Do-
mine oculos meos , ut cognoscam Te , &
porrigam Tibi manum in Pauperibus tuis ,
& præcipuè in Peccatoribus ulcerum ple-
nis , & amissa vestimenta quærentibus ,
quibus tegantur .

O' si possem in illis te latentem agno-
scere , & pro Te , & propter Te illis præsto
esse , ad primam stolam , quam amiserunt
inveniendam , & induendam , ut hac in-
duti , possent ulterius induere Te .



MEDITATIO VI.

*De Facie Domini in Sepulchro
jacentis.*

Quid est, quod Facies Domini sudario tegitur, & intuitus ejus oculis nostris eripitur? Numquid vultum tuum Domine iratus abscondis? Si nostram indignitatem attendis, nulla nobis indignatio non debetur. Qui adhuc viventem, & è Cruce clamantem audire nolimus, cum diceret: O' vos omnes qui transitis per viam, attendite, & videte, si est dolor sicut dolor meus: Non meremur videre defunctum. Solem vidimus in tua Morte lugentem, & non flevimus; Terram sensimus Te moriente, nutantem, & ad motus insolitos, commoti non sumus. Ad sui Conditoris interitum, rupes, & saxa præ dolore discindi conspeximus: corda nostra cautibus duriora scissa non sunt. Idè faciem æquissimo jure nobis abscondis.

Si quis ea esset innocentia, qua præstabat qui dicebat: Iustificationem meam, quam capere tenere non deseram; Non enim reprehendit me cor meum in omni vita mea: Job. 27. 6. posset etiam fidenter dicere: Cur faciem tuam abscondis, & arbitraris me Inimicum tuum. Job. 13. 24. At
quis

quis Peccatorum hoc audeat? Et multò magis quid ego interrogare præsumam, cur faciem tuam abscondas, quem toties cum alijs Lapidatoribus lapidare volui, & exire de Templo coegi, & abscondere Te?

Verum nè irascaris Domine, si tua mansuetudine compellente loqui cogor ad Te cum sim, non solum pulvis, & cinis, sed lutum, & sordes: sed tenebræ, & Peccatum. Quomodò Faciem abscondis Peccatoribus, quibus inclinato Capite moriens Pacis osculum obtulisti? Quomodò mortuus tuum subducis aspectum sine Te morituris, qui jacentes in umbra mortis ad vitam revocasti, & ut revocares, in faciem eorum vitæ spiraculum inspirasti, dum expirares?

Ergo ostende nobis Faciem tuam, ne vitæ, quam dedisti jacturam faciamus. Si ostenderis, quæremus faciem tuam semper, ut monet Propheta psalm. 104. 4. dabimusque operam, ut alij nobiscum quærant, & in oculis amantibus simul, & lacrymantibus ferant. Neque solum Te feremus in oculis, de Te cogitando; & corde Te diligendo; sed feremus in manibus tibi laborando; feremus in humeris Crucem tuam gestando.

2. Desideravimus Domine videre Faciem tuam resolutis mortalibus tænijs, amotoque velamine, sed prohi dolor! quam Faciem videmus? Hæccine Facies speciosæ formæ præ Filiis hominum? Quis ma estatem fronti, quis fulgorem oculis, quis in-

ſidentem labijs tuis gratiam detraxit? Furor nẽ Impiorum depopulator fuit decoris tui, an Amor tuus? Ille vtique fuit Aggreſſor, & quidem barbarus, & omni maior audacia. Sed quanto crudelior fuit aduerſum Te, Amor tuus? Hic enim Furori noſtro arma permifit: nam oblatus es, quia ipſe voluiſti. Hic Te ita miſerabiliter deformavit, ut quos Peccati deformitas deformauerat, reformaret: tuique oris lineamenta noſtris Animis olim impreſſa, ſed vitio noſtro planẽ corrupta, penitusq; abolita reſtitueret. O Cordis, ò Amoris latitudinem nullis finibus circumſcriptam! Tu de formoſiſſimo deformis efficeris, ut ſicuti jubes de tenebris lucem ſplendeſcere, ita facias de noſtra deformitate, antiquæ Formæ Imaginis reſſeſcere.

Adde Beneficium Beneficio, & ut deformitati vultus tui pro nobis ſuſceptæ gratiſſimus, fac nos in poſterum Cuſtodes attentiſſimos illius Imaginis, quam pro nihilo nos habuimus, & aboleuimus: Tu verò tanto cum labore, tantoque Tui diſpendio renovatam reſtituiſti. Remove à nobis omnem anſam, omne periculum relabendi in priſtinam deformitatem. Remove rerum omnium fluxarum amorem, nè reformati, & in novitate vitæ ambulantes velimus iterum huic ſæculo conformari.

Absit iſta conformitas, quæ ſumma deformitas eſt. Non Mundo, ſed Tibi quantumlibet deformato, volumus eſſe conformes.

3 Verum si teste Augustino in Psalm.
 44. Pulcher es Domine IESV in Cælo, pulcher in terra, pulcher in utero, pulcher in manibus Parentum, pulcher in miraculis, pulcher in flagellis, pulcher in Ligno, pulcher in Sepulchro, quo pacto deformis es? Numquid hæc ipsa deformitas, qua deformaris, pulchra est? Ità planè est. Quantumcumque deformis, pulcher esse non desinis; quia Pulchritudo tua, Sapientia tua, Iustitia tua est. Pallor, & Livor, & Macies, & quicquid aliud oris decus invasit, nullum sapientiæ, nullum detrimentum attulere Iustitiæ. Ergo æquè Pulcher in Cælo, atque in Sepulchro. Imò quo deformior, formosior nobis appares, quia è deformitatis pro nobis assumptæ umbris, clarius emicat lumen Sapientiæ, & forma Iustitiæ.

Qui te minimè norunt, dicant: Non est ei species, neque decor. Non ità loquantur Sapiens, & Amans. Tu enim Sapienti, & Amanti, ubique decorus es. Etiam in umulo, etiam decolor, & exanguis decorem tuum ostendis, non secundum faciem, sed justum iudicium judicantibus. Io: 7. 24.

Illumina Domine oculos meos, ut mihi quoque innotescat quid sub tanta deformitate Puichritudinis lateat.

Da secundò, ut sicuti cum omni Cognitore Veritatis, scire non debeo, nisi IESVM, & hunc Crucifixum; ità cum omni Amatore ejusdem Veritatis, nihil magis diligam,

gam, quam IESVM, & hunc deformem.

Da tertio, Ut Anima mea amore Tui Crurifixi, ac deformati, vitæ hujus ærumnis attrita, calumnijs appetita, obrectarum linguis infamia notata, & cum sceleratis reputata, si non assimiletur, saltem assimulari desideret, & contendat Sponsæ opprobrijs onerata, atque dicenti: Cantic. 1. 5. Nolite me considerare, quod fusca sum, quia decoloravit me Sol.

4 Dominus Deus aperuit mihi aurem: ego autem non contradico. Retrorsum non abij. Corpus meum dedi percutientibus, & genas meas vellentibus: Faciem meam non averti ab increpantibus, & conspuentibus in me. Isaię 50. 6.

Quid in grati animi argumentum retribuam Domino meo, qui Corpus suum dedit percutientibus, & genas vellentibus, & Faciem hanc Cælo, terrique venerandam, non avertit ab increpantibus, & conspuentibus in se? Conscius infirmitatis meę, scio quid agam. Si non sponte offeram corpus meum percutientibus, saltem percutientes feram. Et si non dabo genas meas, aut vellentibus, aut cædentibus; & si non potero non avertere faciem meam ab increpantibus, & conspuentibus in me, non querar saltem de injurijs, non irascar injurias inferentibus, non injurijs rependam injurias.

Subjungit Dominus eodem Isaię cap. 50. 7. Dominus meus, Auxiliator meus: Ideo non sum confusus: Ideo posui faciem meam,
am,

am, ut petram durissimam, & scio quoniam non confundar.

Igitur, & ego quantum vires patientur, ponam faciem meam, ut petram durissimam, adversus omnes contradicentes mihi in via Domini. Quid de me senserint adversarij mei, quid oblocuti fuerint, quid fecerint, ut a bene ceptis desistam, non curabo. Dominus enim Auxiliator meus. Nec solum Auxiliator, sed Exemplar, & Præmium. Ideò non confundar.

Atque Utinam Anima mea, cui in peccatis obfirmata, & omni abjecto pudore, divinis vocibus resistenti dictum est: Frons mulieris meretricis facta est tibi: noluit erubescere. Jerem. 3. 3. Utinam, inquam longè, si fieri potest, duriori fronte resisteres vocibus Impiorum pietatem deridentium; & à virtutibus ad vitia evocantium.

Utinam damna pudoris amissi laudabiliore genere inverecundiæ compensares; & quæ tot culpis obnoxia in conspectu Domini videntis, monentis, objurgantis, non erubuiisti; poneres tandem aliquando faciem tuam, ut petram durissimam adversus Mundum, & omnes Amatores Mundi, Crucis stultitiam contemnentes, deridentes, diſſerijſ inſeſſentes.

5 Dicebat David psalm. 30. 20. Illustra Faciem tuam super servum tuum, salvum me fac in misericordia tua.

Ecce aliud Beneficium, quod à facie Domini degeneri, & veluti in tenebras commu-

mutata accipimus . Ideò enim illam Domi-
nus obscurari permisit, ut clariùs illucesce-
ret super servos suos; & illam superinducto
mortis pallore veluti abscondit , ut nos ab-
sconderet in abscondito faciei suę à contur-
batione Hominum .

Ut Beneficij magnitudinem Anima mea
percipias ad verba Prophętę diligenter at-
tende . Quid enim est, Faciem Domini illu-
minari super nos? Et quid est abscondi in
abscondito Faciei Dominicę , & sic à con-
turbatione Hominum liberari?

Primum significat aspici nos à divina
Clementia ore sereno , & Sapientię luce
perfundi, & ardore Charitatis incendi . Se-
cundum significat per donum contempla-
tionis evahi super omnia caduca ; & per
speculum quidem, & in ænigmate , magna
tamen cognitionum supernaturalium cla-
ritate rapi ad contemplandam Faciem Dei,
quę Impiis abscondita maximè est; & sic
abscondi in abscondito, hoc est in loco ma-
ximè dislito, ignotoque Hominibus ani-
malibus , adeoq; non percipientibus , quę
Dei sunt . Sic absconditi, quid à contur-
batione Hominum sibi metuendum pu-
tent?

Igitur, quale quantumque Beneficium
habemus à Facie Domini in Tumulo ob-
scurata, & abscondita? Ideò obscurata est,
ut nobis illustrior affulgeret Ideò amisso
decore abscondita est , ut Faciem interio-
rem Divinitatis clariùs manifestaret, & sic
in abscondito Faciei maximè Impios latent-
tis

tis absconderet Contemplatores suos.

Ergo quicumque invisibilia Dei per ea quæ facta sunt intellecta conspicitis, gratias agite, & in grati animi testificationem, nolite quærere apud Homines nominis claritatem, ut efficiamini Divinæ participes claritatis.

Mansionem absconditam intrà Vulnere Domini deligite vobis, ut experti multitudinem dulcedinis, quam ibi abscondit Dominus timentibus se, à beatis vulneribus procedere possitis ad Faciem iniquis absconditam Sic Illuminatio vestra, & Salus vestra, & Protector vitæ vestræ, abscondet vos in abscondito Faciei suæ à conturbatione hominum: Proteget vos in Tabernaculo suo, à contradictione linguarum. Psalm. 30. 25.

6 Pallor, & livor totum occupant vultum Sponsi candidi, & rubicundi. Lucidiores Sole caligant oculi. Et Labia verbis æternæ, vitæ ad se omnes trahere solita obmutescunt.

Cur autem Pallor Candori, cur Livor Pudori successit? Numquid candor in pallorem versus est, ut macie poenitentiae spontè susceptæ pallefcere disceremus, & hac ratione candorem Sanctitatis amissæ recuperaremus? Numquid ruborem livor exclusit, ut castigati corporis membra livescere doceremus, & sic mereremur accipere de plenitudine verecundiæ, quam peperit nobis facies Domini coesa, saucia, tumensque vibicibus?

Cur

Cur oculi celi, terreque illuminatores, tam alta caligine involuuntur? An quia superbiam Vitę, & concupiscentiam oculorum cernere exhorrescunt? An ut luant licentiam tot oculorum, qui quotidie delinquant, & non quotidie lugent, in quibus delinquant, licet in ipsis provida natura posuerit Visum, & Fletum; ut flendo possint delere, quę videndo committunt? An luce privantur, ut nos imprecatione illa terribili eximant: Obscurentur oculi eorum, ne videant, & dorsum eorum semper incurva? Psalm. 68. 28.

Quacumque de causa oculi Solis, sine lucis expertes, horreamus mala, quę illis displicent: & gratias agamus de bonis, quę jaćtura boni sui, nobis parere voluerunt. Per oculos istos amabiles, & extinctos, à Patre Luminum, & ab illo, qui mortuis hisce luminibus sociatus est Lumen de Lumine, enixę petamus, ut sint oculi nostri semper ad Dominum.

Petamus secundò, ut semper meminerimus Ioannis Apostoli epist. prima cap. 2. 11. dicentis: Qui odit Fratrem suum in tenebris est, & in tenebris ambulat, & nescit quò eat, quia tenebrę obcoecaverunt oculos ejus.

Petamus tertio, Ut cordis oculos illuminatos à Spiritu Sapientię fortiti, non ad oculum seruiamus, quasi hominibus placentes, ad Ephęs. 6. 6. sed ut servi Christi facientes voluntatem Dei ex animo, donec eò perveniamus, ubi videbimus, quod
nec

nec oculus vidit, nec auris audivit .

Cur denique filet os aureum undè vitam hauriebamus ? Non enim in solo pane vivit homo, sed de omni verbo, quod procedit de ore Dei . Numquid filet, quia non audivimus ? Et præcipuè non audivimus, cum clamaret : Venite ad me omnes , qui laboratis, & onerati estis , & ego reficiam vos : omni videlicet verbo ex ore Dei procedente ?

Non audivimus sanè Te, non audivimus verba tua , ò Verbum Patris , & idcò à Te Veritate, & Vita nostra defecimus . Non audivimus amantissimum Dominum loquentem , numquid etiam tacentem audire detrectabimus ? Nimis altè silentium tuum intonat cordibus nostris , & non audire non possumus voces , quibus interiores aures nostras acutissimè pervadis , & vulneras .

Dicebat Augustinus ad Patrem tuum . Percussisti cor meum Verbo Tuo, & amavi Te . Idem Pater, eodem Verbo percutiat nos, qui nec audivimus verba tua; neque nunc satis , neque ut par est audimus silentium tuum copiosissimè loquens . Si percussit, amabimus Illum , & amabimus Te ; quia audiemus Illum dicentem Te ; & audiemus Te, per quem ab illo dictum , facta sunt omnia.

MEDITATIO VII.

*De Christo Domino in Cælum
Ascendente .*

1 **E**Duxit eos foras in Bethaniam :
& elevatis manibus suis benedi-
xit eis Lucæ 24. 50.

Cum Dominus Apostolis in cœ-
naculo congregatis læta facie se spectan-
dum exhibuisset, cibumque in medio eo-
rum sumpisset, ac dixisset : Sedete in Civi-
vitate, donec induamini virtute ex alto,
eduxit eos in Bethaniam, atque hinc in
Montem olivarum, ut undè cœpit igno-
minia passionis, indè Gloria exaltationis
inciperet.

Igitur coram Apostolis, frequentique
aliorum discipulorum cœtu, una cum Ma-
tre sua, Ascendit Deus in jubilo, & Domi-
nus in voce tubæ, psalm. 46. 5.

Ascendit nimirum, ut D. Chrysostomus
notat in jubilo Angelorum, & voce tubæ
non sensibiliter personantis, sed immate-
riali modo plaudentis, & Ascendentis Glo-
riam promulgantis. Non sunt enim auditi
Angelorum Chori, celebrantium ascen-
sum, sicut olim celebravere descensum in
Mundum, & idèd auditi non sunt, ne men-
tes Apostolorum huc, illuc divise, minus
attenderent contemplationi spectaculi at-
ten-

entionem omnem sibi vindicantis.

Quid enim mirabilius primò, quam Naturam humanam, cui dictum fuerat Genes. 3. 20. Pulvis es, & in pulverem reverteris, super omnes Cœlos, imò super omnia, quæ Deus non sunt, exaltari?

Quid mirabilius secundò, quam ità exaltari, non solum postquam in mortis pulverem deducta fuerat, juxta illud: In pulverem mortis deduxisti me: Psalm. 21. 16., sed postquam Peccatorum pedibus fuerat quasi lutum platearum æstu siccatum, proculcata, contrita, in pulverem comminuta, ut ventorum facta ludibrium, à facie terræ projiceretur.

Quid mirabilius tertio, quam Christum ità ascendentem, esse nostræ, quis credat? futuræ ascensionis exemplar, imò & lessionis? Dicit enim Apocalyps. 3. 21. Qui vicerit, dabo ei sedere mecum in Throno meo, sicut & ego vici, & sedi cum Patre meo in Throno ejus.

Singula recale, Anima mea, & è singulis ascensiones in corde tuo disce disponere. in hac lacrymarum valle, ubi hæere non debes, sed eò, ubi vera sunt gaudia per omnes virtutum gradus ascendere.

2 Videntibus illis elevatus est, & nubes suscepit eum ab oculis eorum. Cumque intuerentur in Cœlum euntem illum: ecce duo viri astiterunt juxta illos in vestibus albis, qui & dixerunt: Viri Galilei quid statis aspicientes in Cœlum? Hic IESUS &c, Actor. 1. 9.

R. Au-

D. Augustinus in Psalm. 46. 5. Ibi erat & vox tubæ, vox illa Angelorum: Viri Galilei quid hic statis? Hic est IESUS quasi dicerent: si creditis illi, quo Crucifixo nutaverunt vobis pedes; quo occiso, & sepulto spem vobis perijsse putabatis, ecce Ipse est IESUS. Ascendit antè vos, sic veniet, quemadmodum vidistis euntem in Cœlum.

Tollitur quidem corpus ab oculis vestris, sed non separatur Deus à cordibus vestris. Videte ascendentem, credite in absentem, sperate venientem, sed tamen per Misericordiam occultam etiam sentite præsentem. Ille enim qui ascendit in Cœlum, ut tolleretur ab oculis vestris, promissit vobis dicens: Ecce ego vobiscum sum, usque ad consumationem sæculi. Merito & Apostolus sic nos alloquebatur. Dominus in proximo est. Nihil solliciti fueritis. Sedet super Cœlos Christus, & longè sunt Cœli, & ipse, qui ibi sedet propè est. Ità Augustinus.

Ergo, ut subdit Propheta v. 6. Psallite Deo nostro, psallite: quoniam Rex omnis terræ Deus: psallite Sapienter.

Sæpiùs iteratur psallite, quia non una est causa psallendi: Domino enim ascendenti psallendum est, quia Deus noster est. Psallendum est denuò, quia cum tantus sit, Rex noster esse non renuit. Adhuc psallendum: quia non solum Rex noster, sed omnis terræ, omniumque Regnorum Rex est. Denique sapienter psallendum, quia sum-

ma cum attentione illi obsequium nostrum persolvendum, qui Sapientia sua rationem adinvenit, qua ita discederet à nobis, ut maneret apud nos, ut maneret in nobis, & ut nobiscum esset vsq; ad consumationem sæculi.

Si nobiscum ità amanter est, cum illo pariter esse conemur: & si manet in nobis, in Ipso per sapientiam, & amorem jugiter maneamus.

3 Ad Ephesios 4. 8. Ascendens in Altum captivam duxit captivitatem.

Christus Dominus Triumphantis in morem ascendens, magnam secum multitudinem captivorum evexit, non de sua captivitate lugentium, sed exultantium. Fuerant prius Captivi mortis atque Peccati. Iam verò de morte ad vitam translati, de peccato, poenisque peccati, ad Sanctitatem, & Gloriam, gloriabantur de Captivis diaboli, se Filij Dei factos esse Captivos.

Sed quænam sunt vincula felicissimæ Captivitatis? Numquid Sapientiæ? Numquid vinculla Charitatis? Hæc planè sunt, & alia non sunt. Nam quibus alijs nexibus possunt Iustorum Animæ illigari? Rursum quis cognoscat desiderium collium æternorum, & non amet? Quis amet, & non trahatur Captivus, & catenas, quibus trahitur, non osculetur?

Trahe me post Te, curremus in odorem unguentorum tuorum, dicebat Sponsa, Cantic. 1. 3. Si unguenta Vestimentorum, hoc est Humanitatis ità fortiter trahunt: quid

quid faciet fragrantia, qua redolet ipsa Divinitas?

Antequam perfectissima illa, qua nos Christus Dominus donaturus est Libertate donemur, discamus adhuc in hac vita degentes, duræ servitutis jugum excutere. Pudeat inani gloriæ servire; Pudeat rumores popularis auræ captare. Non trahamur studio rerum affluentiarum minimè necessariarum, non voluptatum illecebris, non promissis fallacibus Dicētis ad unumquemq; nostrum: Hæc omnia tibi dabo, si cadens adoraveris me. Verum illi soli subesse placeat, illius esse Captivos, qui solus est nostra Libertas.

4 Ad Ephesios 4.10. Qui descendit, ipse est, & qui ascendit, super omnes Cœlos, ut impleret omnia. Primus gradus Christi Domini descendens fuit usque ad Carnem. Nam VERBUM CARO factum est. Secundus fuit usque ad Crucem. Nam gaudio sibi proposito Crucem sustinuit confusione contempta. Tertius gradus fuit usque ad mortem, & sepulchrum. Humiliavit enim se usque ad mortem, conditusque in sepulchro, in quo nondum quisquam fuerat positus.

Descensus gradibus, tot respondent gradus Ascensus. Primus gradus Ascensus fuit Gloria Resurrectionis. Secundus exaltatio super omnes Cœlos. Tertius, sessio ad dexteram Patris.

Ideò ascendit, quia descendit. Et quia ita profundè se demisit, ad fastigium tantæ sublimitatis excessit.

De-

Descende quantum potes Anima mea ; & primò quidem pulveris, limique tui memineris, ut conscia infirmitatis tuæ, non altum sapias, sed viribus Divinis freta mortem peccati vincas, & sic de pulvere tuo gloriosè resurgas.

Deindè stultitiam, & ignominiam Crucis libenter amplectere. Sic enim te Crux Sapientia coronatam, & Gloria, exaltabit in Coelum.

Postremò tibi satis non sit mori tibi, & Mundo ; sed ità mortuam, non qualecumque sepulchrum, sed medio in agro fossa humus excipiat, & superiniecta humus tegat, ut Coeli terræque pateas injurijs, pedibusque huc, illuc transeuntium premaris, & conteraris. E' tali humiliationis, & patientiæ tumulo, ad Thronum Filij Dei conscendes, ibique sedebis, ubi sedent omnes Animæ fastus, omniumque cupiditatum victrices. Apocal. 3. 21.

5 Psalm. 23. 3. Quis ascendet in Montem Domini ; aut quis stabit in loco Sancto ejus ? Innocens manibus, & mundo corde, qui non accepit in vano Animam suam, nec juravit in dolo proximo suo.

Dicitur Coelum Mons Domini, quia sicuti Montes supereminet terræ, & omnium oculis patent, ipsisque nobilissimæ Urbes supextructæ visuntur : ità Coelum toti terrarum Orbi supereminet nullique non spectabile est, verticique suo gerit impositam Civitatem amplissimam Beatorum. Quis autem Montis huiusce fasti-

G

gium

gium superabit? Si testimonium Prophætę accipimus:

Superabit primò. Innocens manibus.

Superabit secundò: Qui mundo corde est. Non sufficiunt munde manus. Mundis operibres cordis mundities debet accedere.

Superabit tertiò. Qui non accepit in vano Animam suam, hoc est, qui finem a Deo sibi præstitutum fideliter antè oculos habuit, illumque feliciter attigit, illa solum faciendo, dicendo, cogitando, quę obtinendo fini congruebant.

Superabit quartò: Qui non juravit in dolo Proximo suo, hoc est qui non peccavit labijs suis. Ponitur enim unum peccatum mendacij, atque perjurii prò peccatis omnibus, quę per instrumentum lingue committuntur.

Ergò, inquires, præter Christum nullus ascendet. Solus enim est, qui peccatum non fecit, & non est inventus dolus in ore ejus.

Verùm nè animo concidamus. Nemo quidem virtute sua potest ascendere, sed potest virtute Christi, qui lavit Ecclesiam in sanguine suo, illamque sibi gloriosam exhibuit non habentem maculam, neque rugam. Ille tribuet munditiem cordis. Ille cujus in ore dolus inventus non est, veraces nos faciet, & qui nobis remedia contulit ad salutem, non permittet se nostram inutiliter viam esse voluisse, qua ad Veritatem, & Vitam pervenire possemus.

Igi-

Igitur Ascendentem in Montem Dei, spe, sanctisque desiderijs comitemur, ut ibi sit cor nostrum, ubi Thesaurus est noster.

6 Attollite portas Principes vestras, & elevamini portæ æternales, & introibit Rex Gloriæ. Psalm. 23. 7.

Alloquitur Propheta more poetico Angelos, Coelique porras, ut Bellarminus advertit, dicitque Angelis, non aperite, sed portas attolite: Portis verò non dicit referamini, sed elevamini. Portæ siquidem Coeli non aperiuntur ad latera, quasi in pariete, sed aperiuntur sursum versus tamquam in laqueari. Igitur attolite portas Principes Coelestis militiæ, totasque copias referatis portis effundite Ascendenti, uti par est occursuri, partasque victorias gratulaturi.

Quid moras nectitis Beatissimi Spiritus? Attoliite portas, & Regi vestro, & nobis. Semel enim elevatae, semel referatae non claudentur amplius; juxta illud: Et portæ ejus non claudentur per diem. Non enim nox erit illic. Obsequium, quod Regi vestro præstabitis, nobis quoque proderit, & vobis. Nobis, quia Cælo jam patente, membra caput suum sequentur. Vobis, quia Clientes vestros, quos ita diligitis, tamquam Regni socios habere incipietis, & prò vestra erga nos benevolentia gaudebitis.

Sed cur Angeli, ter interrogant, quis est iste Rex Gloriæ, antequam aperiant? Num-

quid Christum ignorabant? Rursum, **cur** non aperiunt audientes, quod erat Dominus Fortis, & Potens, Dominus potens in prælio: aperiunt verò audientes: Dominus Virtutum ipse est Rex Gloriæ.

Verùm Cæli Principes nulla ignorantia laborarunt. Ter autem interrogarunt; quis est iste Rex Gloriæ, ad exprimendam rei novitatem, quæ illos inusitata planè admiratione defixos tenebat; dum Homo Crucifixus, & mortuus, non tamquam Hospes, sed tamquam Dominus, & Rex, cælestis Regnum ingrederetur. Quod mirati sunt Angeli, miremur & nos alta contemplatione suspensi.

Quod verò ad alteram dubitationem attinet, non attolunt Angeli portas ad Nomen Fortis, & Potentis, & Domini potentis in Prælio; quia nomina illa videbantur solum alludere ad Potentiam exercitam, in Hominibus liberandis. At ubi audierunt; Dominus Virtutum, hoc est Exercituum, portas referarunt; quia ad illa verba: Dominus Virtutum, in memoriam revocarunt, se non solum esse Filii Dei servos, ut Creatoris, sed etiam ut Liberatoris. Homines enim liberavit Filius Dei Incarnatus postquam ceciderunt. Angelos liberavit antequam caderent, illos videlicet à lapsu præservans. Ergo Angelorum exemplo, qui per merita Verbi incarnati in Veritate steterunt, summo existimationis loco habeamus beneficium Redemptionis,

Et

Et quoniam licet tanta cum Gloria Coe-
los conscenderit, sedeatque ad dexteram
Patris, tanti facit Animas nostras, ut in
illas sibi patere ingressum postulet: portas
omnes, & corporis, & Animi illi
aperiamus, ut Creatori, ut Illu-
minatori, sed potissimum,
ut Liberatori. Magno
enim pretio emit
nos,



150
HÆBDOMADÆ

TERTIÆ,

Meditatio Prima.

De Sanctitate Divinæ Parentis.

IUndamenta ejus in montibus sanctis: diligit Dominus portas Sion super omnia tabernacula Iacob. Psalm. 86. 1.

Civitas Dei est Ecclesia militans. Civitas longè clarior Ecclesia triumphans. Clarissima verò est, quam utriusque Civitatis decora complectentem, & excessu mirabili superantem, in Regni sedem elegit Altissimus, nominavitque præ cæteris Ierusalem, hoc est visionem pacis, quoniam ex ipsa processit tamquam Princeps pacis; & qua die processit, justitia, & pax osculatæ sunt.

Si ergo de hac Civitate sermo sit, quoniam sunt montes sancti, quæ illius fundamenta dici possint? Numquid Sancti, Angelique omnes? Si firmitate, & soliditate sua illam fulcire intelligantur, fundamenta non sunt. Si verò fundamenta dicantur, quia ubi ipsa desinunt, inde celsissimæ Civitatis incipit ædificium; in hanc planè

planè sententiam dicatur : Fundamenta ejus in montibus sanctis . Sic Coelum Empyreum coelis inferioribus superimponitur , sed non innititur .

Si hæc ità se habent , ergo ubi Sanctitatem ceteri consummarunt , indè Virgo sumpsit sanctitatis exordium . Ergo tanta luce refulsit à primo conceptionis instanti , quanta refulsit in ultimo gloriosi cursus articulo , aut Martyrum fortissimus , aut Apostolorum , aut maximus Spirituum immortalium .

Quot prodigia Gloriosissima Virgo tuæ conditionem Animæ comitantur ? Primò enim dum conditur , immaculato corpori , immaculata conjungitur . Deindè manibus divinis egrediens Authorem suum accelerato usu rationis intelligit , reveretur , orat , laudibus effert , totis visceribus , toto corde complectitur . Denique in ejusmodi actus , non utcumque prodit , sed perfectissimè .

Conditori tuo , quia nos impares sumus gratiarum persoluant obsequium Cælites universi , prò tot , tantisque donis tibi collatis ; tuamque nobis , & concilient , & impetrent beneficentiam . Tu sine labe concepta . Nos in peccatis concepti peccata , peccatis addimus , & nullus adhuc peccandi modus . Ad nomen Virginis sine labe conceptæ gaudio exilimus . Sed ad maculas Animæ nostræ , neque ingemiscimus , neque illa tristitia tristamur , quam tantopere laudat Apostolus 2. ad Corin. 7. 10.

Quæ enim, inquit ipse, secundum Deum tristitia est, poenitentiam in salutem stabilem operatur. Tristitiam hanc salutarem, orientemque ab ejusmodi tristitia poenitentiam tribue, ut expertes Innocentiæ, quam amissimus, primò in Protoparente nostro; deindè spontè nostra ab ineunte usu rationis miseri contaminavimus, veræ saltem lacrymis, & operibus poenitentiae, omnes vitæ antea actæ maculas eluamus, ut mundi mundissimis oculis placere possimus.

2 Si quæ Apocalypf. 21. 19. Beatus Iohannes vidit, & scripsit de coelesti Hierosolyma, longè perfectiori modo intelligenda sunt de Parente divina: quam erit Civitas ista pretiosa, atque sublimis, cum fundamentis illius nihil pretiosius, nihil sublimius excogitari posse videatur? Quis ergo urbem describere, quis animo complecti possit?

Ut è multis aliqua seligamus, consideremus, cur dicatur structura muri illius ex lapide iaspide, ipsa verò Civitas aurum mundum, simile vitro mundo.

Dicitur primò: Structura muri ex lapide iaspide, quia iaspis lapis est firmissimus, pellucidus, & virens. Firmitas adumbrat fortitudinem, & constantiam inconcussam, qua Sanctitas virgineum Animum circumdedit, per modum muri hostibus omnibus formidabilis simul, & inexpugnabilis. Formidabilis quidem, quia quomodo non summo terrori hostibus esse pote-

rat murus illius Virginis, quæ vix conce-
pta caput antiqui Serpentis contrivetat,
caput videlicet Imperatoris omnium co-
piarum invisibilium simul, & visibilium?
Inexpugnabilis verò, quia quinam arietes,
quænam tormenta supererant perduellibus
ad illum quatiendum, & evertendum, do-
mito planè peccato, primoque Authore
peccati?

Prima dos murorum firmitas est. Se-
cunda pulchritudo. Ideò muri virginæ
Civitatis ex iaspide, lapide videlicet non
solum firmissimo, sed pellucido simul, at-
que virenti esse referuntur. Lux sapien-
tiam; color viridis amœnitatem designat,
& vim delectandi oculos spectatorum.

Appositè igitur mœnia de quibus agi-
mus, constructa ex iaspide asseruntur.
Quid enim clarius sapientia sapientiam
Cœlitum omnium excedente? Quid amœ-
nitas, quid jucundius contemplatione,
familiarique consuetudine Virginis sapien-
tissimæ?

Liceat Beatissima Parens intrâ mœnia
tua nos recipere. Firmissima sunt, nos ab
hostibus tuebuntur. Clarissima sunt, men-
tis caliginem disicient. Iucundissima
sunt, tristitiam omnem vertent in gau-
dium.

Et quidem, quomodo tristitiam non
vertent in gaudium, si conversatione, si
tuo convictu nihil est delectabilius? Quo-
modo tenebras non discutient, si tua Sa-
pientia speciosior Sole est, & super omnem

dispositionem Stellarum , & luci comparata invenitur prior ? Sapient. 7. 29. Quomodo ab oppugnatoribus non defendent, si ab Onnipotente, e firmissimo lapide constructa sunt, ut nos defenderent ? Si membra tua viscera tua sunt, quid timebunt Filii tui inter viscera Matris suæ, Matris potentissimæ, de Potentia Patris, Sapientissimæ de Sapientia Filii, Benignissimæ de Bonitate Spiritus vivificantis, Spiritus in quo clamamus, Abba Pater, Spiritus testimonium reddentis spiritui nostro, quod sumus Filii Dei. Ad Rom. 1. 15.

3 Dicitur secundò Civitas ipsa aurum mundum, simile vitro mundo.

Cur Civitas regalis nõ asseritur e gemmis longè auro pretiosioribus coalescere, sed omni alio ornamento semoto, nominatur aurum mundum, simile vitro mundo ?

Ratio prima est, quia aliquæ conditiones auri, feliciter exprimunt præstantiam nobilissimæ Civitatis, quam gemmarum quarumlibet proprietates. Aurum omis- sis aliis, nullum in igne, nullum ab igne detrimentum patitur. Quinimò quo sæpiùs arsit, proficit ad bonitatem, ut ait Scrip- tor historię naturalis. Dos ejusmodi mi- rificè adumbrat Charitatis ingenium, nul- lum detrimentum patientis in ignibus, & ab ignibus ærumnarum ; sed majorem semper perfectionem acquirentis, & ostenden- tis, quo pluribus, & gravioribus exerce- tur ærumnis. Ideò dicitur tota Civitas aurum

aurum mundum, quia Divina Parens, sicuti fuit Sanctissima, ita fuit perfectissima Charitate prædita, & quodamodò Charitas ipsa. Magnitudinem Charitatis, magnitudo calamitatum exercuit. Si enim unum Dei Filium incarnatum excipias, nullam Animam, atrocior doloris gladius pertransivit quàm Animam Virginis per tot annos in singula momenta morientis ex consideratione, tum Filii sui, morte turpissima condemnandi, tum Peccatorum, tot scelera patrantium, & perire volentium. Nullis cladibus invicta Charitas cessit, sed malis maximis major fuit, & quo magis arsit, magis enituit. Ideò Civitas ipsa aurum mundum.

Ratio secunda. Non dicitur Civitas aurum qualecunque, sed aurum mundum simile vitro mundo. Aurum ejusmodi superat pretium omnium gemmarum. Nam quid pretiosius auro sibi vindicante perspicuitatem cristalli, & fragilitatem cristalli, in suam soliditatem, firmitatemque mutante? Nihil ergo miremur, si fundamenta Civitatis, probatissimis constanter è gemmis, Civitas ipsa nihil est præter aurum mundum simile vitro mundo?

Sed quid sibi vult hoc aurum mundum simile vitro mundo? An sicuti perspicuitas, & munditia vitri fragiles sunt sicut vitrum, sed auro additæ firmæ sunt, & solidæ sicut aurum: ita Claritas Sapientiæ, & munditia Innocentiæ, in societatem Charitatis adscitæ, soliditatem induunt Cha-

ritatis nulli malo succumbentis, & non solum fortis ut mors, sed longè fortior? Mors enim dividit corpus ab Anima, Charitas dividit Animam à se ipsa, nihilque caducitatis relinquens in Anima, totam, quanta est immolat Deo in Hostiam vivam, sanctam, nihil sui habentem. Si Charitas hujusmodi est, quid perfectionis inesse Charitati Virginis arbitrabimur?

Salve igitur Innocentiæ, salve Regina, Sapientiæ, pulchræque Parens dilectionis salve. De plenitudine tuæ Innocentiæ nos munda. De plenitudine Sapientiæ illumina. De plenitudine Dilectionis incende. 4 Civitatis in quadropositæ, duodecim portæ sunt. Nam Teste Divo Ioanne Apocalypf. 21. 13 Ab Oriente portæ tres. Ab Aquilone portæ tres. Ab Austro portæ tres. Ab Occasu portæ tres.

Æternitatem immutabilem Civitatis significat figura quadrata. Tres verò portæ per quælibet latera ad quattuor Mundi plagas convertæ, designant amplitudinem Providentiæ, & Charitatis, nullas nationes, nulla regna, Peccatores nullos à sua Beneficentia excludentis, sed omnibus patientis, omnes respicientis, invitantis, expectantis, & intra sua viscera excepturæ Orientem, & Occasum, Aquilonem, & Austrum.

Si Sanctitas tua, Parens amplissima, ità benigna est, ità magnanima, & augusta, quid de Te sperare non possumus, & debemus? Quid iudicia divina considerantes im-

immodico timore turbemur? Quid nimium solliciti de cursu vitæ præteritæ, de ratione præsentis, atque futuræ, de incerto perseverantiæ beneficio, & similibus curarum omnis quietis expertium fluctibus agitamus?

Tux ab omnibus lateribus patent portæ. Patent nimirum, non solum ab Oriente venientibus, quos videlicet prævenit Deus in benedictionibus lucis, atque dulcedinis; sed patent etiam venientibus ab Occasu, quibus per peccatum occidit Sol iustitiæ, & quibus cum Sole gaudium omne subducitur. Sic patent non solum iis, quos mittit Aulter Charitate flagrantibus: sed etiam quos mittit Aquilo, cordibus durissimo gelu rigentibus.

Accedit portas esse Civitatis in quadropositæ. Sicut illa æternum stabit; ita portæ æternum patebunt. Ergo summa cum fiducia ad Civitatem beatissimam accedamus. Omnibus referata est. Neque nostra nos turbet indignitas. De indignis, faciet nos dignos ipse accessus. In ipso itinere immutabimur: & ab Occasu, vel Aquilone profecti, illorum luce illuminabimur, qui primi lumina Solis excipiunt; & illorum æstu calebimus, qui loca incolunt ad meridiem Charitatis. Si ad Urbem Partheniam talis erit accessus: qualis in illam erit ingressus?

5 Angelus, de quo Apocalypsi. 21. 16. mensus est Civitatem de arundine aurea per stadia duodecim millia; & longitudo,

do, & altitudo, & latitudo equalia sunt.

Longitudo aptè significare potest, vel longanimitatem in tolerando, vel immutabilem durationis tractum in benè ceptis. Latitudo extensionem Charitatis, ad omnes virtutes, & opera virtutum. Altitudo sublimitatem Sapientiæ, & contemperationis. Profunditas, quæ sub altitudine comprehenditur, profunditatem humilitatis.

Sanctitas enim Divinæ Parentis adhuc in hac vita degentis fuit maximè longanimis in tolerandis adversis. Fuit similiter in progressu de virtute in virtutem semper immobilis. Si cum alia qualibet sanctitate Virginis sanctitas componatur, nulla majori Charitate flagavit, nulla ampliori latitudine ad omnia virtutum opera se extendit propter Deum unicè dilectum; nulla sublimiori dono Sapientiæ, & contemperationis Altissimo propinquavit: nulla profundiori Humilitate ad infima se demisit.

Maneant tibi semper tua decora Civitas magni Regis. Civitas Dei viventis. Gloriosa de Te dicta sunt Civitas Dei; ut Propheta cecinit. Psalm. 86. 2. Semperque dicantur.

Interim memor esto Raab, hoc est Ægypti. Bellarm. in Psalm. 86. 3. Memor esto Babylonis. Memor esto Tyri; Memor esto Populi Æthyopum. Omnes alienigenæ sumus. Omnes Ægyptus, hoc est superbi. Omnes de Babylone, hoc est de habitatoribus confusionis. Omnes de Tyro, hoc est

est tribulantes . Omnes de populo Æthiopum , de iis videlicet, de quibus dicitur : denigrata est super carbones facies eorum , & non sunt cogniti in plateis . Thren. 4. 8. Omnes de Gentibus sumus . Omnes per peccatum tenebræ fuimus . Sed omnes novimus te , sed omnes in mortis umbra sedentes vidimus per Te Lucem magnam , & suspiramus ad Te .

Igitur per novam generationem renatos , ex Deo per Christum, excipe nos tamquam Cives unius atque ejusdem Civitatis sanctæ Ierusalem : ubi non est Gentilis , aut Iudeus . Barbarus , & Schyta ; servus , & liber , sed omnia , & in omnibus Christus . Ad Coloss. 3. 11.

Te donante accedemus ad Te , jam non Ægyptii superbia tumidi , sed mites , & humiles corde . Jam non Babylonii confusi , sed omnium cupiditatum perturbationibus libertati , per eum in quem speramus , & per quem facies nostras non operiet æterna confusio : Jam non Tyrii tribulantes , & molesti hominibus , & Deo , sed mansueti , pacifici , & benigni : jam non Æthiopes , sed in sanguine Agni dealbati .

Atque utinam antequam veniamus ad Te , efficiamur per Te Nazarei candidiores nive , nitidiores lacte , rubicundiores ebo-
re antiquo , sapphiro pulchriores . Threnorum 4. 7.

6 Si cum esses apud nos Virgo mirabilis tanta fuit amplitudo tua , qualis , & quantacrit ; postquam Cælum obtines , veluti

luti Regni sedes, veluti Metropolis Gentium, omniumque Princeps Provinciarum? quanta erit altitudo tua, & profunditas, quanta longitudo, & latitudo?

Quoniam superas Sanctitatem omnium, superas etiam perspicaciam in eo videndo, quo nihil sublimius videri potest. Et quoniam Divinus intuitus assimilat intuentem illi, quod ceruitur, juxta illud: Similes ei erimus, quia videbimus eum sicuti est: quali similitudine referes pulchritudinem infinitam, quæ superas omnium oculorum aciem in videndo? Jam si profunditas est æqualis altitudini Sanctitatis, & quanta est altitudo, tanta est profunditas visionis, quam profundè scrutaberis profundissimæ divinæ Perfectionum abyssum?

Denique si quanta est longitudo Æternitatis, tanta est immensitas Charitatis, quanta Charitate Sanctitas tua ferri dicenda est in Deum, & in omnia propter Deum adeoque in omnes Clientes tuos, & in omnes Provincias, & Regna? Si cuilibet Sanctitati debetur Æternitas, quanto potiori jure tuæ Sanctitati debetur, quæ Cælituum omnium superas sanctitatem?

O Civitatem Dei, quam lætificat impetus fluminis beatissimi! Te semper impetus iste lætificet. Utinam sicut audivimus, & audimus, & magna cum voluptate audimus decora tua; sic videamus in Civitate Domini virtutum, in Civitate Dei nostri. Tunc pleno gaudio gaudebimus, quandò videbimus quæ ratione equa-

lia

lia sint altitudo, & profunditas tua, longitudo, & latitudo.

Sed antequam recedamus hinc, ubi non habemus patriam manentem, numquid gaudere de Te non poterimus?

Imò etiam nunc prò conditione vitæ præsentis multum gaudebimus, si præcipuè de sapientia, & humilitate tua, de constantia, & charitate, de abundantia tuæ sanctitatis, te largiente aliquid accipiamus.

MEDITATIO II.

*De Humilitate, & Obedientia
Divinæ Parentis.*

DIuus Bernardus super Missus est. Homil. 1. Missus est Gabriel Angelus à Deo. Ad quem? Ad Virginem desponsatā Viro, cui nomen erat Joseph. Quæ est hæc Virgo tam venerabilis, ut saluetur ab Angelo: tam humilis, ut desponsata sit Fabro? Pulchra permixtio Virginitatis, & humilitatis: nec mediocriter placeat Deo illa Anima, in qua, & humilitas commendat virginitatem, & virginitas exornat humilitatem. Sed quanta putas veneratione digna est, in qua humilitatem exaltat fecunditas, & partus consecrat virginitatem?

Do.

Documentum primum ex eodem Doctore millifluo fit. Audis Virginem, audis humilem. Si non potes virginitatem, humilis: imitare humilitatem Virginis. Laudabilis virtus Virginitas. Sed magis necessaria Humilitas. Illa consulitur. Ista præcipitur. Ad illam invitaris. Ad istam cogeris. De illa dicitur: qui potest capere capiat. De ista dicitur: Nisi quis efficiatur sicut paruulus iste, non intrabit in Regnum Cœlorum. Potest placere humilitas, quæ virginitatem deplorat amissam. Sine humilitate autem audeo dicere, nec Virginitas *MARIÆ* placuisset.

Documentum secundum. *MARIA*, ut de Spiritu Sancto conciperet, sicut ipsa perhibet; Respexit humilitatem Ancillæ suæ Deus, potiusquam Virginitatem. Et si placuit ex virginitate, tamen ex humilitate concepit. Quid dicis Virgo superbe? Maria Virginem se oblita, gloriatur de humilitate. Et tu negligendo humilitatem blandiris tibi de virginitate? Respexit, ait illa, humilitatem Ancillæ suæ. Quæ illa? Virgo utique sancta, Virgo sobria, Virgo devota. Numquid tu castior illa? Numquid devotior? Aut numquid tua fortè pudicitia gratior castitate Mariæ? Ut tu scilicet sine humilitate placere sufficias ex tua; quando illa non potuit ex sua? Denique quanto honorabilior es ex singulari munere castimonix, tantò tibi maiorem injuriam facis, qui ejus in te decorem fœdas permixtione superbiæ. Alioquin

quin expedit tibi virginem non esse, quam de virginitate inolescere. Non omnium quidem est virginitas. Multò tamen pauciorum est cum virginitate humilitas. Si igitur virginitatem in Maria non potes nisi mirari. stude humilitatem imitari, & sufficit tibi.

Documentum tertium. Quod si & virgo, & humilis es, quisquis es, magnus es. Sed de hac ipsa magnitudine noli tibi placere, ne utrumque decus amittas.

2 Idem Sanctus Doctor Sermone de Beata Maria, cujus initium: Signum magnum. Legis in Actibus Apostolorum, quod redeuntes à Monte oliveti unanimiter perseverabant in oratione: qui? Si forè adfuit Maria, nominetur prima, quæ super omnes est, tam Filii prerogativa, quam suæ privilegio Sanctitatis. Petrus, & Andreas, Iacobus, & Ioannes, & ceteri, qui sequuntur. Hi omnes perseverabant unanimiter cum mulieribus, & Maria Matre JESU. Itane & mulierum, se se ultimam exhibebat, ut novissima omnium poneretur? Verè carnales adhuc Discipuli, quibus nec dum Spiritus erat datus, quia IESUS nondum fuerat glorificatus: quoniam facta est inter illos contentio de Primatu: cum MARIA, quanto major erat, humiliaret se, non modò de omnibus, sed & præ omnibus. Meritò facta est novissima prima, quæ cum prima esset, omnium se se novissimam faciebat: Meritò facta est omnium Domina, quæ se om-

omnium exhibebat Ancillam . Meritò denique super Angelos exaltata est , quæ , & infra viduas , & Poenitentes , infra eam , de qua ejecta fuerant septem Dæmonia , ineffabili se mansuetudine inclinabat .

Idèò Sanctus Doctor subjungit primò . Obsecro vos Filioli æmulamini hanc virtutem ; Si Mariam diligitis , si contenditis ei placere , æmulamini modestiam ejus . Nihil enim tam idoneum Homini , nihil tam congruum Christiano , maximèquē Monachum nihil adeò decet .

Subjungit secundò . Et quidem manifesta satis in Virgine , ex hac ipsa mansuetudine virtus humilitatis elucet . Nimirum collactaneæ sunt , humilitas , & mansuetudo , in eo confederatæ germanius , qui dicebat : Discite à me , quia mitis sum , & humilis corde . Sicut enim Mater præsumptionis elatio , sic mansuetudo vera , non nisi ex vera humilitate procedit .

Subjungit tertio . Nec in sola tantùm Mariæ taciturnitate commendatur humilitas . Sed evidentius resonat in sermone . Audierat : quod ex te nascetur Sanctum vocabitur Filius Dei . Et nihil aliud , quam Ancillam ejus se esse respondit .

Subjungit quarto . Beata planè , quam respexit Deus . Et Beata , quæ credidit . Nec humilitas tanta minuit magnanimitatem , nec magnanimitas tanta humilitatem ; sed cum in sua æstimatione tam humilis esset , nihilominus , & in promissionis credulitate magnanimis , ut quæ nihil aliud , quam

quam exiguam se se reputabat Ancillam, ad inscrutabile tamen Sacramentum nullo modo se dubitaret electam, & veram Dei, & Hominis Genitricem crederet mox futuram.

Agit hoc nimirum in cordibus Electorum Gratiæ prærogativa divinæ, ut eos nec humilitas pusillanimes faciat, nec magnanimitas arrogantes.

3 Ecclesiaste 1. 7. Omnia flumina intrant in mare, & mare non redundat.

Torrentes, & Flumina, pluvialibus aquis intumescunt, & ripis contineri non possunt. Mare nullis torrentibus, nullis fluminibus intumescens exuberat, neque limites sibi definitos egreditur. Mari similis est Maria, quæ licet omnium flumina gratiarum amplissimo sinu exceperit, nunquam tamen humilitatis eximie metas excessit.

Sed quale prodigiū esset, si totus Oceanus universam aquarum molem in aliquod fluvium immitteret, & fluvius non intumesceret, non redundaret? Naturæ omnes conditæ, & præsertim intellectu præditæ fluvii sunt immenso de Fonte manantes, & revertuntur ad locum unde exierunt, ut iterum fluant. Primus, & maximus omnium fluviorum Virgo est. In hunc totus influxit Oceanus, quando VERBUM CARO factum est, & fluvius non intumuit, non redundavit, sed majori humilitate se depressit, & in imum alveum se recepit. Ideò Dicitur Ambrosius in

Lu-

Lucam lib. 2. Vide, inquit, humilitatem: Ancillam se dicit, quæ Mater eligitur.

Noli quisquis ista consideras esse torrenti similis, quam exiguae de Cælo aquæ deciduæ tumidum faciunt, & exundantem. Vide quo prodigio totus Oceanus influat in Mariam; & fluuius non solum nativis aggeribus coercetur, sed magis deprimitur. Impletur Oceano, & in immensum crescit, sed quantum crescit, tantum exinanitur.

Quantum bona tua N. Peccator à Patre luminum accepta distent à bonis Virginis nosti. Quid ergo de te magnificè sentis? Cur de bonis non tuis occulta superbia gloriaris? Cur tacitè aliis te præponis? Numera, qui tibi esse humilis videris, quot sint, & qui sint, quibus te præferre non dubitas. Nondum didicisse de aliis semper benè, & altè sentire, magnum argumentum superbiæ est latentis in animo inani humilitatis specie decepto. Recole sæpiùs illa ex Thoma de Kemp. lib. 1. cap. 2. Si videres alium apertè peccare, vel aliquagruvia perpetrare, non deberes tamen meliorem æstimare: quia nescis quādiù possis in bono stare. Omnes fragilesumus: sed tu neminem te ipso fragiliorem stenebis.

4 (De Obedientia B. Virginis.) Psal. 44. 12. Audi Filia, & vide; & inclina aurem tuam, & obliviscere populum tuum, & domum Patris tui.

Si nomine Reginæ, & Sponsæ intelligatur

tur Beata Virgo Maria, sicuti potest intelligi, illam David nomine Patris coelestis alloquitur, hortaturque, ut audiat, videat, & in omnibus obtemperet Sponso; & ad hoc obliviscatur populum suum, & domum Patris sui: sicut reipsa audivit, & audita consideravit, & quicquid intellexit, aut coniecit executioni mandandum, mandavit: & oblita est populum suum, & domum Patris sui, hoc est Mundum, qui populus est Generis humani, & domus est Adami de Paradiso voluptatis ejecti. Est autem perfectissimè oblita Adamum, & Mundum, quia de peccato, moribusque Adami nihil hausit; & licet in Mundo fuerit, nihilominus de Mundo non fuit.

Et concupiscet Rex decorem tuum. Cur? quia perfectè populum tuum oblita fuisti, & domum Patris reliquisti, ut nihil tibi esset impedimento ad obsequium, omnemque obedientiam Sponso præstandam.

Si hæc ità se habent, si juxta modum obedientiæ Rex concupiscit Sponsæ decorem, quid sentiendum erit de illius obedientia, cujus decorem summus Rex præ omnibus concupiscit?

Plaudite Regine vestræ nostræque Spiritus immortales, & qui pulcherrimi estis, pulchritudinem; & qui potentes virtute facitis verbum illius, ad audiendā vocem sermonem ejus, obedientiam prædicat. Si de laudandi munere agitur, nos tacebimus: Quia non est speciosa laus in ore
pec-

peccatoris, neque decet homines incircumcisis cordibus, & auribus, laudare attentissimā ad audiendum, prudentissimam ad considerandum, promptissimam ad inclinandam aurem, populumque suum, & domum Patris sui oblivioni mandandum, studio parendi. Non tacebimus tamen, si de ope vestra imploranda sit sermo. Hac enim summoperè indigemus, & hanc prò vestra benignitate, miseris indulgere potestis.

Si omnes fidelium Animæ, licet peccatrices, ob fidem incorruptam dicuntur Virgines, & Sponsæ ad Sponsam Ecclesiam pertinentes; & singulæ si poenitentiam egerint, & fatuæ esse desierint, Regi Christo adducendæ sunt post eam, hoc est post Virginem Matrem, totius Ecclesiæ Reginam, adeòque primò quidem Reginam Virginum omni labe corporis, animique carentium; deindè verò omnium omnino Poenitentium; impetrate ut Animæ nostræ, ceteræque omnes, audiant, & videant, & inclinent aures suas, & ad promptè, alacriter, totisque viribus, & voluntatis, & intellectus obediendum, obliviscantur populum suum, & domum Patris sui.

5 Stabant juxta Crucem JESU Maria Mater ejus, & Soror Mattis ejus Maria Cleophe, & Maria Magdalenè. Joannis 19. 25.

Maria juxta Crucem JESU inspiciebat, & faciebat secundum exemplar, quod illi mon-

monstrabatur in Monte. Et quoniam inter virtutes singulas exemplaris, obedientia eminebat: nam qui humiliavit se usque ad Crucem, factus est obediens usque ad mortem: idè inter cetera lineamenta virtutum perfectissimam in se transtulit imaginem obedientiæ. Præstantiam imaginis conicere licet è ratione, siue Hostiæ per obedientiam oblatae, siue doloris, quo sacrificium consummatum est: siue fortitudinis, qua dolor animi sacrificantis victus est.

Si consideretur primum, quæ major oblatio? Alię Matres fama inclytæ pro cultu veri Numinis, liberos obtulerunt crudelitati, & cruciatibus Tyrannorum. Sed quid Parēti Partheniæ cum Felicitate, aut Symphorosa, aut Machabæorum Matre? Singulæ Deo septem liberos obtulerunt: Maria unum obtulit; sed nō solum septuagies septies superantem, sed infinities filiorum omnium vitam, generis claritatem, celsitatem indolis, decorem ætatis, candorem morum, & si quæ sunt alia corporis, & animi ornamenta.

Si consideretur secundum, nempe doloris magnitudo, quem Parens obedientissima experta est, ut exactè voluntatem Patris impleret, recolantur verba Divi Bernardi Sermone de Lamentatione Virginis MARIÆ, ipsam in hæc verba alloquentis. Nunc soluis Virgo cum usura, quod in partu non habuisti à natura. Dolorem pariendo Filium non sensisti, quem millies

replectum Filio moriente passa fuisti. Ad hæc recolantur verba ipsius Virginis de obitu Filii sui loquentis libro quarto Revelationem D. Birgittæ cap. 40. Dolor Filii erat dolor meus, quia cor ejus erat cor meum.

Si denique ultimum attendatur, quid mirabilius illa fortitudine, qua Virgo Filium suum pro toto Mundo offerens Patri dolorem vicit? Non enim in tam atrociterum articulo deliquitum passa est, ut aliqui arbitrantur, sed ut habetur lib. primo Revelationum S. Mcsthildis cap. 56. Omnis creatura in morte Filii dolente, ipsa sola; cum Divinitate immobilis, & gaudens, Filium suum pro Mundi salute, voluit immolari. Et D. Ambrosius Sermone de Instructione Virgin. cap. 7. Stabat antè Crucem Mater, & sugientibus viris stabat intredida.

Cur intrepida? quia corpus ægrum sustentabat animus, & infirmitatem voluntatis inferioris, virtus superioris portabat, non solum volentis, quod volebat voluntas Patris, sed de tali voluntate, gaudio deiformi gaudentis.

O' Robur! O' Gaudium voluntatis divinæ voluntati secundum omnia consentientis! quicumque Mariam diligitis, & ista legitis, eligite quid ex omnibus hisce imitari possitis.

6 Melior est obedientia, quam victimæ. 1. Regum 15. 22. Per victimas enim, ut inquit Divus Gregorius, aliena caro,
per

per obedientiam voluntas propria maceratur.

At si loquamur de obedientia Virginis Matris Filium suum tanta cum animi subjectione Aeterno Patri offerentis, numquid affirmari potest obedientiam esse victimam meliorem? Si enim sermo sit de Victima, est infinitæ æstimabilitatis. Si de immolatione Victimæ, per hanc immolatur, & propria voluntas, & caro aliena. Quæ autem caro? Illa nimirum, quæ victimam omnem complectitur, & sacrificiorum omnium implet figuras, & voluntatem macerantem, & maceratam, facit sacrificium Deo summe acceptabile.

Quid comparisonis habet hæc Obedientia cum illa, qua voluit Abrahamus Filium, sicut illi præceptum fuerat immolare? Quæ enim se propinquitate contingunt Filius Abrahami, & Filius Dei? Deinde Abrahamo antequam feriret, dictum est: Ne extendas manum in puerum, & non facias illi quicquam. At virgo sacrificium initum consummavit, & si iussu fuisset, etiam propriis manibus consummasset: & immobilis vidit Filium totq corpore lacerum, oblitum sui, sed non Peccatorum, adeoque pro illis cum clamore valido, & lacrymis, perorantem ad Patrem, caput inclinantem, & expirantem.

O Prodigium fortitudinis, & obedientiæ! Vide robur obedientiæ tuæ Virgo fortissima, & obedientissima, & miserere surditatis nostræ in iussionibus audiendis,

miserere defidiæ in illis considerandis, cecitatis in discernendis, tarditatis in exequendis: miserere timiditatis in difficultibus admittendis, atque duritiæ in reiciendis.

Absit à nobis per Te inobedientiæ omnis. Absit omnis vel culpa levissima in illa exercenda virtute, quæ ità cordi est omnibus Electis, Tibi, Filio, Patrique tuo, cui te cum Filio tuo tanta cum animi contentione, & obedientia immolasti.

MEDITATIO III.

*De Charitate Domini Nascentis re-
lucente in Charitate Matris
ipsum Parientis.*

LUcæ 2. 6. Factum est autem, cum essent ibi, impleti sunt dies, ut pareret. Et peperit Filium suum Primogenitum.

Divina Parens peperit Filium suum, non sibi soli, sed sibi simul, & Mundo: Ideò tantoperè partu suo gavisa est. Si enim, ut Ioannis 16. 21. dicitur: Mulier cum parit tristitiam habet, quia venit hora ejus: cum autem pepererit Puerum, jam non meminit pressuræ propter gaudium, quia natus est homo in Mundum: quo gaudio affectam fuisse putabimus, quæ non solum caruit partus doloribus, & quod majus est,

car-

caruit jactura virginæ integritatis, sed vidit illum hominem in Mundum venisse, per quem omnis homo, divina gratia donatus, de Mundo evehendus erat in Cælum?

Filium Dei genuisse summa dignitas Matris est, summa felicitas. Sed quia charitas nullis finibus contineri potest, bonum quo Parens optima abundavit, in alios derivare contendit, & Orbem terrarum sanctitate, & Cælum implere lætitia lætata est.

E' charitate Virginis parientis, collige Anima mea charitatem Pueri orientis. Si enim illa, non sibi soli parit, sed Mundo; quanto magis non sibi soli oritur, sed Mūdo, qui venit in Mundum, ut esset lux Mundi, & Principem tenebrarum exterminaret è Mundo, totamque Mundi faciem, peccati vetustate sublata renovaret?

Paruulus natus est nobis, & Filius datus est nobis. Natus est nobis, ut esset apud nos, & habitaret in nobis; nos verò novitatem vitæ sortiti per lavacrum regenerationis illi viveremus, jam non ipsi; verum ipse in nobis viveret, & nos viveremus in ipso. Datus est nobis, ut sicuti ipse non secundum partem, sed secundum totum datus est, ita nos disceremus dare totum prò toto. Et quodnam est illud totum, quod à nobis optat accipere, prò toto, quod ipse est? Numquid totus Mundus? Verum nostra non quærit, sed nos. Quando ergo dicit: da totum prò toto: numquid postulat totum corpus, totam animam, quibus constamus? & nihil aliud

postulat? & ad hoc venit in mundum; ut se totum hisce totis inanibus permutaret? Hoc sanè dicendum, nec aliud dici potest, & mirabile; & ineffabile planè est, sed ità dicendum, & ità est.

Domine IESU, qui diligis nos, nihil habentes undè diligamur; Fac nos diligere, te habentem omnia undè diligaris. Et fac nos diligere omnia propter Te, qui habes omnia, undè propter Te omnia diligantur.

Domine IESU, qui veniens in hunc Mundum unicuique dixisti; & jam sedens ad dexteram Patris adhuc dicis. Da totum pro toto; da ut verba oris tui intelligam, penitusque perspiciam: Da ut exequar. Da ut omnibus diebus vitæ meæ amarè lugeam, quia offerenti totum immensæ magnitudinis, immensi ponderis, immensi decoris, & pretii detrectavi post tot annos dare totū, quod nihil aliud est, quam pulvis, & cinis, & nihil, & peccatum. Et hoc totum magis amavi, quam illud, quod infinita sanctitas est, & omnia est.

2 Si Virgo, quæ præ cæteris de plenitudine illius charitatis accepit, qua Deus sic dilexit mundum, ut Filium suum unigenitum daret; tanta voluptate perfusa est, quia peperit Parvulum, qui natus est nobis, & Filium, qui datus est nobis, cujus imperium super humerum ejus, & vocandus erat Admirabilis, Consiliarius, Deus, Fortis, Pater futuri sæculi, Princeps pacis. *Isaïæ 9. 6.* Quanta voluptate Parvulum ipsum

ipsum perfusum fuisse necesse est . Ipse nimirum erat , qui volebat dari nobis ; Ipse , qui nobis nasci volebat : Ipse nobis totum Imperium suis fulcire humeris , non indigens Consiliariis ad deliberandum , aut excubitoribus ad præcavendas insidias , aut exercitibus ad bellandum . Tantulus Infans , tantusque Rex , non dedignatur esse Rex hominum ignobilium , pauperom , insipientium . Et ideo nascitur , ut nobis sit admirabilis , nobis magni Consilii Angelus , nobis Fortis , nobis Pater futuri sæculi , nobis Princeps pacis . Uno verbo nascitur , ut sit noster Deus , juxta illud Apocalyps. 2. 3. Ecce Tabernaculum Dei cum hominibus . Et ipsi Populus ejus erunt , & ipse Deus cum eis , erit eorum Deus .

Tu ergo Puer amabilis eris noster Deus , & vis esse noster : & Homo nasceris , ut sis noster Deus ; Nos autem immemores nostri , & immemores Tui , non desiderabimus esse , & non erimus Populus tuus ?

Si nasceris , ut nobis sis Admirabilis , quid aliud extra Te , mirari nos decet ? Numquid aliud extra Te occurret nobis , quod nostras sibi vindicet mentes , dignaque admiratione detineat ? Si Tu magni consilii Angelus , nobis nasceris , ut consiliarii munere fungaris apud nos ; quem alium in consilium adhibebimus , quoties in ancipiti versabimur , & quid consilii capiendum sit ignorabimus ? Si Tu Protector fortissime venis ad nos , ut scuto veritatis tuæ nos protegas in adversis , quid timebimus ? Si

Te nobis in Patrem exhibes futuri sæculi, qua de causa præsentibus inhærebimus? Et cur vocabimus nobis Patrem super terrâ? Pater noster in Cœlis est, de Cœlo est, Pater futuri sæculi est.

Denique si Princeps pacis futurus venis, & nobis venis, cur sub Principe pacis, bellis intestinis exercebimur, tumultuantibus cupiditatibus adversus rationem, & ratione adversus Regem pacis iride coronatum? Te auspice, Te duce, ante pacem perfectam felicitatis æternæ, volumus inter tot seditiones, & bella vitæ præsentis, illam pacem frui, quæ nascente pacis Principe prænunciata est; & promissa de Cœlo hominibus bonæ voluntatis.

3 Filium suum Primogenitum parit cælestis Puerpera, dum medium silentium tenerent omnia, gaudetque illo silentio, ut & ipsa, & nos cum ipsa voces Verbi tacentis facilius, & clarius audiremus. Parit in propria venientem, suis eum non recipientibus, ut nos reciperemus, Parit in antro, parit non invenientem locum in diversorio, ut ille ad nos diverteret, essetque domus illius Anima nostra.

Atque hi quidem erant affectus Virginis suum edentis Infantem. Quinam verò erant ipsius affectus Infantis? Omnibus medium silentium tenentibus, & nocte in suo cursu medium iter habente, venit in mundum ut homines universos, alta ignorantiae nocte, altoque peccatorum somno sopitos excitaret non Cæli tonitruis, sed

con-

concentu ; non voce, aquarum multarum, sed voce lacrymarum ex oculis placidissime decidentium ; non irarum fulminibus, sed potentissimi telis amoris , ut quos voce tonante non moverat, vagitibus commoveret , & quos non traxerat in admirationem voce, qua loquens Mundum fecit : ad se traheret , & ad amandum excitaret silentio , quo silens Mundum refecit .

In propria venit , & sui eum non receperunt , ut exclusus à suis, reciperetur ab alienis . & cui non fuerat locus in diversorio , domicilium esset in toto Mundo . Nascitur Homo inter homines , ut credentes in nomine suo, non ex sanguinibus, neque ex voluntate carnis , neque ex voluntate viri, sed ex Deo nascantur, & sic Filii Dei, & Fratres sui nominentur, & sint .

Denique in spelunca paritur , ut peccatores de speluncis latronum, de cubilibus ferarum vertat in Tempia suæ Divinitatis, vertat in sedes sapientiæ, & in illas domos, quæ ut innuit D. Petrus Ep. 1. Cap. 2. Lapidum vivo, ab hominibus quidem reprobato , à Deo autem electo , & honorificato, ex vivis lapidibus superedificantur .

Evigila Anima mea de somno tuo, & sequere Dominum ad solitudinem te vocantem , & media nocte ducentem , & loquentem silentio suo ad cor tuum . Nam quæ solitudo beatior , quam solum esse , ubi solus est IESUS, cum Matre sua, & Sponso Matris suæ ?

Libenter excipe venire cupientem ad

H 5

Te.

Te. Noli dicere: Non est locus in diverforio. Ad ingressum enim illius, qui est sibi mundus, & locus, & omnia, dilatatur cor tuum, & exclusis omnibus, quæ nihili ducenda sunt, & nihil sunt, capax immensi Hospitis efficiaris.

Postula à Domino Deo tuo, ut qui simul est fundamentum atque fastigium totius Ecclesiæ: ita non dedignetur esse lapis angularis, cui domus tua spiritualis superextruatur, idemque lapis, qui in editissima parte collocatus ædificium consummet, fundamentum videlicet portans infirmitatem tuam, & fastigium regimini tuo præminens.

4 Pannis Mater eum involuit, ut illius nuditas pannis pauperibus involuta, nostram tegetet nuditatem. Et quidem ad hoc ille venerat. Ad hoc pannis vilibus indigebat, ut nos stola immortalitatis indueret. Sed hoc parum est. Nostram mortalitatem indutus, lineis etiam, laneisque circumdatur indumentis, ut nos induat se ipso. Qui ab initio mundi regnaverat, & in magnificentia, & splendore suorum operum, decorem indutus fuerat, in antro Bethlemio nascens, & perditum, destructumque opus instaurans, prò Cælo speluncam eligit in domicilium, prò opulentia paupertatem, prò decore induit nuditatem, ut nos Regem nostrum intuentes tali veste decoris ornatum, illum similitudine morum, atque virtutum induamus.

Si Dominum induerimus, quas vestes ulte-

ulterius, requirere opus erit? Per nuditatem, pauperesq; pannos Filii tui, indue nos hac veste, Domina Cœli, ac Terræ. Te intercedente Rex noster, nostras indutus exuias, induat nos illa veste, quæ Ipse est.

Sic omni tempore erunt vestimenta nostra candida, ut nobis præcipitur Ecclesiaste 9. 8. & oleum sanctitatis, atque lætitiæ de nostro capite non deficiet.

Sic in die novissimo non apparebit confusio nuditatis nostræ, quia vestimentis albis induti, similes erimus Beatis Spiritibus, quos D. Ioannes vidit Apocalypf. 15. 6. Vestitos lino mundo, & candido, & præcinctos circa pectora zonis aureis.

5 Pannis involutum fascijs circumplectitur. Cur? ut ligatis manibus, pedibusque illum facilius, & securius teneamus, & nullatenus dimittamus. Ergo morem geramus Genitrici Dei, & nostræ. Si cum Anima sancta Cantic. 3. 1. quærivimus, quem diligebamus; si circuivimus civitatem, & per vicos, & plateas quærivimus, & non invenimus: si vocavimus, & non respondit nobis, jam dicat, uniusquisq; nostrum, tenui eum, nec dimittam. Dimittamus omnia, dimittamus nos, ut IESUM pannis involutum, fascijsq; constrictum, teneamus. Teneamus, & non dimittamus omnibus diebus vitæ nostræ. Venit enim, ut teneatur. Idè se offert magis vinculis Charitatis, quam fascijs colligatum, ut non solum iustus, sed etiam Peccator penitens plenus fidenciæ dicat: Tenui eum, nec dimittam.

Nascente siquidem Domino deletur iniquitas terræ; & misericordia, & veritas occurrunt tibi, & iustitia, & pax se invicem osculantur, & peccata dimittuntur, ut Verbum Infans teneatur, nec dimittatur.

Et quoniam Verbum Patris tenere, & immobiliter possidere bonum est super omne votum, & super omne bonum, quid agemus ò Bone IESU, ut teneamus te, & nexu non solubili teneamus?

Dimitemus primò ex toto corde Fratribus nostris, quicquid peccaverint adversum nos.

Dimitemus secundò: mortuos sepelire mortuos, ut omnium à cursu virtutis retardantium, sive cognatorum, sive amicorum amore semoto, sequamur quocumq; vocas, qui de morte vocas omnes ad vitam nunquam interituram.

Dimitemus terciò, quantum licet, etiam amorem vitæ beatæ. Modò enim potiamur gratia tua, & amore tuo, quibuscumque premamur ærumnis, non erimus infelices. Tecum enim esse, neque dimitti à te; neque dimittere te summa, & plena felicitas est.

6 Reclinavit eum in præsepio. Quia enim Filius venerat ignem mittere in terras, & volebat illicò, & vehementer accendi, idcirco reclinatur in palea, ut esset in promptu nutrimentum ignis, quo totus terrarum orbis erat conflagraturus, juxta prædictionem Isaïæ cap. 64. 1. utinam dirumperes coelos, & descenderes: à facie tua

mon-

montes defluerent, sicut exustio ignis tabescerent aquæ arderent igni.

Ab ipso Domini nascentis exordio, sumpsit exordium, illud orbis Incendium, quo potentium, & superborum montes à facie Domini defluerunt, & in cineres Poenitentiae resoluti sunt; & ipsæ cordium aquæ frigidissimæ, non solum, ardente universo concepere fervorem, sed flammam.

O Incendium fortunatissimum! O beatissimæ stipulæ, quæ non exiguam opem suscitando Incendio contulistis! Quis enim amorem Collium æternorum videns jacentem in palea, non concipiat flâmas amoris?

Quid si tanti spectator prodigij non solum jacentem attenderet, sed rigentem, sed indigentem halitu Bovis possessorem suum, & lumentis cognoscentis Præsepe Domini sui? Non ne flammæ è paleis erumpentes illo frigore auferentur quo amabilis Author incendiij obrigeret?

Quid adhuc riges N. peccator omni gelu frigidior? Tu Parentem reclinantem, tu Puerum in præsepio reclinatum videre potes, & adhuc sine ullo commiserationis sensu torpere? Tu paleas videre potes ad primum Ignis nutrimentum electas; Tu mundi videre potes incendium, quod cum Parente tua, ita vehementer desideravisti Parvulus in lucem editus, ut incenderet omnia: Tu hæc videre potes, & non ardere, ardente mundo, ardentibus montibus à facie ignis, & in cineres defluentibus; imò ipsis aquis non solum effervescentibus, sed

in

in olei morem ardentibus?

Vide nē tu quoque inter illos numereris, de quibus loquitur Isaias cap. 1. 2. dicens Audite Cēli, & auribus percipe terra, quoniam Dominus locutus est. Filios enutrivī, & exaltavi, ipsi autem spreverunt me. Cognovit bos possessorem suum, & asinus pręsepe Domini sui, Israel autem me non cognovit: & populus meus non intellexit. Veh genti peccatrici, populo gravi iniquitate, semini nequam, Filijs sceleratis.

MEDITATIO IV.

*De Domino instituyente Divinissimum
Sacramentum sub specie Panis.*

P Rou. 9. 4. Si quis est parvulus veniat ad me. Et insipientibus locuta est. Venite, comedite panem meum.

Cur Sapientia Patris vocat se ipsam panem suum? exhibensque se nobis sub specie panis, dicit: Venite, comedite panem meum?

Ratio prima est, quia sicuti nullum convivium, nulla fercula sapiunt sine pane; ita nulla veritas, qua pascitur intellectus, nulla bonitas, qua voluntatis appetitus expletur, sapit sine sapientia, quę Deus est. Dicant Peccatores, numquid ad mensam demoniorum sedentes unquam sapientur,

& ferculis, quæ apponuntur plenè delectentur? Imò, qui hujus vitæ bonis licitis fruuntur, sed cognitionibus, quantumvis excellentibus scientiarum humanarum, nullam cognitionem primæ Veritatis admiscunt; neque voluptati, è bonis indifferentibus orienti, ullum amorem, aut gaudium de summo Bono associant, numquid his dapibus esuriem pellunt sine pane, hoc est sine ulla cognitione, & amore summi Veri, summique Boni?

Ideò David dicebat psalm. 101. 5. *Arui cor meum, quia oblitus sum comedere panem meum, panem videlicet Veritatis Cælestis, ut explicat Bellarminus, qui propriè panis noster est, non communis cum bestiis. Nam cibus corporalis non est propriè panis noster. Verissima sententia, & ab ijs qui prosperitate fruuntur assidue consideranda. Nisi enim, qui in prosperitate sunt, sub umbra alarum Dei commorentur, vel imbre divinæ Gratiæ perfundantur, fieri non potest quin ut fenum percutiantur, & Cor eorum nauseans ad cœlestem Panem non penitus exarescat. Ita Bellarminus in psalm. citatum.*

Ratio secunda est. Sicuti cibus omnis desipit sine pane: ita panis est cibi cuiuslibet condimentum. Eadem planè ratio, sicuti sine Bono infinito omnia desipiunt, ita Bonum infinitum additum bono finito, reddit possessionem boni finiti valdè jucundam possessori suo, illud honestè possidere nolenti sine Bono infinito. Quare con-

di-

dimentum omnis boni finiti licitè possessi, est Bonum incommutabile, & infinitum. Ideò nemo jucundius fruitur valetudine, viribus, juventute, divitijs, dignitatibus, quam Iustus.

Ratio tertia est, quia omne quidem ferculum desipit sine pane, sed non ita sine quolibet ferculo desipit panis. Solus enim sapor est, præcipuè esurienti. Sic Deus solus sine ullo bono finito, sine divitijs, sine honoribus, sine florente fortuna, sine Amicis, satis superque est esurienti Iustitiam, cum sit Panis continens omnium ciborum saporem, & suavitatem.

Hac de causa nominat se Panem suum Sapientia Dei: & volens Cibo nos non solum Spirituali, sed Sacramentali, & modo Hominibus proportionato nutrire: sub specie panis se nobis exhibet.

2 Cum Sapientiæ panis sit huiusmodi, mirum est ab innumeris Adami Filijs posthaberi tot feruclis non solum bonorum finitorum, sed illicitorum. Quot enim paternam domum deserentes more Adolescentioris Filij, de quo Lucæ 15. 15. peregrè proficiscuntur in regionem longinquam, & ibi dissipant substantiam suam, vivendo luxuriosè? Consumptis omnibus, incipiunt egere, & necessitate compulsi adhærent alicui civium miserabilis regionis, quo mittuntur in villam, ut pascant porcos.

Sed quod mirabilius est, quis ex totamentibus cum adolescente Prodigio in se

se reversus gemit, ac dicit: quanti mercenarij in domo Patris mei abundant panibus, ego autem hic fame pereor? Quis ex tot præ fame cupientibus implere ventrem suum de filiquis, quas porci manducant, expergiseitur, lacrymansque dicit: Surgam, & ibo ad Patrem meum, & dicam ei: Pater peccaui in Coelum, & coram Te, jam non sum dignus vocari filius tuus?

Paterna domus abundat mercenarijs, Deo videlicet servientibus amore mercedis, & hi mercenarij abundant panibus sanctis, abundant panibus propositionis, qui nimirum proponuntur Deo ad ipsum, propitiandum, & Hominibus ad illos pascendos, & sanctificandos; abundant panibus, de quibus Deus per Isaiam 55. 2. quare appenditis argentum non in panibus, & laborem vestrum non in saturitate? Audite audientes me, & comedite bonum, & delectabitur in crassitudine Anima vestra. Hi tamen, quis credat? amant implere ventrem de filiquis Gregis immundi, & volunt potius fame perire, quam vivere de vita illius Panis, de quo Vita dixit: qui manducat hunc Panem, vivet in æternum. Quæ major infania, quam filiquas mortem afferentes Pani vivo præferre, & velle potius, presenti simul, & perpetuò duratura fame perire, quam pasci Cibo omnem esuriem depellente, & in perpetuas eternitates depulsuro?

Rogemus Dominum primò pro Fratribus nostris, ut ad cor redeant, & resipiscant.

Ro-

Rogemus secundò . ut nihil magis oderimus , quam regionem longinquam , in qua sine Deo vivitur : & Cives tristissimæ regionis , qui famulos suos in villas amandant pascendis porcis operam navaturos , & ventrem implere filiquis desideraturos .

Rogemus tertio , ut nihil nobis gratius sit , quam Pater , & Paterna domus ; & mensa abundans panibus etiam pro mercenarijs . Licet autem unusquisque nostrum dicere possit , ac debeat ; Pater peccaui in Coelum , & coram te , jam non sum dignus vocari Filius tuus ; Fac me sicut vnum de mercenarijs tuis ; totis tamen viribus enitatur , ut filij simus , non mercenarij . Licet enim Panis magni Patris familias etiam mercenarijs apponatur , propriè tamen , & potissimum est Panis Filiorum Patri obedientium , quia Pater est , non quia Retributor .

3 August. in Psalm. 90. Fortes estote Fratres , & quandò aliqua inopia tentamini , Deo flagellante , & erudiente vos , quibus , & parat , & servat æternam hæreditatem , non vobis suggerat diabolus : Si Iustus esses , nonne tibi per corvum mitteret panem , quomodò misit Eliæ ? Ubi est quod legisti : Numquam vidi Iustum derelictum , & semen ejus quærens panem ? Tu responde diabolo : Verum dicit Scriptura : Numquam vidi Iustum derelictum , nec semen ejus quærens panem . Habeo enim panem meum , quem tu non nosti . Quem panem ?

Audi .

Audi Dominū . Non in solo pane vivit homo ; Sed in omni verbo Dei . Putasne Verbum Dei non sit panis ? Si non esset panis , non diceret Verbum Dei , per quod facta sunt omnia ; Ego sum Panis vivus , qui de Coelo descendi . Hæc Aug.

Veritates istas altè animo imprimamus , semperque :

Meminerimus primò : Verissimum esse dictum Prophætæ : Numquam vidi Iustum derelictum , & semen ejus quærens panem . Licet enim Iustus ad summam inopiam reductus mendicare cogatur , nunquam tamen caret pane , de quo loquitur Dominus dicens : Non in solo pane vivit homo , sed in omni verbo , quod procedit de ore Dei .

Meminerimus secundò , Omnia verba procedentia de ore Dei esse nostrum panem ; omnia enim , & singula sunt doctrina cœlestis continens illas veritates per modum cibi nos reficientes , & confortantes . Idè cor nostrum exarefeit . ac deficit , quoties verba ex ore Dei procedentia negligentes , nostrum panem comedere obliviscimur .

Meminerimus tertio ; quod si verba Scripturarum , & Patrum , dulciora sunt , super mel , & favum , quia verba sunt ex ore Dei procedentia , quam erit dulce Verbum illud , quod à diebus Æternitatis ex ore Dei procedit , & per quod Pater infinitè eloquens dicit se ipsum , & omnia , & dicendo condit omnia , & condita conservat , & lucis

cis expertia illuminat, & alit indigentia alimento; Angelis verò, & Hominibus longè diverso modo alimenta suppeditat? Non enim Angelos, & Homines per solam Verbi doctrinam pascit, sed per ipsum Verbum de Pane vivo Angelorum, factum Panem Hominum omne delectamentum habentem?

Quis Boni, quis Beneficij magnitudinem percipere possit? Timeamus, & esuriamus, ut nobis quoque porpitius sit, qui dat escam timentibus, & esurientibus; & nihil aliud esuriamus, psalm. 110. 5. 141. 7.

4 Sed quoniam parvulis lacte opus est, non solido cibo: Perfectorum enim est solidus cibus, ut innuit Apostolus ad Hæb. 5. 12. Quid consilij cepit Divina Sapientia, ut humanæ infirmitati consuleret? Cuncti Homines parvuli eramus, & lacte indigebamus; non solido cibo, qui Angelorum erat, tamquam perfectorum, ideò, ut August. docet in psalm. 130. Dominus noster IESUS Christus panis, se fecit nobis lac, Incarnatus, & apparens mortalis, ut in eo finiretur mors, & non aberraremus à Verbo, credentes in Carnem quod factum est Verbum. Hinc crescimus, ipso lacte nutriamur: antequam validi simus ad capiendum Verbum, non recedamus à Fide lactis nostri. Sunt quidam homines, qui cum audierint, quia humiles esse debent, dimittunt se, nihil volunt discere, putantes, quia si aliquid didicerint, superbient; & remanent in solo lacte: quos reprehendit

dit Scriptura dicens : ad Hæb. 5. Et facti estis opus habentes lacte, non solido cibo. Sic enim nos Deus vult nutriri lacte, ut non ibi remaneamus, sed crescendo per lac ad solidum cibum perveniamus : Ergo non debet homo extollere cor suum in superbiam sed debet elevare in Doctrinam Verbi Dei. Non ergo sic tibi dicitur : Humilis esto ut non sapias : Humilis esto propter Superbiam : Altus esto propter Sapientiam. Lactare, ut nutiaris, sic nutrire ut crescas, sic cresce, ut panem manduces.

Idem August. in psalm. 30. 4. Dux mihi eris nè aberrem a Te : & enutries me, ut validus sim ad manducandam escam, quæ pascis Angelos. Hic enim lacte nos nutrit, qui nobis coelestem cibum promisit, & usus est materna misericordia. Sicut enim Mater lactans eandem escam, cui sumendæ idoneus Infans non est, per carnem trajcit, & lac infundit : hoc enim accipit parvulus, quod accepturus erat ad mensam ; sed quod per carnem trajcitur congruit Parvulo : Sic Dominus Sapientiam suam, ut lac nobis faceret, carne indutus venit ad nos.

Idem de Verbis Domini in Euang. secundum Ioannem serm. 39. Non nè esca erat in mensa ? sed invalidus est Infans ad comedendam escam, quæ in mensa est. Quid facit Mater ? Incarnat escam, & conficit lac de ipsa. Conficit nobis, quod capere possumus. Sic Verbum Caro factum est, ut lacte Parvuli nutriremur, qui ad
Ci-

cibum quidem eramus Infantes. Verum hoc interest, quia quando cibum Mater incarnatum lac facit, cibus in lac convertitur. Incomutabiliter autem manens Verbum Carnem assumpsit, ut esset quodammodo contextum. Ex his;

Colligamus I. Divitias Bonitatis Divinæ. Ut enim homines Panem Angelorum manducare possent, fecit Verbum Lac rationale, quod Homines per Lavacrum regenerationis ex Deo nati, tamquam modò geniti Infantes concupiscerent; ut Fideles omnes Princeps Apostolorum hortatur. Ep. prima cap: 2. 2.

Colligamus II. Ad coelestem Cibum; sive meditatione, sive Sacramentali manducatione degustandum, nos parvulos esse debere non ratione insipientiæ, aut levitatis puerilis, sed Humilitatis, & Innocentiæ, juxta illud prima Corinth. 14. 20. Nolite pueri effici sensibus, sed malitia parvuli estote. Sensibus autem perfecti estote.

Colligamus III. Non esse nobis sistendum in lacte, sed à lacte procedendum ad panem, à nutrimento Infantium ad cibum solidum Perfectorum, ab Humanitate assumpta ad Verbum. Ideo D. Aug. in psal. 130. Cum dixisset Deum velle nos humiles, & altos: Humiles propter cavendam superbiam, altos propter capiendam Sapientiam: concludit: Lactare, ut nutriaris. Sic nutrire, ut crescas. Sic cresce, ut panem manduces. Cum enim ceperis Panem man-
du-

ducare; ablaſtaberis, ideſt, jam tibi non erit opus lacte, ſed ſolido cibo.

§ *Psalm. 134. v. 3.* Laudate Dominum, quia bonus Dominus, pſallite Nomini ejus, quoniam ſuave *S. Aug. Legit: Laudate Dominum, quoniam bonus eſt. Pſallite Nomini ejus, quoniam ſuavis eſt.*

Non diſcrepant reiſſa verſiones, quia ideo ſuave eſt pſallere Nomini Domini, quia Dominus ſuavis eſt. Hæc autem habet in rem noſtram textum explicans Sanctus Doctor.

Forteeſſet bonus, & ſuavis non eſſet, ſi tibi non daret poſſe guſtare. Talem autem ſe præbuit hominibus, ut etiam Panem de Cœlo miſerit, & Filium ſuum æqualem, qui hoc eſt, quod Ipſe, dederit Hominem faciendum, & pro Hominibus occidendum; ut per hoc, quod tu es, guſtes, quod non es. Multum enim ad te erat guſtare ſuavitatem Dei; quia remota erat illa, & nimis alta; Tu autem nimis abiectus, & in imo jacens. In magna iſta ſeparatione miſſus eſt Mediator. Non poteras ad Deum homo; Deus factus eſt Homo, ut quoniam Homo potes ad Hominem, qui non poſſes ad Deum; per Hominem venires ad Deum. Si Homo ſolum eſſet, hoc ſequendo quod es, numquam pervenires. Si Deus ſolum eſſet, non comprehendendo quod non es, nunquam pervenires. Deus factus eſt Homo, ut Hominem ſequendo, quò potes, ad Deum pervenires, quod non poteras. Ipſe eſt Mediator. Inde factus eſt ſuavis. Quid enim

enim suavius Pane Angelorum? Quomodo ergo non est suavis Dominus, quando Panem Angelorum manducavit Homo? Non enim aliunde vivit Homo aliunde vivit Angelus.

Ipsa est Veritas. Ipsa est Sapientia. Ipsa est Virtus Dei. Sed quomodo ea perfruuntur Angeli, tu non potes. Illi enim quomodo perfruuntur? Sicuti est. In Principio erat Verbum, & Verbum erat apud Deum, & Deus erat Verbum per quod facta sunt omnia. Tu autem, quomodo contingis? quia Verbum Caro factum est, & habitavit in nobis. Ut autem Panem Angelorum manducaret Homo, Creator Angelorum factus est Homo. Psallite ergo nomini ejus, quoniam suavis est. Si gustastis psallite. Si benè sapit, quod gustastis, laudate. Quis tam ingratus est, vel coquenti, vel pascienti; ut cum fuerit pulmento aliquo delectatus, non reddat gratiam laudando, quod gustat? Hæc Aug.

Laudemus igitur Dominum primò, quia ut gustaremus quam suavis sit, misit nobis Panem de Cælo dulciorem super mel, & favum.

Laudemus secundo, quia nos pares fecit Angelis, illorum nos faciens Mensæ participes.

Laudemus tertio, quia licet Angeli Pane divino pascantur, sicuti est: nos vero pascamur sub speciebus Eucharisticis: illotamen pascimur, qui pascit Angelos, ut dum pascimur sub aliena specie, ad illum tandem

dem gustandum sicuti est, veniamus.

6 Sed quinam alij præter indicatos, sunt effectus, & fructus Panis, qui nobis de Cælo descendit?

Fructus primus est, quem adumbravit panis subcinericius Eliæ ad umbram juniperi dormienti exhibitus. Sicut enim Propheta fugiens à facie Iezabelis ambulavit in fortitudine cibi illius quadraginta diebus, & noctibus usque ad montem Dei Horeb: ut habetur 3. Regum 19. 8. ita Fidelis quilibet fugiens à facie Reginæ habentis poculum aureum in manu sua, & sedentis super Bestiam coccineam plenam nominibus blasphemiarum, ut habetur Apocalypf. 17. ambulat in fortitudine Cibi Eucharistici, omnibus diebus vitæ suæ, usque ad montem Domus Domini in vertice montium. Isaia 2. 2.

Fructus secundus præsignificatus est prædico, quod Angelo præcipiente detulit Habacuc Danieli in medio Leonum sedenti, ut describitur Danielis 14. 34. Sicut enim Daniel inter Leones jejunos, metu vacuus cibum sumpsit: ita nunc postquam Panis vivus de Cælo descendit, non unus Daniel, sed innumeri cælesti Cibo recreantur securi, inter Leones invisibiles, qui continuo circumeunt quærentes, quem devorent.

Fructus tertius. Illis verbis exprimitur: Manducaverunt Patres vestri manna, & mortui sunt. Qui manducat hunc Panem, vivet in æternum. Io: 6. 59.

Fructus quartus alijs omissis, est conver-

sio manducantis in Panem, qui manducatur, juxta verba, quibus olim Dominus Augustinum allocutus est dicens: Cibus sum grandium. Cresce manducabis me, nec tu me mutabis in te, sed tu mutaberis in me.

Perpende singula, Anima mea. Sede solitaria, & tace, & leva te super te, ut admiratione defixa, scruteris, quid sibi velint illa: Nec tu me mutabis in te, sed Tu mutaberis in Me.

Numquid per istam mutationem manducantis in Panem, qui manducatur, alluditur ad summam similitudinem, quæ inter Convivam Christi, & Christum intercedit? Ergo manducans Corpus Domini, debet similis esse Domino secundum corpus immaculatum, planèq; rationi subiectum, secundum visum, secundum auditum, secundum sensus omnes. Ergo debet referre Dominum secundum animam, secundum intellectum, & voluntatem. Sed numquid, iniquies debet etiam referre Divinitatem Verbi? Si Panis noster est non solum Corpus, sed Anima, non solum Anima, sed Verbi Divinitas, quid est dicendum? Dominus dicit: Nec tu me mutabis in te, sed tu mutaberis in me. Quicquid habet rationem Panis in Convivio ineffabili non convertitur in nos, sed convertit nos in se ipsum. Cuinam magis convenit esse Panem, quam Verbo? Ergo etiam Verbo Patris, si dignè ad mensam accedimus, similes esse debemus. Magna planè, & fidem omnem superantia sunt ista, sed vera sunt.

Re-

Revertere iterum ad te Anima mea, & vide primò, quid in grati animi testificationem immensæ Beneficentiæ possis offerre.

Vide secundò. Quantum distes à Domino secundum omnia, quæ insunt tibi, & quæ Illi. Video te ad comparationem istam illicò exanimari. Alta confusione confundere, sed noli spem omnem abijcere. Tibi propitius erit, qui dixit: Estote perfecti, sicut Pater vester Coelestis perfectus est.

Vide tertio, ut quoniam crescente clara cognitione crescit similitudo videntis cum Deo clarè viso: crescat in te manducante per Fidem Panem vivum cognitio per speculum, & in ænigmatè. Crescente siquidem lumine Fidei, & Sapientiæ, perfectiori similitudine mutaberis in dicentem: nec tu mutabis in te, sed tu mutaberis in Me.

MEDITATIO V.

*De Christo Domino Spinis
redimto.*

Dictum est Adamo Genes. 3.
17. Maledicta terra in opere
tuo: in laboribus comedes
ex ea cunctis diebus vitæ
tuæ. Spinæ, & tribulos germinabit tibi.

Adamo de terra terreno, terra spinas, & tribulos germinavit, sed quibus atrocius pungeretur Adamus de Cælo Cælestis. Sensit miseriarum suarum, peccatorum suorum aculeos terrenus Adam; senserunt, & sentiunt omnes Adæ Filii: Sed nemo diris cuspidibus sauciatus est acerbius, quam Adam innocentissimus. Unus enim omnium dolores expertus est: Unus omnia omnium mala sustinuit: Unus amarius fleuit miscens oculorum lacrymas sanguini spinoso è capite defluenti.

Vide Anima mea quos flores, quos fructus terra nostra protulerit Conditori suo? Spinas pro floribus, tribulos pro fructibus germinavit. Sed quid spinas capitis intuemur? Spinas longe horridiores consideremus, quas terra naturæ humanæ, quas terra corporis, quas terra cordis nostri pepererit Domino suo. Plantaverat vineam, & expectaverat ut faceret vuas, fecit autem spinas: spinas nimirum non solum caput augustum, sed cor amantissimum cruentaturas.

Quis non irascatur terræ spinarum pro vuis germinatrici? Quis terram ejusmodi non omni maledictione dignam existimet? Quis non miretur charitatem, quis non doceat vicem illius, qui ut maledictæ benediceret terræ, spinas, quas illa peperit, gestavit in capite, gestavit in corde, nec gestare destitit, donec de maledicta fieret benedicta.

Ergo terra cordis humani, terra ingratis.

cissima, irascere duritiæ tuæ, torque dolorum aculeis compungere, quot spinarum cuspidibus caput, & cor Domini sauciaſti,

Ergo humiliare sub potenti manu Dei, teque sæpius dignam omni maledictione pronuncia.

Ergo considera, quid te pati deceat pro illo, qui tanta pertulit pro te: & quibus laudibus illi benedicere debeas, qui caput, & cor suum tuis spinis exhibuit vulnerandum, ut de te maledicta faceret benedictam: & de vinea spinas proferente, verteres in vineam vuis hinc inde pendentibus, ad coloni votum onerandam, dulci-que multo redundantia torcularia inebriaturam.

2 D. Bernardus Serm. 71. in Cantic. Est lilium Sponsus, sed non inter spinas; quoniam non habet spinas, qui peccatum non fecit. Sponsam protestatus est lilium inter spinas, quoniam si dixerit, vel ipsa, quia spinas non habeat, se ipsam seducit, & veritas in ea non est. Se verò florem quidem, & lilium professus est, non tamen inter spinas. Ego inquit, flos campi, & lilium convallium; & non est spinarum mentio, quod solus sit hominum, qui opus non habeat dicere: Conversus sum in ærumna mea dum configitur spina. Ità D. Bernardus.

Sed quomodò, Bone IESU, Tu flos campi, Tu lilium convallium, sed non inter spinas, qui tam horrido spinarum diademate redimiris? Non habet spinas, qui

peccatum non fecit, si Doctōri sanctissimo de te loquenti credimus. Cūr ergo spinea corona circumdaris, qui solus Hominum dicere non potes: *Conversus sum in erumna mea, dum configitur spina?*

Nimirum sicut Dominus noster Pater tuus, posuit in te iniquitates omnium nostrum, itā posuit in Te spinas nostras, posuit in te peccatorum nostrorum, dolorum nostrorum aculeos. Te spinis nostris circumdedit, ut non Te, sed Animas nostras lotas in sanguine tuo, tamquam lilia inter spinas circumdaret sepe spinarum, & ab illis arceret, siue belluarum, siue hominum incursiones.

Immortales agimus gratias, primò quia non opus habens dicere sicuti David, & Peccator quilibet: *Conversus sum in ærumnis meis ad gravitatem peccatorum meorum considerandam, penitusque perspiciendam, dum conscientia spina configitur atrociter vulnerantis: voluisti tamen spinis, non solum sub sensum cadentibus, sed etiam non cadentibus vulnerari, ut nō Tu, sed nos aliquando tandem converteremur ad multitudinem, & magnitudinem delictorum nostrorum perpendendam, dum cordibus nostris acutissima spina configitur, quia neque de nostris delictis, neque dolemus de doloribus tuis.*

Agimus secundò; Quoniam solitus pasci inter lilia, pascere jam inter spinas, & saturatus opprobriis, vis etiam amore nostri cruciatibus satiari.

Agi-

Agimus tertio, gratias immortales, & amoris tuo, & candori. Candori, quia de candore tuo candidos facis etiam illos, quorum facies denigrata est super carbones. Amori, quia quos de candore innocentiae tuae lilia facis, spinis tuis obarmas adversus omne injuriarum genus, & simul edoces, quam securè inter spinas Amoris Crucifixi vident lilia innocentiae.

3 Lucæ 8. 5. Exiit qui seminat seminare semen suum, & dum seminat aliud cecidit secus viam, & conculcatum est, & volucres Cæli comederunt illud, & aliud cecidit supra petram, & natum aruit, quia non habebat humorem, & aliud cecidit inter spinas, & simul exortæ spinæ suffocaverunt illud.

Semen hoc, ipso Verbo interprete, est verbum Dei. Sed numquid est verbum Dei Prophetarum, & Apostolorum ore prolatum: An est ipsum Verbum, quod ore Dei profertur à diebus æternitatis? Non solum primo, sed etiam secundo modo appositè potest intelligi, postquam Verbum Caro factum est.

Si hoc posteriori modo intelligatur non aliud cecidit secus viam, non aliud supra petram, non aliud inter spinas: sed ipsissimum Verbum Caro factum cecidit secus viam, nostræ mortalitatis: non tamen licet fuerit ab hominibus conculcatum, volucres Cæli, hoc est nefarii spiritus comederunt illud: imò dum ab hominibus conculcaretur, ipsos nefarios spiritus, & æ-

res potestates disiecit, contrivit, ad nihilum redegit. Ipsum cecidit suprà petrâ, quæ dicitur Mons Calvariæ, ibique moriens natum est; neque natum illicò aruit, quia non haberet humorem; sed in petra, sed in terra lapidosa altius egit radices, abundantem undique humorem sufficientibus oculis in lacrymas resolutis, vulneribus cruore scatentibus, & latere, aquâ, & sanguinem emittente.

Denique idem cecidit inter spinas illius Caput ambientes; sed exortæ spinæ non suffocaverunt illud. Imò inter spinas, Ille, qui dicitur Frumentum Electorum gratus vernavit, quia quo tempore dicebatur: Non est ei species, neque decor, eò formosior apparuit. Inter spinas crevit, quia spinarum suarum amatores fortius ad se traxit. Verbum inter spinas non amisit dicendi leporem, sed florentiori quodam genere dicendi Auditores ad se pellexit; Auditorum sibi animos devinxit, ab Auditoribus, quicquid voluit, extorsit.

Numquid Anima mea tibi soli displicebit incultus, implexisque spinis hirsutus Orator? Absit, quærant alij florentem, stylum, quærant amœnitatem orationis, Tibi præ floribus omnibus cordi sint hæ spinæ. E Verbo Dei disce inter spinas erumnarum facundius loqui, quam inter flores etiam celestium consolationum.

Gaude inter spinas quidem Verbum Dei cecidisse, sed minime suffocatum; sed nihil inde reportasse detrimenti, immò ulte-

rio-

riorem fructum attulisse ; ac disce curarum aculeis premi, sed non opprimi, oppugnari, sed non vinci, vulnerari, sed non succumbere vulneranti.

4 Geneseos 22, 13. Levavit Abraham oculos suos, viditque post tergum arietem inter vepres hærentem cornibus, quæ assumens obtulit holocaustum pro Filio.

Quis erat ille Aries, quo immolato impletum est significativo sanguine sacrificium ? Quis illo, (nempè Ariete) figurabatur, nisi JESUS Christus; antequam immolaretur, spinis judaicis coronatus ? Ità interrogationi suæ respondet D. Aug. de Civitate Dei lib. 16. cap. 32.

Sed quomodo Aries implexis cornibus senticeto inhærens, ne fugeret, & ne se immactandum aræ subduceret, similitudinem gessit illius, qui tam libenter Animam suam posuit pro ovibus suis, & cui cibis unicus semper fuit, ut faceret voluntatem Patris sui ?

Verum aliud est quod Christus Dominus libentissimè se se morti obtulerit : aliud est, quod se nulla necessitate compulsus obtulerit. Si Divinæ Justitiæ satis faciendum erat, si mandatum Patris implendum, si modo perfectissimo, reparandus mundus, delendumque peccatum, erat omnino necessarium ità mori, & quoniam à peccatis potissimum per spinas representatis oriebatur ista necessitas, idè aries hærens inter vepres in hostiam eligitur figurativam Hostiæ, non coactæ quidem, sed

necessariæ : & quidem ineluctabili necessitate immolandæ propter peccatum.

Ergo Domine IESU, quoties intueor Caput tuum vepribus implexum, video spinas meorum peccatorum, te prementium, & adigentium ad mortem voluntariam utique, sed necessariam? Verùm cur necessariam? Plectantur qui peccaverunt, non qui peccatum non fecit. Qui spinas protulerunt, spinis propriis implicentur, & immortalis morte damnati, gerant capita illis implexa vepribus, quos inserta perennia sibi contexuerunt. Videant semper peccata sua, sentiant aculeos peccatorum suorum, feriantur, cruententur peccatis suis, doleantque sine fructu inter æterna supplicia, se peccatores fuisse, & esse, & futuros esse, quamdiù erit æternitas. Qui tam perditè adversum se usi sunt libertate sibi concessa, isti necessitati subdantur. Quid ergò necesse est, arietem inter vepres hærentem, hoc est Dominum nostrum JESUM Christum spinis Judaicis coronatum interire? Unde est ista necessitas? Si non est à peccatis totius mundi, & meis, unde? Non aliundè procul dubio, quam ab amore Patris tui, & amore tuo.

O necessitatem! O Amorem! Et mihi liberum erit amare, & non amare hunc Amorem! Videnti Te, sicuti es liber amor non est, sed necessarius. Utinam etiam esset necessarius te cernenti non in splendoribus Sanctorum, non coronatum gloria, sed spinis in crudele diadema compactis.

Si

Si beata necessitate, quæ ad meliora compelleret frui non possumus, saltem amor noster, erga nostrum caput spineo coronamento circumdatum, fiat ita vehemens, fortis, in duris constans, & ad omnia pericula imperterritus, ut sit quodamodò necessarius.

¶ Sed si, Augustino interprete, Aries herens cornibus inter vepres, est Christus Dominus spinis Judaicis coronatus, quis est Isaac, cui parcitur, & cujus loco Aries immolatur? Numquid idem sunt Isaac, & Aries? Sed Isaac quidem Filius Dei est in forma Dei, Aries verò in forma Servi? Ideo verò Isaaco mactando sufficitur Aries, quia sicuti Isaac mori non debebat, ita Filius Deus de Deo, mori non poterat: & sicut Aries occisus est, ita Filius Dei in forma servi aræ Crucis impositus immolatus est?

Quomodocumque ista se habeant, citrà ullam dubitationem est, Filium Dei in Homine assumpto ligna holocausti suis imposita humeris ad montis fastigium detulisse, & manibus non vinctis, sed crudeli ferro trajectis, Altari superextensum, & in Hostiam super omnes hostias vivam, sanctam placentem, fuisse in odorem suavitatis oblatam. Ergo qui pati non poterat, mori non poterat in se ipso, passus est, mortuus est in assumpta natura, passurus etiam, & moriturus in se ipso, ut nos viveremus, si potuisset. Ergo antequam moreretur, vepribus etiam, quibus inha-

ferat Aries , implexus est , cruciatus est ,
acerbissimè sauciatus est .

Quid retribuam Domino meo prò omnibus, quæ retribuit mihi . Si Caput tuum, Bone JESU , Deus est, numquid caput hoc spinis meis , peccatis meis circumdedi , & vulnerum incapax , & doloris , quantum est ex me, pupugi punitionibus acutissimis, dirissimis , amarissimis ? Sapientia enim tua æterna vidisti me semper , & ego semper contristavi Te , & iniquitates meæ, veluti circa tempora Capitis Augustissimi, oberraverunt, & radiis inaccessæ lucis, quibus coronaris, spinas suas inserverunt , & si potuissent, atrociter pupugissent, uulnerassent , & dolore fontem beatitudinis affecissent .

Quasnam miser , & miserabilis , & pauper , & cæcus , & nudus , à cecitate, à vesania mea expetam pœnas ? Capiti meo omnibus digno fulminibus, circumponam coronam è spinis peccatorum meorū contextam , & ut spinæ validius infigantur, addam spinis beneficia tua perpetuò antè oculos posita, meisque continuò componenda peccatis . Cogitationum ejusmodi corona circumdatus , Recogitabo tibi omnes annos vitæ meæ , & erunt mihi lacrymæ meæ panes die, ac nocte, donec de inimico Crucis amator Crucis effectus illam mihi vindicem, illam vertici meo coronam imponam , quæ unicè delectantur amatores regis dolorum ; & nemo accipias coronam meam.

6 Joannis 19. 2. Milites plectentes coronam de spinis imposuerunt Capiti ejus, & veste purpurea circumdederunt eum. Et veniebant ad eum, & dicebant. Ave Rex Iudeorum, & dabant ei alapas.

Vestimentum regis dolorum purpureum est. Spinæ rubent sanguine. Facies alapis cæsa rubet pudore. Videat omnis Anima, quam verè sit Rex suus candidus, & rubicundus. Candidus, quia peccatum non fecit, & non est inventus dolus in ore ejus. Rubicundus, quia summè innocens, & summè sapiens, inter sceleratos, & fatuos reputatur. Rursum rubicundus charitatis ardore, sui que baptismo sanguinis, quo semper ardentissimè baptizari desideravit. Videat omnis Anima, & erubescat, si nondum ardere didicit de tali charitatis ardore. Erubescat, si nondum sibi ruborem injectum sensit de suis delictis, pro quibus tanta verecundia, & confusione repleti voluit, non solum coram Homini-bus omni probro affectus, sed coram Patre suo Personam sustinens omnium peccatorum.

Prima ad Corinth. 1. 22. Quod stultum est Dei sapientius est hominibus; & quod infirmum est Dei fortius est hominibus.

Non recusavit Omnipotens arundineū præferre sceptrum in argumentum Regni fragilis, & inanis: Et sapiens infinitè, non rejecit à se purpuram illusoriam, non coronam, tamquam indices fatuitatis, atque stultitiæ. Sed sapientior est ista fatuitas,

tas, omni hominum sapientia; & omni fortitudine hostium visibilium, & invisibilium, fortior est nostri Ducis infirmitas.

Ergo primò quidem rejecta sapientia mundi, rejecta prudentia carnis, quæ inimica Deo est, & quam reprobavit Deus, adhærebo stultitiæ, per quam stulta facta est sapientia mundi: & per quam prudentum prudentia reprobata est. Ero prudentior, ero sapientior, si premens vestigia Regis, quem fatuum mundus habuit, ac declaravit, ego quoque inter fatuos numerabor.

Rursum sicuti insipientiæ ludibrio habiti; ita infirmitati Regis nostri, pedibus conculcantium attriti, volo unicè inhærere. Nam quod infirmum est Dei, fortius est hominibus. Nihil arundine fragilius, nihil inconstantius. Sed si quis innitatur arundini, quam præ manibus habet Omnipotens, erit fortior omnibus hominibus, ipsisque inferi Patris; & pati gaudens cum Christo, & invadentibus non resistens, & percutientibus unam genarum, alteram exhibens, omnia poterit in illo, qui nos confortat infirmitate sua.

Altè in cor meum, Domine IESU, ista verba descendant: Quod stultum est Dei, sapientius est hominibus. Et quod infirmum est Dei, fortius est hominibus, animoque meo persuadeant. suavione fortissima, me nunquam sapientio rem fore, quam, cum juxta doctrinam Apostoli, ero insipiens;

piens ; & nunquam fortiozem , quam cum
ero maximè infirmus .

MEDITATIO VI.

*De Pedibus Domini uulneratis
in Sepulchro jacentis .*

SI lustraremus loca, vel ubi Domi-
nus stetit verba factururus ad tur-
bas, quæ Lucæ 6. 17. confluxe-
rant ab omni Iudæa, & Ierusa-
lem, & maritima, & Tyri, & Sidonis, ut
audirent eum : Vel ubi stetit : Matthæi 20.
30. ad duos cæcos illuminandos, dum cla-
marent ; Domine, miserere nostri Fili Da-
vid : vel ubi lacrymans stetit ad sepulchrū
Lazari. Io: 11. 41. Amicum suscitaturus
à mortuis : si hæc, inquam, & similia lo-
ca lustraremus, possemus dicere : Procu-
bamus, & adoremus. Nam adorabimus
in loco, sive adorabimus locum, ubi stete-
runt pedes ejus. Psalm. 131. 7.

At sepulchrum introeuntes, & ad pedes
Domini procidentes, numquid adorabi-
mus locum ubi steterunt ? an ubi jacue-
runt, & jacent, & miserandum in modum
confossi jacent pedes ejus ? Ità planè est.
Sed numquid locum hunc non adorabi-
mus ? Imò non minori adoremus reveren-
tia ubi jacent, quam ubi steterunt. Non
enim alii sunt, sed iidem, & eadem nobis
cha-

charitate, & studio benefaciendi jacentes, qua multiplici stantes in loco reveriti sumus.

Accedit, quod utilissimè nobis jacent. Jacent enim ut nos erigant. Jacent, ut firmo gradu stare in veritate nos doceant. Jacent, ut qui stat, videat, nè cadat. Jacent immoti, ut socordes hortentur ad cursum, de quo Apostolus: Sic currite, ut comprehendatis.

Ergò illis jacentibus, erigamur. Ab infimis erigamur ad summa. A bonis perituris ad æterna. A nobis omni bono carentibus, ad bonum, quod est omnia bona. Ergo tantum roboris à pedibus Domini jacentibus mutuemur, ut semel erecti semper stemus in veritate, adversus mundum, adversus mundi rectores tenebrarum harum, adversus mundi fallacias, & omne mendacium.

Ergo ab immotis excitemur ad cursum nunquam intermittendum, nisi postquam metam attigerimus, & bravium. Neque cadamus animo, audientes, multos quidem currere; sed unum tantum accipere bravium. Non solum enim hic unus Christus est; sed ad felicissimam unitatem hanc pertinet, quisquis vita, moribus, charitate cum Christo unus est.

Si quis malè sibi conscius ad pedes benignissimos, vereatur accedere, pro certo sciat, se à vero, quàm longissimè aberrare. Sunt enim pedes Principis Pastorù, nullum à se repellentes peccatorem. Non

solum Magdalenam, quæ multum dilexit. Admittunt etiam qui parum dolent, quia parum amant. Admittunt etiam, qui timore penarum accedunt, & admittunt, ut de timentibus faciant amantes, & de lugentibus timore supplicii, faciant lugentes horrore peccati.

Sed rogabis: Numquid hi pedes sinent se illis manibus contrectari, quæ tam acerbæ vulnera intulerunt? Numquid ab iis, qui soliti fuerunt acuire linguas, sicut serpentis, & habere labia aspidum veneno scatentia. Psalm. 139. 2. oscula patientur? Et qui siccis oculis viderunt Solem, in Domini morte lugentem, lugere ad hos pedes audebunt, imò pedum vulneribus non verebuntur infundere lacrymas? nec audaciæ redarguentur? Nec procul facessere jubebuntur?

Qui repulsam ejusmodi timet præ suorum magnitudine delictorum, latitudinem immensi amoris ignorat. Ille solum hoc sepulchro indignus est, horumque pedum obsequio, qui pauculas denegat guttas pedibus non solius Magdalene lacrymas fictientibus, sed omnium peccatorum.

Ergo mittamus timorem Peccatores omnes. Multiplicatæ fuerint iniquitates nostræ super capillos capitis nostri, & sicut onus grave, gravatæ sint super nos. Magna sit indignitas nostra. Magnoque intervallo distet luctus noster à lacrymis Magdalene; non propterea omni spe destituamur. Sed post Sanctissimam Poenitentem, & post

& post innumeras Animas, illius, quæ multum flevit, multumque dilexit imitatrices, accedamus, & nos, plenoque fiducia corde, gemamus, atque clamemus: Non dimittemus Domine pedes tuos, nisi benedixeris nobis.

3 Ad augendam fiduciam veniæ, ad pedes Domini jacentis in tumulo impetrandæ, recolant Pœnitentes, quam pulchri sint super montes pedes Apostolorum annunciantium, & prædicantium pacem, teste Isaia 52. 7. annunciantium bonum, annunciantium salutem, & dicentium Sion: Regnabit Deus tuus. Si enim ita pulchri sunt pedes discipulorum, quam erunt speciosi pedes Magistri antè mortem super montes: post mortem verò intrà viscera montis in tumulum excavati: quæ erunt, inquam speciosi pedes de tumulo annunciantis, & prædicantis pacem inquirentibus eam: annunciantis bonum, quod est super omne bonum; & prædicantis annum placabilem Domino, & captivis indulgentiam, & clausis apertionem, & dicentis Sion: Non vocaberis ultrà derelicta, & terra tua non vocabitur amplius desolata. Isaia 62. 4.

Hæc missus à Patre annunciavit nobis, vivens, & lustrans Regiones, & Castella, Iudeq. Hæc predicavit moriens; hæc mortuus predicare non desinit in sepulchro, & sicuti exaltatus à terra, ita in sinum terre demissus, trahit omnia ad se ipsum. Dum viveret, & exultaret, ut gigas ad currendam

dam viam, sequebatur fugientes. Vita-
verò functus fugientes traxit ad se: quia
sicuti sequenti nullum adhuc supererat iter
suscipiendum, ad finem cursus; & operis
instituti: ità profugis, nihil aliud supere-
rat, nisi ut fugerent à Deo irato ad Deum
placatum, & nihil magis timerent, quam
divelli à pedibus, à quibus tota contentio-
ne recesserant.

Dicamus ergo, quam pulchri pedes,
quos non viæ longitudo, non labor, non
asperitas retardavit à cursu, ut nolentibus
sibi prodesse, prodesse.

Quam pulchri pedes Evangelizantis pa-
cem non cognoscentibus viam pacis, quam
pulchri pedes invitantis ad pacem inimi-
cos suos; annunciantis bonū indignis om-
ni bono: prædicantis indulgentiam, & sa-
lutem captivis, atque dicentis: Ego dis-
pono vobis Regnum, sicut disposuit mihi
Pater, ut edatis, & bibatis super mensam
meam in Regno meo.

Lividi pedes sunt, exanimes, exangues,
læthali gelu rigentes sunt, speciosi tamen
sunt, eoque speciosiores, quo abundantius
illa gratia, quæ diffusa est in labiis specio-
si forma præ filiis hominum, diffusa est
etiam in vulneribus pedum, idem per vul-
nera sua loquentium, annunciantium, præ-
dicantium, quod loquuntur labia annun-
ciantis pacem, evangelizantis bonum,
prædicantis liberationem captivis, indul-
gentiam reis, vitamque æternam morte
damnatis.

Quis

Quis ergo formidet ad istos pedes pro-
cidere, & quam per benignissima vulnera
pacem annunciant; & bonum, & libera-
tionem, & indulgentiam, & vitam, quam
predicant implorare?

4 Lucę 7. 40. Respondens IESUS dixit
ad illum. Vides hanc mulierem? Intravi
in domum tuam, aquam pedibus meis non
dedisti. Hęc autem lacrymis rigavit pe-
des meos, & capillis suis terxit. Osculum
mihi non dedisti. Hęc autem ex quo in-
travit non cessavit osculari pedes meos.
Oleo caput meum non unxisti. Hęc autem
unguento unxit pedes meos. Propter quod
dico tibi: Remittuntur ei peccata multa,
quoniam dilexit multum.

Si vivens Dominus ita delectabatur ob-
sequio pedibus suis exhibito, in domo
Pharisęi: quanto magis mortuus idem pro-
babit obsequium exhibitum in sepulchro?
Intremus igitur tumulum, & si Pharisęus
non dedit aquam pedibus Domini, demus
nos: demus aquam oculorum nostrorum.
Demus aquam Poenitentię salutaris. Pro
capillis sanctissimę Poenitentis, utamur
cogitationibus mentis nostrę ad tergen-
dos pedes lacrymarum imbre perfusos.
Acquę grati sunt Domino, sive decidui
oculorum nimbi, sive sanctarum capilli
cogitationum, quibus memori animo ver-
samus viam tanta cum exultatione susce-
ptam, tantoque pro nobis labore confe-
ctam. Non cessemus Beatę Poenitentis ex-
emplo osculari pedes, per quos osculum

pacis inquirimus, & acquirimus.

Osculis accedant unguenta virtutum, & præcipuè virtutum incipientibus congruentium. Tria unguentorum genera Diuus Bernardus enumerat. Serm. 10. in Cantica. Devotionis unguentum, quod ex recordatione beneficiorum conficitur, convenit capiti, juxta sententiam citati Doctoris. Pietatis unguentum ex consideratione miseriæ sublevandæ conflatum, per universum Christi corpus diffunditur, non dico illud Crucifixum, sed quod illius Passione est acquisitum, mysticum videlicet corpus Ecclesiæ.

Unguentum verò contritionis convenit pedibus, quia ex recordatione Peccatorum Animæ peccatricis manibus distillatur, extremisque corporis membris infunditur. Neque tamen usque adeò contemptibile, aut vile est, quin totam domum odore compleat suavissimo. Si enim attendamus, quanta in unius Peccatoris conversione fragrantia respergatur Ecclesiæ, & quantis fiat odor vitæ ad vitam indubitanter pronuntiabimus, quia domus impleta est ex odore unguenti. Ipsas Beatorum mansiones attingit Pœnitentiæ odor, ita ut teste ipsa veritate, magnum gaudium sit inter Angelos Dei super uno Peccatore pœnitentiam agente.

Concludit Sanctus Doctor. Gaudete Pœnitentes, pusillanimes confortamini. Securæ manus vestræ distillent myrrhæ amaritudinem in salubrem hanc unctionem,

nem, quia cor contritum, & humiliatum Deus non despiciet. Non est omninò spernenda, nec vilis æstimanda hujusmodi unctio, cujus odor non solum homines provocat ad correctionem, sed & Angelos ad exultationem invitat.

5 Ad uberiores Penitentiae fructum. è vulneratis Domini pedibus decerpendum, consideremus monita, quæ Diuus Bernardus tradit Sermone 3. in Cantica, de osculo pedis, manus, & oris Domini.

Monitum primum ad Animam peccatricem. Anima onerata peccatis, suæque adhuc carnis obnoxia passionibus, non temerè assurgat ad os serenissimi Sponsi, sed ad pedes severissimi Domini mecum pavida jaceat, & cum Publicano terram tremens, non Cælum aspiciat.

Monitum secundum. Non tibi, ò quæcumque es talis Anima, non tibi ille locus vilis, aut despicabilis videatur, ubi Sancta Peccatrix peccata deposuit, induit sanctitatem. Ibi Æthiopissa mutavit pellem, & in novum restituta candorem, jam tunc fiducialiter, veraciterque respondebat exprobrantibus sibi verbum: Nigra, sed formosa Filiae Hierusalem. Miraris, quam id arte potuerit, vel quibus obtinuerit meritis. Paucis accipe. Flevit amarè, & de intimis visceribus longa suspiria trahens, salutaribus intrà se succussa singultibus, felleos humores evomuit. Cælestis Medicus celerrimè subvenit, quia velociter currit sermo ejus.

Mo-

Monitum tertium. Hujus ergo Beatæ Poenitentis exemplo prosternere, & tu, ò misera, ut desinas esse misera; prosternere, & tu in terram, amplectere pedes, placare osculis, riga lacrymis, quibus tamen non illum laves, sed te, & fias una de grege conſarum, quæ ascendunt de lavacro; ità sanè, ut suffusum pudore, & merore vultum, non antè sustollere audeas, quam audias, & ipsa: dimittuntur tibi peccata tua: quam audias: *Consurge, consurge* captiva Filia Sion; *consurge*, excutere de pulvere.

Præfatis monitis accedat ejusdem Abbatis Sancti doctrina Serm. 54. inter parvos de labiis Animæ divinos pedes osculantis. Labia hujusmodi sunt: Ratio, & voluntas. Rationis est, inquit ille, percipere sapientiam, voluntatis virtutem. Si sola ratio percipiat sapientiæ cognitionem, & voluntas non habet virtutis amorem, non est plenum osculum. Aut si sola voluntas obtineat amorem, & ratio minimè percipiat cognitionem, nihilominus est semiplenum. Tunc verò plenum, & perfectum est, quando, & sapientia illustrat rationem, & virtus afficit voluntatem.

6 Ultima consideratio desumi potest ex Cantic. 5. 16. ubi dicitur. Crura illius Columnæ marmoreæ, quæ fundatæ sunt super bases aureas.

Basibus aureis pedes Domini comparantur, quia sicuti Sponsi caput aurum optimum, & manus ejus tornatiles aureæ ple-

næ hyacintis ; ita pedes aurei sunt :

Aurei autem sunt primò , quia nisi fuissent ex auro probatissimæ Charitatis , fulcire non potuissent , crura , tamquam columnas marmoreas , quibus immensi labores debebant incumbere , totusque mundus peccatorum omnium pondere prægravatus . Sola Charitas Christi tanto robore pollere poterat , ut sub tanta mole minimè aut fatisceret , aut curvaretur .

Aurei sunt secundò quia quacumque incessetunt , aurea ubique virtutum impreslere vestigia . Non solum enim charitas , sed omnis Christi virtus est aurum : quia virtus omnis in Christo , omnia propter Patrem cogitante , dicente , operante , patiente , erat eternissima charitas .

Aurei sunt tertio , quia Danielis 1. 32. Statuæ Regi Chaldæo per somnium ostensæ , caput ex auro optimo erat , pedum verò quædam pars erat ferrea , quædam autem fictilis . At pedes Christi Domini , neque partim ferrei , neque partim fictiles sunt . Sed sicut caput ejus aurum optimū , ita pedes ejus erant aurum probatissimum . Fuerunt quidem crudeli ferro trajecti , ut adhuc patentia vulnera testificantur ; Sed erga ferreum animum traicientium nulla indignatione commoti , cursum viæ laboriosissimæ confecerunt ; ut vel inimici , & crucifixores sui de ferreis secundum mores in aureos verterentur . Non fictiles , non imbecilles , sed robustissimi , omnisque defatigationis expertes , ita curruerunt ,

ut

ut comprehenderint. Comprehenderunt nimirum opus fictile manuum suarum, illudque in pristinum, imò in melius, reformarunt, feceruntque, ut omnes, si velle-
mus, tutò servare possemus thesaurum, quem in vasis fictilibus habemus. Quid ad hæc admiratione suspensi heremus? Nimirum sicut in capite humanitatis assumptæ, ita in pedibus tota Divinitas est. Tota Sapientia Patris in capite: Tota Fortitudo Verbi Omnipotentis in pedibus est. Ideò caput, ideò pedes aurum optimum.

Denuò igitur antè Dominum procidamus, & adoremus in loco, ubi jacent pedes ejus, & primò quidem petamus charitatem de plenitudine Charitatis, qua pedes pretiosissimi portaverunt mundi totius infirmitatem, & nostram; discamusque alter alterius onera portare ad Galat. 6. 2.

Petamus secundò, ut gradientes per vestigia, quæ nobis ubique pretiosis pedibus reliquit impressa Dominus, sicut ille ambulavit, & ipsi ambulemus.

Petamus tertio. Ne primis extrema dis-
sentiant, neque capiti aureo pedes partim ferreos, partim fictiles subiiciamus. Adsit bonè ceptis Sapientia Patris: nosque ad exitum vitæ felicem perducatur fortitudo Verbi Omnipotentis.



MEDITATIO VII.

De Spiritus Sancti Adventu.

I **C**Um complerentur dies Pentecostes erant omnes pariter in eodem loco. Actuum 2. 1.
 Secessio ab omnibus humanis tumultibus, & curis, fuit dispositio prima, qua se Discipuli Domini, Divino excipiendo Hospiti compararunt. Seccessionem hanc Deo gratiorem reddidit Obedientia. Nam juxta mandatum illud: Sedete in Civitate, donec induamini virtute ex alto; quieti sedebant expectantes promissionem Patris.

Dispositio secunda, fuit concordia. Erant enim omnes pariter in eodem loco, non solum visibili, sed invisibili. Erant enim omnes in eo, non quomodo Peccatores, sed quomodo Iusti, in quo vivimus, movemur, & sumus. Nulla concordia in loco firmiori constantior. Nulla quies in loco securiori felicior.

Dispositio tertia fuit fervens unanimis, & perseverans oratio. Omnes enim erant unanimiter perseverantes in oratione, cum mulieribus, & MARIA, Matre IESU. Actuum 1. 14.

Vide Anima mea, quam tibi cordi sit sevocatio à rebus fluxis, & inanibus, ab inutilium cogitationum turbis, variisque tumultibus.

multibus cupiditatum in diversa trahentium cortum. Sede in Civitate pacis, si vis indui virtute ex alto.

Vide qua concordia Sanctis inhæreas. Vide ubi locorum sis. Locus tuus est nè Cénaculum Ecclesiam referens? Locus tuus est nè ille, extrà quem volenti quiescere non est alius? An locus tuus est mundus, & Regio bonorum, nihil præter speciem exteriorem boni habentium, corporisque tui terra inanis & vacua? Quid misera quæris in istis locis?

Postremò vide quæ sit oratio tua. Si tepida, si frigida est, quomodò illum Ignem expectas, quem Dominus missurus in terras, ascendit in Cœlum, & voluit vehementer accendi? Si discors, atque dissentiens ab oratione Sanctorum, quid spiritum unitatis postulas, & sanctitatis? Si moræ impatiens, & repulsæ; qui fieri potest, ut non tibi pudorem iniiciant Apostoli perseverantes in petendo, unà cum Matre illius, qui sæpius repulsam passus à Patre, non tamen destitit ab orando?

2 Et factus est repente de Cœlo sonus tamquam advenientis spiritus vehementis.

Non sine ingenti sonitu venit, cujus virtute in omnem terram exiturus erat sonus Apostolorum legem novam promulgantium, legem Amoris, non timoris, legem, non descriptam in lapideis tabulis, sed felicius, & profundius in Amantium cordibus incidendam.

Ingenti cum sonitu venit, ut à somno excitet dormientes, ut rebellibus timorem incutiat, ut à male ceptis desistere nolentibus bellum indicat; & sibi militaturis pugnae signum edicat, adversus Principem tenebrarum, adversus mundum, adversus cupiditates noxias, & scelera universa

Ad sonitum hunc expergiscere Anima mea. Vox magna, magni Dei est. Non est qui non audiat vocem hanc, vocem sermonum grandium. Idèò quicumque non timet, quicumque non amat, inexcusabilis est. Vox enim Divini Spiritus, omnes concutientis, commonetacientis, deterrentis à vitijs metu poenarum, invitantis ad virtutem spe præmiorum, evocantis ad Bonum incommutabile ex toto corde, ex tota Anima, ex tota fortitudine diligendum, ad omnes ingenti cum sonitu fertur, & aures interioris hominis percellit. Vè autem audientibus, & corda sua obdurantibus.

Fit autem repenti sonus de Cælo, quia Divinus Spiritus ubi vult spirat, & quando vult. Improvisus est illius adventus, qua hora non putatur, lux illius menti, motio illabitur cordi. Quare in singula momenta vigilandum est, ut quoties vox insonuerit, manus admoveantur operi, pedes expediantur ad cursum.

Fit prætereà repenti sonus de Cælo, quia Divinus Spiritus efficacissimus est, & celerissimus in agendo. Idèò D. Gregor. homil.

30. in Euang. O' qualis, inquit, est Artifex iste Spiritus! Nulla ad discendum mora; agitur in omne, quod voluerit. Mox enim, ut tetigerit mentem docet, solùmque tetigisse, docuisse est. Nam humanum subito, ut illustrat, immutat affectum: abnegat hoc repente, quod erat; exhibet repente, quod non erat. Pensamus Sanctos Prædicatores nostros quales hodierna die reperit, quales fecit. Ecce gaudet Petrus in verberibus, qui antè in verbis timebat. Et qui prius ancillæ vocem requisitus timuit, post adventum Spiritus Sancti vires Principium cæsus premit.

Adimatur mihi, Spiritus Patris Spiritusque Filij, Paraclite Ineffabilis, adimatur facultas resistendi, qui tandiù corde, & auribus incircumcisis restiti, cui nemo resistere potest. Vincat efficacia tua duritiam meam. Vincat celeritas tarditatem. Ope tua, exuam repente quod fui; & fiam repente, quod sine Te esse non possum.

3 Et replevit totam domum, ubi erant sedentes. Domus, quæ Spiritu Sancto repletur, Ecclesia est, & quælibet Anima sancta est. Cur autem, non utcumque domum replere dicitur, sed totam replere?

Dicitur primò totam replere, quia ubi ipse est, nullus alius spiritus est. Non patitur secum spiritum erroris, ac deceptionis. Sapientissimus enim est. Non spiritum arrogantiae aut contemptus. Mitissimus enim est. Non invidiæ, atque discordiæ, Benignis-

simus enim est . Non spiritum tristitiæ exsiccantis ossa. Fons enim gaudij est.

Dicitur secundò totam domum replere, quia nullam partem, quia nullum recessum domus vacuum relinquit donis suis, & se ipso . Ad internas quasque conscientie latebras descendit, & abditissima quæque detegit, & latentes animi motus, & vestigandos proponit intellectui, ut erubescamus, & voluntati, ut de levissimis quibusque noxijs propensionibus, minusque rectis intentionibus, penitentiam agamus.

Quot gratias debemus Spiritui totam domum replenti, ut illam faciat dignam sedem suæ Divinitatis? Sed ut tantæ Beneficiæ fructum referamus, quæramus primò, utrum Anima nostra sit domus super angulari Lapide Christo fundata . Si nobis inhæserimus, & mundo, similes erimus viro stulto, qui ædificavit domum suam super arenam, ut habetur Matth. 7. 26. & descendit pluvia, & venerunt flumina, & flaverunt venti, & irruerunt in domum illam, & cecidit, & facta est ruina magna: Si verò soli Deo, soli angulari Lapido inhæserimus, immunes erimus à ventis, à fluminibus, à ruina.

Quæramus secundò, utrum absint à nobis spiritus Divino Spiritui adversantes. Abest ne levitas intellectus, & studium novitatis, veritati fabulas anteponens? Abest ne spiritus arrogantiae, spiritus contentionis, spiritus tristitiæ exsiccantis ossa? Si protul aberint hi, similesque spiritus

nequam, tota domus salutari flatu replebitur.

Quæramus tertio : Utrum libenter Spiritum omnium scrutatorem, in penetralia quælibet cordis nostri, Animę nostrę admittamus, & patienter monentem audiamus, & monenti pareamus, & imperfecta perficiamus, & renovationis indiga renovemus.

4 Et apparuerunt illis dispersitę linguę tamquam ignis. Act. 2. 3.

Cur in speciem ignis e Coelo delabitur Spiritus Veritatis? An quia nihil igne actuosius? An quia nihil fecundius? An quia nihil illustrius simul, atq; calidius?

Si quia nihil actuosius, quid magis rationis consentaneum? Quid enim actuosius Spiritu Creatore, non solum vniversa condescende de nihilo, & vocante ea, quę non sunt; tamquam ea, quę sunt; sed in omnibus Peccatoribus ad nihilum redactis per peccatum, omni deterius nihilo, cor mundum creante, & spiritum rectum innovante in visceribus nostris, & mentes, quas in tenebras suas Princeps tenebrarum converterat irradiante splendoribus sanctitatis, & in lucem Solis iustitię commutante?

Si quia nihil fecundius; quid fecundius Principio, de modica tenuissimę cognitionis scintilla, immensum amoris incendium excitante, & dum ab uno ad alium conceptus propagatur ardor, totum mundum, flammis exundantibus occupante?

Si quia nihil splendidius simul, atque ca-

lidius; quæ major distantia, quam inter amorem prophanum; atque Divinum? amor prophanus, sicut ignis Gehænnæ, quanto est ardentior, tantò est lucis expectior. At Divini Spiritus Amor, quanto est ardentior, tantò est Sapientiæ luce illustrior. Et idè in omnibus hoc igne correptis ardor affectus, à luce Sapientiæ non dividitur, & lux auget ardorem, & ardor, quo Bonum diligitur, novè, semper claritatis est author, qua verum inspicitur.

Ad nihilum, Paraclite ineffabilis, meæ me peccata redegerunt. Voca me Domine ad esse, quod amisi, & renova in me tuæ prodigia Omnipotentia, cor mundum, creando in me, & faciendo, ut qui defluxi à Te, ad me, à me revertar ad Te, & vivat Anima mea de Te, & Spiritus Animæ meæ sit Spiritus tuus.

Qui de modica scintilla cognitionis, amoris incendia excitas, decidat à Te in cor meum una ex his scintillis, ut postquam per tot annos novi Te, & amavi me pro Te, discam tandem diligere Te, non me, & conceptus ignis à me diffundatur in alios; & animo, cui ad concipiendum ignem nulla fax hætenus admota suffecit, una scintilla sufficiat.

Qui denique totus Amor, & totus es oculus, cecum à me cupiditatum amorem depelle, & prò ceco, amorem tribue oculatum, ad imaginem Amoris tui, qui Spiritus es Veritatis, & cujus idcirco Ardor, & Lux, non solum æqualia sunt, sed Unum.

Se.

Sed sine me Beatissime Spiritus adhuc unum loqui, licet sim pulvis, & cinis. Quid sibi vult ignis, quò velas Majestatem tuam, arduentes dispersit in linguas? Numquid sicuti splendor, ut dictum est sapientiam refert, ita linguæ species, index est Eloquentiæ? Ardor efficacis in dicendo? Multiplicitas verò linguarum; numquid est adumbratio, exuberantiæ, & effusionis Tui extrè Te, qua Lumen tuum, Facundiam tuam, contentionem Orationis tuæ communicas Auditoribus, & Amatoribus tuis. O si præter sapientiam ad intelligendum, fierem etiam particeps facundiæ ad te laudandum, & prædicandum, vehementiæ ad me, & alios incendendum odio vitiorum, amore virtutum, amore Sanctitatis, Sanctique, Sanctorum: denique multiplicatis linguarum ad exercitationem Charitatis gaudentis cum gaudentibus, flentis cum flentibus humilibus consentientis, non alta sapientis, sapientia tamen utentis cum Sapientibus.

5 Seditque suprà singulos eorum. Act. 2.
3. Sedit suprà singulos sedere jussos in Civitate, & sedet etiam nunc suprà singulos Civitatis Dei Habitatores, non discessurus, nisi abire cogatur. Quis autem ita durus, & inhumanus, ut abire cogat gaudentem esse nobiscum, sicut ille gaudet, à quò missus est? Sicut enim ille mundum relinquens, & vadens ad Patrem, non discessit à nobis, sed mansit apud nos usque ad consummationem sæculi: Ita veniens Tu ad

nos dulcis Hospes Animarum nostrarum ;
ut doceres nos omnia , & suggereres nobis
omnia,quæcumque erat ille dicturus nobis,
non venisti, ut illicò recederes , sed ut ma-
neres apud nos,& habitares in nobis,essetq;
Tibi Anima nostra sedes ad habitandum si-
mul, & docendum.

Mane igitur , & sede, & semper sede su-
per singulos in Civitate Sancta sedentes :
& ut similiter ledeas apud me,& in me, fac
me dignum civem illius Civitatis , quam
non facit Amor sui, usque ad contemptum
Tui: sed amor Tui, usque ad contemptum
sui. Amem Te semper plusquam me . Neque
me nisi propter Te . Absit à me, ut contri-
stem Te. Satis superq; contristavi , minimè
quem contristarem, considerans. An etiam
considerans, & à contristando nihilomi-
nus non desistens? Utrumq; feci, multum-
que doleo, & quod ignorans fecerim, &
multò magis, quod sciens . Sciebam enim
Tè, & noveram me, & experimento didi-
ceram, quod non habet amaritudinem
conversatio tua, nec tēdium convictus, sed
lætitiā, & gaudium Ne autem contrista-
rem Animam meam, volui contristare Spi-
ritum omnis tristitię depulsores.

Sed numquid concidam corde, omnique
spe deturber? Manus, vocesque ad illum
tollo , qui postulat prò nobis gemitibus in-
nenarrabilibus . Tu meo cordi gemitus,mi-
tissime Consolator, Tu aquas oculis suffice,
quibus quicquid adversum Te peccavi,
elucere possim. Te juvante pēnitentia salu-

taris, de omni inconstantia mea sit constans: Vetus Homo, tollatur omnino: Vitæ novitas firma sit, & immobilis: Amor caducis omnibus moriendi, Tibique soli vivendi, sit immortalis; ut omni à me instabilitate sublata, mecum esse non cesses, qui venis, ut sed eas, & è cælo mitteris, ut supra singulos sedentes sed eas, & in omnium, Fidelium cordibus perenniter conquiescas.

6 Et repleti sunt omnes Spiritu Sancto, & ceperunt loqui varijs linguis, prout Spiritus Sanctus dabat eloqui illis. Act. 2. 4.

Non otiosè Divinum Spiritum, ipsiusque dona acceperunt Apostoli: sed nulla interposita mora Deum glorificaverunt varijs loquentes linguis; & audientes, quo ipsi ardebant igne inflammaverunt.

Nos vero Divinis aucti muneribus, quid agimus? Et ego præ cæteris, quid ago? Cur frustrà thesaurum habemus in vasis fictilibus, illam nimirum gratiam, per quam Divinæ consortes efficimur Naturæ, & Filij Dei nominamur, & sumus. Donis alijs prætermisissis, quæ sortiti sumus, & quotidie sortimur à Deo, in unam justificantem gratiam conijciamus oculos, & videamus, quam in plerisque otiosum sit donum aliorum omnium Fons, & origo donorum.

Indito sibi pondere, forma præstantissima Gratiæ sanctificantis fertur in Deum, animumque nostrum vehementer impellit, ad cogitandum, ad loquendum de Deo, rebusque Divinis, ad agendum, ad vires omnes exercendas, ut obsequamur Deo, ipsiusque

que gloriam amplificemus ! O si quò vocat impetus, niteremur ! Si res ità se haberet, non complicatis manibus, uti nunc, sederemus, nihil agentes, nihil nisi inania cogitantes, de inanibus fabulantes, tempus pretiosi temporis jactura fallentes ; sed omnia quæ mundi sunt, nihili duceremus ; sed nostra conversatio in Cœlis esset, & os loquens de abundantia cordis, loqui non posset, nisi de summo Vero, de summo Bono, de summa Vita, de summa Luce, de summa Pulchritudine, quæ omnia Deus est. Loqueretur os nostrum de Deo cum Deo ; de Deo nobiscum ; de Deo cum Fratribus nostris ; & ità loquens non impediret auditum, quominus voces Dei loquentis audiremus, & de plenitudine Divinæ Sapientiæ sapientiā hauriremus, majoremque dicendi vim de plenitudine omnis facundiæ acciperemus. Sic esset ardens cor nostrum, dum Spiritus sapientiæ nobis loqueretur in via, & nos cum ipso, & de ipso nostris cum Fratribus loqueremur.


Utinam ità Divino Spiritu repleremur, ut summa celeritate, sicut animus de concepto igne ferveret, ità lingua cordi consentiens ardentia verba diffunderet : imò tota vita linguæ conformis, Dei magnalia Sanctis operibus loqueretur. Si volueris, Benignissime Spiritus, etiam tacente lingua, non tacebit cor nostrum, non tacebunt oculi, manus admotæ operi non tacebunt ; sed sicuti dederis loqui & lingua, & vita : ità, & verbis, & operibus eloquemur.

HEBDOMADÆ

Q V A R T Æ,

Meditatio Prima.

*De Sanctitate Domini in forma
Hominis.*

1  Uca 2. 52. JESUS proficiebat Sapientia, & ætate, & gratia apud Deum, & Homines.

Proficiebat quidem JESUS ætate, sed quomodo proficiebat sapientia, & gratia? Non proficiebat utique secundum intimam perfectionem; sed proficiebat solum secundum majoris excellentiæ manifestationem. Dum enim plures, & mirabiliores effectus ederet sapientiæ, & sanctitatis, sapientior, & sanctior in suis effectibus elucebat. Et quia hæc manifestatio verissima erat, ideo dicitur profecisse coram Deo, & hominibus, seu apud Deum, & homines.

Talis sapientia, talis gratia Dominum Incarnatum decebat. Sicut enim sapientia, & sanctitas Verbi nostra mortalitate induti incapax est cujuslibet additamenti, & sicuti unioni hypostaticæ Verbi cum homine, nulla poterat addi perfectio; ita

consentaneum erat, ut creata assumpti hominis sapientia, & sanctitas incrementi omnis capacitatem excluderet.

Dejectis igitur in terram vultibus, una cum iustis omnibus beatisque Spiritibus procumbamus antè Dominum plenum sapientia, & perfectum decore in omnibus viis suis, à die conditionis suæ, ipsique exultemus, quoniam de illo verissimè dictum est; *Femina circumdabit virum.* Fuit enim in utero a die conditionis suæ Vir ita Sapiens, Fortis, & Sanctus, sicut in Cruce, se offerens Patri pro toto mundo, singulisque Peccatoribus, Templum, & Altare; Victima, & Sacerdos.

Ab utero factus est Principatus super humerum ejus, neque ab illo puncto minus habuit sapientiæ, ad regendum, minus roboris ad pugnandum, minus felicitatis ad vincendum, quam cum exaltatus à terra, trahensque omnia ad se ipsum, donavit nobis omnia delicta, & quod adversus nos erat chyrographum decreti, delevit, & Cruci illud affixit, & expolians Principatus, & Potestates, traduxit confidenter palam triumphans illos in semetipso. Ad Colossens. 2. 15.

Venite igitur fideles omnes, & coram Domino procidamus, & exultemus, & exultantes ploremus. Exultemus ipsi, tanta eminentia cognitionis, & gratiæ prædito: Ploremus nobis, & de nobis tanta intellectus caligine circumfusi, tanta voluntatis nequitia corruptis, Si tot iusti ac
Pec-

peccatores de illo illuminati, sanctificati-
que lætantur, cur nos adhuc jacemus in
tenebris, altoque indulgemus sopori? In-
tellectus obscurati, depravatæque volun-
tatis causas veltigemus, & reiiciamus.

2. Qui non poterat, aut sapientior fieri,
aut sanctior, in singula tamen momenta
exultabat ut gigas ad currendam viam
immediati laboris, & fructus, & gloriæ;
singulisque passibus merebatur, quicquid
satis erat ad jura Divinæ Justitiæ læsa in
integrum restituenda, ad mundum repa-
randum, ad peccati tyrannidem everten-
dam, ad effringendos carceres captivorum,
captivosque in libertatem filiorum evo-
candos, Cæloq; donandos. Erant enim
quælibet opera pretii omni pretio mayo-
ris, nec uni tantum Orbi redimendo, sed
pluribus, graviorique jugo servitutis labo-
rantibus sufficientis. Numquam tamen
cursum intermisit, sed fuit in laboribus à
juventute sua psalm. 87. 16. nobis labo-
rem illi præbentibus, & facientibus, Do-
minum vitæ, mortisque servire in pecca-
tis nostris.

Sed cur Domine IESU tota vita labora-
sti clamans clamore nobis incognito: quid
raucæ factæ sunt fauces tuæ, cur defece-
runt oculi tui dum aspiceres in auxiliato-
rem. Psalm. 68 4. si merita quoad vim in-
tensivam, augere non poteras: si à prima
conceptione, satis, superque latifeceras
pro injuriis irrogatis Patri?

Desidiam videlicet nostram carpere in-
ten-

tendebas læthalemque dormientibus somnum excutere, ut surgeremus, & calcaria subiicere ut viam mandatorum tuorum totis viribus curremus. Descripsit unumquemque nostrum Spiritus tuus Proverb. 26. 13. loquens: Dicit Piger, Leo est in via, & Leena in itineribus. Sicut ostium vertitur in cardine suo, ita piger in lectulo suo. Abscondit piger manum sub ascella sua: & laborat si ad os suum eam converterit.

Tates planè sumus. Omnis virtutis, omnis sanctitatis expertes, laborem omnem fugimus, & ubi nihil est metuendum metuimus, & nobis viam salutis; & perfectionis ingressuris inanes timores fingimus, & more puerorum dicimus: Leo est in via, opprimit nos: & Leena in itineribus, ferociam illius evadere non poterimus, quare segnitiam nostram foventes, pedem efferre domo corporis nostri negligimus, lucem odimus, & sicut ostium vertitur in cardine suo, ita nos in lecto degeneris otii torpentes, latus latere commutamus. Sub ascella, vel in sinu manum abscondimus, nihil agentes, & videtur nobis labor immensus, si manus ad os convertamus, hoc est, si executioni mandemus, quod ore, magistra fide, proferimus. O segnitiam! O probrum maximè detestabile! Et Discipuli nominamur illius, qui cepit facere, & docere, & volumus legis esse Doctores, sed non Factores.

3 Quod si tanta socordia minimè labo-

ramus, sed vestigia tua premere utcumq;
contendimus, quam longissimè tamen à
preeunte distamus, & quotidie, & in mul-
tis delinquere non cessamus. Apostolus
tuus Paulus, cum tot, ac tanta egisset, &
pertulisset prò tui nominis amplificatione,
plura tamen agere, & plura pati desidera-
bat. Non enim se comprehendisse arbitra-
batur, sed ut scribit ad Philipp. 3. 13. quæ
quidem retrò sunt obliviscens, ad ea ve-
rò, quæ sunt priora extendens se ipsum,
ad destinatum persequabatur, ad bravium
supernæ vocationis Dei in Christo JESU.

Verus imitator tui Paulus, quæ retrò
sunt obliviscatur: ad instantia verò ex-
tendebat se ipsum. Non quid egisset atten-
debat, sed quid agendum esset. Nos verò,
quid viæ peregerimus, attentè considera-
mus: quid verò, quantumque supersit iti-
neris non attendimus. Vix iter ingressi, di-
verticula quærimus; vix terram tetigimus
vomere, sulcisque semina credidimus, &
ante brumas hyemis, & lata gelu rigentia,
maturas jam segetes, versamus animo, &
jam horreo messes inferimus; Sanctorum
omnium immemores, qui semper consue-
verunt ire, & flere mittentes semina sua;
exacto verò tempore hyemali, & verno
venientes venire cum exultatione portan-
tes manipulos suos. Ratio nostræ vitæ hu-
jusmodi est. Nihil duri, nihil incommodi
experiri placet. Et agere, & pati fortia
Christianum esse testamur. Sed quod in
aliis commendamus, aliis relinquimus.

Non

Non de militia cogitamus, sed de stipendio, non de certamine, sed de corona.

Vide insipientiam, vide torporem tuorum, Imperator optime, qui nullum hostem pertimescens, nunquam tamen arma ponebas: & qui habens, undè facillimè Fortem alligares, & mundi Principem foras eiiceres, & nefariis Potestatibus spolia detraheres, & captivos in libertatem assereres, nihilominus, ut abundantius nostræ saluti prospiceres, noctes ducebas insomnes, in oratione Dei pernoctans; tota die contristatus incedebas, & quia nondum exaltatus à terra, trahebas omnia ad Te ipsum, merore gravissimo conficiebaris. Vide quam dissimiles Tui sint milites sub vexillis tuis.

Numeramus dies, & annos conversionis; & res gloriosè gestas à die conversionis numerare non possumus. Et ità expertes bonorum operum, de mercede miserè cogitamus. Salutari vultus nostros pudore suffunde, antequam districti iudicii dies adveniat, nè in conspectu severissimè omnia discussuri, nimis probrosa confusione, & nimis inutili confundamur.

4 Reliquisti nobis exemplum Domine, 1. Petri 2. ut vestigia tua sequeremur, qui peccatum non fecisti, nec inventus est dolus in ore tuo, qui cum maledicereris, non maledicebas, cum patereris non comminabar: tradebas autem iudicanti Te injustè. Qui peccata nostra ipse pertulisti in corpore tuo super lignum, ut peccatis mortui,

tui, justitiæ viveremus, cujus livore facti sumus.

Singula ex Apostolo Petro deprompta, & consideratione digna sunt. Sed qui singula non potest percurrere, atque perpendere, Dominum saltem alloquatur, ac dicat: qui peccatum non fecisti, reliquisti nobis exemplum. Vide quis quibus exemplum reliqueris. Tu Sanctus, Tu innocens, Tu impollutus, tu segregatus à peccatoribus. & excelsior Cælis factus. Tu non indigens quotidie, prius pro tuis delictis Hostias offerre, deinde pro populi: quod innocentis reliqueris exempla Spiritibus immortalibus, quod hominibus innocentissimis, quod Pueris Babylonicæ fornacis, quod juvenum, virginumque Choris, qui stolis illibati candoris purpuram addidere martyrii, magnæ utique dignationis fuit. Sed numquid etiam Te fecisti Sanctitatis exemplar peccatoribus? Etiam perditissimis peccatorum? Etiam mihi?

Audite Cælum, ac terra. Audite omnia, quæ Cælum impletis, ac Terras. Audite prodigia dignationis: Audite, & videte magnitudinem Sanctitatis, quæ cum tanta sit, se proponit peccatoribus imitandam.

Ergo peccatores omnes ad pedes provocamur illius, qui peccatum non fecit, & cujus in ore inventus dolus non est, & ab illius clementia summis precibus contendamus, ut nos de impiis justos, de filiis tenebrarum filios lucis efficiat. Qui veritas

ster-

æterna est, & Sapientia Patris doceat nos omnem veritatem, præstetque, ut non inveniatur dolus in ore nostro. Non solum ab ore, sed ab omni vita removeat omne mendacium. Non solum verba nostra auspice Veritate, vera sint, sed opera, & species exterior actionum habeat perfectum cum interiori virtute consensum.

5 Duo præ cæteris Domine IESU, immutabili firmitate sanctam reddebant Humanitatem tuam: Unio hypostatica, & visio beata. De utroque beneficio tibi in forma Hominis collato, perennes hymnos Patri tuo persoluant, quorum est alternis vocibus canere: Sanctus, Sanctus, Sanctus.

Quoniam vero omnis cognitio primi Veri, per ænigmata, est quædam participatio cognitionis Beatæ: & unio amoris cum summo Bono, est quædam participatio unionis hypostaticæ; tribue nobis sapientiam Sanctorum, ut primam Veritatem, in singulis rerum conditarum veritatibus, contemplemur. Tribue unionem charitatis, qua tibi adhareamus, qua tecum unus spiritus efficiamur. Si jucundissimæ disciplinæ operam dederimus, audiendo, credendo, legendo, meditando; & dum in praxim redigimus audita, credita, lecta, discussa, nobis vim inferendo, quam longissimè aberimus à peccando. Si verò cognitioni Tui Amor accesserit, si nexu isto fortissimo tibi copulabimur, quis, & quid nos separabit à Te?

Nemo

Nemo separabit , ut inquit D. Augustinus lib. 1. de moribus Ecclesiæ cap. 11. minando mortem . Idipsum enim quod diligimus Deum , mori non potest , nisi dum non diligimus ; cum mors ipsa sit non diligere Deum . Nemo separabit pollicendo vitam . Nemo enim ab ipso fonte separat, pollicendo aquam . Non separabit Angelus . Non enim est Angelus , cum inheremus Deo nostra mente potentior .

Non separabit virtus ; nam si virtus apud Apostolum illa nominetur , quæ aliquam potestatem in hoc Mundo habet , toto mundo est omninò sublimior mens inherens Deo . Sin virtus illa dicitur , quæ ipsius nostri animi rectissima affectio est : si in alio est , favet ut coniungamur Deo : si in nobis est , ipsa coniungit .

Non separabunt instantes molestiæ , hoc enim leviores illas sentimus , quo ei , undè nos separare moliuntur , arctius inhaeremus . Non separabit promissio futurorum ; nam & quicquid boni futurum est , certius promittit Deus . Et nihil est ipso Deo melius , qui jam profectò benè sibi inherens , præsens est .

Non separabit altitudo , neque profundum . Nam quis mihi , inquit Augustinus Cælum pollicetur , ut à Cæli fabricatore seiungar ? Aut quis terreat infernus , ut Deum deseram , quem si nunquam descrivissem inferna nescirem ? Postremò quis me locus ab ejus charitate divellet , qui non ubique totus esset , si ullo contineretur loco ?

6 Sed cum innumera sint Bone JESU tuæ testimonia Sanctitatis, numquid illud præteribo, quod cum esses Verbum Omnipotens, per quod facta sunt omnia, tamquam Agnus coram tondente Te obmutescere voluisti: neque solum cum maledicereris, non maledicebas, cum patereris, non cominabaris, sed cum interficiebaris, vitam interficientibus tribuebas? Judex vivorum, & mortuorum subiisti judicium te iniquissime judicantis: & justitia sempiterna peccata nostra pertulisti in corpore tuo super lignum, ut ilvore tuo sanati, & morti per mortem tuam erepti, peccatis moreremur, justitiæ viveremus.

Quid prius suspiciam? Silentium Verbi, quo loquente, non solum sidera, sed omnia, quæ in lucem sunt evocata dixerunt: Adiumus? An Tribunal iniqui Iudicis judicium ferentis, de justitia sempiterna? An morrem Vitæ, ut vita donarentur, qui Vitam, extrâ quam vita non est interfece-
runt?

Quocumque me verto, immensæ occurrunt tenebræ, immensa lux oculos ferit. Dâ ut noverim Domine, quæ sit latitudo, & longitudo, & sublimitas, & profundum Sanctitatis tuæ. Latitudo pusillanimum erigat, & confortet. Longitudo longanimum faciat, in orando, gemendo, opem expectando, adversariis repugnando, adversa tolerando. Sublimitas sursum attollat oculos, ut omnia terrena despiciens, nihil magis amem, quam tuæ sanctitatis cel-
situdo.

fitudinem contemplari. Profundum, profunda confusione me repleat propter iniquitates meas, quæ causa fuerunt, ut Salvator mundi exclamaret: Saluum me fac Deus, quoniam intraverunt aquæ usque ad Animam meam: & qui imperat ventis, & mari diceret: Veni in altitudinem maris, & tempestas demersit me: & Altissimus quereretur: Infixus sum in limo profundi, & non est substantia. Psalm. 68. v. 1. 2. 3. Quid ejusmodi sanctitate profundius?

Quoniam semel cæpi, loquar adhuc ad Dominum mentem cum sim pulvis, & cinis. Rogo Te in reverentiam silentii tui, pone custodiam ori meo, & ostium circumstantiæ labiis meis, quoties vel dictis incessar, vel justè reprehendar.

Si vi, si calumniis opprimar, da ut semper illa recogitem: Circumveniamus justum, quoniam inutilis est nobis, & impropere nobis peccata legis. Promittit se Scientiam Dei habere, & Filium Dei se nominat. Gravis est nobis etiam ad videndum. Videamus ergo si sermones illius veri sint. Contumelia, & tormento interrogemus eum, ut sciamus reverentiam ejus, & probemus patientiam illius. Morte turpissima condemnemus eum &c. Sap. 20.

Si nimius me timor peccatorum meorum exterreat, & ad considerationem judiciorum tuorum immodicè perturber, suggerere menti meæ, quam pretiosa fuerit in conspectu tuo Anima mea, & quam libenter peccata mea pertuleris in corpore tuo super

per lignum, & mortuus fueris, ut ego vis-
verem, & sepultus, ut ego de Gehennę se-
pulchro educerem, & non perpetua putre-
dine, vermibusque scaterem, inter mor-
tuos innumerabiles, quorum neque vermis
moritur, neque mors.

MEDITATIO II.

*De Humilitate, & Obedientia
Domini.*

CLarissimus claritate, quam ha-
buit antequam mundus fieret:
Ad hæc etiam clarissimus hu-
mani generis claritate, obscu-
rus nascitur, vivit obscurus, obscurus mo-
ritur. Cum dives esset propter nos egenus
factus est, ut illius inopia ditaremur; &
cum esset Omnipotens infirmus factus est,
ut infirmis infirmitate sua consuleret.

Vide humana superbia, Regis nobilissi-
mi, ditissimi, potentissimi humilitatem.
Tu majores jactas, & si clari generis natu-
ra te fecit expertem, mentiris genus, vel
certè obscuritatem generis occultas. Filius
Dei dissimulat quod est. Tu simulas, quod
non es. Avitum decus affectas superbe
Peccator, & ex illo Patre es, qui primus
omnium desit esse Filius Dei. Verà no-
bilitas Sanctitas est. Filiatio Dei est. Que-
re hanc ad ima descendendo, non te supra

te efferendo . Donec ista carveris , non solum eris ignobilis , sed omni notatus infamia inter ignominia vasa computaberis .

Prætereà pone te juxta faciem tuam , & considera , utrum paupertatis te pudeat , ac infirmitatis . Cur paupertatem fugis ? Cur versari inter pauperes erubescis , cum ille tanti fecerit paupertatem , qui cum dives esset propter nos factus est pauper , & paupere tecto , & veste , & mensa paupere usus est , & pauperibus ad Apostolatam electis , ne quid sibi morienti superesset , inimicis ipsis vestimenta divisit , & mortuus aliena sindone involutus est , conditusque sepulchro non suo ? Non tibi sit pudori ista paupertas : sed illa , qua omnis veri boni expers , miser es , & miserabilis , & pauper , & cæcus , & nudus . Hanc inopiam erubescere , non illam , quam inopia sua Rex Gloriz Gloriosissimam fecit .

Fugis etiam nomen infirmi , declinans cor tuum in verba malitiz ad excusandas excusationes in peccatis , vel apud ipsos conscientiz arbitros . Quid vis fortis apparere , si nemo te imbecillior , fragilior , inconstantior ? Quid Medicum celas morbos Animæ tuæ , nè saneris ? Vide Fortissimum illum , per quem facta sunt omnia , despectum , & novissimum Virorum , Virum dolorum , & scientem infirmitatem . Neque solum Omnipotens factus est participes nostræ infirmitatis , quia vulneratus est propter iniquitates nostras , attritus est propter scelera nostra : Sed prætereà passus

L

est

est nostra peccata sibi attribui, imò ipse attribuit sibi dicens Psalm. 21. Deus Deus meus respice in me: Longè à salute mea verba delictorum meorum. Nulla major infirmitas infirmitate peccati. Ab hujus opinione noluit Medicus se purgare, ut omnes sanaret ægros. Tu verò cum tot peccatorum morbis labores, vis non videri Peccator.

2 Verùm, ut Humilitatem Filii Dei, nostramque superbiam penitiùs intueamur, consideremus attentè verba D. Bernardi Sermone tertio in Vigil. Natalis Domini. Postquam enim commemorasset corpus humanum de limo terræ formatum, & vitæ spiraculum in illius faciem inspiratum, subjungit:

Voluit quoque infirmiora nostra abundantiori gloria sublimare, & contraxit se majestas, ut quod melius habebat, videlicet se ipsum, limo nostro coniungeret, & in Persona una sibi invicem unirentur, majestas, & infirmitas; tanta vilitas, & sublimitas tanta! Nihil enim Deo sublimius. Nihil vilius limo. Et tamen tanta dignatione Deus descendit in limum, tantaque dignitate limus ascendit ad Deum: ut quicquid in eo Deus fecit, limus fecisse credatur; quicquid limus pertulit, Deus in illo pertulisse dicatur, tam ineffabili, quam incomprehensibili Sacramento.

Et attende, quia sicut in illa singulari Divinitate Trinitas est in Personis, Unitas in substantia: sic in ista speciali commixtione

tione Trinitas est in substantiis , in Persona unitas . Et sicut ibi Personæ non sciunt unitatem , unitas non minuit Trinitatem , ita & hic Persona non confundit substantias , nec substantiæ ipsæ , Personæ dissipant unitatem . Verbum enim , & Anima , & Caro in unam convenere Personā : & hæc tria unum , & hoc unum tria , non confusione substantiæ sed unitate Personæ . Concludit Sanctus Abbas .

Adverte Homo , quia limus es , & non sis superbus : quia Deo conjunctus es , & non sis ingratus .

Si hæc ita se habent , cur superbiat limus ad tantam dignitatem erectus ? Ita enim exaltatus est , ut se quantum posset , cum Deo se humiliante , ad ima deprimeret . Ne sit ingratus . Ne sit superbus . Quicquid habet vilitatis suum esse cognoscat . Quicquid habet Gloriæ , Glorificatori acceptum referat . Et ut sit gratus , sicuti Deus factus est limus , ut posset pro nobis omnium pedibus conculcari : ita se pedibus omnium pro Deo subiiciat . Nulli dedecori , nulli se probro subducatur .

Dictum est de Sapientia Patris ; Unde huic Sapientia hæc , & virtutes ? Nonne hic est Fabri Filius ? Matthæi 13. 55 . Dictum est de Sancto Sanctorum . Blasphemavit . Quid adhuc egemus testibus ? Matthæi 26. 65 . Dictum est Amantissimo Custodi generis humani , Victorique omnium dæmoniorum : Nonne bene dicimus nos , quia Samaritanus es Tu , & demoniū

habes . Io: 8. 48. Alia multa in ipsum convicia congesta sunt . Ergò qui gratus esse vult , videat quid sibi agendum sit . Sæpius graviora sunt maledicta , quam facta contumeliosa . Verus igitur amator Christi sæpius recolat , non solum usque ad vilitatem limi exinanitum , ut peccatorum pedibus tereretur : sed etiam suam excellentiam occultasse , qua linguarum omnium maledicentiæ potuisset occurrere .

3 Dixit Dominus . Matth. 11. 29. Discite à me , quia mitis sum , & humilis corde .

Quam verè mitis fuerit , & humilis corde , clarum est primò quia ipse dixit : Nam ille est , qui peccatum non fecit , & cujus in ore dolus non est inventus .

Clarum est secundò , quia nemo se pleniori corde humiliavit , aut humiliare potest . Quantò enim magis se quis demittit non sola humilitate intellectus , sed affectus , tanto se pleniori ex corde humiliat . Se autem demisit Dominus humilitate summa . Non poterat enim ex majori sublimitate ad maiorem descendere profunditatem , cum Deo nihil sit sublimius , & nihil Deo in formam servi exinanito , in formam insipientis , ac stulti , in speciem peccatoris , in speciem Rei , cum sceleratis reputati , mortui , & sepulti , profundius .

Clarum est tertio , quia sicut iracundia superbiæ , ita mansuetudo index est humilitatis . Quantò enim quis humilior , tantò mansuetior est . Quis autem Domino

man-

mansuetior? In qua nocte tradebatur se-
tradidit nobis in Cibus, & Potum: &
dum Peccatorum manibus interficeretur,
dicebat: Pater ignosce illis, quia nesciunt,
quid faciunt: hoc est, quia phrenesi labo-
rant, & febris vehementia facit, ut Me-
dicum non agnoscant.

Dixisti Domine te mitem esse, & humi-
lem corde. Utinam ex toto corde credam,
quod dixit prima Veritas, & amem, quod
amavit Summa Charitas. Sed quomodo
credam, & amem quod dixisti, & amari
præcepisti ex toto corde, qui factus sum
quasi Columba seducta non habens cor?
Osee. 7. 11.

Quomodo pleno, quomodo sincero cor-
dis affectu, possum à te discere humilita-
tem, si spiritus tuus locutus est de me,
quando Ecclesiastici 2. 14. dixit: Væ du-
plici corde, & labiis scelestis, & manibus
malefacientibus, & Peccatori terram in-
gredienti duabus viis. Et Cap. 3. 28. Cor
ingrediens duas vias non habebit successus.
Cor nequam gravabitur in doloribus, &
Peccator adiiciet ad peccandum.

Deinde Tu de summo factus es omnium
infimus. De qua summitate ego possum
descendere, ut humiliem me? Non aliun-
dè possum descendere, nisi ab illa celsitu-
dine, quam iniquè occupavi, præferens
me aliis: imò quis credat? præferens me
Tibi, quoties peccavi. Quinam locus in-
frà pedes omnium Peccatorum, in profun-
dissima regione umbræ mortis tantæ con-
gruat superbix? L 3 Po.

Postremò si eminentiam tuæ humilitatis declarat incredibilis mansuetudo erga eos, qui te humiliaverunt, opprimendo, feriendo, occidendo: quid ego contempler tantæ humilitatis exemplar, qui sive levissimis laceſſar injuriis, sive non ex animi ſententia aliquid contingat, iracundia totus exestuo?

4 Quod ad obedientiam Domini attinet conſiderentur illa verba ex Psalm. 39. 11. In capite libri ſcriptum eſt de me, ut facerem voluntatem tuam; Deus meus volui, & legem tuam in medio cordis mei.

Si maximè probatur in obedientia magnitudo Animi, celeritas, & amor; quam perfectæ fuit obedientia illius, qui ab initio conceptionis ſuæ, vidit omnia, quæ de ipſo ſcripta erant in capite libri, hoc eſt in ſumma omnium Scripturarum, de ipſo loquentium?

Vidit omnia, & ad omnia ſine ulla cunſtatione ſe obtulit, & omnia in medio cordis ſui deſcripſit. Ergo quæ obedientia amplioris Animi, quæ obedientia fortior, promptior, Præcipientis, præceptique amantior, excogitari poteſt?

Vidit omnia unico intuitu, aſpera, dura, plena horroris, plena dedecoris. Numquid ad multitudinem, & magnitudinem tot malorum expalluit? obriguit? animo concidit? Numquid adverſus hæc, & illa fortiter inſurrexit: ab aliis verò tolerandis avertit ſe, ratione acerbitatis deterrius, vel ignominia? Imò ad longè plura,
& hor-

& horribiliora se obtulit, clamans: Plura Pater, Plura. Pauca sunt ista, & pauca sunt. Plura, & longè atrociora desidero.

Ubi Patris voluntatem cognovit nullam interposuit moram, non tergiversatus est, sed illicò dixit: Deus meus volui. Non, dixit volo, sed volui, ipsam quodamodò Patris voluntatem preoccupans, & volens quod volēbat Pater, antequam plenè illius voluntas innotesceret.

Neque solum celerrimè paruit, sed amantissimè. Ideò subjungit: Et legem tuam in medio cordis mei. Non dixit in mente, sed corde. Non dixit in corde, sed in medio cordis mei, ut intelligeremus, quam amanter, quam ardentè voluntatem Patris diligeret, quamvis amarissima præcipientem.

Huc animum adverte Peccator infelix. Tu quàm forti animo, quàm prompto, quàm amanti accipis quæ jubentur? Quos ex omnibus, quæ proponuntur excipis? Minima solum, & quæ minimum habent molestiæ admittens? Et hæc ipsa, quam timidè, quam cunctanter admittis, huc illuc te versans, & multis nominibus causas hæsitandi prætexens. Quam verò diligis quæ mandantur? Geris ne illa descripta in medio cordis tui? Ergo nihil habes de obedientia dicentis: In capite libri scriptum est de me, ut facerem voluntatem tuam, Deus meus volui, & legem tuam in medio cordis mei?

5 Cum esset Filius Dei, didicit ex eis,

L +

quæ

quæ passus est obedientiam. & consummatus factus est omnibus obtemperantibus sibi causa salutis æternæ. Ad Heb. 5. 8.

Quid sibi volunt illa : didicit ex eis, quæ passus est obedientiam ? Numquid antequam ageretur in Crucem, quid esset obedientia nesciebat ? Sciebat utique scientia infusa, sciebat scientia beata. Imò sciebat etiam scientia experimentalis, quam hauserat ab obedientia per tres annos suprà triginta in actus suos redacta, sed nondum sciebat scientia experimentalis exactior, quam hausit ex eis, quæ in Cruce passus est, ut potè præteritorum omnium asperis, ac difficillimis. Voluit autem, præter labores vitæ exactæ, experiri Crucem, clavos, spinas, mortem, ut esset nobis Pontifex probatus per omnia, & ut nos doceret, facilius disci virtutes, illas exercendo, quam speculando, & contemplando. Ille quidem huiusmodi experimento non indigebat ; erat enim antè experimentum Crucis, & mortis numeris omnibus absolutus obediens. Sed nos indigebamus, ut incenderemur ad virtutes discendas, illarum potius exercitatione, quam studio.

Se unusquisque attentè consideret, videatque utrum gaudeat scire magis, quam agere. Multi multa sciunt, & se ipsos nesciunt. Et quidem multi ex iis, qui se Deum profitentur adorare in spiritu, & veritate, multa ex frequenti lectione Patrum, & meditatione Scripturarum, & ju-

cun-

cūda rerum Divinarum contemplatione cognoscunt; Nullius verò sunt roboris ad agendum, ad laborandum, ad injurias beneficiis rependendas, ad se ipsos vincendos. Simplicī cognitione, & quæ indè proniscitur consolatione contenti, obedientiam norunt, & laudant: Sed obedientiæ legibus se subducunt: Crucem colunt, sed Crucem ferre detrectant. Amori Crucifixo compatiuntur, sed passionum ejus nolunt esse consortes. Isti non semel, iterumque, sed sæpius recolant, cur Filius Dei voluerit ex iis, quæ passus est discere obedientiam.

6 His quæ dicta sunt, sequentia subiiciamus, quæ habentur Io. 8. 29. Qui me misit mecum est, & non reliquit me solum; quia quæ placita sunt ei facio semper.

Quia Pater, qui Te miserat, Magister, optime obedientiæ, tecum erat, protegens ac regens, humanitatem tuam. quæ placita sunt ei faciebas semper. Rursum, quia, quæ placita sunt ei faciebas semper, ideò Pater tecum erat, probator, & amator obedientiæ tuæ.

Ita non deserat nos Pater tuus, ut semper pareamus, & semper parendo, novis titulis, illius nobis præsentiam, protectionem, gratiam mereamur. Nullum tuæ vitæ momentum, nulla cognitio, sermo nullus, actio nulla caruit obedientia summa, cum perfectione magnanima, celeri, amante; & ita usque ad mortem obediens potuisti dicere, antequam morereris: Con-

summaturum est. Exactissimè videlicet obediendo, consummasti omnia, quæ Tibi præcepta fuerant: Consummasti opus reparationis humanæ Tibi mandatū: Consummasti laboriosissimæ iter peregrinationis, de qua dixeras: Io: 16. 28. Exivi à Patre, & veni in Mundum: iterum relinquo Mundum. & vado ad Patrem: Consummasti sacrificium sacrificiorum omnium maximum, ut carnalium sacrificiorum varietate cessante, omnes differentias hostiarum, una Corporis, & Sanguinis tui impleret oblatio. Diu. Leo Serm. 8. in Passione Domini. Consummasti prælium ingens, de quo locutus fuisti. Io: 12. 31. Nunc iudicium est Mundi, nunc Princeps hujus Mundi eiicietur foras: Consummasti denique ædificium Ecclesiæ inchoatum à Baptismo Ioannis, sicuti tradiderunt nobis tuarum Scripturarum interpretes D. Epiphanius, & D. Augustinus, atque in tua morte perfectum, nè de Te diceretur: Hic homo cepit ædificare, & non potuit consummare.

Hæc autem omnia per cōsummatā obedientiam consummasti, usque ad ultimam inclinationem capitis in Cruce, in argumentum reverentiæ ergà Patrem, & amoris erga Peccatores, ut ità cōsummatas fieres omnibus tibi obtemperantibus causa salutis æternæ.

Perfice Domine JESU etiam in nobis opus tuum: Ut sicuti Tu, ità nos, quæ placita sunt Patri tuo faciamus semper,
Sis

Sit obedientia nostra non solum ad omnia indifferens, & imperterrita: sit non solum prompta, non solum amore flagrans, sed sit immobilis atque perpetua. Nunquam tēdeat nos benè ceptorum. Non dicatur nobis: Currebatis benè; quis vos impedit veritati non obedire? Absit, absit, ut non obediamus Tibi, qui Via, & Veritas, & Vita nostra es. Factus es omnibus obtempe antibus Tibi causa salutis æternæ. Da igitur, ut obtemperemus usque ad finem viæ, ut obtemperemus usque ad intuitum veritatis: ut obtemperemus, usque ad fruitionem vitæ.

MEDITATIO III.

*De Charitate Domini in Templo
presentati.*

MOre aliorum Primogenitorum offertur Deo, quis credat? Ille qui est Imago Dei Invisibilis, Primogenitus omnis creaturæ; quoniam in ipso condita sunt universa in Cælis, & in terra, visibilia, & invisibilia, sive Throni, sive Dominationes, sive Principiatus, sive Potestates. Ad Coloss. 1. 15.

Offertur ille, qui est Caput corporis Ecclesiæ, qui est Principium, Primogenitus ex mortuis, ut sit in omnibus ipse primatus

tenens : Offeritur autem tamquam vnus ex illis Primogenitis, qui offerebātur ad recordandam memoria n beneficij Hebræis collati illa nocte , qua omnes Ægyptiorum domos, Primogenitorum cede funestans Angelus pepercit domibus Israelitarum , quia illarum postibus, & superliminaribus, cæsi Agni sanguis erat aspersus , ut habetur Exod. 12. 13.

Divinus igitur Infans in illo sanguine, sanguinem suum, & in illo Agno seipsum adumbratum intelligens , non solum offert se Patri, ut Primogenitum, sed etiam, ut Agnum, per quem omnes Primogeniti Israelis, hoc est Electi, æterna Morte liberandi erant .

Quis explicet, quo amoris igne Puer arderet, & quo desiderio teneretur illius sanguinis profundi, qui prius in ænigmate consecraverat , mox verò multò felicius per seipsum postes Fidelium erat consecraturus, & omne mali contagium depulsurus à domibus, domorumq; Habitatoribus?

Adhuc parum idoneus vulnere, manibusque tortorum, dicebat . Baptismo habeo baptizari, & quomodo coarctor, vsque dum perficiatur ? & quia nondum poterat cruorem effundere , lacrymas pro cruore fundebat, & pro Sacrificio dilato, sacrificij offerens desiderium, exhibebat. Patri in se ipso Hostiam viuentem, sanctam , placentem, & in odorem suauitatis super omnes hostias acceptabilem .

Gratiæ agantur immensæ Infantulo nimis

mis amabili pudeatq; nihil hæcenus obtulisse, de nobis, aut illi, qui ut nobis parceret, Filio non pepercit: aut illi, qui non aliquid de se ipso, sed se totum ab ineunte ætate offerens Patri, totum similiter se nobis impendit. Si teneri pueritiæ anni, si adolescentia, si iuventus nostra inutiliter effluxerunt, maturiorem saltem ætatem offeramus Parvulo suam præ nobis infantiam offerenti: Et si maturioribus annis jam senecta successit, senium ipsum offeramus vetustatem omnem auferenti, & veteris Hominis, sicut Aquilæ iuventutem renovanti; Si non possumus sanguinem, lacrymas offeramus: & si ne lacrymas quidem cordis duritia suppeditat; confusionem vultus nostri, & sancta desideria offeramus ipsa præ factis desideria Coronanti.

2 Sed quibusnam postibus divini Agni sanguis, & quibus superliminaribus per Agni mystici Sanguinem significabatur illinendus, ut essent domus à Fulminatoris Angeli cæde securæ, & præcipuè Primogenitis parceretur?

Postes, & ostia, per quæ in Animas nostras patet ingressus, sunt omnes potentiæ exteriores, & interiores, corporeæ, & incorporeæ obiectorum suorum expressivæ. & quoniam intellectus, utpotè omnis expers materiæ, est eminenti modo omnis sensus externus, & internus, potissimum obtinet locum inter potentias, per quas in domos Animarum nostrarum intratur: adeoque superliminaris nomine potest intelligi.

Quo-

Quomodo autem his postibus, & superliminaribus immaculati Agni sanguis aspergitur?

Si sermo sit de sensibus externis, & internis, ejusmodi aspergitur sensibus, per illas virtutes, quas nobis Domini Sanguis acquisivit, temperantiam videlicet, mortificationem, modestiam, verecundiam, & si quæ sunt aliæ continentes in officio levitatem, & curiositatem, videndi, audiendi, imaginandi. Sensus interiores, & exteriores ad omnem moderationem ita compositi, coelestis Agni quodammodo Sanguine purpurascunt.

Intellectui verò sensus omnes ad perfectissimam in se ipso unitatem redigenti, aspergitur per Fidem, Sapientiam, Prudentiam consiliatricem, & cætera dona divini Spiritus pertinentia ad Intellectum, Sanguis Domini in his virtutibus, tamquam suis effectibus, perseverans, & Intellectus superliminare consignans, arcet à domo omne infortunium, & præcipuè removet cordis interitum.

Hoc est Illud Primogenitum, quod inter omnia sibi postulat Deus dicens Exodi 13. 2. Sanctifica mihi omne Primogenitum, quod aperit vulvam in Filijs Israel, tam de hominibus, quam de jumentis. Mea sunt enim omnia. Clarius verò. Proverb. 23. 26. Præbe Fili mi cor tuum mihi.

Si Patri Cælesti ita cordi est cor nostrum, quo corde Filium Infantem, se illi credimus obtulisse, ut corda nostra servaret ille.

sa, deposcenti præ omnibus Primogenita?
Sed non poterant illesa seruari, non poterant ab interitu vindicari, nisi domorum postes, & superliminaria, sanguine cæsi Agni ruberent. Ergò immoletur Agnus dicebat Agnus; aperiantur venæ, fundatur sanguis totusque fundatur, ut omnium possitibus, & superliminaribus illinatur, & nulla in domo Israelis, mors Primogeniti luceatur.

Nihil Pater Sancte iniquiori animo fers, quam cædem Primogenitorum, quam interitum cordium humanorum, Uniuersa ista corda, corde meo complector, & ne ipsa intereant morti libenter occurro; & quia tandiù mors optata differtur, morior, quia non morior.

3 Sed alia ratio Primogeniti consideranda occurrit, quæ omitti non debet, ut Charitas & Beneficentia Parvuli, se pro nobis offerentis ad cælem, clarius elucescat. Primogenitus in vnaquaque domo, cui propitius est Deus, est homo noster interior transformatus in Christum illo genere transformationis, de qua loquitur ad Galatas, Apostolus 2. 20. Christo confixus sum Cruci. Vivo autem, jam non ego, vivit verò in me Christus.

Ad hujus Primogeniti generationem concurrit primò Fides, de qua Divus Aug. in Decalog. dixit: Primogenita cordis nostri Fides est. Nemo enim benè operatur, nisi Fides præcesserit. Omnia opera tua bona Filii tui sunt spirituales, sed inter illos

tibi primogenita Fides est.

Concurrit 2. Charitas bonorum operum locuples. Fides enim sine Charitate, & operibus ex Charitate, mortua est.

Concurrit 3. Cor instructum Fide, & Charitate. Sicut autem Fides, & Charitas concurrunt per modum partium componentium, minus præcipuarum: ita concurrat cor tamquam subiectum in se recipiens imaginem Filij Dei; & ut principium efficiens ad agendum suprâ vires, Gratia viribus elevatum.

Concurrit denique tamquam forma potissima, totiusque operis cõsummativa imago illa, & similitudo mirabilis, qua Iustus dicit: Vivo ego, jam non ego, vivit verò in me Christus. Primogenitum hoc sibi præ cæteris postulat Deus. Qui verò dixit: Deliciæ meæ esse cum Filijs hominum, ideò dixit, quia similis hominibus exinanitione sua: homines assimilat sibi cõmunicatione suæ plenitudinis: & in hominum filijs ad suam celsitudinem à sua vilitate traductis, suam in singulis contemplatur imaginem, totidemq; velut in fratribus seipsum intuetur, ac diligit.

Hinc illud vehemens in Puero desiderium reipsa præstandi, quod multò antè per immolationem Agni fuerat prænunciatum: quantum fratres suos diligebat, quantumque desiderabat Primogenitorum interitum à nostris domibus remove, tantum ardebat fundendi sanguinis desiderio, quo super utrumque possem, & in superli-
mi.

minaribus posito, illa tandem prædictio im-
pleretur: erit autem sanguis vobis in si-
gnum in ædibus in quibus erit: & videbo
sanguinem, & transibo vos, nec erit in vo-
bis plaga disperdens, quando percussero
terram Ægypti. Exod, 12. 13.

Quoniam ita diligis nos, non aliunde
amabiles, nisi de Te, Amor infans, & Amor
æterne, fac de Amore tuo amantes, & Pri-
mogenita nostra Patri tuo offerenda vna
cum Primogenito primatum in omnibus
tenente, fac de sanguine tuo secura. Non
peribunt, si perire nolueris. Si januas do-
morum nostrarum sanguine tuo tingere
non desieris: Non peribit illa similitudo,
per quam nos, jam non vivimus nos, sed tu
vivas in nobis: non peribit illa Imago, per
quam præstas, ut Filii Dei, fratresq; tui no-
minemur, & simus.

4 Sed nostram considerationem hoc lo-
co non prætereat aliud Charitatis ineffabi-
lis argumentum. Iam verò, quid fiet, æje-
bat Puer, dum se tamquam Agnum sacrifi-
candum offerret, de Primogenitis Ægy-
ptiorum? Numquid irreparabili cede tol-
lentur, & quibus prodesse poterat mors
mea, nullatenus profutura est? Illis etiam
Pater & pro illis offero, quicquid sangui-
nis habeo, & quicquid vitæ, multumque
doleo, quod me pereunte ne pereant, adhuc
perituri sint, quia tenebras magis dilecturi
sunt, quam Lucem. Vocabo enim, & re-
nuent. Extendam manum meam, & non
erit, qui aspiciat. Consilium omne dispi-
cient,

erunt, & invitantes & clamantes: Rever-
timini, & vivite; deridebunt; Peribunt er-
go, quia erunt ex ijs, qui dicent: Percussi-
mus fœdus cum morte, & cum inferno fe-
cimus pactum. Isaia 28. 15. sed si fieri pos-
set, ut ab Inferis illos educerem, etiam
postquam ab inferis resurrexero, denu-
dò illis morerer, ut qui adversum me fœ-
dus percusserunt cum morte, vitam forti-
rentur æternam.

Quid dicis Bone IESU, & quid exoptas?
Si fieri posset ut de reproborum cordibus
triumphares, post mortem occisam, trium-
phatumque tua morte peccatum, rursus
de Immortali mortalis, novam pugnam
inires, nova exciperes vulnera, novo san-
guinis imbre terram irrigares, ut veluti
frumenti granum terræ arenti, lapidosæ,
spinis implexæ creditum, mortuumq; mul-
tùm fructum afferres, & in lætam, uberem-
que segetem vnà cum impijs mutatis in ju-
stos, exurgeres.

O Charitatem! O cordis latitudinem
nullis finibus comprehensam! Fieri nè po-
test, ut ad tale rigescam incendium? & ni-
hil de me offeram illi, & prò illo, qui post-
quam obtulit prò toto Mundo, & prò me,
id, quò majus offerri non potest, illud idem
offerre desiderat, secundum id, quod in
ipso est, prò ijs, prò quibus reipsa offerri
non potest. Qui ad procurandam anima-
rum salutem deses est, recolat sæpius desi-
deria, quibus desideratus cunctis gentibus
nobis prodesse desiccat. Recolat quid

egre-

egerit, dixeritque jam sedens ad dexteram Patris Carpo Cretenſi Paſtori, in votis habenti, ut peccatores duo, ſana conſilia detrectantes, poſitique, ut ipſi videbatur, in ſumma Gehennæ crepidine, devolverentur tandem aliquando in preceps. IESUS enim unâ cum Angelis ſuis è Cælo delapſus, jam jam lapſuris, clementiſſimam porrexit manum, & adhuc protenſa dextera, Carpo dixit: Iam percutite adverſum me. Paratus enim ſum etiam iterum prò ſalvandis hominibus pati. Dyonif Areop. ep. 8. ad Domophilum. Baronius Anno Chriſti 59. Petri 15.

5 Oblatus Patri per manus Matris, & oblatus oblatione perfectiſſima per ſe ipſum, vult redimi aliorum more ſervorum, tamquam ſervus, qui erat Dominus omnium, & tamquam legi ſubditus, qui erat Legislator ſupremus; & Mundi Redemptor vult redimi ac ſi eſſet indigus redemptionis. Nimirum, ut legem ſervare, & amore parendi parere, & viam mandatorum ſuorum currere diſceremus, non erubescit, imò amat apparere ſervus, & legi ſubditus, ac tamquam unus è numero captivorum, qui non poſſet in libertatem aſſeri, niſi prò ipſo conſtitutum pretium ſolveretur

Quam ſit Charitas iſta ſublimis, declarat profunditas Humilitatis: & quanti ſit pretij Charitas illius, in quo ſunt omnes theſauri Sapientiæ, & Scientiæ Dei: declarat Liberalitas omnia Bona ſua tam vili pretio vendentis,

Quo-

Quonam autem pretio redimitur, qui cum dives esset factus est omnium egenus, ut sua nos inopia locupletaret? Quo pretio redimitur dives in omnes, qui invocant illum? Quinque siclis redimitur. His persolutis restituitur Matri, & per Matrem mundo, & mihi quoque restituitur. Non pluris emitur Regnum, cum Rege suo? Infinita auri, argentique talenta, nè minimæ quidem particulæ Regni sufficiunt comparandæ. Quomodò quinque tantum sicli pro toto Regno cum ipso Rege solvuntur? Quam rectè dixisti Domine per Isaiam 55. 1. Omnes sitientes venite ad aquas, & qui non habetis argentum, properate, emite. & comedite. Venite emite absque argento, & absque ulla commutatione vinum, & lac. Quare appenditis argentum non in panibus, & laborem vestrum non in saturitate?

6 Sed si absque argento, & absque ulla commutatione emitur fons aquæ, & vinum, & lac, & panis vivus, qui de cælo descendit, nè sicli quidem quinque necessarij sunt, ad emendum Deum. Emitur enim absque argento, & absque ulla commutatione, & quidem emitur, & redimitur ab ijs, de quibus scribit Apostolus prima ad Corinth. 6. 19. An nescitis, quoniam membra vestra Templum sunt Spiritus Sancti, qui in vobis est, quem habetis à Deo, & non estis vestri? Empti enim estis pretio magno. Ergo magno empti pretio, sine ullo pretio illum emimus, qui se nobis dedit in pretium,

de-

Sed quomodo, inquires, quod absq; argento, & absque ulla commutatione traditur, emptio dici potest? Si quid hoc pacto tradatur, liberaliter donatur, non emitur. Ejusmodi quæstioni in hæc verba respondet Divus Bernardus Serm. 2. De resurrectione Domini. Quid est emere sine argento, sine commutatione? Non talis est emptio apud amatores hujus sæculi, sed apud Authorem sæculi, alia esse non potest. Propheta enim dixit Domino: Deus meus es tu, quoniam bonorum meorum non eges. Quam igitur commutationem ei dabis homo pro Gratia sua, qui nullius eget, & cujus sunt universa? Gratia gratis datur, & cum emitur gratis emitur, quia quod datur pro ea, nobis melius retinetur. Tria ergo nummo propriæ voluntatis emenda sunt: quam quidem dimittentes nihil amittimus, etiam & lucratur plurimum, commutantes illam in melius, ut communis fiat, quæ propria fuit. Porro communis voluntas, Charitas est. Emimus ergo absque commutatione, recipientes, quod non habuimus, & quod habuimus melius retinentes.

Ex his perspicua primò est Charitas se tradentis. Utenim se tradat omnibus, sive egenis, sive avaris absque ullo pretio se tradit.

Perspicuum est secundo, quomodo in unum coeant, & venditionis ratio, & donationis. Eadem traditio, venditio dicitur, quia à volente Bonum Infinitum emere,

re, loco pretij nummus propriæ voluntatis exigitur, eadem verò traditio perfectissima donatio est, tum quia voluntas emptoris, quæ traditur venditori, venditoris est, tum quia voluntas cum omnibus alijs, quæ præter se ipsam offerre potest, si Deo conferatur nihil est: Nam in conspectu illius omnia, quæ sunt, tamquam ea, quæ non sunt: Tum denique ut Sanctus Abbas subtiliter, & verè nos docuit: Voluntas, quæ traditur, non amittitur, sed retinetur commutata in melius. Dum enim Deo emendo persolvitur, de propria fit communis. Voluntas verò communis Charitas est, seu voluntas est prædita Charitate. Quid ergò amittimus tradendo in pretium voluntatem? Quod tradimus, retinemus, & ad majorem perfectionem evectum retinemus & in Dominium Dei translatum, excellentius possidemus in Deo, quam in nobis ipsis.

Perpicuum est tertio, quam rectè oratione in Sanctum Baptisma exclamaveris Nazianzenus. O' miram Beneficentiæ celeritatem! O' facilem contrahendi rationem! Hoc Bonum solo voluntatis pretio emendum tibi proponitur. Appetitionem ipsam Deus ingentis loco pretii estimat: sicut fitiri. Bibere cupientibus potum præbet; cum à Deo beneficium petitur, beneficio affici se putat: jucundius dat, quam alii accipiunt. Hæc Nazianzenus.

Cur ergo accipere detrectamus, quod ita jucundè dat Pater Filium nobis reddens,

dendo; quod ita iucundè dat Filius, se pretio quinque siclorum, & nummo voluntatis, venalem omnibus offerendo? Merces vltro neque vilescunt. Sed numquid merces postea magna nimis, vilescere potest, etiam oblata? & gratis oblata? Imò quia tam spontè, iucundèque nobis offertur, nobis quodammodo pretiosior esse debet, non solum quia spontè, sed quia gratis offertur. Dum enim una cum voluntate sensus omnes corporis. Animique potentias, adeoque nos totos offerimus nihil amittimus; sed quod offerimus, mutatum in melius retinemus, & cum ipso Deo gratis empto retinemus, & in ipso Deo perfectissimè possidemus. Quid humana trepidas avaritia? Pretium hominis Deus est. Licet hominem, quem tradis amitteres, & nullatenus retineres: quæ utilior commutatio, quam si homine commutetur Deus?

MEDITATIO IV.

De Sacramento Eucharistico sub specie Vini Dominum continente.

C Antic. 5. 1. Veni in hortum meum soror mea sponsa, melle sui myrrham meam, cum aromatibus meis. Comedi fauum cum melle meo; bibi vinum cum lacte meo.

No.

Nobis ad convivium eucharisticum accessuris suo præluens exemplo Conviva noster, atque Convivium, tria consideranda proponit.

Dicit enim primò. Messui myrrham cum aromatibus meis, ut intelligamus, myrrham, & amarissimas lacrymas poenitentiae eucharisticae sumptioni præmitendas esse, cum aromatibus omnium virtutum, illud inter cetera efficientium, ut Christi bonus odor simus.

Dicit secundò. Comedi fauum cum melle meo; hoc est comedi Corpus meum continens Animam, & Divinitatem, sicut favus continet mel. Qui manducat mel, non manducat fauum. Non enim favus de rore Cæli in ceram concretus, idoneus est comestioni. Verum Christi Corpus, favus est ita dulcis, & palato gratus, ut una cum melle dulcissimo manducetur. Quid Anima, quid habeat dulcedinis Christi Divinitas, nemo novit, nisi, qui accipit: imò nemo perfecte novit, nisi qui dicit, Venite, comedite, & bibite.

Dicit tertio. Bibi vinum cum lacte meo, hoc est bibi sanguinem cum Divinitate mea sub specie sanguinis latente. Verbum lacti componitur, quia, ut advertit Cornelius à Lapide, sicut lac ex mamilla Matris profluit, ita Verbum ex vi generativa Patris procedit, ut homines lactet, doceat, & pascat.

Quod si verborum illorum: Bibi vinum cum lacte meo: sensus est: Bibi sanguinem me-

meum, qui simul est vinum, & lac: Multò magis idem intelligendum est de Verbi Divinitate, quæ simul est vinum, & lac præstantissimum. Lac nimirum, quatenus nutrit, refrigerat, & impinguat. Vinum verò, quatenus cor lætificat, calefacit, & inebriat.

Hæc omnia præstat Christi sanguis: sed multò magis Divinitas, quæ vinum illud est, de quo Raphael ad utrumque Tobiam, cum se quis esset prodidisset, locutus est dicens: Tob. 12. 18. Videbar quidem vobiscum manducare, & bibere: Sed ego cibo invisibili, & potu, qui ab hominibus videri non potest, utor.

Impetra mihi Beatissime Archangele, ut Sanguinem Domini bibens, gustem etiam illum potum, qui videri non potest; ut gustando videam, quantum videri potest, quod videri non potest, juxta illud ex Psal. 33. 9. Gustate, & videte, quam suavis est Dominus.

2 Sed quinam sunt effectus eucharistici poculi calefacientis, lætificantis, inebriantis?

Effectus primus est: alienatio Animæ à sensibus, mentisque traductio ab usu rationis humanæ, ad usum intelligentiæ, & sapientiæ divinæ. Ideò mens ità alienata judicat, nihil humana felicitate infelicius excogitari posse, nihil pauperius divitiis, nihil molestius mundi voluptatibus, nihil vilius Regum purpuris, & coronis. Ex opposito verò nihil Sanctorum stultitiæ.

sapientius, nihil pœnarum acerbitate jucundius, nihil ærumnarû, mortisque deformitate formosius. Ideò quantû fugit laudes humanas, & plausus, tantum amat nesciri, & prò nihilo reputari. Si ridet fortuna tristatur. Gaudet verò, si minas intentat, si ferit, si uulnera uulneribus addit. Suprabundat gaudio cum Apostolo in omni tribulatione sua: dicitque cum Ignatio Martyre: Ignis, Crux, bestia, confractio ossium, membrorum divisio, & totius corporis contritio, & tota tormenta diaboli in me veniant, tantum ut Christo fruatur.

Vide Anima mea quantum ab his affectibus discrepent affectus tui. Ergo tu quoque inter illos numeranda es, ad quos dicitur Aggei 1. 6. Comedistis, & non estis satiati; bibistis, & non estis inebriati.

Sed quid causæ est infelix anima, cur comederis, & satiata non sis? Cur biberis, & non sis inebriata? Cur illud hæcenus ex Propheta Psalm. 22. 7. usurpare non potes: Impinguasti in oleo caput meû, & calix meus inebrians, quam præclarus est? Numquid ebria non es, quia neque sæpius, neque totum hausisti calicem Domini? Et sæpius hausisti, & calicem totum hausisti, sed tota non hausisti. Huc enim, & illuc divisa, voluisti simul bibere de calice Domini, & de calice Babylonis. Qui autem ita bibit, licet totum bibat, qui totus in quolibet haustu est: Se tamen ita habet, ac si nihil de calice Domini bibe-

beret. Sicut enim veros Adoratores Patris, Patrem adorare oportet in spiritu, & veritate, ita veros Filii Dei Convivas, oportet bibere in spiritu, & veritate, quod bibunt de calice ineffabili. Tu quomodo bibis, Anima insipiens, & misera? Numquid in spiritu, quæ obnox a terrenis affectibus, & versa in pulverem pulvere tui corporis vilior, naturam spiritus exuisti? Numquid in veritate, quæ tota vanitas es, tota mendacium?

Ergo noli mirari si de torrente voluptatis biberis, & nihil inde beatissimæ haueris ebrietatis. Bibe in spiritu. Bibe in veritate. Sic totum bibes, & tota inebriaberis, sensusque mutabis, & mentem, juxta id, quod Divus Gregorius docet in Ezechielem homil. 10. dicens: Solet per ebrietatem sensus mutari. Qui ergo ad cognoscendum Dei Verbum devotus est, sed ea, quæ sunt hujus sæculi adipisci desiderat, bibit, & inebriatus non est. Si enim inebriatus esset, procul dubio mentem mutasset, ut jam terrena non quæret; jam vana, & transitoria, quæ amaverat, non amaret.

3 Effectus secundus divini Poculi inebriantis, est copia sermonis, & arcanorum euulgatio.

Cor enim vini spiritu calefactum, ac dilatatum, abundat spiritibus ad cogitandum, facilemque linguam impellit ad enuncians quicquid mens fecunda concepit. Ideo Eucharistico ebrius Vino, mul-

tus est ad loquendum cum Deo exultans, gratias agens, non vana desideria proponens, preces multiplicans, offerens se, suaeque omnia ad nutum omnem divinae voluntatis executioni mandandum. Multus est ad loquendum cum Cœlitibus, Cœlitumque Regina. Multus ad flammam peccatoris effundendas in alios, ut alii simul ardeant, quo ipse ardet, incendio.

Si de arcanorum manifestatione sermo fit, nulla suavior, nulla cum amicis utilior communicatio secretorum, quam illa, quæ ab ebrietate dominici calicis proficiscitur. Est enim communicatio plena veritatis, plena sapientiae, plena amoris; utpotè ortum ducens à vino illius, qui Veritas est, à vino illius, qui Sapientia Patris est, à vino illius, qui Amor est, & unà cum Patre suo Principium Amoris Infiniti, Patrique consubstantialis, & sibi.

Domine Deus meus magnus, & laudabilis nimis, & cujus magnitudinis non est finis, cur linguis infantium es ita locuples argumentum fandi de te: cur generationes omnes magnificentiam gloriæ Sanctitatis tuæ loquuntur, & narrant mirabilia tua? Psalm. 144. & memoriam abundantiae suavitatis tuæ eructant, & Justitia tua exultant: Ego verò numquam impeditioris linguae sum, quam cum debeo loqui ad te de te? Et locuturus inter, & ad fratres meos de te, dicere cogor: a. a. a. Domine nescio loqui. Undè tanta jeiunitas orationis? Undè tanta sermonis inopia de sermo-

mone, per quem facta sunt omnia? Possunt nè verba deesse de illo, qui facit loquendo, quæ dicit? Mihi sanè defunt, sermo indeficiens, sermo viuus, & efficax, mihi defunt verba de te Verbum Omnipotens, quia non novi te. Quid enim lingua nescientis te loquatur de te? Nescio autem, quia non amo, neque amo, quia mens mea, & cor meum vino tuo non maddent. Utinam ego quoque bibam sicut bibunt amici tui: Bibam sicut ij, quos charissimos nominas, & illorum more inebrier, ut discam diligere te, & diligendo nosse te, & loqui de te, ad te, & ad omnes, qui diligunt te.

Vide Domine Deus meus, quid petam. Mihi solum debetur calix vini meri plenus misto, de quo Psalm. 74. 7. calix iræ, & furoris tui. Calix, de quo bibent omnes peccatores terræ: & postulo calicem Amoris tui. Ne obsecro irascaris, sed magni peccatoris, secundum magnam misericordiam tuam misere, inebriando me, non calice furoris tui, sed Amoris. Quæ, & quanta sit bonitas tua vix novi, & ista peto. Quid peterem, si cognoscerem?

4 Effectus tertius est curarum obliuio juxta illud, ex Prou. 31. 6. Date ficera mærentibus, & vinum his, qui amaro sunt animo. Bibant, & obliuiscantur egestatis suæ, & doloris sui non recordentur amplius.

Si vinum ex vuis expressum curas animi pellit, egestatis, atque doloris obliuio-

nem inducit , quantò magis eucharistia-
cum?

Ierem. 2. 19. Quoslibet peccatores ob-
jurgans Dominus , dicit : Scito , & vide ,
quà malum , & amarum est , reliquisse te ;
Dominum Deum tuum . Benè dixisti Do-
mine non amarum fuisse , sed amarum esse ,
quod fontem aquæ vivæ reliquerimus .
Amaritudo , quam experti sumus deserendo
te , non solum fuit , sed est , sed adhuc
perseverat , cogitque animo esse , non so-
lum amaro , sed amarissimo .

Verùm , quas tibi debemus gratias di-
centi : Date vinum his , qui amaro sunt
animo ? Quoties , & quam amanter , non
solum præcepisti dari , sed ipse dedisti no-
bis vinum dulcissimum , quo amaritudo
omnis in dulcedinem verteretur ? Vinum
enim tuum spe de remissis peccatis imple-
vit sæpius , & implet corda nostra : timo-
remque Iustitiæ , amaras ex oculis lacry-
mas excutientis , convertit in amorem Bo-
nitatis , totum Animum voluptate dulcis-
sima perfundentis .

Egestas omnium bonorum , omnium
virtutum , qua premimur , magna est . Ære
alieno gravati gemimus quotidie dicen-
tes : dimitte nobis debita nostra , Undè
vivamus non habemus , nisi des nobis in
singulos dies Panem tuum quotidianum .
Inter innumera salutis æternæ discrimina
versati sumus , & adhuc tot periculorum
imago terribilis mentibus nostris oberrat ,
non sine sensu metus , atque doloris . Sed

om.

omnibus tu ejusmodi malis occurras. Præcipis enim, ut hausto vino tuo obliviscamur egestatis nostræ, & doloris præteriti non recordemur amplius. Et verè tuq; Beneficentiæ munere obliviscimur. Si enim dignè ad te accedamus, si labra sitibunda humanitati tuæ, tamquam cyatho pretioso cæleste vinum continenti, admoveamus, totumque poculum hauriamus, non recordamur amplius egestatis nostræ, quia illum bibimus, in quo sunt omnes Thesauri Sapientiæ, & Scientiæ Dei: & non meminimus amplius doloris nostri, quia illum bibimus, qui toties flevit, ut lacrymas nostras abstergeret: dixitque; Tristis est Anima mea usque ad mortem, ut nos omni tristitia liberaret: & antequam in illius gaudium intraremus, ita gauderemus, etiam in hac lacrymarum vallè, ut nemo gaudium nostrum tollere posset à nobis.

5 Zachariæ 9. 17. Quid enim bonum ejus est, & quid pulchrum ejus, nisi Frumentum Electorum, & vinum germinans Virgines?

Cur vinum Eucharisticum dicitur germinans Virgines? Causæ plures sunt, dignæque accurata consideratione.

Causa prima est, quia calor eucharistici vini, calefacientis, & lætificantis Amor est. Hic autem amor purissimus est. Nam amor est pulchritudinis non corporeæ, sed incorporeæ. Pulchritudo autem incorporea, ex proportionem iustitiæ, & luce Sa-

pientia, tamquam partibus coalescit. Quid autem mundius Sapientia? Quid purius Iustitia, seu Sanctitate? Quod si amor sit non sapientia, sanctitatisque finita, sed infinita: quam erit purus, & mundus ille amor, quem Sapientia Increata, quem Iustitia sempiterna cognita, gignit; perficit, sui que candoris consortem facit? Quid ergo miremur, si quod est Frumentum Electorum, siue juvenum sit etiam vinum, unde Virgines leta proferuntur in germina, immortalique juventutis flore donantur?

Causa secunda est, quia qui bibit, & inebriatur ad votum Domini dicentis: Bibite, & inebriamini charissimi, illud potissimum sortitur, ut a sensibus corporis alienetur. Caelestium enim spectaculorum, admiratione defixus, nihil videt, nihil audit, nihil ad ceteras sensuum functiones attendit. Quid autem immaculatae vitae candori, quid virginitati nocentius, quam licentia oculi saepe animam depradantis: quam aurium curiositas audientium, quod melius taceretur: quam odorum studiosè nimis quaesita varietas, quibus delectatur olfactus: quam usus cibi, potusque abundantioris, & exquisiti, quo non solum palatum, sed etiam corrumpitur iudicium rationis: quam indulgentia nimia, & immodica corporis blandimenta, unde vile mancipium saepius adversus Dominum insolenscit? Externis sensibus, & internis in officio contentis, nullus hostis superest co-

inentiæ metuendus. Non ergo quæramus ulterius vini causas virgines germinantis. Mirifica enim illius ebrietas usu quodammodo sensuum privat, hominemque corporeæ molis facit expertem.

Tu me Domine, JESU omnium sensuum meorum, totiusque corporis implacabilem inimicum effice, ut victis domesticis hostibus, sicuti vitæ, ita pacis Angelicæ consors efficiar. Magna peto, & indignus peto. Petere tamen libet. Minus enim peto, quam reipsa exhibeas. Peto siquidem ebrietatem ab amore sensuum, ab amore corporis abducentem: Peto alienationem mentis, ad corpus durè tractandum inducentis, sensusque omnes ita severis legibus coercendos, ut jugum excutere nequeant. Tu verò nobis propinas vinum tuum, quod aliud non est, quam Tu.

6 Causa tertia, omissis aliis, vini virgines germinantis est, quia si, ut inquit D. Augustinus: Dulciores sunt lacrimæ poenitentium, quam gaudia theatrorum: quanto dulcior est voluptas Dominici calicis, quam omnia mortalium gaudia voluptatum? Indè fit, ut illo semel hausto, nectar omne desipiat, quod bibitur è calice Babylonis. Neque solum desipit, quia bibitur cum veneno, & quia ad infelicem haustum indubitata mors, & æterna consequitur: sed omninò desipit, quia quid jucunditatis percipere potest ab immundis, fugacibusque illecebris voluptatum, qui vel semel divinam dulcedinem in suo fon-

te gustavit? Ergò quam rectè Zacharias vinum, de quo loquimur, vinum germinans virgines appellavit?

Sed ad profundiorē veritatis propositionē indagationem, latentisquē mysterii intelligentiam, juvat miram advertere societatem, quæ inter duos calices dissimillimos intercedit. Primus est mensæ, secundus est Dominicæ Passionis. Primum in ultima Cœna suis Discipulis Dominus propinavit. Secundum Pater obtulit Filio in horto Gethsemani dicenti: Si fieri potest, transeat à me Calix iste. In primo Fons omnium bonorum; In secundo malorum omnium cumulus continebatur. Utrumque bibit Dominus. Et quidem secundum usque ad fæces bibit. Utrumque nobis offert; sed cum hoc discrimine. Primum, exhibet plenum. Secundum, vix paucas continentem guttas amarissimi liquoris: & quidem supremis poculi labiis suorum dulcedine labiorum aspersis. Qui de vitæ hujus ærumnis libenter bibit, sit particeps illius calicis, quem prior Medicus bibit, nè bibere dubitaret ægrotus, & sic fieret particeps perfectæ sanitatis, quæ Sanctitas est. Quoniam ergò è primo calice amor bibitur, & quantò magis bibitur, tantò magis amatur Amor Crucifixus, Amor amarissima bibens, & patiens: idèò ebrius de calice mensæ, inebriatur etiam de calice Passionis, quo mundantur omnia, sanctificantur omnia, & Peccatores omnes loti, si volunt, in sanguine Agni, fiunt sicut Angeli

geli Dei, vestiti lino mundo, & candido,
& præcincti circa pectora zonis aureis.

Si tanta mundities oritur è calice Passionis, cur non vinū eucharistici calicis dicatur germinans Virgines, unde tanta sitis accenditur, ad hauriendum calicem Passionis? Quis mihi tribuat, ut inebrier utroque calice? Non solum Calix mensæ Dominicæ sit præmium laboris, & patientiæ, & omnis amaritudinis. Sed ipse Calix Dominicæ Passionis sit merces mea magna nimis. O si cor linguæ, & facta consonent orationi!

MEDITATIO V.

*De Christo Domino Crucem
bajulante.*

Quibus oculis Crucem primò sibi oblatam aspexit Dominus? Quo affectu complexus! qua sacratissimis humeris alacritate imposuit!

Jam tùm horrida esse desiit arbor infelix, quæ omnibus erat horrore. Ex illo tempore dedecus omne deposuit, rigorem, asperitatem, onus omne, omnem exuit deformitatem. Ex quo enim incubuit cervici, cui totus orbis incumbit, decorem de membris illius suscepit, qui cuncta super eo ducit ab exemplo pulchrum pulcherri-

mus Ipse Mundum mente gerens ?

Cur ergo N. omni supplicio digne peccator, tantoperè Crucem fugis? Non est nuac, quod fuit. Erat olim gravis, erat funesta, erat horribilis, atque deformis. Nunc levis est; fausta, & fortunata est. Et ex aspera, atque deformi, facta est amabilis, & de specioso forma præ filiis hominum, speciosissima.

Indè sapientibus rerum æstimatoribus tanta de Cruce lætitia. Indè Sanctus Clavallensis Abbas de Beato Andrea loquens sermone in ejus pervigilio hæc habet. Quomodo non exulemus in memoria triumpho ejus, quem in ipsa sui præsentia supplicii, tam vehementer novimus exultantes? An non erit læta festivitas, ubi, & Crux ipsa plena est gaudio? Siquidem, & festivum solemus nominare, quod lætum est, & Crux à cruciatu utique dicitur, aut certè cruciatus à Cruce. Quanta proinde exultatione universæ terræ, celebrandum tantum novitatis miraculum, tam magnificentum opus Divinæ virtutis? Andreas homo erat similis nobis passibilis, & tam vehementi ardore spiritus Crucem sitiebat, tam inaudito à seculis gaudio tripudiabat, cum paratum sibi patibulum conspexisset. O' Crux, inquit, diù desiderata, & jam concupiscenti animo præparata, secutus, & gaudens venio ad te, ita ut & tu exultans suscipias me.

Videtis pergit D. Bernardus, quia non se capit præ magnitudine gaudii? Ità, inquit,

quit , ut & tu exultans . Ergo nè tanta est exultatio , ut exultet , & ipsa Crux ? Aut quis dicat , minùs contrà consuetudinem , suprà rationem , ultrà naturam Crucifixum exultare , quam Crucem ? Illi sensum lætitiæ natura negavit : Huic si quid prævalet , gaudium omne exterminat , ingeritque dolorem . Amator ait , tuus semper fui , & desideravi amplecti te . Fratres , ignis vibrans est , non lingua loquens , & si lingua , certè ignea est . Carbones sunt ignis illius , quem de excelsis Christus miserat in ossibus meis . Atque utinam desolatorii nobis sint , consumentes , & exurentes quod in nobis est carnalis affectionis .

Addamus verbis Sancti Doctoris : ut aliquandò tandem de inimicis Crucis , Crucis amatores efficiamur ,

2. Lucæ 9. 23. Si quis vult post me venire abneget semetipsum , & tollat Crucem suam quotidie , & sequatur me .

Præcipitur primò , ut abnegemus nos . Nisi enim contradixerimus affectionibus inordinantis , nisi voluntati propriæ contradixerimus , neque Crucem tollere , neque quotidie tollere , neque Dominum sequi poterimus . Ergo nobis vim forti animo inferamus , corpori jugum excutienti obuiam eamus , desideria non solum noxia , sed inutilia rescemus , & prò viribus contradicamus voluntati nostræ , quæ toties voluntati Domini contradixit . Durum multis videtur hoc verbum : Abnega

temetipsum : sed multò durius erit audire illud extremum verbum : Discedite à me maledicti in ignem æternum . Thom. à Kemp. lib. 2. cap. 12. 1.

Præcipitur secundò, ut Crucem tollamus . Crux inevitabilis est . Si tollere detrectabimus, velimus, nolimus, ferenda est . Et sine ullo emolumento, imò summò cum detrimento ferenda est . Nam breve pondus crucis coactæ, mutabitur onere sempiterno ; & miseræ transeunti, nunquam transitura succedet . At si oblatae cruci spontè humeros submittamus, quæ crux est, fiet Principatus insigne, & gloria Triumphantis . Sicut autem illam complectenti, non erit ignominia, sed honor : ita portantem non gravabit, sed allevabit, imò portantem se portabit .

Huc pertinet quod Divus Augustinus docuit tom. 9. tract. 2. in Io: cap. 1. Ubi ostendit qua ratione crux vastum pelagus transitoris de cruce fit navis . Cum enim considerasset, Deum esse veluti portum, illum felicissimum, & immobilem, quem omnes in votis habemus, & alios quidem videre portum à longe, alios non videre, omnes tamè æquali necessitate premi transfretandi pelagi interiacentis : Quid consilii ceperit Dominus, subjungit dicens . . . Instituit lignum, quo mare transeamus . Nemo enim potest transire mare hujus sæculi, nisi Christi Cruce portatus . Hanc crucem aliquandò complectitur, & infirmus oculus ; & quia non videt longè quò
eat.

eat. non ab illa recedat, & ipsa illum perducet. Itaque fratres mei, hoc insinua-
verim cordibus vestris: Si uultis pie, &
Christianè vivere, adhærete Christo se-
cundum id, quod prò nobis factus est: ut
perveniat ad eum secundum id, quod est;
& secundum id, quod erat. Accessit, ut
prò nobis hoc fieret: quia hoc prò nobis
factus est, ubi portentur infirmi, & mare
hujus sæculi transeant, & perueniant ad
Patriam, ubi jam navi non opus erit, quia
nullum mare transibitur. Melius est ergo
non videre mente id quod est, & tamen à
Christi Cruce non recedere, quam vide-
re illud mente, & Christi Crucem con-
temnere. Bonum est super hoc, & opti-
mum, si fieri potest, ut & videatur quod
eundem sit, & teneatur quo portetur, qui
pergit. Hoc potuerunt mentes magnæ
montium; qui montes dicti sunt, quos
maximè illustrat lumen Justitiæ: potue-
runt, & viderunt illud, quod est. Nam
videns Joannes dicebat: In principio erat
Verbum, & Verbum erat apud Deum, &
Deus erat Verbum. Viderunt hoc, & ut
pervenirent ad id, quod videbant de lon-
gè, à Cruce Christi non recesserunt, &
humilitatem Christi non contempserunt.
Parvuli ergo, qui hoc non possunt intelli-
gere, non recedentes à Cruce, & à Passio-
ne, & à Resurrectione Christi, in ipsa na-
vi perducuntur ad id, quod non vident.
in qua navi perveniunt, & illi qui vident.

3 Antequam procedamus ulterius, li-

ceat

Est indicata ex Doctore Sanctissimo documenta, in ordinem digerere, iterumque sedula mente perpendere.

Documentum primum. Ille qui Exodi 3. 14. Moyfi dixit: Ego sum, qui sum: est illud Bonum incommutabile, est ille finis indeficiens, ad quem omnes, tamquam ad beatissimam stationem, firmissimamque contendimus. Omnia mutabilia sunt, omnia, velut aquæ fluctuantis pelagi instabilia. Nulla firmitas inconcussa extra illum, cujus nomen est: qui est. Quare ipse omnium navigantium Portus est, ipse Quies, ipse Vita beata, ipse communis, & sempiterna securitas est. Et quoniam non sibi soli locus est, & mundus, & omnia, ut agebat Tertullianus: Sed hæc omnia est & sibi, & omnibus: propterea ipsum appellare possumus, & Patriam, quam inquiremus, Patriam omnium Electorum, Patriam semper manentem, & promissam illam, quam toties divinæ commemorant litteræ, terram lacte, & melle manantem. Huc tendimus per casus innumeros, & huc fine fine, laborisque intermissione tendendum est. Væ sive non tendentibus, sive tendentibus, & non pervenientibus.

Documentum secundum. Aliqui divina luce perfusi vident à longè, quò pergant. Aliqui pauca de Deo, & valdè obscure cognoscentes, se habent, ac si quò pergerent non viderent. Omnes tamen, sive docti, sive indocti, pervenire possunt, & portum intrare, si volunt. Quare nemo

gi-

tristetur si parum in humanis disciplinis ; imò in Sanctorum etiam sapientia exercitatus , in corpore Ecclesie vicem oculi non sustineat , sed manus , vel pedis . Sorte sua contentus delectetur magis velato vultu jacere ad pedes , quam vultum Altissimi intueri .

Documentum tertium . Ad Portum , qui unus est feliciter occupandum , uno Crucis navigio opus est . Non alio vastum mare traicitur . Non alia puppi aut vitantur scopuli naufragiis infames , aut procellarum , ventorumque impetus sustinetur . Neque refert utrum navigantes multa , vel exigua Celi , astrorumque peritia polleant ad cognoscendum quò , vel quà cursus sit dirigendus , ad securè per syrtes , & cæca saxa continenti applicandum . Noli de rate in ratem transcendere . Tene puppim , quam semel elegisti , & portum , licet illum non videas , tenebis . Noli à Cruce recedere , & ipsa te quò tendis tutò perducat . Non recedamus à Christo , secundum id , quod prò nobis factus est : ut perveniamus ad eum , secundum id , quod est , & secundum id , quod erat à diebus æternitatis .

4 Documentum quartum ex eodem Augustino , loco citato . Quidam Philosophi hujus mundi extiterunt , & inquisierunt Creatorem per creaturam . Quia potest inveniri per creaturam evidenter , dicente Apostolo : Invisibilia ejus à constitutione mundi , per ea quæ facta sunt intellecta

lecta conspiciuntur, sempiterna quoque virtus ejus, & Divinitas, ut sint inexcusabiles. Et sequitur. Quia cum cognovissent Deum; non dixit, quia non cognoverunt Deum: sed quia cum cognovissent Deum, non sicut Deum glorificaverunt, aut gratias egerunt, sed evanuerunt in cogitationibus suis, & obscuratum est insipiens cor eorum. Et undè obscuratum est? -- Dicentes se esse sapientes, stulti facti sunt. Viderunt enim, quo veniendum esset; sed ingrati ei, qui illis præstitit, quod viderunt, sibi voluerunt tribuere, quod viderunt.

Sed cur videntes, non pervenerunt ad id, quod videbant? quia ut subdit, Augustinus; noluerunt tenere humilitatem Christi, in qua navi pervenirent ad id, quod longè videre potuerunt, & sorduit eis Crux Christi. Mare transeundum est, & lignum contemnens? O sapientia superba, irridens Crucifixum Christum. Ipse est, quem longè vidisti. -- Sed quare Crucifixus est? quia lignum tibi humilitatis ejus necessarium erat. Superbia enim tumueras, & longè ab illa patria projectus eras, & fluctibus hujus sæculi interrupta est via, & qua transeat ad patriam, non est, nisi ligno porteris. Ingrate irrides eum, qui ad te venit, ut redeas? Ipse factus est via. Et hoc per mare. Indè in mari ambulavit, ut ostenderet in mari esse viam. Sed tu, qui quomodò ipse, ambulare in mari non potes: navi portare, li-
gno

gno portare . Crede in Crucifixum , & poteris pervenire . Hæc Augustinus .

Sed numquid ista superbia solum philosophos ethnicos obcecavit ? O' stultam sapientiam etiam illorum , quibus datum est in schola Christi versari , & multa nosse , & multa de Deo subtiliter disputare ! Quantò hi sapiētibus Ethnicis inexcusabiliores ! Vident quò , & quà tendendum sit . Sed superbissimis hominibus Crux Christi sordescit . Miseri ! transeundum est mare . Et lignum contemnitis ? Non videre Portum , & fluctibus absorberi , magna miseria est . Sed quantò luctuosius est , Portum aspicere , & perire ? Et perire , quia navis illa displicuit , extrà quam certissimè pereundum est ?

Alii alia navigia eligant , firmissimis compacta lateribus : Placeat aliis auratis puppibus navigare . Quid celsa , quid superba , quid auro tecta navigia proderunt peritutis ? Una Crux Christi nobis satis sit . Hæc una perducet , quò ceteri omnes irritò conatu feruntur .

Non solum præcipitur , ut crucem tollamus , sed ut quotidie tollamus . Quotidie siquidem pugnandum est , quotidie malorum impetus ubique præter opinionem ocurfantium excipiendi . Ad fortiter autem , quicquid ingruerit perferendum , tria potissimum recolantur .

Recolatur primo illud ex Sapientiæ 3 .
5 . In paucis vexati in multis benè disponentur ; quoniam Deus tentavit eos , &
inve-

invenit illos dignos se. Bone Deus. Dignum Deo inveniri, quid est, & quantum boni est?

Recolatur secundò, quod dicitur 8. ad Rom. 18. Non sunt condignæ passionēs hujus temporis ad futuram gloriam, quæ revelabitur in nobis. Tolerabis dura temporalia, inquit Augustinus in Psalm. 36. v. 24. Sed ad lætitiā pervenies sempiternā. Si vis sustinere laborem, attende mercedem. Nam & operarius in vinea deficeret, nisi attenderet quid accepturus esset. Cum autem attenderis, quid sis accepturus, omnia tibi erunt vilia, quæ pateris. Miraberis tantum dari pro tanto labore. Nam utique prò eterna requie labor æternus subeundus erat. Sed si æternum sustineres laborem, quandò venires ad æternam felicitatem? Itā fit ut necessariò temporalis sit tribulatio tua, qua finita venias ad felicitatem infinitam. -- Huc accedit, quia Deus non solum voluit temporalem laborem tuum, sed etiam brevem. Paucorum dierum est tota vita hominis, etiā si læta duris non miscerentur: quæ plura, & longiora sunt certè, quam dura, ut durare possimus. Si ergo per totam vitam suam homo in laboribus, & in ærumnis esset. -- Pauci dies sunt, tota vita hominis: quo labore transacto, veniet Regnum æternum, veniet sine fine felicitas, veniet æqualitas Angelorū, veniet hereditas Christi, veniet cohæres Christus. Prò quanto labore, quantam mercedem accipimus?

Veterani homines, qui laborant in militia, & versantur inter vulnera, tot annos, incipiunt militare in juventute, exeunt senes, ut habeant paucos dies quietos senectutis suæ, quando eos jam ipsa ætas incipit gravare, quos bella non gravant. Quanta dura tolerant, quæ itinera, quæ frigora, quos soles, quantas necessitates, quæ vulnera, quæ pericula: & non attendunt patientes hæc omnia, nisi paucos dies illos senectutis, ad quos utrum perveniant, nesciunt.

Recolatur tertio, Ducis exemplum. Multò plura, & graviora, quam nos patimur, ille passus est, & semper passus est, nè ullo quidem momento quieti concessio. Non queramus ergò si tollenda Crux est, & quotidie tollenda. Si via prærupta est, si aspera, levamentum viæ, & omnis laboris est ille, qui preit.

6 Duo Latrones perditissimi de carcere educuntur, comitesque adduntur mortis turpissima condemnato, ut medius illorum incedens, tamquam latronum dexterimus haberetur.

Societatem, Bone JESU, latronum non exhorres, quia tu ille David es, ad quem conventuri erant omnes in angustia positi, & oppressi ære alieno, & amaro animo, ut fieres eorum Princeps. 1. Regum 22. 2.

Peccatores omnes ad te convenimus, ad extremam inopiam redacti, quia paterna domo relicta, omnem substantiam, quæ nobis contigerat dissolutè vivendo consum-

sumpsimus. Ad te venimus in angustia positi, quia cum multi mercenarii in domo Patris tui abundant panibus, nos fame perimus: & venimus oppressi ære alieno, quia nē prò unius quidem peccati debito solvendo sumus: quantò minus solvendo sumus, prò debitis innumeris, quæ omnibus diebus vitæ nostræ contraximus. Ad te postremo confugimus amaro animo, quia si præterita consideramus, amarissimum nobis est, posuisse amarum in dulce, & dulce in amarum. Si præsentia attendimus, omni amaritudine replet nos præsens necessitas. Si futura, manet nos mors amarissima.

Tu nihilominus, sicuti latrones, ita non despicias peccatores longè nocentiores latronibus, qui te comitantur, & longè inhonestiores Nomini tuo. Non repellis tamen hujus generis comites, neque fieri noster Princeps recusas. Ità nē amantissime Domine tibi tuæ Dignitatis oblito, cordi sumus? Et homines obscurissimi generis socios Regni designas? Et Deus Exercituum pateris sub tuis militare vexillis laxis, & calonibus viliores, & raptò vivere assueptis despicabiliores?

Quid ingrati animi argumentum Ducem Duci, Regumque Regi præstabimus? Fuimus inimici Crucis. Crucem erubimus. Crucis amatores derisimus, contempsimus, persecuti sumus. At in posterum nihil erit nobis antiquius, quam Crux. Crucem ore, fronte, corde, hume-

merisque gestabimus. Gestabimus ore
laudando fronte palam profitendo, & il-
lius ignominiam nobis gloriæ ducendo.
corde, totis illam viribus diligendo hu-
meris, adversa omnia, atque durissima
perferendo.

MEDITATIO VI.

*De Manibus Domini uulneratis
in Sepulchro jacentis.*

Isaïæ 49. 14. Dixit Sion: Dereliquit
me Dominus, & Dominus oblitus
est mei.

Quid respondet Dominus animæ
omni consolatione destitutæ? In hæc ver-
ba respondet. Numquid oblivisci potest
mulier infantem suum, ut non misceatur
filio uteri sui? Et si illa oblita fuerit, ego
tamen non obliviscar tui. Ecce in manibus
meis descripsi te.

Ut ostenderes Domine apud te memo-
riam nostri oblitterari non posse, dixisti: In
manibus meis descripsite. Sed si nos tanto-
perè diligis, nos utiq; etiam in corde, non
in solis manibus descripsisti. Cur igitur po-
tius manuum facis mentionem, quam cor-
dis? An quia maximè actius est amor, &
amor non est, si non è corde proficiens per
facta se prodar?

Ergo quis dabit capiti meo aquam, &
ocu-

oculis meis fontem lacrymarum, ut plorem die, ac nocte miseriam meam? Si amor non est qui activus non est, quomodo ego amo amorem tuum, qui nihil ago? quomodo ex toto corde, ex tota anima, ex tota fortitudine, & ex tota mente mea dilexi, ac diligo te, si nondum in manibus meis descripsi Te?

Ut ergo in animum meum inducam in manibus meis describere te, da primò, ut penitus intelligam illa verba ex Matth. 7. 21. Non omnis qui dicit mihi, Domine, Domine, intrabit in Regnum Cœlorum: sed qui facit voluntatem Patris mei, qui in cœlis est, ipse intrabit in Regnum Cœlorum.

Da secundo: Ut Doctrina tua benè perspecta, ab illorum me numero totis viribus segregem, qui dicunt, & non faciunt.

Da tertio: Ut non solùm agam, sed multa, & multùm patiar prò te. Quoniam hæc manus, quibus tot, ac tanta egisti prò me, ità crudeliter vulneratæ declarant, quid, & quantum passus fueris prò me, & à me.

2 Sed quænam est Domine ista descriptio, qua in manibus tuis descripsisti me? Numquid hæc vulnera sunt characteres, quos clavorum stylo duxisti, & sanguine tuo colorasti? Sed ego, non tu in manibus tuis descripsi me, insanientem contra te. Ego stylo ferreo notas istas incidi. Ego scripturam exaravi scriptor infelix ad perpetuam memoriam furoris mei. An etiam ad memoriam perpetuam Amoris tui? Quoniam enim

enim furore meo famulante Amori tuo, per manus meas in manibus tuis descripsisti me; ideo erunt hi characteres perenne monumentum furoris mei, & Amoris tui. Furoris mei, quia eum alijs peccatoribus insurrexi in te, & occidi te. Amoris tui, quoniam oblatus es, quia ipse voluisti, & his vulneribus vulneratus es, quia in domo eorum, qui diligebant te, vel certè debant diligere, vulnerari voluisti.

Et quoniam in manibus tuis, per manus meas descripsisti me; utinam hi characteres non sint argumentum solius furoris, sed sint perenne monumentum furoris mei in amorem conversi.

Tu Domine Deus meus omnia potes. Et omnia potest Amor tuus. Efficiat ergo Amor tuus, ut ex istis vulneribus oriatur amor meus, ita ut tantum diligam, quantum oderim, imò diligam, magis. quam oderim. Si enim ratio cur oderim, Ego fui, & omne bonum, quod amore mei dilexi: cur non possum, ac debeo magis diligere te, quam omnia bona dilexerim propter me; cum neque bonis omnibus, quæ dilexi, neque mihi propter quem dilexi, insit ulla ratio, nisi vel detestandi, vel certè frigidissime diligendi: tibi verò omnia vera bona complectenti non insit nisi planè ineffabilis, nullisque comprehensa finibus ratio diligendi.

Si hoc egeris, notæ istæ, quas te volente nimis altè Peccatorum furor impressit, erunt immortale monumentum, prius qui-

dem Amoris tui, deindè furoris nostri. Postremò furoris virtute vulnèrum tuo: um in amorem conversi.

3 D. Aug. tom. 9. lib. Soliloq: cap. 2.
- Manus tuæ fecerunt me, & plasmaverunt me. Manus inquam illę, quæ affixę clavis sunt pro me. Opus manuum tuarum, Domine, ne despicias. Vulnèra manuum tuarum nè despicias. Vulnèra manuum tuarum, precor, ut aspicias. Ecce in manibus tuis, Domine Deus descripsisti me. Legę ipsam scripturam, & salva me. Hæc S. Doctor.

Sed quid inter cætera leget Dominus, legens scripturam tuam? Leget illud, quod scripsit Apostolus ad Colossenses 2. 13. dicens: Et vos cum mortui essetis in delictis, & præputio carnis vestræ, convivificavit cum illo, donans vobis omnia delicta, delens quod adversus vos erat chyrographum Decreti, quod erat contrarium vobis, & ipsum tullit de medio affigens illud Cruci, & expolians principatus, & potestates, traxit confidenter, palam triumphans illos in semetipso.

Scriptura ergo in manibus Domini exarata, continet deletionem, sive abrogationem antiqui Chyrographi: quod erat contrarium nobis: continet delicta condonat; continet expoliationem principatum, & potestatum nobis adversantium: continet nomina Electorum de morte ad vitam, translatorum: continet novum chyrographum, se habens per modum Testamenti
ir.

irrevocabilis, quo bonorum omnium Testatoris declaramur hæredes. Et idcirco, ut vim suam obtineat Testamentum. Testator mortuus est, ut Apostolus ad Heb. 9. 16. affirmat ijs verbis: Ubi Testamentum est, mors necesse est intercedat Testatoris. Testamentum enim in mortuis confirmatum est. Alioquin nondum valet, dum vivit qui testatus est.

Si hæc omnia continet Scriptura manuum, in quibus sunt sortes omnium, quam rectè D. Aug. dixit: Lege Domine scripturam tuam, & salva me.

Rursum si tanta nos dilectione dilexit, novorum Institutor hæredum, ut ad vim conferendam Testamento manuum suarum, mori voluerit: qua fiducia rogare debemus cum Augustino, ut legat scripturam, quam stylo ferreo durorum opera Amanuensium in suis manibus exaravit, & quam, ut irrevocabilem faceret, more Testatorum morte sua confirmavit?

4 Psalm. 101. 26. Initio tu terram fundasti, & opera manuum tuarum sunt cæli.

Sine labore manus tuæ Domine terram fundaverunt, & cælum, sicut pellem in morem tabernaculi extenderunt, & fabricatæ sunt Auroram, & Solem. Sed non sine labore hominem de limo terræ formatum, & super omnia opera manuum tuarum constitutum reformarunt. Quantum laboraveris, quantum restituendo operi insudaveris, manus hæc crudeli ferro trajectæ declarant. Sed antequam vulnera ista inferre-

mus, quid non fecimus? Servire te fecimus in peccatis nostris. Præbuimus tibi laborem [in iniquitatibus nostris. *Isaiæ 43. 24.*

Et opusa hoc, tanta olim indultia, tanto consilio ad tui vultus imaginem elaboratum, & consumatum, postquam ab Authore suo defecit, & in Authorem suum contumax caput erexit, non perdere, sed restituere voluisti.

Vide Anima mea primò quid hæ manus omnipotentes fecerunt prò te, sine labore, ut sine labore in operibus suis Dominum tuum agnosceres, & amares, & in illo conquiesceres.

Vide secundò, Quid fecerint tanto cum labore, ut errantem revocarent, jacentem erigerent, & nimium laborantem ad summam quietem reducerent.

Vide tertio, Quid ipsa feceris prò illo, qui te fecit, & qui prò te fecit, quæcumq; fecit, & pertulit, ut refectam, & in melius restitutam, ratione longè perfectiori, quam antea cõstitueret super omnia opera manuum suarum.

5 *Iob. 14. 15.* Vocabis me, & ego respondebo tibi. Operi manuum tuarum porriges dexteram.

Si operi manuum tuarum tuis vocibus respondentem porrigis dexteram, quomodò porriges mihi, qui nunquam respondi, & adhuc respondere detrecto vocanti? Vocem audiui, vocem audio, acutissime ferientem aures cordis mei: & sicut obmutui, ita obmutesco, & jaceo in tenebris, &

um-

umbra mortis, & in pulvere, & vermibus, & putredine computresco.

A' multo jam tempore in interritu meo ridere debueras, & subsanare me timentem à facie calamitatis ingruentis, quia toties vocasti me, & renui: extendisti manum tuam, & non aspexi, & increpationes tuas, & consilium omne despexi.

Quod tanta Benignitate dignum omni supplicio cumulas beneficijs, quod iterum vocas, socium eorum, de quibus dixisti: Tunc inuocabunt me, & non exaudiam; manè consurgent, & non inuenient me. Prouerb. 1. 18. Quod iterum manum extendas, ut eruas me de profundo lacu peccatorum meorum, gratias ago. Quod pro tot beneficiis peccata rependerim, & rependam, vehementissimè doleo; & linguæ meæ beneficentiam tuam laudibus efferre desideranti, sed neque scienti, neque potenti; substituo lacrymas oculorum, ut lingua tacente, pupillæ non tacerant, lugentes me, & respicientes ad te.

Sed antequam aliò convertam animum, libet interrogare Dominum meum, quid sit acturus, si dexteram operibus manuum suarum porrigere solitus, mihi quoque porrexerit.

Vide primò, Bone IESU, antequam mihi dexteram porrigas ubi jaceam. Nullus peccatorum locus, meo profundior est. Alij profundè peccaverunt. Osee 9. 9. Ego profundissimè. Numquid celsissimam dexteram vis demittere, non in profundis.

simum infernum, sed in profunditatem peccatorum meorum, omni profundiore inferno?

Vide secundò manus meas. Leprosæ, ulcerosæ, scatentes vermibus sunt, sanieque stillantes. Numquid manus has tangere non refugient manus tuæ tornatiles aureque plenæ hyacintis, Manus, quæ fabricatæ sunt Aurorem, & Solem?

Vide tertio, Quid tu feceris, quid ego fecerim. Quid tu feceris prò me, quid ego fecerim adversum te. Tu me vocasti in admirabile Lumen tuum. Ego magis dilexi tenebras meas, quam lumen, quo illuminasti me, ut in lumine tuo viderem lumen, quod est super omne lumen. Tu fatigatus ex itinere, sedisti ad Fontem Misericordiæ tuæ, ut dares mihi aquam vivam, quam qui bibit, non sitiet in æternum. Ego vias difficiles ambulavi, & in via iniquitatis lassatus sum, ut aquam biberem de cisternis dissipatis, neque aquas continere valentibus. Tu ad me sanandum, carnem assumens, usque ad ægrotantis lectum descendisti, ut inquit servus tuus Augustinus: Ego Medicum in furorem versus occidi. Et huic operi manuum tuarum porriges dexteram ad me allevandum? Imò utrasque manus, quas ego cruci suffixi; ad me complexandum extends? Bone IESU! Quid hoc rei est? Quoniam magnitudini dilectionis tuæ non est finis, da ut nunquam harum manuum obliviscar. Da ut lavem inter innocentes manus meas; & choris te.

canentium immixtus, circumdem Altare
 tuum, & audiam vocem laudis, & enarrem
 universa mirabilia tua. Psalm. 25. 6. Da
 ut dirigatur oratio mea sicut incensum in
 conspectu tuo: elevatio manuum mearum
 sacrificium vespertinum. (Explicatio pul-
 cherrimi hujus versiculi peti potest ex Bel-
 larm. in Psalm. 140. 2.)

6 Psalm. 18. v. 1. Celi enarrant gloriam
 Dei, & opera manuum ejus annunciat Fir-
 mamentum.

Non solum coeli visibiles, & intellectus
 expertes, sed etiam invisibiles, & prae-
 diti intellectu opera sunt manuum, quas exan-
 gues, & ita barbarè confoslas aspicimus.
 Neque solum harum opera manuum sunt
 coeli angelici, sed humani: coeli videlicet de
 perditis reparati; de reductis in nihilum
 per peccatum, ad novum esse per gratiam
 sanctificantem evocati, & de corruptis ad
 statum incorruptibilitatis evecti.

- Si coeli mente, & lingua destituti, ita fa-
 cundè gloriam Dei enarrant, si firmamen-
 tum tot linguis, quot syderibus suum com-
 mendat Artificem; si prae-terea coeli multo
 sublimiores: Spiritus videlicet immorta-
 les, caeteriq; loci spirituum Immortalium
 longè clariori voce, uberiori; laudationis
 genere celebrant Authorem suum, quid
 nobis agendum? Numquid coelo, terraque
 divinis laudibus personante silebimus?

Ergo & nos enarremus gloriam Dei, an-
 nunciemus opera manuum ejus, annun-
 ciemus verbis, annunciemus operibus, an-

nunciemus lingua, annunciemus vita opera, quæ manus hæ, non solum Omnipotentia sua, sed laboribus, sed vulneribus suis, & sanguine perfecerunt. Annunciemus præcipuè opera Sanctorum Apostolorum, omniumq; Sanctorum, qui rectissime comparantur cælis, ut advertit Bellarminus in psalm. 28. 4. quod elevati à terra per contemplationem, ampli per charitatem, splendidi per sapientiam, semper sereni per animi tranquillitatem, celerrimè moti ab intelligentia per obedientiam, pluentes per instructionem, tonantes per objurgationem, fulgurantes per miracula, multa bona terris largientes, & nihil ab eis quærentes per veram liberalitatem, purissimi ab omni sorde per vitæ sanctitatem, denique Habitaculum Summi Regis per Iustitiam perfectam sint. Nam Anima Iusti sedes est Sapientiae.

Multitudinem, magnitudinem, pulchritudinem horum operum suspicientes, laudemus Dominum in operibus suis. Et meminerimus, quod opera præstantissima, sunt harum opera manuum, quæ nostra vincula diruperunt, & quas nos in vincula conjecimus. Sunt opera manuum, quæ nostra vulnera sanaverunt, & quas nos vulneravimus. Sunt denique opera manuum, quæ nihil intentatum reliquerunt, ut lacrymas ab oculis nostris abstergerent; & quas cruci affixas, ad mortem usque, sanguine precioso manare coegimus.

Manus beatissimæ, quas lacrymas nostris
ab-

abstergere vultibus peroptastis, nunc sufficite. Nullis abundantiores aquę cōveniunt, quam ista siccis oculis commemorantibus, Virga potentię vestrę percutite perram, durissimam animorum nostrorum, percussioque de scilice, largissimas aquas eijcite. Sic opera vestra erunt, non solum aquę omnes, quę super celos sunt, sed etiam quę ope vestra de nostris cordibus exundabunt.

MEDITATIO VII.

*De Assumptione Divinę
Parentis.*

GLoriosam gloriosissimę Regi-
nę Resurrectionem, & As-
sumptionem mors gloriosa
præcessit. Ex Provincijs om-
nibus Apostoli, multique ex Discipulis, San-
ctique non pauci, partim instinctu divino,
partim angelico ministerio Hierosolymam
adducti sunt, ut è terris decessurę præstò
essent, & vltima verba morientis, & mo-
nita salutis exciperent.

Ad sunt è Cœlo Angelici Chori, Adest
Rex Filius dicens. Veni de Libano, veni
coronaberis, de capite Amanæ, de vertice
Sanir, & Hermon; de cubilibus Leonum,
de montibus Pardorum.

De Libano, hoc est de candido monte.

N s.

ob

ob nives, & simul odorato ex abundantia thuris, vocaris Parens amplissima, quæ candore Innocentiæ, & sanctorum operum, suaveolentia, longè, lateq; diffusa, montium omnium odores excedis, & nives.

Vocaris de capite Amana, hoc est de fastigio Fidei, & veritatis; Amana enim idem est ac Fides, seu Veritas. Nulla verò præstantior Magistra Fidei, ac Veritatis, quam tu, quæ omnes hereses interemisti. Vocaris de vertice Sanir, & Hermon, hoc est de superbis montibus superstitionis profligatæ: Vocaris de montibus leonum, de cubilibus pardorum, hoc est impiorum, quos ad justitiam, & mansuetudinem informasti: & de pardis, atque leonibus in Agnos commutasti.

Ad istas voces inter filiorum tibi circumstantium lacrymas, cantusq; cœlituum, Anima fortunata, illibato prodit è corpore; in amplexus evolat Filij, & in cœlum abducitur.

Si pretiosa in conspectu Domini, Sanctorum mors est, quam pretiosa fuit mors illius quæ pretium Mundi peperit, Sanctumque Sanctorum? & quæ nobis pariendo Viam, Veritatem, & Vitam, in uno peperit omnes, quorum futura erat mors pretiosissima, & vita felicissima?

Salve parens amabilis, salve dulcedo, Vita, & Spes nostra, Salve Ne obliviscaris, quos in hac lacrymarum valle destituis. Fac de tuis nivibus candidos. Fac de tua fragrantia suaveolentes. Illumina Fide, il-

lu-

lūmina splendoribus Veritatis . Mentis arrogantiam, & fastum amove. Pardorum feritatem, & leonum in mansuetudinem verte. Per vitam denique, mortemque tuam, pretiosissimam, vitam impetra clientibus tuis, qualis requiritur, ut moriatur Anima nostra morte iustorum.

2 Corpus incontaminatum per manus Apostolorum sepulturæ traditur ; Anima super omnes Angelorum choros exaltata, plausus, & obsequia excipit adorantium . Sed quoniam separationem sublimis Animæ, corporisq; virginei diuturniorem esse non decebat ; non multò post mortis, peccatque triumphatrix Anima repetit corpus suum, vegetat, movet, illuminat, donatque Deo donante cæteris dotibus corporum beatorum.

Si dotes cōmunicatę respondent excellentiæ Principij communicantis, qua luminis claritate corpus resplenduit, qua pulchritudine donatum est, cuius Anima superat lucem sapientiæ, eminentemq; iustitiæ decorem, totius Ecclesię, sive militantis, sive triumphantis ?

Qua subtilitate, & agilitate fuit instructum, cuius Anima fuit præ cæteris subtilissima in vestigandis, ac deprehendendis divinæ Sapientiæ sacramentis; & celerrima ad omnem divinæ Voluntatis nutum executioni mandandum ?

Postremò quam perfectè positum fuit extrà omnem aleam passibilitatis, cuius Anima fuit expers omnis perturbationis, om-

nis mutationis, omnis impugnationis ab hostibus invisibilibus, à bonorum fugacium illecebris, à cupiditatibus, à peccato? Vicit enim peccatum ab ipso conceptionis initio, caputque contrivit antiqui serpentis.

Utinam filij magnæ Parentis, omniumque Magistræ virtutum premant præ suæ tenuitate vestigia. Sit nobis cordi sapientia Sanctorum. Loricam justitiæ induamus. Nulla macula quantum fieri potest inficiat lucem sapientiæ, decoremque justitiæ. Simplici, humilique corde incerta, & occulta Divinitatis arcana contemplemur, non scrutatores elati, sed miratores obsequiosi, ne Majestatis Gloria opprimamur. Ad omnem divinæ Voluntatis nutum agiles feramur quocumq; vel subobscuræ vocis indicio agimur.

Denique ita humani Generis hosti, ita mundo, ita nobis reluctemur, ut victis omnibus, perfectè nobis, & omnibus dominemur, donec felici morte positi extrà omnis perturbationis aleam, atque periculi, perfectà pace potiamur, redivivum corpus repetituri, ac renovatum, quando omnia in occasu mundi renovabuntur.

Sicuti Christus resurgens ex mortuis, jam non moritur, mors illi ultra non dominabitur: ita non dominetur tibi Dominus cæli, & terræ: ita non dominetur ijs, quos vox omnipotens referatis tumulis excitabit, Filio tuo, tibi que conformes futuros in perpetuas æternitates.

Re-

3 Reginam ascendentem illæ voces circumsonant: quæ est illa quæ ascendit de deserto, delicijs affluens, innixa super dilectum suum cant. 8. 5. Mundo major descendit in mundi hujusce desertum, quando concepta est, quando in lucem edita est, nostram illuminatura noctem, suumq; horrorem ademptura deserto.

Descendit infrà desertum quando ad infima se quæque demisit; quando in spiritu, & veritate ad peccatorum se pedes abiecit restitantes ad penitentiam invitans: quis enim conjectura assequi possit, qua charitate illos semper complexa fuerit, quot preces pro illorum salute fuderit, quo dolore peccata defleverit, quot lacrymis duritiam flectere, & emollire tentaverit?

Ascendit per desertum de virtute in virtutem progrediens, superansq; montes omnes celsissimæ sanctitatis.

Ascendit suprà desertum primò quidem nihili faciens omnia terrena. Deindè dum adhuc esset mortalis, omnes urbes, provincias, & regna protegens, gubernans, pacificans, benedictionibus replens.

Ascendit denique de deserto, mutans lacrymarum vallem in paradysum voluptatis, & locum exilij in Regni sedem, omnes illi portas attollentem, & omnes in occursum cives effundentem, & cælestium orbium concentum geminantem, ad Reginæ laudes solemniùs celebrandas. Sphæras omnes felici cursu transcendente Augustissima Parens, & ubique relinque signalæ citiæ,

tan-

antiqua; vestigia Triumphi, nulla oblivione delenda, omnibusque visenda, qui te Duce, te Auspice per desertum incedent progredientes de virtute in virtutem, ad normam sibi propositi exemplaris: & supra desertum per omnium rerum despicientiam eveniunt: E deserto denique felici migratione decedent, lustraturi vias lucidissimas, quas lustrasti: ingressuti Civitatem quam omnes tibi Portas referantem intrasti: tecumque ubi regnas perpetuò regnaturi. Non regnet, Regina potentissima, peccatum in corpore nostro, sed sanctitas, ut participes sanctitatis, regni quoque possimus esse confortes.

4 Ascendis autem lugentium Consolatrix, deliciis affluens, quia secundum multitudinem dolorum tuorum in Corde tuo consolationes tuæ lætificaverunt Animam tuam. Psalm. 93. 19.

Si sermo sit de doloribus, quis excepto Filio tuo, acerbius doluit, quam tu? Ab initio usque ad finem vitæ sanctissimæ, amarissimè doluisti de peccatis totius mundi; & de peccatis meis. Et quanto magis à primis annis sapientia, & ætate crescebas, & gratia, apud Deum, & homines, tanto magis cum Amore crescebat dolor de injurijs, quæ Deo unice dilecto irrogabantur; & de tot animarum interitu, quibus irreparabili excidio perituris, tot incassum remedia impendebantur.

A' Verbi verò exinanitione in utero tuo concepti, quam acutus gladius præsciamus
fu-

uturorum Animam pertransiuit, dum siuè
lie, siuè nocte versares animo, quæ Filio
lectissimo impendebant? In momenta
ingula renovabatur vulnus gladij animam
ranſerberantis, donec in vulnus unum
numeris vicibus repetitum, omnia Filii
le cruce pendentis vulnera cojerunt.

Quibus ergo nunc delicijs affluens ascen-
lis. si secundum multitudinem dolorum
uorum, Animam tuam cōsolationum mul-
tudo lætificat? Delicijs fructu, quas nec
culus vidit, nec auris audivit, nec ipsa
dens sublimium intelligentiarum assequi
otuit. Fruamur & nos delicijs tuis, tibi
ue gaudeamus, & nobis. Gaudeamus tibi,
uià hyems jam transijt, imber abiit, & re-
ellit. Flores, imò & flores, & fructus, ap-
aruerunt in terra, quæ nobis Frumentum
eperit electorum, & Vinum germinans
irgines. Gaudeamus tibi; quia doloribus
am finitis. nunquam finiendæ succedere
leliciæ. Gaudeamus, & nobis, quia bona
ua nostra sunt; quia quantò nos dolore
onfecerunt dolores tui, tanto nos gaudio
leliciæ tuæ perfundunt; & quia quæ nobis
undum sit, cursu tuo demonstras. Si & nos
le quibus tantoperè doluisti, dolebimus;
i familiare, & amarum doloris nostri argu-
nentum erunt nostra, totiusq; mundi pec-
ata: Et si dolor iste acerbissimè recrude-
cet, ad jugem considerationem Regis do-
orum, vulnerati propter iniquitates no-
stras, attriti propter scelera nostra: de ple-
itudine gaudiorum, de quæ ipsa nunc ac-
ci-

cipis accipiemus, & inenarrabilibus tecum delicijs affluemus, quando, patrocínio tuo aspirante, de corpore mortis hujus liberabimur, & qua nos Filius tuus donavit, libertate donabimur.

5 Ascendis denique innixa super Dilectum tuum. Nihil unquam aggressa fuisti; nihil cogitasti, dixisti, voluisti, peregisti, nisi uni Deo innixa; ideò tam sublime sanctitatis attigisti fastigium; & ideò nunc ad tantam gloriæ celsitudinem eveheris, innixa super Dilectum tuum.

Felix progredere, & quò nullus eniti potuit, enitere, illo tibi dexteram porrigente, imò brachium cōmodante, qui exinanitus in utero tuo in formam servi, fecit potentiam in Brachio suo. Quantò humilior descendisti, tantò sublimior ascende, illo te, & fulciente, cui nihil antiquius est, quam superbos mente cordis sui dispergere, & potentes de sede sua deponere, & humiles exaltare.

Dum ità Filio tuo subnixa conscendis, nostris mentibus illa profundè imprime verba: Maledictus homo, qui confidit in homine. Jerem. 17. 5. & illa: Benedictus vir, qui confidit in Domino, & erit Dominus fiducia ejus. Et erit quasi ligrum, quod transplantatur super aquas, quod ad humorem mittit radices suas, & non timebit, cum venerit æstus. Et erit folium eius viride, & in tempore siccitatis, non erit sollicitum, nec aliquandò desinet facere fructum, Jerem. 17. 7.

Ab-

Abſit à nobis, ut aliquid boni à noſtris viribus expectemus. Non dixit Dominus Io: 15.5. Sine me parum poteſtis facere: dixit ſine me nihil poteſtis facere. Quicquid igitur operis ſive parvi, ſive magni aggrediemur, urgebimus, perficiemus, totum uni Deo acceptum referemus. Non innitemur prudentiæ noſtræ. Non hominum conſilij, non patrocinio.

Memores erimus D. Auguſtini in pſalm. 31. coarguentis hominem ſibi, non Deo, ſidentem: Moucas licet in bonis operibus lacertos, & videaris nauim optimè gubernare in ſaxa feſtinas.

Memores erimus D. Bernardi dicentis: Hec eſt vera hominis fiducia à ſe deficientis, & innitentis Domino ſuo. Hæc inquam vera fiducia, cui miſericordia non denegatur, Prophæta atteſtante, quoniam beneplacitum eſt Deo ſuper timentes eum, & in eis, qui ſperant, ſuper miſericordia eius. -- In nobis quidem timoris, in ipſo autem cauſa fiduciæ. Suavis, & mitis eſt, copioſæ Miſericordiæ, præſtabilis ſuper malitia, multus ad ignoſcendum. Serm. 3. in Annunc. Dominica.

Memores poſtremò erimus Iſaiæ ſpem noſtram accendentis ijs verbis: qui ambulavit in tenebris, & non eſt lumen ei, ſperet in Nomine Domini, & innitatur ſuper Deum ſuum.

Sint viæ difficiles, præruptæ, incognitæ, caligine involutæ: ſpem non abijciamus. Dominus Deus erit Auxiliator noſter, donec

nec uni sibi fidentes traducat, quò Spes, Vita, & Dulcedo nostra super Dilectum suum innixa traducitur.

6 Cantic. 6.9. Quæ est ista, quæ progreditur, quasi aurora consurgens, pulchra ut luna, electa ut sol, terribilis, ut castrorum acies ordinata?

Quodlibet comparisonis membrum interpretatione multiplici abundat. Omis- sis, quæ studium brevitatis cogit omittere, surgenti auroræ componeris beatissima Pa-rens, quia sicut aurora est initium diei simul, & gaudij: Sic tu fuisti principium Lucis illius, de qua Lux ipsa loquens dixit: Ego sum Lux mundi. Io: 8.12. Tu principium illius gaudij de quo, idem Dominus dixit: Io: 16.20. Tristitia vestra vertetur in gaudium, & num. 22. Gaudium vestrum nemo tollet à vobis. Utinam te nobis affulgentem aliam lucem, aliud gaudium non quæramus.

Post auroram pulchritudini lunæ componeris, quia quicquid à sole hausisti luminis, totum ad noctem illuminandam contulisti, ut qui aliquandò fuimus tenebræ, jam non tenebræ, sed esse lux in Domino incipiamus. Nulla tanti beneficii memoriam, nulla tui pulchritudinem vultus nostris impressam mentibus obitterabit oblivio.

Diceris tertio Electa ut sol, quia ita perfecte iustitiæ Solem Filium tuum induisti, ut in ipsum commutata solem videaris. Idcirco juxta solis ingenium oriri quotidie

non

non definis super bonos, & malos, ut mali transformentur in bonos, & boni provehantur in optimos.

Describeris ultimò tamquam castrorum acies ordinata, ut intelligamus, quanta virtute polleas adversus omnes hostes visibiles, & invisibiles. Quantò formosior tuis, tautò perduellibus terribior. Sola mille Ducibus par es, imò longè præstantior. Sola robore tuo centena millia pugnatorum excedis. Esto igitur nobis instar Exercitus armati, adversus spiritualia nequitię in cęlestibus, adversus Principes, & Potestates tenebrarum harum, adversus machinamenta mundi, adversus cupiditatum illecebras, adversus omne peccatum.



HEBDO:

³⁰⁸
HEBDOMADÆ
Q V I N T Æ,

Meditatio Prima.

De Sanctitate Domini in forma Dei.

A Pocalyps. 3. 7. Et Angelo Philadelphię Ecclesię scribe: Hęc dicit Sanctus, & Verus.

Nominat se Filius Dei Sanctum simul, & Verum, ut intelligamus qua sanctitate sit sanctus, & quam non solum ab Episcopo Philadelphię, verum etiam à nobis postulet sanctitatem. Qui prima Veritas est, non solum pręditus est sanctitate, quę perfectissimę vera est, sed quę Veritas est. Consubstantialis Patri habet veritatem, habet sanctitatem consubstantialem Veritati Paternę, Paternę sanctitati. O Veritatem sanctissimam! O verissimam sanctitatem!

Tu verò N. peccator miserabilis, quę fronte ista consideras? Tu ex illis, de quibus Propheta Psalm. 4. 3. Filii hominum, usquequò gravi corde, ut quid diligitis vanitatem, & quęritis mendacium? Tu prò veritate vanitatis amator: Tu vanitas ipsa:

Tu

Tu concretus ex mendaciis totus quantus es, mente veras sanctitatem non fictam, non adscititiam, sed verissimam, sed quæ veritas est?

Quomodo ergo pervenies ad id, ad quod unice conditus es, nempe ad clarum verissimæ sanctitatis intuitum, qui veritatem non facis, & in quo veritas non est? Si nunc desideras lumen clarissimum contemplari, simulationis genus omne deponere. Hactenus exteriori solum quadam specie humilitatis, mortificationis, obedientiæ delectatus, voluisti potius videri, quam esse. Depone virtutum larvam, depone. Poenitentiam age, & poenitentia sit vera. Sapientiam quære, sed veram. Ad sanctitatem enitere, quæ sit, non quæ videatur. Sic dignè poteris cogitare de illo, qui apud Ioannem dicit de se ipso: Hęc dicit Sanctus, & Verus.

2. Apocalypf. 4. 8. Et quattuor Animalia singula eorum habebant alas senas, & in circuitu, & intus plena sunt oculis, & requiem non habebant die, ac nocte dicentia: Sanctus, Sanctus, Sanctus, Dominus Deus Omnipotens, qui erat, qui est, & qui venturus est.

Qui erat à diebus æternitatis in sinu Patris: & qui immutabiliter est, quia nomen illius est: Qui est: cum sit Deus de Deo, Deus verus de Deo vero: & qui à mundi constitutione sub humana specie venturus erat in mundum: & in occasu mundi venturus est Iudex vivorum, & mortuorum,
di-

dicitur Sanctus, Sanctus, Sanctus. Dicitur ter Sanctus, quia Sanctus est Sanctitate Patris; nam ipse in Patre, & Pater in ipso est. Sanctus est Sanctitate sua, quia sua Sanctitas est. Sanctus est Sanctitate Spiritus Sancti, quia sicuti Pater, ita Spiritus Sanctus in ipso est: & ipse in Spiritu Sancto est, cui se cum Patre, communicat communicatione ineffabili, & solum conveniente illi esse, quod infinitè potens est, infinitè sapiens est, infinitè sanctum est.

Et quoniam summè potens, & sapiens, & sanctus ubique est, qua ratione peccatores contumacissimi summè Sancti Potentiam non reformidant, Potentiam ubique regnantem, & continentem omnia, ne sibi relicta deficient, & valentem ipsos, & omnia simplici nutu delere? Qua ratione ejusdem Sapientiam non verentur omnia illorum dicta, facta, cogitata intuentem? Rursum, quomodò tantam proterviam patitur, tantamque impudentiam infinitè Potens, & Sapiens? An quia ter Sanctus est?

Ita planè est dementissimi Peccatores. In ipso vivimus, & movemur, & sumus, & dissimillimi sumus, Et ille Lux est, nos autem tenebræ. Et ille candor incontaminatissimus est. Nos autem maculæ, sordes, & lutum. Et ita dissimiles non avertatur. Non repellit. Sed patienter dissimulat peccata hominum propter penitentiam. Sed cum adhuc inimici simus diligit nos dilectione misericordiæ suæ. Quid

plu.

plura? Ille est, qui dicit: Deliciæ meæ esse cum filiis hominum. O' Sanctitatem! O' Charitatem! O' peccatores ad tantæ Charitatis incendium adhuc argentes! Circûstat nos undique ignis immensus. Ignis Omnipotens. A dextris, & à sinistris, supra nos, infra nos, intrâ nos est. In ipso vivimus, & movemur, & sumus. Et illius Præsentiam, Potentiam, Sapientiam non reveremur. Et lucem non videmus. Et flammæ non sentimus. Et magis tenebras diligentes, quam lucem de ipso non vivimus. Et ambulantes vias difficiles, ad ipsum non movemur. & nobis, & bonis caducis inhærentes, neque sumus in ipso, neque ipse in nobis est.

3 Intelligentiæ sub specie quattuor animalium loco citato Apocalypsi. Sanctitatis eminentissimæ contemplatrices intus, & in circuitu erant oculatæ, senas habebant alas, & requiem non habebant die ac nocte clamantes: Sanctus, Sanctus, Sanctus. Erant plenæ oculis ad videndum, senis alis instructæ ad volandum, valida voce ad clamandum, Sanctumque Sanctorum laudandum.

Si Animæ nostræ intus, & in circuitu plenæ oculis non sunt, sicuti Intelligentiæ; utinam saltem perspicaciorem mentis acie fortirentur: ut quam illæ sanctitatem innumeris oculatæ luminibus intuentur, nos aliquantò clariùs attingeremus.

Cognoscimus beatæ mentes, quod cognoscitis, nos quidem obscurè, vos clarè:
& co-

& cognoscimus, quod adhuc viatrices, per ænigmata cognovistis. Et hæc inter tot ærumnas vitæ præsentis nō est pars infima nostræ felicitatis. Verūm quantum à vestra cognitione etiam per ænigmata discrepat nostra cognitio? Non hoc tamen dolemus, sed vestros vobis oculos, oculorumque æciem gratulamur. Illud dolemus, quod non amavimus, quod amastis: neque laudavimus, quod laudastis. Illud dolemus, quod ad primam cognitionem Sanctitatis, Sanctique Sanctorum, in e us laudes orasolvistis, & senas alas explicuistis ad parendum, ad divinæ Gloriæ cooperandum, ad volandum, quocumque divino Spiritu ferebamini: Nos verò ad primum incuntis rationis usum, ad primum primæ Veritatis, & Sanctitatis aspectum sine voce obmutuimus: Sine volatu in summo corpore jacuimus; elingues ad laudandum, inertes ad parendum, impigri ad vitia, desides ad virtutem.

Ergò ad reparanda vitæ præteritæ detrimenta sapientiam rudibus impetrate, ut nosse discamus, quod non cognovimus. Infantibus fandi copiam sufficite, ut vobis perpetuò laudantibus Sanctum in omnibus operibus suis, nos quoque laudare possimus. Pigros, altoque torpentes otio vestris pennis instruite, ut vestræ obedientiæ, acceleritatis in agendo imitatores faciamus verbum illius ad audiendam vocem, sermonum ejus, sicuti vos fecistis, & fa-

cistis, Regio Vate testante. Psalm. 122. 20.

4 Sapiencia, ut habetur Sapiencie 7. 25.

-- Emanatio quædam est claritatis omnipotentis Dei sincera; & idè nihil inquinatum in eam incurrit. Candor est enim, Lucis æternæ, & speculum sine macula Dei Majestatis. & imago Bonitatis illius.

Quoniam Sapiencia Patris est emanatio quædam claritatis omnipotentis Dei sincera, nihil inquinatum in eam incurrit. Si lucem corpoream non solum cœlestia corpora illuminantem, sed etiam terras, sed etiam loca fordida, lutulenta, inhumatis cadaveribus obfita, sanie, taboque manantia nihil, nè tenui quidem macula inficit, ac dehonestat: quantò minus aliquid inquinamenti potest aspergi Luci incorporeæ divinæ Sapiencie, omnia periusstrans, & ubique propter suam munditiam attingentis? Hoc enim est lucis ingenium, & illius potissimum, in qua tenebræ non sunt ullæ, super inquinatissima quæque diffundi, & nullum indè referre suæ munditiæ dispendium.

De Lucis hujusce plenitudine, quantum pro nostra conditione licet, accipiamus, ut qui tot inter sordes versamur, nihil indè sordium contrahamus. Bone Deus! quæ non audire, quæ non videre non possumus? Totus mundus in maligno positus est 1. Ioannis 5. 19. Omnis caro corrumpit viam suam. Genes. 6. 12. Sensus, & cogitatio humani cordis in malū prona sunt ab adolescentia sua. Genes. 8. 21. In medio na-

tionis pravæ, & perversę incolę sumus; & quocumque nos vertimus, Domine Deus, nostris oculis obtruduntur omnes abominationes, quas te revelante vidit Ezechiel in Sanctuario tuo. Nam in ipso introitu portę, quę respicit ad aquilonem occurrit nobis Idolum zeli statutum ad provocandam indignationem tuam. Ingredientibus verò templum, ecce similitudo reptilium, & animalium, abominatio, & universa idola domus Israel depicta in pariete in circuitu per totum. Et non septuaginta solum, sed innumeri viri de senioribus domus Israel stantes antè picturas, & unusquisque habens thuribulum in manu sua. Numquid hic abominationum finis? Finis abominationis pessimę, gradus est pejoris. Nam si per ostium portę quod respicit ad aquilonem (quã nimirum charitas multorum extincta est) ecce ibi mulieres plangentes Adonidem. Sed quid ingressis atriũ interius se nobis spectandum præbet? Ecce in ostio Domini inter vestibulum, & altare, non vigintiquinque, sed plurimi dorsa habentes contra Templum Domini, & facies eorum ad orientem, adorantium ad ortum solis. Ezechiel. 8.

Inter istos degimus, iisdem menibus continemur, illos adire, errantes reducere, ad meliora consilia revocare cogimur. Quomodo tot periculis eruemur? Nam, qui tetigerit picem inquinabitur ab ea: & qui cõmunicaverit superbo, induet superbiam. Ecclesiastici 13. 1.

Ergo

Ergo Lux clarissima illumina oculos nostros, ut nihil inquinatum in animos nostros incurrat, & in affectus voluntatis derivetur illa mundities, quæ sapientis intellectus propria est, etiam immundissima, mundissimè cogitantis.

5 Qui candor est Lucis æternæ, speculum est sine macula Dei Majestatis. Cur? quia est candor Lucis æternæ. Carens enim omni defectu intellectus, caret omni defectu voluntatis. Quoniam ergo candor Lucis æternæ, est infinitè sapiens, necessariò est infinitè sanctus, adeoque speculum sine macula Dei Majestatis. Rectè igitur dicitur speculum sine macula, quia Lux est, in qua tenebræ non sunt ullæ. Et idèd maculæ omnis est expers, quia nullam societatem potest habere cum tenebris.

Excludat igitur unusquisque ab intellectu suo tenebras, quas potest. Quantum enim intellectui lucis accedet, tatum adii-cietur innocentiae, & sanctitatis voluntati. Quomodo autem illuminandus sit intellectus, docet Propheta Psalm. 33. 5. dicens: Accedite ad eum, & illuminamini, & facies vestrae non confundentur.

Accedite nimirum primò per Fidem, & Poenitentiam, & illuminamini per gratiam justificationis, inquit Bellarminus. Nam illuminatio divina, vitam spiritualem confert. Undè Apostolus ad Ephes. 5. 14. Surge qui dormis, & illuminabit te Christus. Et Io: 8. 12. dicitur. Qui sequitur me, non ambulat in tenebris, sed habebit lumen

vitz. Accedite igitur securi, quia facies vestra non confundentur repulsæ pudore. Nam Sol increatus accedentes per Poenitentiam, & respicientes per Fidem, respiciet, & vultu suo serenissimo illuminabit.

Accedite secundò per meditationem, mysteriorum Fidei. Dum enim veritates profundissimæ simul, & lucidissimæ attentius vestigantur, & inspiciuntur, intellectum semper majori luce perfundunt.

Accedite tertio, per supremum genus orationis, quæ contemplatio dicitur. Per hanc enim ineffabilis Excellentie admirator, majori quadam serenitate disponitur, ad radios æterni Solis excipiendos, ardentiorque charitatis æstus concipiendus, ad summum Bonum diligendum, moresque divinos in se derivandos, juxta illud: Esto te perfecti, sicuti Pater vester cælestis perfectus est.

6 Qui candor est Lucis æternæ, & speculum sine macula, idem est Paternæ Bonitatis, & Pulchritudinis imago pulcherrima.

Bellarmin. in Psalm. 44. 5. -- Sicut corporum pulchritudo in proportionem membrorum, & suavitate coloris, ita pulchritudo spiritualis consistit in justitia, quæ est proportio quædam, & sapientia, quæ splendet instar lucis, vel potius, ut sapiens loquitur, lucis comparata invenitur prior. Illa igitur anima est pulcherrima, quæ habet in voluntate justitiam, in intellectu sapientiam. Hæc Bellarminus.

Si

Si hæc ita se habent, quis infinite Sapi-
 entis, & Iusti speciem formosissimam,
 assequatur? Rursum, quis ejus Charita-
 tem erga mundum, & unumquemque no-
 strum non summa admiratione defixus,
 omni obsequii, laudumque genere prose-
 quatur? Cum enim solus propter infini-
 tam Sapientiam, & Iustitiam, seu Sancti-
 tatem sit figura substantiæ, & imago ab-
 solutissima suo prototypo cœterna, cœ-
 qualis, consubstantialis, vult, non solum
 Intelligentias, sed animas nostras, quan-
 tumlibet peccatrices, suæ participes pul-
 chritudinis. Sicut enim ipse est imago Pa-
 tris, nullatenus ab exemplari deficiens; ita
 non solum Angelos, sed homines, ad sui
 vultus similitudinem conditos, vult esse
 imagines, immenso quidem intervallo di-
 stantes, imagines tamen Bonitatis cujus
 ipse imago est numeris omnibus absoluta;

Agnosce igitur homo Charitatem Filii
 Dei. Agnosce dignitatem tuam. Filius
 Dei voluit dici, & esse Filius hominis: ut
 homo qui libet efficeretur Filius Dei. Vo-
 luit in assumpta mortalitate omnis expers
 pulchritudinis apparere, juxta illud: Nō est
 ei species, neque decor: ut homo in anti-
 quam imaginem reformatus fieret divinæ
 consors naturæ, suumque referret exem-
 plar.

Quid ergo tibi agendum est homo ex
 miserrimo felicissimus? Enicere, quod te
 vocat divini Amoris magnitudo. Exue
 vilitatem tuam. Exue teipsum; & quan-

um licet, Deum induere, sapientia, & sanctitate. Nam in utroque sita est divinæ imaginis pulchritudo.

MEDITATIO II.

*Quo semper honore Filius Dei sit
prosecutus Humilitatem, &
Obedientiam.*

Quoniam Filius Dei non poterat in se ipso, aut humiliari, aut alienæ voluntati parere, infinita Sapientia sua rationem excogitavit, qua & posset imperata facere, & verissima sibi cognitione vilescere. Formam enim servi accipiens, non solum se paterno subiecit imperio, sed humano: neque solum inter homines vilis factus est, sed vermis, sed opprobrium hominum, & abiectio plebis.

Tu verò N. peccator superbissime pulvis, & cinis, quid superbis, postquam Altissimus non solum caput asperxit pulvere, & cinere, sed factus est cinis, & pulvis, ut te tui pulveris admoneret, & obiecta nativi cineris recordatione ad ima deprimeret sublimes oculos, fastumque supercilii detestabilis?

Humiliavit se ipsum factus obediens usque ad mortem, virtutem utramque conjungens, & utrique decorem concilians in se.

seipso, ac de seipso, ut geminæ virtutis admiratores, & amatores effecti neutram ab altera separaremus, & ut perfectæ humilitati comparandæ vires totas impendentes in rebus arduis, ac maximè duris parere fortiter disceremus. Quantò enim quisque humilior est, tantò est promptior, celerior, animique fortioris, ac veluti bellicosioris, ad illas victorias reportandas, de quibus Spiritus Sanctus Prov. 21. 28. loquitur dicens: Vir obediens loquetur victorias.

2 Sed quantum humilitati, quantum obedientiæ tribuerit Filius Dei, etiam antequam in hunc mundum veniret, accuratius consideremus.

Genes. 22. Abraham, & Isaac pergebant pariter, & venerunt ad locum, quem ostenderat Abrahamo Deus, in quo ædificavit Altare, & desuper ligna composuit, cumque alligasset Filium suum, posuit eum in altari, super stuvem lignorum. Extenditque manum, & arripuit gladium, ut immolaret filium suum.

Cum autem prohibitus esset Abraham extendere manum in puerum, illi dicitur v. 16. Per memetipsum juravi, dicit Dominus, quia fecisti hanc rem, & non pepercisti Filio tuo unigenito propter me, benedicam tibi, & multiplicabo semen tuum sicut stellas Cæli, & velut arenam, quæ est in littore maris. Possidebit semen tuum portas inimicorum suorum, & benedicentur in semine tuo omnes gentes terræ: quia obedisti voci meæ. O 4 Tan-

Tantæ humilitati, quæ se tam duro subjecit imperio; tantæ obedientiæ, quæ manus paternas armavit ad filium unicum, immolandum, quid promittitur? Promittitur benedictio planè mirabilis. Promittitur multiplicatio seminis super stellas Cæli, & super arenam, quæ est in littore maris. Triumphus promittitur de hostibus universis. Sed nulla sunt hæc. Promittitur desideratus cunctis gentibus, in quo nationes omnes erant benedicendæ. Promittitur lumen, decus, atque felicitas omnium sæculorum.

Audi peccator argentum appendens non in panibus, & laborem tuum non in satietate. Si tibi cordi est divinæ Dexteræ benedictio; si virtutum, bonorumque operum secundum germen, & propagatio; si hostium visibilium, & invisibilium expugnatio: denique si præ cæteris omnibus desideras, ut in corde tuo æternus lucifer oriatur, possisque dicere: Vivo ego, jam non ego, vivit verò in me Christus: Esto humilis, esto obediens.

Subiectio humilitatis subiiciet tibi omnia. Fortitudo obedientiæ in durissimis quibusque executioni mandandis, faciet te omnium hostium invisibilium triumphatorem. Et quoniam ex D. Augustino, omnia opera tua bona Filii tui sunt spirituales, utriusque virtutis humilitatis, & obedientiæ conjuncta perfectio, atque fecunditas cæterarum virtutum, pulchra faciet te prole parentem, donec oriatur in-

sc.

tē, qui vīsitavit nos oriens ex alto.

Alludit Zacharias Lucæ 1. 78. ad illud Malachiæ 4. 2. Orietur vobis timentibus nomen meum Sol Iustitiæ, & sanitas in pennis ejus, & ad illud Sapientiæ. 5. 6. Ergo erravimus à via veritatis, & Iustitiæ lumen non luxit nobis, & Sol intelligentiæ non est ortus nobis. Et Isaia 60. 1. Surge, illuminare Ierusalem, quia venit lumen tuum, & Gloria Domini super te orta est. Et ad illud Zachariæ 2. 8. Ecce ego adducam seruum meum orientem. Et cap. 6. 12. Ecce Vir Oriens Nomen ejus.

Advertant autem studiosi humilitatis, & obedientiæ, non solum illum, cujus nomen est Oriens, oriri nobis, sed etiam in nobis oriri. Qui enim per viscera misericordiæ Dei nostri oritur nobis, per eadem viscera misericordiæ, hoc est per intimā, & ex imo cordis sinu, fundoque manantem misericordiam Dei nostri, ut explicat Cornelius à Lapide in primum Cap. Lucæ 78. oritur in nobis.

3. Tanta benevolentia, humiles, obediētesque complectitur Filius Dei, ut si fortē in hac vita deprimantur, & contemptui habeantur, peculiari illos honore afficiat, bonisque omnibus spiritualibus cumulet. Ideò D. Augustinus in Psalm. 30. circa finem hæc habet.

Quando humiliantur, qui Deū timent, si fortē in aliqua dignitate hujus seculi refulserunt, humiliati non ceciderunt, quia Deum de corde suo non excluderunt. Al-

titudo ipsorum Deus est. Humiliatus videbatur Iob perdita substantia sua, perditis Filiis, perditis quæ servabat, perditis quibus servabat, remansit sine hereditate, & quod est tristius sine herede. Remansit ad solam uxorem, non suam consolatricem, sed diaboli potius adiutricem. Humiliatus videbatur. Vide si miser factus est. Vide si non erat in abscondito vultus Dei. Nudus ait, exii de utero matris meę. Nudus revertar in terram. Dominus dedit, Dominus abstulit; sicut Domino placuit, ita factum est. Sit nomen Domini benedictum. Istæ geminæ laudes Dei, undè sunt? Videte foris pauperem, intus divitem. Istæ geminæ laudes Dei, non exirent de ejus ore nisi thesaurum haberet in corde. Qui divites esse vultis tales divitias concupiscite, quas nec in naufragio potestis amittere. Ergo tales, quando humiliantur, nolite eos putare miseros. Erratis nescientes, quid intus habeant. Habent intus quo gaudeant. Interior est Dominator eorum; interior est Pastor, & Consolator ipsorum. Hæc Augustinus.

Ergo cur humiles inter homines, infortunis humiliati ad tantam celsitudinem, evehuntur? quia ipsorum altitudo Deus est. Cur obediētes patientissimi Regis exemplo, dicentesque inter ærumnas suas: Dominus dedit, Dominus abstulit, sicut Domino placuit, ita factum est: sit nomen Domini benedictum: tanta gloria præfulgent; tanta felicitate potiuntur? quia in-

sus

eus habent unde latentur ; quia interior est Dominator eorum : Interior est Pastor, & Consolator ipsorum .

Vide N. peccator , quam vera in oculis tuis tibi humilitate vilescas , quoties internis , quoties externis humiliaris circumnis . Vide qua resignatione in adversis omnibus dicas : Pater Sancte non mea , sed tua voluntas fiat . Vide , quam verè dicere possis . Dominus dedit . Dominus abstulit . Non contradico sermonibus Sancti . Sit nomen Domini benedictum .

Si hac humilitate, si hac obedientia prestat altitudo tua Deus est . Interior est Dominator animæ tuæ . Interior est Pastor, & Consolator tuus . Tu deiiceris , & ille te evehit ad se . Tu vocem ejus audis : & ille facit voluntatem tuam : juxta illud : Voluntatem timentium se faciet . Psalm.

144. 20.

4 Sapientia Patris , ut nobis humilitatem obedientiæ commendaret, fecit illam parentem sapientiæ . Idcò in illa verba : A mandatis tuis intellexi ex Psalm 118. -- Aliud est , inquit Augustinus , mandata tua intellexi , Aliud est , à mandatis tuis intellexi . Nescio ergo quid aliud se significat intellexisse à mandatis Dei, quod est, quantum mihi videtur , faciendo mandata Dei , pervenisse se dicit , ad earum rerum intelligentiam, quas concupierat scire.

Idcò subiungit primò . -- Propter quod scriptum est : Concupisti sapientiam, serva mandata , & Dominus præbet illam tibi .

bi, ne quisquam præposterus antequam habeat humilitatem obedientiæ, velit ad altitudinem sapientiæ pervenire. Textus ex primò Ecclesiastici 33. citatus, ità se habet. Fili concupiscens sapientiam, conserva justitiam, & Deus præbebit illam tibi.

Subiungit secundò. Audiat ergo: altiora te, nè quæsieris, & fortiora te, ne scrutatus fueris; sed quæ præcepit Dominus, illa cogita semper. Sic homo ad occultorum sapientiam pervenit per obedientiam mandatorum. Cum enim dixisset: Quæ tibi præcepit Dominus, illa cogita; ideò addit, semper, quia, & custodienda est obedientia, ut percipiatur sapientia, & percepta sapientia, non est deferenda obedientia.

Subiungit tertio. Propterea inquit, odio habui omnem viam iniquitatis. Necessè est enim ut oderit omnem iniquitatem amor justitiæ, quia tantò major est, quantò eum magis inflammat amplioris dulcedo sapientiæ, quæ præbetur ei, qui obtemperat Deo, & à mandatis ejus intelligit.

Quisquis ergò supremum donorum omnium Divini Spiritus Sapientiam desiderat, nunquam studere desinat, aut humilitati, aut obedientiæ. Gradus enim ad sapientiam est humilis obedientia, & obediens humilitas. Gradus autem ad illum, qui simul est sapientia Patris, & Amor: est sapientia, quam parit humilitas, & obedientia, & quam inseparabili nexu charitas cooperatur.

§ Si-

§ Sicut humilem obedientiam fecit parentem sapientiæ, Sapientia Patris: ita Virtus Patris, per quam facta sunt omnia facit obedientiam ceterarum virtutum inftricem atque custodem. Enim vero D. teste Gregorio: Obedientia sola virtus est, quæ virtutes ceteras menti inserit, inserensque custodit.

Inserit primò. Fidem, insertamque custodit, quia ad captivandum intellectum in obsequium Fidei, valde humilis obedientia requiritur. Intellectus enim suapte natura superbus, detrectat credere, quæ non intelligit. At humilis obedientie studio sublime deprimat caput, & credit quicquid divina revelat Auctoritas, præcipitque credendum.

Inserit secundò, spem, & custodit, quia nulli plura, nulli majora sibi de Bonitate ineffabili pollicentur, quam qui humiliter, & impigre imperara faciunt: juxta illud ex Psalm. 113. 19. Qui timent Dominum speraverunt in Domino. Et illud ex Psalm. 144. 20. Voluntatem timentium se faciet, & deprecationem eorum exaudivit, & salvos faciet eos. Textum explicans Bellarminus, inquit. Voluntatem timentium se faciet, id est audita oratione præstabit, quod ipsi volunt. Sed addit timentium se, quia hoc justum est, ut Deus faciat voluntatem eorum, qui faciunt voluntatem ipsius.

Inserit tertio, & custodit charitatem, primò quia à divina Benificentia, Regi-
nam

nam omnium virtutum, non sortimur, nisi volendo parere dicenti: Diliges Dominum Deum tuum ex toto corde tuo. Ad volendum autem parere, humilitate disponimur. Quare humilitas est dispositio ad obedientiam. Obedientia ad charitatem.

Demè sicut humilis obedientia dispoſitivè concurrit ad primam charitatis acquisitionem, ita concurrit ad conservationem. Tandiu enim diligimus Deum propter ipsum, quandiu Precepto de diligendo Deo super omnia, paremus.

Denique concurrit ad conservationem simul, & incrementum, quia ad conservandum, augendumque thesaurum pretiosissimum magna gratia requiritur. Quandiu enim vivimus magnis periculis obnoxii sumus. Cum autem Deus superbis resistat, humilibus autem det gratiam: cumque obedientes, humilitate carere non possint, ideo per humilem obedientiam charitatem assequimur, custodimus, augemus, & augendo consummamus.

6 Quemadmodum theologicas, ita inferiores theologicas virtutes menti inserit, insertasque custodit obedientia.

Inserit primò Prudentiam. Licet enim sit virtus intellectualis, fungi tamen officio suo non potest, nisi mens veluti caliginosis perturbationum vaporibus libera, veritatis lumine perfundatur. Rursum inutiliter prescribit quid sit agendum, vel non agendum, si voluntas directioni resistat. Obedientia vtrò utrumque removeret im-

pedimentum . Dum enim perturbationes subicit rationi , & rationem subiicit Deo , mentem deterfis vaporibus serenat , & voluntatem sicuti divino promptam reddit imperiò , ita reddit mobilem ad nutum prudentiæ dictantis , quid sit agendum , quid fugiendum .

Inserit secundò Justitiam . Nam virtus , quæ nulli uult præesse , & omnibus subesse , nulli potest injuriam irrogare . Quare humilis obedientia parens optima est , custosque justitiæ .

Inserit tertio Fortitudinem . Hæc enim frustrà ad magna , & ardua subeunda impellit , si voluntas reluctetur . Non reluctatur autem , si consuevit magis obedire Deo , quam hominibus . Ideò fortiter Mattathias 1. Machab. 2. 19. magna voce respondit : Et si omnes gentes Regi Antiocho obediunt , ut discedat unusquisque à servitute Legis Patrum suorum , & consentiat mandatis eius : Ego , & filii mei , & fratres mei obedimus Legi Patrum nostrorum . Propitius sit nobis Deus . Non est nobis utile relinquere legem , & justitias Dei . Non audiemus verba Regis Antiochi , nec sacrificabimus transgredientes legis nostræ mandata . Sic tres pueri magis obedientes Deo , quam Regi Caldeorum , missi sunt in fornacem ignis ardentis . Danielis 3.

De cæteris virtutibus idem esto judiciũ . Quare pronunciavit verissimè Gregorius Magnus ; Obedientia sola virtus est , quæ
vir-

Virtutes ceteras menti inseris, insertasque custodit.

In acquisitionem igitur tantæ virtutis totis viribus incumbendum est, ut per unâ ceteras assequamur. Ideò verò tanti meriti est obedientia, & longè ipsi fortitudinipericulorum omnium contemptrici, præferenda, quia per fortitudinem non aliena caro, sed propria: per obedientiam verò voluntas propria mactatur. Quare tantum videtur præstare fortitudini obedientia, quantum nostrî corporis, præstat mactatio, & mors propriæ voluntatis.

MEDITATIO III.

*De Charitate Domini inter Doctores,
Doctorem agentis.*

Verbum illuminans omnem hominem venientem in hunc mundum illuminatione invisibili, voluit etiam sub humana specie illuminatione visibili nos docere. Et ut docentem libentius audiremus, ea ætate docet, quæ dulcius omnium sibi animos vindicat, & amores. quid enim jucundius, quam audire scripturarum interpretationem ex ore Interpretis duodecimum annum agentis?

Sed verba, quæ ex ore tuo prodibant, ut vobis essent amabilia, & dulciora super
mel

mel, & favum, ò Bone JESU, non indigebant dulcedine, & amabilitate ætatis tuæ. Erant enim verba Vitæ æternæ. Quia tamen infirmitati nostræ major quidam decor elucet in te, quoniam æternus factus es duodennis; ideò antiquus dierum, puer appares, ut jucundè audiendo, & amando adolescentulum, longè jucundius audiamus, & amemus Æternum.

Ego verò quid hætenus egi? Neque audivi, neque amavi doctrinā, quā Æternus in puero docuisti. Frustrā Majestatem æternitatis decore adolescentiæ temperasti, ut docentem fidentius audirem. Utinam mutata voluntate nihil in posterum frequentius nihil ardentius dicere possim: Loquere Domine, quia audit servus tuus, Loquere adolescens æterne; Loquere, ut audiat servus tuus Sapientiam Pueritiæ tuæ, audiat Sapientiam de Sapientia Patris tibi consubstantialis æternam. Audiat autem servus tuus, non solum percipiendo, sed executioni mandando, quæ dicis. Væ siquidem servis cognoscentibus, & non facientibus voluntatē Domini sui. Servus enim, qui non cognovit, & fecit digna flagis, vapulabit paucis, qui autem cognovit, & non fecit voluntatem Domini sui, vapulabit multis. Lucæ 12. 47.

2. Ut autem intelligeremus, quo amore nos doceat, relicta paterna domo, relicta matre, relicto Patre, solus remanet Ierosolymis. Verum quid miramur, si docendi studio pauperem domum relinquat, & Paren-

rentes suos, qui exivit à Patre, & è cœlo venit in terras, ut homines erudiret? Neque venit ut tridui solum spatio, sicut in Templo Hierosolymitano, Doctoris officio fungeretur. Venit ut nobiscum esset usque ad consumationem sæculi, & mundum relinquens, & vadens ad Patrem unà cum Patre apud nos mansionem faceret, & quæcumque audit à Patre, nota faceret nobis. O ineffabile Charitatis ingenium? Si deliciae Filij Dei sunt esse cum filiis hominum, & illos alloqui, illisque suam Doctrinam tradere, usquequò diligimus vanitatem, querimusque mendacium? Cur sapientiam de summis, excelsisque verticibus, ut habetur Proverb. 8. 2. supra viam in medijs semitis stantem, juxta portas civitatis in ipsis foribus loquentem non audimus? O viri ad vos clamito, & vox mea ad Filios hominum. Intelligite parvuli astuciam, & insipientes animadvertite. Audite, quoniam de rebus magnis locutura sum, & aperientur labia mea, ut recta prædicent. Iusti sunt omnes sermones mei, non est in eis pravum quid, neque perversum. Recti sunt intelligentibus, & equi invenientibus scientiam. Accipite disciplinam meam, & non pecuniam. Doctrinam magis, quam aurum eligite. Melior est enim sapientia cunctis pretiosissimis; & omne desiderabile, ei non potest comparari.

Gratias agamus Amori, quo Sapientia suo nos auro ditare desiderat; ut primò quidem exemplo Apostolorum pauperes simus

mus in hoc mundo, sed divites in Fide, & hæredes Regni, quod repromisit Deus diligentibus se Iacobi 2. 5. Deindè ut humiles in exaltatione, divites simus in humilitate. Iacobi 1. 10. Tertiò, ut sortiamur locum inter eos, qui Ecclesiastici 24. 6. dicuntur homines diuites in virtute, pulchritudinis studium habentes, pacificantes in domibus suis.

Gratiarum actioni succedat ingens de insipientia nostra confusio. Quid enim majori nobis probro verti potest, quam quod audire detrectantes dicentem unicuique nostrum: suadeo tibi emere à me aurum, ignitum probatum, ut locuples fias, & vestimentis albis induaris, & non appareat confusio nuditatis tuæ. Apocalypsi. 3. 18. audire pergimus verba, & doctrinam illorum, de quibus dicitur Ierem. 6. 30. Argentum reprobum vocate eos, quia Dominus projecit illos. Et Ezechielis 22. 18. Versa est mihi domus Israel in scoriam. Omnes isti æs, & stannum, & ferrum, & plumbum in medio fornacis: scoria argenti facti sunt.

Postremò petamus spiritum Veritatis, ut ipso docente omnia, & suggerente omnia, quæ nos Veritas docuit, & docet, non solum quæ dicta sunt nobis, atque dicuntur percipiamus. sed perficiamus.

3 Diligebas Puer dilecte Genitricem, tuam, diligebas Parentem nutritium, & educatorem tuum. Pateris tamen illam, pateris hunc tam acerbè dolere, ut nos
gau-

gauderemus, nobisque tuam præsentiā indulgens, & sapientiam communicans nobiscum ipse gauderes. Ut facias voluntatem Patris tui, qui te misit, & ut nos erudias, ad quos missus es, mœrore conficis, quos sumoperè diligis, & doles, quia ipse dolent, sed vincis dolorem amore Patris, & nostri.

Quod vincas amore Patris, qui te misit, non miramur. Quod vincas amore nostri ad quos missus es, non intelligimus: quid enim boni, undè nos ames habemus? Immo quid non habemus mali, unde averferis?

Si enim utilitatem attendis, vilissimi sumus. Si rusticitatem morum, durissimi. Si tarditatem ingenij tardissimi. Si animum beneficiorum immemorem, ingratiissimi: quæris tamen esse nobiscum, & nos alloqui, & docere; & ut doceas, audire non refugis: Fili, quid fecisti nobis sic? Ecce Pater tuus, & ego dolentes quærebatimus Te?

Utinam dolor Parentum, utinam dolor tuus doceret, quos verba non docent. Et si ex ore tuo sapientiam non discimus, ex dolore saltem disceremus amorem.

Non quærimus te, quia cum sollicitis, & de tua dolentibus absentia non dolemus. Neque dolemus, quia non amamus, neque amamus, quia non cognoscimus. Da nosse, ut amemus, da ut amantes doleamus, & cum dolore quæramus donec inveniamus, quæri volentem, immò etiam se non quæren-

rentibus offerentem, juxta illud: quæsierunt me, qui antè non interrogabant: Invenierunt me, qui non quæsierunt me: dixi: Ecce ego, Ecce ego ad gentem, quæ non invocabat Nomen meum. Isaia 65. 1.

Quæsimus autem, bone IESU, non interrogantes, quia gentium erroribus obvoluti, quærebatamus Præceptorem numeris omnibus absolutum, sed neque interrogabamus te, neque alios de te, quia latebat nos, te illum esse, & unicè esse, quem ignorantes quærebatamus. Invenimus verò te non quærentes, quia dum alios Doctores quærimus occurristi nobis, Nomenque tuum minimè invocantibus dixisti: Ecce ego, Ecce ego.

4 Sed quis hospes, bone IESU, Ierosolymis tridui spatio manentem, quæ domus, quæ mensa, quis lectus excepit? An prò foribus Templi de nocte mansisti, & gradus, quibus ascendebatur in Templum subditi quiescenti præbuere cervical? & panis ostiatim emendicatus mensam instruxit? An potius omni cibo abstinuisti? quid illo triduo actum sit, ignoramus.

Si nemo commiseratione tactus excepit hospitio, si manum ad stipem porrigenti, frustulum panis exhibitum est, numquid panem petebas, ut panem pane rependeres, pane videlicet Doctrinæ celestis? Sed Doctrina hæc numquid illa est, de qua dicturus eras: Doctrina mea non est mea. Si hæc est, cum doctrina tua aliud non sit, quam tu, vide obsecro; quid, prò quibus retribu-

buis. Prò fragmento enim atri, durique panis, Panem illum exhibes vivum, qui de cælo descendit. Tibi satis non est, docere nos verbis dulcioribus super mel, & favum, nisi unâ cum verbis prætereuntibus, Verbum immobile, indeficiens, Patrique coeternum in corda nostra illabar, præstans, ut illo invisibili cibo vescamur, quo vescuntur Spiritus Immortales. Quis charitatem, quis Liberalitatem istam dignè perpendat?

Quod si desiderio nos Doctrina tua pascendi, jejunio trium dierum tenue corpusculum attrivisti, quid dicemus? Numquid de jejunio interroganti respondisses: Alium cibum habeo manducare, quem vos nescitis? Meus cibus est, ut faciam voluntatem ejus, qui misit me, ut perficiam opus ejus, Esuris ergo, ut pascas, & esuries tua tibi cibus est, quia esuries ejusmodi, voluntas Patris est.

O si nos tuæ dulcedo Charitatis, atque faciundie ita caperet, ut ab ore tuo penderemus immemores cibi, nostroque experimento disceremus, non in solo pane hominem vivere, sed de omni verbo, quod procedit ex ore Dei. Pisce nos verbis, quæ procedunt ab ore tuo disertissime Puer. Immo pascenos Verbo, quod procedit ex ore Dei Patris tui, & nihil prætereâ esuriemus.

Ad hæc humi de nocte cubas, ut die illucescente radios tuæ Doctrinæ diffundas. Ut nostræ consulas quieti, nulla tibi quiescenti laxa dura, aspera, incommoda sunt.

sunt. Quies, cui nobis per tuam Sapientiam comparandæ inuigilas, ita dulcis tibi est, ut nihil de somno tuo labores. Somnum quantumvis durum mollissimum facit amor sapientiæ nobis impartientiæ.

Quid ergo nobis in grati animi testificationem agendum? Quoniam amore nostri somnum carpis ipsa vigilia molestiorem, nulla nobis amore tui gravis erit vigilia, sed memores verborum tuorum, Ego diligentes me diligo, & qui manè vigilant ad me inuenient me. Prouerb. 8. 17. vigilabimus semper ad te, ut inueniamus te

Deinde si nobis prò foribus Templi somnum capis, & nos vigilabimus ad fores tuas quotidie, & observabimus ad postes ostii tui, ut inuenientes te, inueniamus vitam, & salutem à Domino hauriamus. Prou. 8. 34. Ad cuius autem Templi fores vigilabimus, nisi ad fores illius, quod inimici quidem tui solvent, sed tu trium dierum spatio reedificabis? O Templum omni Templo religiosius, augustius, magnificentius, in quo inhabitat plenitudo Divinitatis corporaliter? Utinam ab huius Templi gradibus nunquam recedamus. Utinam ad valvas istas quotidie yigilemus, & ad postes venerabilis ostii observemus, ut oracula de Templo Sapientiæ audiamus, & diligentes diligamur.

Denique si tu quidem humi jacens dormis, sed cor tuum vigilat nobis, & prò nobis:

Studebimus primò, ita custodire cor nostrum,

strum, ut maximè tibi vigilet, quando sopore mortis oculi nostri claudentur. Ità dormientibus nō auferetur Lucis aspectus, sed clariùs illucescet.

Studebimus secundò, ità prævía oratione, sanctisq; desiderijs somnum capere, ut vel dormientes cogitemus de te, & resistamus tentatori, vti experiebatur Augustinus dicens: Domine memores mādatorum tuorum in somnis resistimus.

Studebimus tertio, acquisitioni sapientiæ Sanctorum per meditationem, & contemplationem, quæ dulcis quidam animæ somnus est, ut quantum fas est, & nos affirmare possimus: dormimus, sed nullo unquam tempore, magis vigilat cor nostrum, dum ità quiescimus.

6. Amissus, Puer amabilis, quæreris à Parentibus tuis. Quæsitus inveniris. Inventus interrogaris, cur tanti causâ doloris extiteris. Respondes autem. Quid est, quod me quærebatis? Nesciebatis, quia in his, quæ Patris mei sunt, oportet me esse?

Quænam autem ad Patrem pertinentia, tuam præsentiam requirebant? Numquid illa; Ecce dedi te in lucem gentium, ut sis salus mea, vsque ad extremum terræ? Isaia 49. 6. Distabat nimium tempus prædicationis tuæ. Ideò præ desiderio nos illuminandi, illud præoccupas, morem Patri gerens imperanti, quod ardentissimè imperari tibi desiderabas, & ijs volenti præcludere, quæ pleniori ætate perfecturus eras faciens, & docens.

Sed

Sed quænam arcana primis illis auditoribus tuis nota fecisti? Numquid argumentum intetrogationis, ac disceptationis tuæ fuerunt illa Danielis verba, 9. 24. Septuaginta hebdomades abbreviatæ sunt, super populum tuum, & super urbem sanctam tuam, ut consummetur prævaricatio, & finem accipiat peccatum, & deleatur iniquitas, & adducatur Iustitia sempiterna, & impleatur visio, & prophætia, & ungatur Sanctus Sanctorum? An illa ex psalm. 2. 7. Dominus dixit ad me, Filius meus es tu. Ego hodiè genui te?

Quoniam enim summus Amor tuus erat Pater; & maximè tibi cordi erat nostra felicitas, ideò cognitionem Patrisingerebas, & fecunditatem in gignendo Filio sibi consubstantiali innuebas, ut jam inde inciperent Homines fieri æternæ Vitæ participes: Hæc est enim vita æterna, ut cognoscant illum unum verum Deum, & quem sibi coeternum misit Filium vnigenitum.

Utinam cognitio Patris, utinam cognitio tui semper cumulationi luce refulgeat in cordibus nostris per Spiritum Sanctum, sine quò ritè cognoscere, sine quo amare, sine quo obtinere non possumus vitam, quæ Pater est, vitam, quæ tu similiter es, vitam deniq; ab utroque manantem, quæ Spiritus Sanctus est. O' Vitam, quæ sola Vita est, Vita beatissima, securissima, Indeficiens!

Et quoniam ad Vitam beatissimam pervenire non possumus sine via, & veritate, locum Danielis fortasse in medium produ-

xisti, ut innumeris cladibus attrita mortalitas, in spem denique erigeretur salutis, & Peccati finem accepturi, & iniquitatis delendæ. & adducendæ in Orbem terrarum Iustitiæ sempiternæ, & Sancti Sanctorum, de hostibus visibilibus, & invisibilibus, de Morte, atque peccato triumphaturi.

Gratias immortales, quas possumus, reddimus, ut nobis quoque utiliter oleo lætitiæ præ confortibus tuis inunctus fueris, & nobis quoque peccatum finem acceperit, & deleta iniquitas terræ: & adducta fuerit Iustitia sempiterna.

MEDITATIO IV.

De Christo Domino dicente

*Qui manducat meam carnem, &
bibit meum sanguinem, in me
manet, & ego in illo.
Jo. 6. 57.*

1 **C**onsiderandum est quomodo manducans carnem, & bibens sanguinem Domini maneat in ipso.

Omissis aliis, triplici tantum utamur similitudine ad præfata verba interpretanda. Igitur coelestis mensæ Conviva manet in illo, quem manducat, & bibit, primo

Undè quidem uti manet palmes in vite, secundò uti ferrum in igne, tertio uti amans in amato.

Quoad primum. Sicuti palmes ità viti, undè processit, coniungitur, ut nihil magis timeat, quam indè separari, undè vitam, viriditatem, fructus accepit, & accipit: Ità Justus ab illa vite progerminans, quæ dixit: Ego sum vitis, vos palmites: nihil magis amat, quam suo inhærere Principio, undè vivit, undè vernat, undè botros sanctorum operum implet liquore, hoc est amore dulcissimo, quo tantopere delectatur cœlestis Agricola. Rursum sicuti palmes, ut fructum plus afferat, libenter patitur falcem superflua amputantem: ità justus per Fidem, & Charitatem dominicæ Viti inhærens, non contentus foliis exteriorum operum, ut fructum plus afferat de corde puro, & fide non ficta procedentem, diligentis coloni falcem non refugit, curas inutiles, & fluxa desideria resecantis.

Quoad secundum. Sicuti ferrum naturam quodamodò suam in igne dediscens, fit de obscuro lucidum, de frigido ardens, de resistente, sive cōflatori, sive malleatori tractabile, & in varios usus ad normam artificis efformabile: ità justus manens in illo, de quo dicitur Deuteronom. 4. 24. Dominus Deus tuus ignis consumens est: consumens videlicet quicquid inest vitii naturis ad purum excoquendis: Justus inquam in Domino manens in ferri morem

obscuri, frigidi, ac duri, illuminatur, accenditur, aptusque redditur cujusque operi, sive fusorio, sive malleatorio ad nutum opificis peritissimi.

Quoad tertium. Si omnis amans egreditur à se ipso, & magis est ubi amat, quam ubi degit: ità longè potiori jure, qui manducat carnem, & bibit sanguinem Domini, egreditur à se ipso, & magis est, ubi amat infinitum bonum, quam ubi nihil habet præter se ipsum omni bono carentem.

Ego sum Bone IESU, tamquam ramus inutilis, excindendus, & in ignem mittendus, & semper arsurus. Tua tamen Potentia, tua Sapientia, Charitas tua potest me facere de sarmento inutili, palmitem fructiferum in vite non solum manentem, sed mansurum, semperque mansurum. Palmiti solum convenit, aut vitis, aut ignis, dicebat Augustinus. Maneam Domine IESU in vite ne separatus a te ignem mihi solum videam superesse.

Ego sum animi ferro durioris, rigidioris, tenebrosioris. Mitte igitur in me illum ignem, quem de Cælo misisti, & illumina tenebras meas, & frigus dissolve, quo rigeo; & ferrei animi vince duritiem, ut faciat de me quicquid operis manus tua voluerit.

Ego denique serò te cognovi Pulchritudo tam antiqua, & tam nova, serò te cognovi. Amare verò nunquam didici. O si tandem aliquandò esse desinerem in rebus

bus caducis ! O' si desinerem esse in me ipso ! Et prò bonis caducis , & prò me ipso , inciperem esse in illo , in quo sunt omnia , & omnia unum sunt , & extrà quod quicquid est , nihil est !

2 Considerandum est , quomodo maneat Dominus in manducante corpus , & bibente sanguinem suum . Dicendum autem est , manere sicut Gubernatorem in puppi , sicut Dominum in domo , sicut spiritum in corpore , & potissimum sicut alimentum in alito .

Manet igitur ut Gubernator in puppi , non sedens otiosus ad clauum , sed clauum regens , sed vela sanctorum desideriorum explicans , sed extantes scopulos , & cæca saxa devitans , sed ad Portum Æternitatis inoffenso cursu deducens . Quis pelagus , quis procellas timeat , illo gubernacula moderante , qui imperat ventis , & mari , & sit tranquillitas magna ? Quis de naufragio sit sollicitus , si tu puppim regas , qui cum adhuc mortalis inter nos versareris . venisti in altitudinem maris , & tempestas demersit te , ne demergeret nos ? Et tribus diebus , ac noctibus fuisti in ventre cæti , ut nos eriperes voracitati mortis æternæ ?

Ut Beneficiæ nobis impensæ prò viribus respondeamus , nulla prò te pericula nostrum navigium pertimescet . Tibi tamquam remiges parebunt omnes potentiæ nostræ exteriores . Tibi parebunt interiores . Tibi ad nutum voluntas obtemperabit . Tibi vigilabit intellectus .

Et quoniam ubi Crux, & Amor Crucifixi, ibi Dominus; ut nunquam mecum esse desistas: erit rati meæ prò malo Crux tua, & illam erigam in medio cordis mei. Erunt vincula tua prò funibus antennas è malo suspendentibus. Erunt prò velis lintea, quibus in tumultu corpus exanime involutum fuit. Nulla carbasa plenius Divini Spiritus auras excipient. Prò quolibet armorum genere, erunt virgarum fasces, erunt flagella, spinæ, mallei, clavi, lancea. Prò commeatu vinum felle mixtum. An potius sanguis, & aqua, faucio nobis erumpentes è latere, in lavacrum simul, & alimoniam immortalem?

3 Apocalypf. 3. 20. Qui stat ad ostium, & pulsat, & dicit: Si quis audierit vocem meam, & aperverit januam, intrabo ad illum, & cenabo cum ipso, & ipse mecum: Manet hic apud hospitem suum, sicuti Dominus in domo sua. Sicut enim Domino patent singula cubacula ad sedendū, ad colloquendum, ad agendum, ad quiescendum: ita Hospiti divino patent singulæ potentia animæ nostræ.

Patet memoria ingredienti ad sedendū, ad colloquendum, ad agendum, ad quiescendum, quoties illius beneficia recensemus. Neque sedet hospes mitissimus, aut quiescit nihil agens. Sed agit quicquid intrā nos agitur. Ipse enim in memoria, nostrā suis coloribus, & lineamentis animat imagines sui creantis, conservantis, gubernantis, hominem assumptis, nascentis.

tis in antro Bethlemio, morientis in Cruce, prodeuntis è tumulo, redeuntis ad Patrem, Spiritumque suum è Coelo mittentis

Patet intellectus illius ingressū opperiēs, qui novit quiescens agere, silensque facundissime loqui, eo præcipuè tempore, quo de virtutibus acquirendis, quo de sanctitate in nobis, & aliis promovenda, quo de peccatoribus ad meliora consilia revocandis, cogitamus. Quid quando spectaculum, contemplatoris admiratione suspensi, Pater est, Ipse est, Spiritusque Patri consubstantialis, & sibi?

Patet voluntas totis votis venientem excipiens; si moram facit, ardentè expectans, donec veniat; ad pedes præsentis procidens, & expansis ulnis amplectens, & fortiter tenens, ac dicens: Non dimittam te, donec benedixeris mihi. Gaudet cum gaudente, manet in manente, cumque verissimum illud sit: Minus te amat, qui tecum aliquid amat, quod non propter te amat, enixè petit ut unicè amemus ipsum propter ipsum, neque nos nisi propter ipsum, & omnes in ipso, sicut jubet Lex Amoris lucens ex ipso.

Concurrentibus denique singulis in unum potentiis, memoria, intellectu, voluntate, patet cœnaculum grande stratum, latitudine Charitatis amplum, Sapientiæ apparatu splendidum, pictis auleis parietes vestientibus ope memoriæ exornatum, ubi Dominus sedet ad mensam, & ille cœ-

nat nobiscum, & nos cum ipso.

4 Sicuti spiritus manet in corpore, ita Dominus manet in iusto eucharistica dape refeito. Sicuti enim spiritus unitus corpori, totus est in toto, & in qualibet parte totius est totus, vivificans, movens, tribuens robur, calorem, colorem, pulchritudinem, vim ad videndum, audiendum, olfaciendum, gustandum, atque tangendum: ita Christus Dominus virtute Sacramenti unitus iusto, totus est in toto, totus in qualibet parte totius: totus in corpore, totus in anima: totus in sensibus externis, illos in officio continens; totus in phantasia illam rationi subiiciens: totus in ratione, illam illuminans; totus in voluntate, illam incendens: totus in tota anima, illam suæ Divinitatis participatione vivificans, movens, roborans, formosam reddens, habilemque ad videnda, quæ oculus non vidit, ad audienda, quæ auris non audivit; ad currendum in odorem unguentorum suorum; ad gustandum quam suavis sit Dominus Pater suus, quam dulcis ipse sit, Spiritusque suus; denique ad experimentalis quadam cognitione tangendum, & amplexandum illum, qui superat omnem sensum & amplexum, cum solum sit amplius quidam hominis interioris, atque de illo dicat anima sancta: Tenui eum, nec dimittam.

Non recedat à me, Domine Spiritus tuus, ne te recedente, quicquid habeo de te boni, recedat. Sine te anima vivo in
cor-

corpore mortua est, exanguis, frigida, decolor, deformis, & scatens vermibus est. Expers omnis virtutis activæ non videt te. Non audit vocem tuam. Non percipit fragrantiam vestimentorum tuorum. Non esurit Justitiam. Non sitit Fontem aquæ vivæ. Et quæ tibi uni inhærere debebat, serpentum spiris, & amplexibus prefocatur.

Non hac morte moriatur anima mea, sed moriatur morte Justorum, quibus vivere Christus est, & mori lucrum. Moriar mihi, & omnibus, quæ Deus meus non sunt. Moriar mihi, nè moriar: & vivat unicè in me Spiritus ille, sine quo nemo unquam vixit, vivit, aut vivet. Præsta in singula momenta centies mori, & milles, quam peccando expertem fieri vitæ, extrâ quam vita non est.

Denique Dominus est in manducante carnem suam, & bibente sanguinem suum sicut alimentum in alito. Triplex autem differentia inter cibum corporeum, & Eucharisticum attendenda est.

Differentia prima est, quia alimentum, quo nostra corpora nutriuntur, vitæ particeps esse non potest. Mortibus enim vivimus, ajebat ille. At Cibus eucharisticus vivius est. Est enim panis vivus, qui de cælo descendit.

Differentia secunda. Alimentum corporeum, sive solidum, sive liquidum, convertitur in substantiam comedentis, & bibentis. Alimentum eucharisticum, non

convertitur in comedentem, & bibentem: Sed comedens, & bibens transformatur in similitudinem, & quodamodò vertitur in substantiam alimenti, juxtà illud, quod D. Augustino dictum est: Cresce manducabis me, nec tu me mutabis in te, sed tu mutaberis in me.

Differentia tertia. Post conversionem alimenti corporei in alitum, nihil de alimento remanet in alito, præter partem infimam alimenti, nempe materiam, quæ sub hac, vel illa forma latebat. At Alimento eucharistico, non solum manet in alito, integris adhuc speciebus eucharisticis, sed illis etiam consumptis, de alimento remanet, quod optimum est. In iusto non remanet panis vius, qui de cælo descendit, secundum humanitatem re ipsa præsentem: At remanet secundum hypostasim, remanet secundum Divinitatem.

Quot differentias, tot prodigia Divini Amoris attigimus. Tot argumenta nostræ felicitatis: Cibus, & potus animarum nostrarum, vius est, & vius vita, extrà quam non est alia. Ergo nullam aliam, quæramus vitam, unde vivamus.

Ad hæc non mutatur in nos, sed nos in ipsum convertimur. Quid felicius? Quid optabilius? Illud unicè mihi dolendum est, quod hætenus ità dissimilis sum, convertenti nos in se ipsum. Ille siquidem est candor Lucis æternæ. Ego adhuc tenebræ, & nondum lux in Domino. Ille speculum sine macula. Ego maculæ, & sordes. Ille
cum

cum malediceretur non maledicebat . Ille in qua nocte tradebatur , se ipsum nobis tradebat . Ille . Si cetera persequar , Bone IESU , destituor animo , & quo me vertam nescio . Nam quo me vertam , dum illa recolens ; nec tu me mutabis in te , sed tu mutaberis in me : Considero te , & considero me ?

Postremum Amoris prodigium est panis viuis , non desinens esse in nobis , secundum optimam partem sui , postquam consumptis accidentibus Sacramenti esse desit in nobis Humanitas . Quid hoc rei sit , doce nos omnipotens Sapientia .

Accuratiùs igitur in hoc ultimo meditationis puncto , consideremus , quomodo cibus , potusque cœlestis , non solum paucis instantibus à manducatione , & haustu sacramentali , sed perenniter maneat in illo , qui manducavit , & bibit .

Desinit in illo esse Humanitas Verbi , sed non Divinitas . Non manet autem solum per Essentiam unicuique intimam , & essentialiter indistantem : non solum per potentiam creantem , conservantem , & omnia in omnibus agentem : non solum per præsentiam Sapientiæ omnia perfectissimè intuentis , quæ omnia communia sunt iustis , & peccatoribus . Neque solum manet per singularem beneficentiam , communicantem animæ gratiam sanctificantem , intellectui sapientiam , voluntati charitatem , quæ iustis omnibus communia sunt ; sed manet præterea per modum cibi ,

potusque ineffabilis, quod solum convenie-
dignis Sacramenti Eucharistici suscepto-
ribus.

Sed quid agit, inquires in Angelicę men-
sę convivis Filius Dei in forma Dei, se
habens per modum cibi, & potus?

Quos transformavit in se, transformare
non cessat. Alit vitam, quam dedit, &
per modum cibi solidi, vires, quę quoti-
dię atteruntur, reparat, roboratque ad cur-
rendum, ut comprehendatur propter quod
curritur. Roborat ad luctandum, non
adversus carnem, & sanguinem, sed ad-
versus Principes, & Potestates, adversus
mundi Rectores tenebrarum harum, con-
trā spiritualia nequitie in coelestibus. Ro-
borat ad pugnandum, & expugnandum
Regnum celorum, quod vim patitur; &
quod soli rapiunt violenti.

Per modum verò meri potentissimi si-
mul, atque dulcissimi delectat, calefacit,
exhilarat, timorem pellit, inebriat.

Delectat, quia sitienti sapientiam, &
sanctitatem nihil dulcius est Filio Dei sa-
pientissimo, sanctissimo, atque pulcher-
rimo.

Calefacit, quia dulcedo, & amabilitas
Dei in fonte suo gustata, amore mirabili
cognoscentem incendit.

Exhilarat, quia Spiritus jucundissimi la-
ticis per venas animę, cordisque diffusus,
exilire præ gaudio facit.

Timorem pellit, quia Charitas diffusa
in cordibus nostris, per Spiritum Sanctum,
qui

qui datus est nobis, foras mittit timorem; atque adedò ad omnia pericula facit intrepidus. Quid enim timeant, qui secum habent dicentem: Ego sum, nolite timere.

Denique inebriat, non mero, sed vero, ut docet Divus Bernardus. Imò, & mero, & Vero. Inebriat enim Vero, quod est purum verum, seu merum verum, quoniam est ipsa Veritas. O' Verum! O' Merum! O' Merum Verum! Utinam alii, utinam ego, non alio, aut Mero inebriemur, aut Vero.

MEDITATIO V.

*De Christo Domino exaltato à
Terra, & omnia trabente
ad se ipsum.*

PRima ad Corint. 4.9. Puto quod Deus nos Apostolos novissimos ostendit, tamquam morti destinatos: quia spectaculum facti sumus mundo, & Angelis, & hominibus.

Si Apostoli morti destinati facti sunt spectaculum mundo, & Angelis & hominibus: quanto magis Apostolorum Dominus Cruci durissimis clavis affixus, spinis redimitus, lacero innumeris vulneribus corpore geminoq; tamquam dux Latronum Latro-

trone hinc, inde stipatus?

Spectaculum insolens trahit ad se om-
nium oculos, sed non corda. Tria sunt enim
genera spectantium. Spectant alij curiosita-
te ducti. Alij odio, atque nequitia. Illis ni-
hil insulsius. Istis nihil crudelius excogi-
tari potest. Faceſſite hinc barbari ſpectato-
res, & dolete de malis veſtris, non gaudete
de malis, malorum omnium depulſo-
ris.

Alij verò ſpectant, & dolent, & multum
dolent, quia multum amant. Neque horum
deſiduoſus eſt amor, ſed alacer ad agendum,
fortis ad patiendum, Dominoque morienti
commoriendum. Ardua quæque aggredi-
tur, & molitur amore pro ſe patientis, &
morientis. O ſpectantium genus amabile!
Cur veſtro lateri non adjungor, ut vobi-
ſcum adhæream lateri Amoris de Cruce
pendentis?

Exaltatus ille à terra traxit vos cum om-
nibus alijs ad ſe. Cur adhuc non traxit me?
Non defectu fanè trahentis non traxit.
Nam & vis trahentis omnipotens eſt; Et
ille nihil intentatum reliquit, ut me quoque
traheret inter alia, quæ traxit. Ergò non
traxit, niſi vitio reſiſtentis. Numquid reſi-
ſtam ſemper? Et omnipotenti reſiſtam, ſum-
mèque Sapienti, & ſummè Amanti?

Vos qui trahenti ita feliciter, ita prom-
ptè ceſſiſtis, afferte opem miſero, & docete
qua ratione poſſim currere poſt vos, & a-
mare, quod amaſtis, & facere, quod feci-
ſtis.

Sed

2 Sed qui non trahitur ad trahentem omnia ad se, attentè perpendat quibus ipse quoque moveri possit impulsibus, quibus catenis innecti, ruptisque vinculis miseræ captivitatis, captivus fieri Amoris Crucifixi.

Perpendat igitur primò loco nuditatem speciosi forma præ filiis hominum. Pepercit ignis camini babylonici vestimentis trium puerorum, ut advertit Divus Chrysostomus, ne versis in cinerem vestibus, prius ingenuos adolescentes, nuditatis pudor incenderet, quàm flamma corripere. Parci-
tur vestibus, consulitur nuditati Ananiæ, Azariæ, Misaelis: non consulitur illius nuditati, qui non tres solùm, sed innumeros Babylonicis Pueris pares innocentie lumine sicut vestimento circumdat.

Nuditatis ignominiam innocentissimus Dominus sensit magis, quam clavos pedum, & manuum; quam spinas Capitis, quam nervorum, membrorumq; violentissimam tensionem. Amarissimum tamen tormenti genus coram Populo tam frequenti, trium horarum spatio perferre non renuit. Et ut ostenderet, quam acerbè simul, & patienter, ejusmodi probro affectus fuerit, dixit Psalm. 21. 19. Ipsi verò consideraverunt, & inspexerunt me, diviserunt sibi vestimenta mea, & super vestem meam miserunt sortem. Consideraverunt, & non intellexerunt, inquit D. Aug. in Psalm. 21. Conspexerunt, & non viderunt. Usque ad carnem oculos, non usque ad Verbum cor habuerunt, Ad.

Adde possumus: Usque ad ignominiam oculos, sed non usque ad causam ignominiae, & Charitatem Verbi, cor habuerunt.

Quis non amet Verecundiam tot probrorum toleratricem, ut penas inverecundiae nostrae persolveret? quis non toto feratur impetu in candorem Lucis aeternae tanto rubore suffusum, quia nos ita fuimus impudentes! Utinam sicuti nubes occidente Sole, purpureo colore tinguntur: ita nostris vultibus, & animis excipientes radios Divini Solis in suo occasu purpureos, disceremus de plenitudine omnis Innocentiae, de plenitudine omnis modestiae, ac verecundiae, interioris, exteriorisque rubore Hominis erubescere, coram oculis Civium beatorum, coram oculis divinae Parentis, coram oculis Iustitiae Solis cuncta cernentis. Erubescamus toti, quibus tot insunt, ac tanta, unde non possumus, nisi confusione totos obtinente, confundi. Si hoc egerimus, jucundissimum illi de nobis specimen exhibebimus, qui tam logubre pro nobis factus est coelo, terrisque spectaculum.

Perfectae nuditati Christi Domini de Cruce pendentis, licet plerique Scripturarum opponantur Interpretes, immo, & piarum mentium revelationes: adstipulatur tamen D. Ambrosius in cap. 23. Lucæ dicens: Nudus Crucem ascendit; nudum ecce video. Talis ergo ascendat, qui saeculum vincere parat, ut saeculi adiumenta non quaerat. Victus est Adam, qui vesti-

menta quæſiuit. Vicit ille, qui veſtimenta depoſuit. Et talis aſcendit, quales nos Authore Deo, natura formavit. Sed Adam, inquit Taulerus, cap. 33. Exercit. Vitæ Chriſti: ob amiſſam innocentiam tegeretur ſe, & veſtibus operire feſtinavit: Chriſtus verò nudatus eſt, eò quod integram, & illæſam ſervarat innocentia puritatem, nec ullo ei alio tegmine opus erat.

Idem ſentiunt Gretſerus lib. 1. de. Cruce cap. 22. Suar. in tertiam part. quæſt. 46. art. 8. ſec. 4. Franciſcus Lucas, & Cornelius à Lapide in cap. 27. Matthæi.

Quomodo cūque ſe res habeat, illud certiffimum eſt, Chriſtum Dominum ad hæc, & longè plura, & magis indecora perferenda fuiſſe propenſum, licet fortè magis conſultum voluerit dolori, & commiſerationi ſpectatorum, quam ſiti ardentiffimæ probra quælibet tolerandi.

3 Qui ad omnis centrum Amoris trahentis omnia ad ſe cum omnibus aliis trahi deſiderat, perpendat ſecundò nouum, & intolerabilis genus dedecoris, & ignominia.

Oſtendit olim Dominus Zachariæ 3. 1. Jeſum Sacerdotem magnum ſtantem coram Angelo Domini; & Sathan ſtabat à dextris ejus, ut adverſaretur ei. Et JESUS erat indutus veſtibus ſordidis, & ſtabat antè faciem Angeli.

Sed quid Sacerdoti, Zachariæ oſtenſo; cum Sacerdote ſecundum ordinem Melchizedech, ſuſtinente perſonam omnium peccato-

catorum, coram cœlitibus universis, & præcipuè coram Patre, in cujus conspectu cœli mundi non sunt? Videbas Domine IESU Sathanam à dextris tuis adversantem tibi; videbas te peccatis omnibus coopertum, & qui peccatum non noveras, factum prò peccatoribus peccatum. Videbas Spiritus immortales, videbas Patrem refugientibus oculis aspicientem, & abominantem sordidas vestes, quibus eras indutus. Erat tibi magno pudori nuditas corporis coram multitudine confertissima insultantium, deridentium, maledictis ferientium. Sed quantò majori confusione operiebant faciem tuam vestes inquinatissimæ, quibus toti cœlesti Curix, quibus Patris oculis eras horrore?

Ergo non solum peccatores super dorsum tuum araverunt, & morte turpissima condemnarunt, & manus, pedesque affixerunt Cruci, & animam merore acerbissimo confecerunt, sed etiam pudore pudorem omnem excedente, faciem operverunt. Sed si hoc ità se habet, si te peccatores tanto probro affecerunt, suisque te sordibus contaminatum erubescere coegerunt in conspectu Patris tui: quo ego te replevi pudore, qui omnium inquinamenta, sordesque longè transgredior?

Ego igitur, ego, sicuti fui pars maxima tui luctus, tuæque tristitiæ, & sicuti gravissimè omnium te flagellis cecidi, spinis circumdedit, clavis trajeci; ità præ cæteris in summum te ruborem adduxi coram Patre

tre tuo, & coram oculis tuis erubescen-
tibus de te vestibus meis induto, propter
me.

Quid igitur mihi agendum est pro te ;
qui tantum dedecus, tantumque ori tuo
injectum pudorem pertulisti pro me ? Non
erubuisti vestes, non erubuisti sordes meas
tibi impositas. Non erubuisti me. Num-
quid ego ludibria tua, numquid ignomi-
niam Crucis, numquid Regem dolorum,
simul, & probrorum, erubescam ? Propi-
tius mihi sis, non erubescam.

4 Trahi desiderans ad quem trahuntur
omnia perpendat tertio illa Verba ex Psal.
145. 5. Considerabam ad dexteram, & vi-
debam, & non erat qui cognosceret me.

In Passione sua, inquit Bellarminus.
Multos videbat Christus Dominus à sini-
stris : idest inimicos, & adversarios : A
dextris autem, idest amicos, & notos nul-
los habuit. Nam & Evangelista dicit : Sta-
bant autem omnes noti ejus à longè. Et
Petrus ipse, qui præcipuus erat amicorum,
cum juramento dixit : Non novi hominem
hunc. Rectè igitur Dominus dicebat :
Considerabam ad dexteram, hoc est ad
auxilia amicorum, & videbam num quis
mihi socius, & amicus esset, & non erat,
qui cognosceret me, idest nemo se ex do-
mesticis esse, & familiaribus meis profite-
ri audebat.

Sed parva sunt ista. Non solùm te ho-
mines dereliquerunt. Pater tuus dereli-
quit te. Ità nè ? Pater tuus sic dilexit mun-
dum,

dum, ut Filium suum unigenitum daret ? Tibi, ut nobis parceret, non pepercit ? Posuit in te iniquitates omnium nostrum. Propter scelus populi sui percussit te ? Sed numquid etiam è Cruce pendentem, toto corpore lacerum, cruentum, siti, tristitia que confectum ità deserere potuit, ut nè ultima quidem verba promentem, & jam jam expiraturum aspiceret, quoad illa, quæ pertinebant ad salutem corporis tui ? Audivit quidem, & pro tua reverentia cum clamore valido, & lacrymis clamantem pro nobis exaudivit : sed morti durissimæ non eripuit morientem. Ergò ità dereliquit te, ne dereliqueret me, qui toties venam aquarum viventium derelinqui, ut per viam Ægypti, vel Assiriorum incensens biberem aquam turbidam fluminum terras, non animas fecundantium, nihilq; societatis habentium, cum illimi Fonte Sapientiæ tuæ.

Ego desertor legis tuæ, ego desertor tui, qui non amas, & deseris, sive justos, sive peccatores, illos inhærentes tibi amantissimè fovens, istos verò fugientes à te persequens, & volentes deserì, minime derelinquens. Cur mutatis vicibus, tu ità durè desereris, ego non deseror ? Cur nè servus nequissimus deseratur, Filius amantissimus in summis doloribus derelinquitur ?

Utinam discā ferre pro te omnes erumnas omne desolationum, omne derelictionis genus, memor Patris tui, qui te deseruit, ne desereret me : Memor tui, qui vo-

lui.

Iuisti dicere: Deus Deus meus, ut quid dereliquisti me: nè servus nequam à Patre suo desereret, ne à te derelinqueret.

5 Perpendatur quarto loco sitis illa, unde pendens è Cruce dicit: Sitio.

Drogo Serm. Dominicæ Passionis: quid, inquit, sitis mi IESU? Ergo ne plus cruciat sitis, quam Crux? De Cruce files, & de siti clamas: Sitio. Quid? Vestram Fidem, vestram salutem, vestrum gaudium. Plus animarum vestrarum dolores, quam Corporis mei cruciatus me affligunt.

Drogoni consonat D. Augustinus dicens: quod verò sitire se in Cruce positus dicit, Eidem incredulæ Gentis concupiscit. Sed è contrà acetum malitiæ porrigunt, quia vinum Sapientiæ, quod à Deo acceperant, peccando corruperant. Tom. 10. Serm. 1. in Passione.

Idem in Psal. 68. Sitis ipsius erat, quando dixit mulieri: Sitio, da mihi bibere. Fidem quippe ipsius siciebat. Et de Cruce, cum diceret: Sitio, Fidem illorum, quærebat, prò quibus dixerat: Pater ignosce illis, quia nesciunt, quid faciunt. Sed illi homines, quid propinarunt sitienti? Acetum. Acetum enim vinum vetus dicitur. Merito de vetere homine propinarunt, quia novi esse noluerunt. Quare novi esse noluerunt? quia ad titulum psal-mi huius, ubi scriptum est: Prò iis, qui commutabuntur, non pertinuerunt. Hec Augustinus post medium Concionis primæ in primam partem Psalmi citati.

Ab.

Absit à nobis Domine ut veterem hominem exuere detrectemus. Absit, ut peccando vinum Sapientiæ corrumpamus: & Fidem nostram, & Sapientiam sitienti, acetum prò vino propinemus.

D. Augustino subiiciamus Diuum Gregorium Nissenum, à quo si quæramus, quid sit illa sitis, respondebit esse desiderium amoris nostri. Quia enim Dominus, nihil magis amat, quam amari, ideò sitit firiri.

Ergo amemus Amantem, & sitientem, sitiamus, & non utcumque sitiamus, sed sitiamus pendentem è Cruce, uti pependit: & horrentem spinis, sicut inhorruit, & derelictum à Patre, uti derelictus est; desiderantes videlicet fieri ex toto corde, consortes illius Crucis, clavorum, spinarum, derelictionis. Ità sitienti potum, quem desiderat exhibebimus, juxta id, quod pius Vates cecinit

Quæ petis in tantis, sitiens solatia pennis,
A nobis, non à fontibus, illa petis.

6 Postremò attendamus aliud genus sitis planè inusitatum, atque mirabile. Quid sitit Dominus clamans: Sitio? Ad suæ Charitatis magnitudinem ostendendam, sitit plures, sitit acerbiores, sitit diuturniores pēnas. Et quoniam imminente morte, videbat sibi facultatem adimi, plura patiendi, ideò, antequam diceret: Sitio: Dixit Deus, Deus meus, ut quid dereliquisti me. Querebatur nimirum, se derelictum à Patre, non quia sine levami-

ne durissima pareretur ; sed quia suis criminibus, ac doloribus, modus decreto immutabili statueretur . Dolebat igitur, aiebat D. Bernardus, non propter tormenta, quæ patiebatur, sed propter tormenta, quæ pati non dabatur ulterius .

O' sitim Amoris ! O' sitim dolorum !
Sicim hanc sitiamus .

Et quoniam ille vivens, & moriens non solum sitivit aquas Poenitentiae nostrae, Fidem nostram, Sapientiam, Charitatem, opera nostra, Animas nostras : Sed pro salute Animarum nostrarum omnes illas sitivit aquas, & omnia flumina, quæ Charitatem suam obruere, & sitim extinguere non potuerunt ; & ideo novas calamitatum, & penarum aquas, & nova flumina expetivit, præter illum torrentem, de quo in via bibit ; & præter illam aquarum molem, de qua dixit : Veni in altitudinem maris, & tempestas demersit me : optemus, & nos pro ipso desiderium vehementissimum patiendi omnia, quæ Patri ipsius, ipsique placuerint .

O' si cor nostrum ita incalesceret, ut quoties adversa ingruunt, possemus dicere cum Indiarum Apostolo : Plura Domine ; plura ! Imò utinam possemus dicere cum ipso Amore Crucifixo, novas, & graviores penas sitiente : dum vita deficeret : Deus, Deus meus, ut quid dereliquisti me : quia vita jam, & viribus deficientibus, non pateris me plura pati pro te ?

MEDITATIO VI.

*De Aperto Latere Domini in
Sepulchro jacentis.*

Post lacrymas ad vulnera pedum,
manuumque in tumulo jacentis
affusas, restat adhuc, amantissi-
sime JESU considerandum La-
tus immani vulnere patens. Dolorem in-
juriosæ, diræque trajectionis jam vita cas-
sus percipere non potuisti. Mater sola per-
cepit, lanceam cordis exanimi scrutatri-
cem, toto corde recipiens, dolensque ad-
huc odia peccatorum effervescere in de-
functum, conceptamque, sævitie nova, ex-
ercere sævitiam.

Gavisa tamen est, sinum potius aper-
tum fuisse, quam crura confracta. Gavi-
sa est, quia juxta prædictionem: Os non
comminuetis ex eo: Ossa integra argu-
mentum erant non solum Divinitatis in-
violabilis, & illæsæ: verum etiam Huma-
nitatis infractæ adversus omnem vim ho-
stium, ærumnarum, vulnerum, crucia-
tuum. Gavisa est, quia dum vulneraba-
ris, vidit de latere Adami, non de terra
terreni, sed de Cælo cælestis dormientis in
Cruce Sponsam Ecclesiam prodeuntem,
una cum sanguine, & aqua: cum aqua vi-
delicet Baptismi, undè mundabatur: &
cum

cum sanguine vivifici corporis tui , undè nutrienda erat , & usque ad consummationem sæculi inebrianda .

Arcanorum igitur conscia , & prænuncia futurorum in vertice montis Calvariæ , de cujus lateris dolebat vulnere , de fecunditate gaudebat : eoque magis gaudebat , quò tibi ad eò cordi erat ista fecunditas . Ad hoc enim in hunc mundum veneras . Ad hoc laboraveras , fleveras , interieras . Huc omnia tui cordis vota spectaverant .

Ergo & nos tuæ , & si fas est ita loqui , nostræ Parentis . exemplo doleamus , & gaudeamus . De injuria tibi irrogata doleamus : De Ecclesia ex isto latere genita gaudeamus . Quod si Ecclesia Fideles omnes ; numquid omnes , & singuli ex isto corde prodivimus ? Bone IESU , quid hoc rei est ?

Quandò Pater tuus ab initio mundi ait : Faciamus hominem ad imaginem , & similitudinem nostram , nos in Adamo tuis manibus condidisti . At nunc eosdem : Audite celi , quæ loquor : Eosdem in Adamo , & ex Adamo secundo regenerans in lucem edis , in lucem miserationum tuarum : in lucem illam , quâ inhabitas inaccessibilem . Sed undè nos edis ? Edis de latere , de sinu , de corde tuo .

O' si nunquam celsissimæ originis oblivisceremur ! O' si viscerum tuorum , undè prodivimus , & cordis referremus ingenium !

2 Sed numquid egressis de latere tuo patet regressus ?

Q

Imò

Imò verò latus, quod patuit, ut nos de seipso in vitæ novitatem regeneraret, jugiter patet, ut ad ipsum redeamus, per amorem, qui nunquam ineffabilis beneficii sit immemor.

Rursum patet, ut perenniter ingrediamur, & egrediamur, & pascua inveniamus. Patet ut ingrediamur ad spectanda tuæ viscera pietatis, & ad contemplandam lucem Divinitatis tuæ. Patet ut egrediamur ad agendum, ad gloriæ tuæ cooperandum, ad nos virtutibus exercendos, ad animas tibi quærendas, periculis eripiendas, adducendas in tutum, & in abscondito vultus tui, & in cordis abscondito abscondendas. Sive quiescamus in te, si-
ve laboremus pro te, ubique dulcissima pabula invenimus; Nam & videre faciem tuam contemplando, & facere voluntatem tuam agendo, cibus est suavissimus. Cibus est, quem faciem tuam, quem voluntatem tuam ignorantes ignorant,

Ergo quod patuit, semper pateat. Pateat innocentibus. Pateat poenitentibus. Peccatoribus pateat nondum quidem redeuntibus, sed redituris, Pateat, & mihi nequissimo omnium peccatorum, Novi latitudinem sinus; novi amplitudinem cordis, quam limites nulli definiunt. Continet coelum, terrasque. Continet omnia. Sed adhuc in immensum protenditur, & ad meliora converti, & reverti ad cor cupientes expectat.

Nemo dubitet. Nemini locus deesse

po-

potest intrare latitudinem confinia nescientem.

3 Discipulus ille, quem Domine diligebas, super pectus tuum in coena recubuit. Nulli praterquam Ioanni, tanti argumentum Amoris exhibitum est. Quomodo ergo pectus, in quo sunt omnes thesauri Sapientiae, & Scientiae Dei nunc patet, non solum Ioanni, sed omnibus, & iustis, & peccatoribus, & grandi apertum. vulnere patet, & magnis vocibus, omnes invitat ad accessum, ad ingressum, ad confessionem, & confessionem ad mensam omne delectamentum, & omne genus refectio- nis habentem?

Qui stat ad ostium animarum nostrarum; & pulsat, & dicit: Si quis audierit vocem meam, & aperverit januam, intrabo ad illum, & coenabo cum illo, & ipse mecum; nunc vocat omnes ad se, & ne ullus expectet ad januam, reserato lateris ostio admittit omnes, & intromittit antequam pulsent, antequam vocent: & sedere facit discumbentes, ad mensam, & praecinctus ministrat dicens: Comedite Amici, & bibite, & inebriamini carissimi,

Si quid ferculorum, si quid potionis ministratur, si qua ibi quiete fruantur convivae, quæris, quære ab Augustino dicente: Loginus aperuit mihi Latus Christi lancea, & ego intravi. Hic fidenter habito. Hic me jucunde reficio. Hic quiesco securus,

Idem ergo sinus domicilium est, cenaculum est, cubile est, Domicilium ad ha-

bitandum. Coenaculum ad gustandum, quam dulcis sit Dominus, & suavis. Cubile ad recumbendum in coena non supra, sed intra pectus Domini. Alias alii domos quærant, ubi degant. Alias coenationes ad celebranda convivia, etiam Salomonis ædibus, etiam Assueri hortis magnificentiores: Alios ad quietem comparandam lectos lectissimis, mollissimisque refertos sive frondibus, sive lanis: nobis hæc omnia Christi Pectus est.

4. Aperuit nobis Dominus finum suum. Cor suum. Cur? Non solum, ut nos ingrederemur ad ipsum, sed ut ipse ingrederetur ad nos. Aperuit enim pectus suum, ut suo provocati exemplo, nostra illi pectora panderemus. Aperuit cor suum, ut Amori suo omnia cordis nostri penetralia rescerentur. Dixi Amori, non oculo. Omnia enim illius Sapientiae oculis nuda sunt, aperta sunt. Sed non omnia patent Amori. Non quæcumque pervadit lux Sapientiae, Amoris flamma succendit.

Pravum est cor omnium, & inscrutabile, quis cognoscet illud? Ego Dominus scrutans cor, & probans renes. Jerem. 17. 9. Quomodo ergo scrutator acutissime cordium in humana tibi corda ingressum patere desideras? Quod si omnium corda prava sunt, quid erit, & quale, cor meum? Si duritiam attendis. Quid durius? Si perturbationes. Quid turbulentius? Si labes, & inquinamenta, quid immundius? Si duplicitatem, si obliquitates intentionum, quid

quid tortuosius ? Sigelu , quid frigidius ?
Et hoc tibi cum omnibus suis recessibus po-
stulas aperiri ? Quid invenies in corde
meo , nisi mala omnia , quæ tantoperè ex-
horrescis ?

Si à sententia non recedis munda prius
cor meum , vel potius cor mundum crea in
me , & spiritum rectum innova in visceri-
bus meis ; munda latebras omnes miseræ
conscientiæ meæ ; munda me illo sanguine,
qui unâ cum aqua de Latere tuo manavit :
ne te ingrediente cor meum habeat Boni-
tas tua , undè nimium contristetur ; neque
habeam ego , unde intolerabili confusione
confundar .

¶ Habes Domine corda innumera, de
rectitudine cordis tui rectissima, de candore
candidissima, de latitudine incircum-
scripta latissima . Hæc tibi aperta sunt .
Hæc te digna sunt . O' si ad horum simili-
tudinem cordium , ego quoque cor tuum
ex corde toto diligere didicissem . Non
ambulassem tunc vias difficiles , & in via
iniquitatis lassatus non fuisset . Viam
mandatorum tuorum cucurrissem , quia
tui cordis latitudo , cordis mei dilataisset
angustias . Sicut ipse ambulasti : sine me
Domine proferre verbum , non solum sen-
sum , & vires omnes , sed omnia exupe-
rans desideria : Sicut ipse ambulasti , &
ego ambulassem . Et cor meum , & caro
mea exultassent in Deum viuum , & ego
venissem ad te , & tu venisses ad me , & po-
tuisset dicere : Paratum cor meum Deus ,

paratum cor meum . Paratum videlicet ad bona , paratum ad mala . Paratum ad vitam , paratum ad mortem .

Hęc summa fuisset felicitatis meę in hac lacrymarum valle . Hoc summum erga me tuę clementię beneficium . Verũ quò defluxerim, vide . Obscuratum est insipiens cor meum , & evanui in cogitationibus meis . Dura cervice , & incircumciso corde restiti semper spiritui tuo . Peccavi , & iniquè egi recedens à te : & deliqui in omnibus , & pręcepta tua non audivi , nec observavi , nec feci , sicut pręceperas mihi , ut benè mihi esset . Et isti homini aperis viscera tua , sinum tuum , cor tuum ? Quoniam magnitudo Bonitatis tuę , nequitiam meam , nequitiam omnem excedit : Aufer à me , aufer ab omnibus peccatoribus cor lapideum , sicut olim promissisti Israeli per Ezechielem cap. 36. 26 . Pone spiritum tuum in medio nostri . Dic etiam nobis : Salvabo vos ab omnibus inquinamentis vestris , & eritis mihi in populum , & ego ero vobis in Deum .

Proba cor nostrum , & visita nocte , igne nos examina , & non inveniatur in nobis iniquitas , uti petebat David Psalm. 26. 4 .

Non inveniatur iniquitas in corde nostro , sive nos remotis arbitris , & velut in tenebris operantes visitaveris : Sive tempore tribulationis pariter visitaveris , quando palea fumat , aurum verò lucet , atque perficitur .

6 Templum illud est assumpta humanitas,

tas, de quo dixit Dominus Io; 2. 19. Solvite Templum hoc, & in tribus diebus excitabo illud. Ne autem portæ augustissimo Templo deessent, quinque ingressuris vulnera patuerunt.

Quoniam verò ex foribus Templi Hierosolymitani aliqua dicebatur speciosa, quia erat portarum omnium maxima, altissima, atque pulcherrima, & per eam, ut inquit Cornelius à Lapide in Actus Apostolorum cap. 3. principalis in Templum, erat introitus: quidni divini Templi Portam speciosam vulnus Lateris appellemus? Est enim vulnus maximum, celsissimum, formosissimum, & per illud principalis in viscera Domini patet introitus.

Rursus quemadmodum ad portam speciosam Templi Salomonici, claudus ex utero matris suæ quotidie bajulabatur, & ibi ponebatur, ut stipem ab introeuntibus emendicaret, donec Petro, & Ioanne ad horam Orationis nonam ascendentibus, apprehensa manu ejus dextera allevatus est, & consolidatis basibus, & plantis, exurgens stetit, cum illis intravit in Templum, ambulans, & exiliens, & laudans Deum: Ità quot claudi ab utero genitricis suæ ad apertum Domini Latus, tamquam ad Portam speciosam ponuntur, ut à divitibus introeuntibus stipem petant, & pro auro, & argento sanitatē animæ recipiant, & consolidatis basibus, hoc est affectibus cordis humani, qui potissimum sunt, odiū sui, & Amor Dei, cum ascendunt in

Templum, ascendant, & præ lætitia exilient, & laudent Deum.

O' si ego præ cæteris utroque captus pede ad januam positus speciosam, ope introeuntium non auro, argentoque donarer, sed sanitati restituerer! Quicumque divites in virtute, divites in Fide Templo succeditis, dexteram porrigite misero, & jacentem allevate, & Deo vestris annuente votis, tribuite, ut incipiam odisse me ipsum, & amare Deum; & qui amavi me usque ad contemptum Dei, discam amare Deum usque ad contemptum mei; & sic basibus consolidatis à terra surgam, & cū introeuntibus Templum introeam, & gaudio exiliam, & laudem Deum.

Surgam ergo Domine Deus, & amem, Surgam, & accedam ad te, & recedam à me, & recedens peream mihi, & mihi periens perveniam ad te. O' amare! dicebat Augustinus. O' ire! O' mihi perire! O' ad Deum pervenire!



MEDITATIO VII.

De Parentis Divina Coronatione.

A Pocalypf. 12. 1. Signum magnum apparuit in celo: Mulier amicta Sole, & Luna sub pedibus ejus, & in capite ejus corona stellarum duodecim.

Divus Bernardus tom. 1. Serm. de Assump. cujus initium est: Signum magnum. Putasne ipsa est Sole amicta mulier? Est quidem, ut de præfenti Ecclesia intelligendum prophetica visionis series ipsa demonstret, sed id planè non inconvenienter Mariæ videtur attribuendum. Nimirum ea est, quæ velut alterum Solem induit sibi: Quemadmodum enim ille super bonos, & malos oritur, sic ipsa quoque præterita non discuit merita, sed omnibus se exorabilem, omnibus clementissimam, præbet, omnium denique necessitates amplissimo quodam miseratur affectu. -- Et paulò inferius.

Candidissimus sanè, sed & calidissimus hujus mulieris amictus, cujus omnia tam excelenter irradiata esse noscuntur, ut nihil in ea non solum tenebrosum, sed obscurum saltem, vel minùs lucidum, sed nè tepidum quidem aliquid, aut non ferventissimum liceat suspicari. Insuperantia ve-

rò omnis sub pedibus ejus est, ut penitus absit hæc ab insipientium mulierum numero, & Collegio Virginum fatuarum. Imò vero, & unicus ille stultus, & totius stultitiæ Princeps, qui verè mutatus ut luna, sapientiam perdidit in decore suo, sub Mariæ pedibus conculcatus, & contritus miseram patitur servitutem.

Denique paulò post subdit. -- Quam familiaris ei facta es Domina, quam proxima, imò, quam intima fieri meruisti! Quantam invenisti gratiam apud Deum! In te manet, & tu in eo. Vestis eum substantia carnis, & vestit ille te gloria suæ Majestatis. Vestis Solem nube, & Sole ipsa vestiris. Hæc Sanctus Doctor.

Igitur quid à muliere amicta Sole sperare non possumus, ac debemus? Si Pater Cælestis solem suum oriri facit super bonos, & malos: numquid Mater ejusdem Solis, solem suum oriri non faciet super justos, & injustos? Ab initio conceptionis suæ, Sapientia sua, & Charitate deiformi induit Patrem Luminum, induit Lumen de Lumine, Deum de Deo, Deum verum de Deo vero. Quidni, & ipsa faciat, quod Pater Luminum facit?

Deindè si amictus Virginis candidissimus est, & calidissimus, quis à Luce purissima, quis ab illius calore ardentissimo se abscondat? Nisi quis perire velit, nemo expers erit, aut lucis omnia illuminantis, aut caloris omnia vivificantis. Soli stulti per lunam adumbrati sub ejus pedibus

jacent, & unâ cum totius stultitiæ Principe, attrito capite conculcantur.

Ab illa postremò, quæ tam perfectè induit Solem, non solum incarnatum, sed increatum, petamus, ut secundum præceptum Apostoli IESUM Christum induentes, non solum illius virtutes, quas in terris visus, & cum hominibus conversatus exercuit, imitemur; sed etiam quantum licet, divinis ejus moribus informemur.

2. Et in capite ejus corona stellarum, duodecim. Privilegia duodecim frontem augustissimam coronantia, ut memoriæ consulatur, ad quattuor ternaria revocari possunt.

Ternarium primum fit: Divina Maternitas; secunda Virginitas; perfectior post partum Corporis, Animique integritas, quam antè conceptum.

Ternarium secundum. Nescia hereditariæ maculæ Innocentia; fortitudo omnis peccati, omniumque cum Duce suo invisibilium hostium Debellatrix: Beneficentia damni omnis per Hævam illati reparatrix.

Ternarium tertium. Potentia de Potentia Patris; Sapientia de Sapientia Filii, Charitas de Charitate Spiritus Sancti; singulorum simul, & omnium cælituum Potentiam, Sapientiam, Charitatem supereminens.

Ternarium quartum. Protectio militantis, Consolatio Gementis in Carcere, Lætitia triumphantis Ecclesiæ.

Antequam proposita seorsim decora perpendamus, egrediamur, & videamus Reginam in diademate, quo coronauit eam Filius suus. Gaudeamus non gemmis, sed sideribus coronari caput, quod semper cœlestia cogitauit.

Gaudeamus secundò. Duodecim decora, non auro siderum aut comparari, aut illustrari, sed tantummodò adumbrari. Quantò enim divina Maternitas, quantò secunda Virginitas, quantò cœtera Privilegia clariora sunt, ac pretiosiora sideribus?

Gaudeamus tertio. Quòd nemo per contemplationem, & amorem cœlestium, exaltatus à terra, si nidum fortè posuerit inter hæc sidera Virginei capitis, illa sepe animo versans, & suspiciens, & venerans; nemo inquam audiet illud ex Abdię 4. Si exaltatus fueris ut Aquila, & si inter sidera posueris nidum tuum, inde detraham te, dicit Dominus. Utinam cum astris matutinis, & omnibus filiis Dei Deum, laudantibus, & jubilantibus, possimus, & nos in suis operibus Deum laudare, ipsumque diligere in his præcipuè sideribus, quæ serenissimum caput exornant.

3 Si primum ternarium attendamus, quid mirabilius excogitari potest? Divina Omnipotentia majus cœlum condere potest, majorem mundum, majorem sapientiam, majorem sanctitatem illa, quam innumeris Angelis, & hominibus impertivit. Matrem majorem condere non potest. Quæ siquidem Mater illi conferri potest,

test, quæ Dei Parens nominatur & est?

Aue igitur gratia plena. Ave benedicta inter mulieres. Ave Mater Altissimi. Aue, quæ cum sis Mater Adami de cælo cælestis, non dedignaris esse Mater filiorum Adami de terra terreni. Ità nè Mater amabilis? Tu tibi probro non ducis esse matrem nostri, quæ Mater es Dei? O' Charitatem! O' Dignationem! Da ergo, ut ex toto corde possimus dicere: Monstra te esse matrem. Da virtutes, quibus filii nominemur, & simus illius, quæ mundo peperit lucem mundi.

Iam verò quoniam eras Lucem purissimam paritura, quid convenientius, quàm ut simul esses Mater, & Virgo? Et quidem magis incontaminata, & illibata postquam peperisses, quam antequam concepisses? Deus enim de Deo, Lumen de Lumine finum tuum ingrediens virgineam integritatem nullatenus minuit, sed consecravit; novaque lucis immissione reddidit candidiorem.

O' Virgo ante Partum, Virgo in partu, Virgo post partum, candidissima de candore Lucis æternæ. Fac ut de plenitudine tui Candoris accipiant universi. Illustra Faciem tuam super nos, & corporis, animiq; mundiciem omnibus impertire. Munda potentias exteriores. Munda interiores: Munda opera, munda verba. Tribue candorem cogitationibus intellectus. Candorem tribue affectibus voluntatis, ut gratiora sint Matri candidissimæ, nostræ obsequia servitutis.

4 Pri-

4 Privilegia secundi ternarii singularem adversus omne peccatum primumque Authorem peccati oppositionem includunt: præterea cladum, quæ per Hevam illatæ sunt mundo, reparationem. Quantum de peccato domito, primoque Authore peccati triumphato, unâ cum Ecclesia militante, ac triumphante, gratulamur tibi Triumphatrix amplissima; tantum obsecramus, obtestamurque Clementiam tuam, ut nihil magis oderimus, quam peccatum. Quoties de tua Sanctitate divinæ impeccabilitati simillima cogitamus, toties gaudio impares sumus, totisque præcordiis exultamus.

Sed quid refert de tua Sanctitate gaudere omnis labis experte, & non summo ferri odio in omne peccatum? Ergo in Admiratores, & amatores Innocentiæ tuæ, deriva de sanctitate tua studium ardentissimū vitæ innocentis, deriva omnis peccati odium implacabile. Noxas omnes etiam levissimas fugiamus. Pugnemus te Duce, quotidie adversus mundum, adversus mundi Rectores tenebrarum harum, contra spiritualia nequitie in cælestibus. Pugnemus præciquè adversus nosmetipsos, quos nisi vicerimus, frustra manus cum aliis hostibus conferemus.

In præliis verò adversus inferi portas, illud potissimum præ oculis habeamus, ut exemplo tuo caput tortuosi draconis conteramus, hoc est ut machinationum initiis obstanmus, & numerosa colubri capita

nostræ semper insidiantia salutis, ab ipso congressus initio comprimamus, elidamus, proteramus.

Quod attinet ad malorum depulsionem, mundumque in melius restauratum, plus nobis profuisti, quam Eva nocuerit. Angelico illa seducta colloquio mundum perdidit. Tu ab Angelo salutata mundum erexisti jacentem, perditumque renovasti. Illa mortem peperit. Tu occidisti. Illa sibi, nobisque Paradisum voluptatis occlusit. Tu celum, tibi, nobisque per Filium referasti: Audiens illa: Eritis sicut Dei, de filiis Dei fecit filios Diaboli. Tu audiens: quod ex te nascetur Sanctum vocabitur Filius Dei, illum concepisti, nobisque dedisti, qui mutata servitute in Regnum, miseraque sobole de Patre diabolo, in sobolem Patris sui, dicturus erat hominibus: Ego dixi: Dij estis, & filii excelsi omnes.

Exclamemus igitur cum Beato Augustino tom. 10. de Annunc. Dom. serm. 2. O Beata MARIA quis tibi dignè valeat jura gratiarum, ac laudum præconia rependere? - Quasi tibi laudes fragilitas humani generis persolvat, quæ solo tuo commercio recuperandi aditum invenit. Accipe itaque quascumque exiles, quascumque meritis tuis impares gratiarum actiones, & cum susceperis vota, culpas nostras orando excusa - sit per te excusabile, quod per te ingerimus. Fiat impetrabile, quod fide mente poscimus. Accipe quod offerimus.

Re.

Redona quod rogamus, excusa quod time-
mus, quia tu es spes unica peccatorum ,
per te speramus veniam delictorum , & in
te beatissima nostrorum est expectatio præ-
miorum .

5 Ternarium tertium vocat nos ad con-
siderationem decoris eminentissimi . Si
enim Humanitatem assumptam excipias ,
fuit Parens divina prima , & perfectissima
imago Augustissimæ TRIADIS . Igitur
qua Potentia erit prædita , quæ de Patris
Potentia potentissima , ardua quæque ,
dum apud nos vi veret, aggressa est, per-
fecitque : nunc verò omnia potest ampli-
tudine sibi traditæ potestatis, beneficen-
tiæ, protectionis Urbes omnes, Provin-
cias, Regna, & Imperia respicientis, &
omnibus prospicientis,

Qua Sapientiæ luce fulgebit, quæ de Sa-
pientia Filii Sapientissima ab ipsa conce-
ptione fuit Cherubinis, qui toti sunt ocu-
li oculatior, & ad maiorem semper clari-
tatem in singula momenta progrediens,
more surgentis Auroræ, nunquam intermi-
sit cursum, nisi postquam meridiem attigit
beatificæ Visionis ?

Quo denique Charitatis igne flagrabit,
eius adhuc viventis in corde Spiritus san-
ctificator Seraphim omnium collegit in-
cendia ?

Ad hujus provoluti pedes magnitudi-
nem veneremur, beneficentiam depolca-
mus. Potentiam infirmi, lucem caligine
involuti, ardorem gelu rigeutes implore-
mus.

mus. Succurre igitur Potentissima imbecillitati nostræ, neque tot malis undique ingruentibus; neque tot incurfionibus hostium permitte succumbere. Si volueris, nos quoque adversus nefarias Potestates, adversus mala omnia, poterimus omnia in illo, qui nos per te confortat.

Caliginem intellectus discute Sapientissima, ut Scripturarum arcana scrutantes, & in veritatibus revelatis primam Veritatem contemplantes, ad illius denique clarum intuitum, remotis ænigmatum umbris evehamur.

Dissolve glaciem ardentissima Parens; qua per tot annos obriguimus. Dedoce amare, quæ amavimus. Amare doce, quæ adhuc amare nescimus. Impetra unicuique nostrum, ut mutata voluntate dicere possit ex toto corde: Amo te Pater ingenite: Amo te, Fili unigenite: Amo te Divine Paraclite: Amo te Deus cordis mei; plusquam me, & plusquam omnia, quæ sunt infra te. Amo Potentiam tuam, ut possim agere omnia, & pati, & durissima pati pro te, & propter te, Potentia tua confortante me. Amo Sapientiam tuam, ut per illam magis noverim te, & magis cognoscendo, magis diligam te, non verbo, & lingua, sed opere, & veritate. Amo Amorem tuum: & quia quid sit amare Amorem tuum, neque scio, neque scire dignus sum: offero tibi omnes Amores illorum, qui sciunt, quid sit amare Amorem tuum; offero tibi omnes Amores
Ama-

Amatorum tuorum. Sed quia, & omnium **Amorum cumulus**, nimis exigua portio est illius **Amoris**, qui tibi debetur, offero tibi **Amorem tuum**, exuviis nostræ mortalitatis indutum, qui tibi solus esse potest æqualis. Quibus autem manibus **Amorem optimum** offeram **Domino Potentissimo**, **Sapientissimo**, **Optimo**, nisi manibus **Dominæ Optimæ**, **Sapientissimæ**, **Potentissimæ**?

6 **Ternarium ultimum** revocat nobis in **memoriam**, **Virgo clarissima** te **Robur esse**, & **Columnen militantis**, te **Solamen gementis in vinculis**, te **Gaudium Ecclesię triumphantis**.

Mille clypei pendent è **turribus tuis**, & **omnis armatura fortium**. Pendent **scuta**, quibus **divina Veritas** nos circumdat, ne timeamus à **timore nocturno**, à **sagitta volante in die**, à **negotio perambulante in tenebris**, à **incurso**, & **Demonio meridiano**. **Psalm. 90. 5.** Pendent **galeæ salutis** ad **retundendos impugnantium ictus**, **servandumque caput intellectus illæsum ab erroribus**. Pendent **loricæ**, quibus nos induit **Sanctitas**, & **Iustitia**. Pendent **arma lucis**, quibus **Principes**, & **Rectores tenebrarum harum feriuntur**.

Quis timeat **bellare bella Domini**, te omne **genus armaturæ militantis** ministrante. Si ego **infimus pugnatorum** ad **inuitatos hostium impetus** fortè **perturber**, **animoque destituar**, una cum **armis impertire vires**, & **animos**, ne **vincenti-**
bus

bus aliis ego succumbam, & vincar sub vexillistantæ Victricis.

Dum autem bellantibus præsto es, non es immemor eorum, qui de prælio faucii exierunt. Ideò sæpè tristi victos in carcere per nuncios invisis, & lugentibus solatia adhibes, & captivis pretia Redemptionis à fidelibus collecta transmittis.

Utinam etiam nos fratrum nostrorum in vinculis degentium commiseratio tangat, & pietas à te in nos delapsa faciat nos de nostro liberales, undè, & obsequi tibi, & illis subsidio esse possimus.

Denique sicuti cælum omne tua luce, ita voluptate perfundis. Prima post Deum, Filiumque tuum de te Hominem factum, in admirationem rapis omniū oculos Beatorum. Specula Divinitatis sunt omni decore fulgentia cælites cuncti. At nusquam extra te occurrit speculum illi similis, qui dicitur: Candor Lucis æternæ, Speculum sine macula, & Imago Bonitatis illius. Ideò Spiritus immortales, Iustique omnes pleni sunt quodamodò oculis intus, & foris, ad Reginam amictam Sole spectandam, sideribus redimitam, & non solum habentem lunam sub pedibus, hoc est omnia caduca, & mutabilia, sed habentem infra se lunam, hoc est Ecclesiam universam ex omnibus Angelorum ordinibus, classibusque Sanctorum coalescentem. Sed numquid caput tuum duodecim solum astra circumdant? Si Divinitas cælum est tot coruscum sideribus, quot attributis im-

men-

mensa Luce fulgentibus, & si vestis tua
Sol est; cur non omnia divini Celi sidera
in tui se capitis coronam aptare dicantur?
Ergo beatissimi Cives quodnam infrà De-
um, quodnam infrà hominem Verbo con-
junctum potestis habere spectaculum Vir-
gine spectabilius?

Speſtaculo veltro ſuperfrui liceat vobis
ſpectatores excelsi, gaudiumque velttrum
de ſpectaculo veltro ſit plenum; ſed inte-
rim memineritis noſtri, ut & nos gaudere
poſſimus. undè gaudetis, poſtquam beni-
gniffimus Dominus lacrymas ab oculis no-
ſtris abſterſerit, & non erit amplius luctus,
neque dolor, neque clamor erit ultra.

F I N I S.

